

Ex bibl. Ezech. Spanhemii.

~~C7874~~

Uc 4736

40



Me 4736

videtur continere in presentia...

Leo Chronique et Annales de Pologne, par Blaise de Digonde, Secretaire de son Monseigneur le Duc de Neubourg 1573. 2.

De legatione polonica, oratio F. Balduini I.C. ad Cl. V. Jo. sarium Zamoscium Legatum Polonum. 1573. 3.

Caroli Carsi Pontificis ac Ducis Lingonum, Francia Paris, et sacri Concilii Senatoris oratio, ad amplissimos Legatos Polonorum, Metis habita, anno D. 1573. ad 4. Id. Augusti.

Stanislai Carnconii Episcopi Vladislavensis, ad Henricum Valesium Poloniae Regem designatum panegyricus. 1574. (s) in 4.

Vidi Fabri Domini a Pibrac, ad superiorem panegyricum responsio. 8. 5.

Hactenus publicus et biduum, au Roy Hon. 27 de Calois, Roy d'Espagne, Pologne, pronom. et par Stanislaus Carnconius Eusque de Vladislavio 1574.

LES
CHRONIQUES
& Annales de
Poloigne.

Par Blaise de Vigenere, Secretaire de fess
Monseigneur le Duc de Nyvernois.



A PARIS,
Chez Iean Richer Libraire, rue S. Iean de Latran,
à l'enseigne de l'Arbre Verdoyant.


1573.

AVEC PRIVILEGE DV ROY.

Handwritten notes in French, including a large circular signature and several lines of text.

EXTRAICT DV PRIVILEGE.

PAR lettres patentes du Roy, donnees à Paris au mois de Iuillet, 1573. Sa Maieité a donné priuilege, permission, & congé à Iean Richer marchand libraire & Imprimeur en l'vniuersité de Paris, de imprimer, ou faire imprimer, vendre, & exposer en vente, durant le temps & terme de six annees prochaines & consecutiues, certain liure intitulé, *Les Chroniques & Annales de Pologne, avec les Statuts, & Ordonnances du Royaume, & description d'iceluy*, par luy recouurees de Blaise de Vigenere, Secretaire de feu Monseigneur le Duc de Nyuernois. Portant expresse inhibitiōs & defences à tous Imprimeurs & Libraires de ce Royaume, d'imprimer ou faire imprimer lesdites Chroniques & Annales, ne icelles exposer ou faire exposer en vente pēdant le temps desdites six annees, sur peine de confiscation des caracteres, liures, & impressions, d'amende arbitraire, & despens, dommages & interests audiēt Richer, ainsi qu'il est amplement contenu & declaré par lesdites lettres patentes. Signees par le Roy en son conseil.



DE LA HERBAVDIERE.

Vf 5 411 5247



A TRESHAVT, TRESPVIS-
SANT, TRESILLVSTRE ET IN-
vincible Prince, HENRY FILS ET
FRERE DE ROY, Duc Danjou, de
Bourbonnois, & d'Auuergne, Conte de
Forests, la Marche, Quercy, Rouergue, &
Montfort. PAR LA GRACE DE DIEV
ESLEV ROY DE POLOIGNE, grād Duc
de Lithuanie, Ruffie, Prusse, Malouie, Sa-
mogithie, Chiouie, Vollinie, Podlachie, &
Liouie, salut & felicité perpetuelle.

SIRE puis qu'il a plu à Dieu vous
appeller à vne si belle & ample
coronne, à vn si riche & si puissant
estat, & au gouuernement d'une
nation si noble & belliqueuse: Il est
bien raisonnable que le peuple que vous laissez
ainsi triste, dolent & ennuyé, non pas de ceste vo-
stre bonne fortune, condigne au tresillustre sang
dont vous estes sorty, à la grandeur & hauteſſe
de vostre tresmagnanime & invincible courage,
à vos merites et biensfaictz enuers la Repub. chre-
stienne, Et à l'heur dont vous auez, tousiours esté
accompagné dès l'heure de vostre naissance: mais
pour se veoir affoiblir d'un tel & si valeureux

champion et deffenseur. Ce peuple doncques Sire, ainsi desolé, cognoisse la grandeur, les richesses, force & puissance de ceux pour qui vous l'habandonnez. Ensemble les faictz & gestes, la gloire & renommee des tresillustres, & serenissimes Princes qui vous y ont precedé, en nombre de quarante deux tous d'une suite, sans aucune interruption. A scauoir quinze non. encores illuminez de la grace & benedictio du saint Euangile: et vingt sept tres Chrestiens & Catholiques. Ainsi vous ferez, si Dieu plaist à la bonne heure le 28^e. Cecy sera à tout le moins quelque consolation & recofort pour la MAIESTE DV ROT vostre frere, nostre souuerain Sire. LES MAIESTEZ DES ROYNES nos souueraines Dames. M^oseigneur: vostre frere. Les serenissimes Roynes, vos sœurs. Et pour tous les Princes, Seigneurs & Estats de ce royaume, qui vous voyet partir, et prennent congé de vous, avec autant de larmes, de soupirs, et de regrets: que la Poloigne doit auoir d'aïse, de plaisir, & de resiouissance en vous attendat, pour mettre en vos victorieuses mains non seulement le sceptre qui vous est desia acquis: Mais encores de bien plus hautes esperances et promesses à quoy vous estes de tout temps esleu et appelle. Car en vain ne se verröt pas ainsi iointes et assemblees ces deux diuines marques & enseignes: dont les vnes furent iadis miraculeusement transmises

du ciel aux ancestres & primogeniteurs de vos Maïestez: & l'autre (comme dient les Poëtes) est ministre du plus grand de tous les Dieux, dont elle porte les foudres & tonnerres. En recompence de quoy elle a ceste faueur d'esclorre ses petis dans son giron. Jcy doncques TRES-VALEUREUX ET MAGNANIME MONARQUE, se pourront veoir en vostre langue naturelle representees & descriptes les Prouinces, les contrees, & regions qui doüent d'oresenauant estre soubz l'obeissance de vostre Maïesté. Les mœurs, conditions & façons de faire des peuples & nations qui les habitent: les fleues, & riuieres plus notables, les villes & citez, Eueschez, Magistrats, charges, et dignitez de vostre Royaume: Avec les faits & gestes de voz predecesseurs. Le tout neantmoins par forme de recueil & abbrege, attendant que la traduction de l'Histoire generale de Martin Cromer sorte en lumiere, lequel a compris en trente liures (qu'il en a escrit) tout ce qui est aduenü, depuis le commencement & origine du peuple Slauon dont les Polaques sont immediatement descendus iusques au temps du Roy Sigismund Auguste n'agueres decedé. Ce qui ne sera par auenture pas inutile ny sans quelque fruit pour ceux qui n'entendans point la langue Latine, seront neantmoins curieux ou auront besoin d'auoir congnoissance de ces affaires, dore-

EPISTRE.

enauant communs aussi bien à la France qu'à la
 Poloigne. Qu'il plaise dōques SIRE au Dieu pro-
 tecteur des bōs & legitimes Princes, ottroyer à vo-
 stre Maieſté, ce voyage si heureux, si prospere &
 favorable, que ce puisse estre à la louange et exal-
 tation de son nom, à la gloire honneur & renom-
 mee de vostre tresnoble, tresillustre & treschre-
 stien sang, & au bien repos & traquillité de l'un
 & de l'autre peuple. Conseruer quant & quant
 & maintenir tousiours vostre dicte Maieſté
 en tresparfaicte santé & prosperité, avec treslon-
 gue & tresheureuse vie. De Paris ce xx. iour
 d'Aouſt, mil cinq cens septante & trois.

De vostre Maieſté.

Treshumble & tresobeissant seruiteur
 Blaise de Vigenere.



LA LISTE OV CATHALOGVE
 DE CEUX QUI ONT REGNE EN
 Poloigne, depuis Lechus premier, fondateur de ceste
 Monarchie, inſques au Tresillustre & Sere-
 niſſime Prince Henry premier,
 regnant à present.

LES PAYANS ET IDOLATRES,

- Lechus premier.
 - Les douze Palatins, ou gouuerneurs.
 - Cracus.
 - Lechus ſecond.
 - Venda.
 - Les douze Palatins derechef.
 - Premiſlus, ou Leſcus premier.
 - Leſcus ſecond.
 - Leſcus troſième.
 - Popiel premier.
 - Popiel ſecond.
 - Le piaſte. On dit qu'il veſquit ſix vingts ans, & en re-
 gna plus de ſoixante dix.
 - Zemouit. Il regna trente & vn an.
 - Leſcus quatrieſme.
 - Zemomile.
- De tous ceux cy on ne peut gueres bien parler, ſinon par
 aduis de pays, ſelon qu'on a peu apprendre, & re-
 tenir de main en main, car on ne trouue rien de cer-
 tain és anciennes Histoires de leurs faits & ge-
 ſtes, ne du temps qu'ils regnerent.

LES ROYS ET PRINCES

Chrestiens.

Miecislav premier Chrestien, l'an du monde 4931.

De l'inschrift. 965. De ceste monarchie. 415.

Il regna. 35. ans.

Boleslav Chrobri, eut le titre Royal le premier de tous, par l'Empereur Otho troisieme avec les marques & enseignes Imperiales, & fut couronné à Gnesne, l'an de salut 1001.

Il regna. 25. ans. En vesquit 38.

Miecislav Roy. 9. 44

Casimir premier. 18. 41.

Depuis Miecislav insques à Casimir, y eut environ six ans d'interregne.

Boleslav second. 22. 38.

Sur la fin de son regne le nom & tiltre de Roy, fut osté aux Polaves par Gregoire septieme, à cause du meurtre de l'Evesque Stanislav par luy comis.

Vladislav premier. 20. 36.

Boleslav troisieme. 36. 53.

surnommé Criuovite.

Vladislav second. 6. 55.

Boleslav le Crespe. 27. 47.

Miecislav le viellard. 5. 41.

Il regna cinq ans apres son frere Boleslav. Puis Casimir son ieune frere fut mis en sa place.

Casimir second. 17. 56.

Miecislav. Derechef depuis la mort de Casimir regna

huit ans. 8. 73.

Lescus le Blanc fils de Casimir, ne voulut point accepter

le Royaume apres la mort de son oncle Miecislav, pour ce qu'on le vouloit contraindre de chasser Gonoric Palatin de Sendomirie. Parquoy il fut mis es mains de Vladislav Lasconogue.

Vladislav Lasconogue. 4.

Il ne tint le Royaume qu'environ quatre ans, & puis fut rendu à Lescus le Blanc.

Lescus le Blanc. 21. 42.

Boleslav le Chaste. 52. 64.

Lescus le Noir. 10. 46.

Premislus. 8. mois. 38. ans.

Il reprit le tiltre Royal qui avoit esté delaisé par l'espace de 215. ans, depuis la mort de Boleslav second. Mais outre les annees des regnes cottez cy dessus, faut adiouster deux ans que Boleslav vescut, depuis qu'il fut priué du Royaume, & sept ans pour les embroulemens de Miecislav, Casimir, Lescus le Blanc & Lasconogue, & les autres interregnes de iours & de mois, qui font en tout le dit nombre de 215. ans.

Vladislav Loctique. 4.

A ceste premiere fois il ne regna que trois ou quatre ans, car il fut demis.

Venceslav Bohemien. 5.

Vladislav Loctique derechef.

Il regna lors paisiblement l'espace de 28. ans, & enuoya devers le Pape pour ravoit le tiltre Royal, car il eut opinio qu'il estoit mesadvenu à Premislus de l'avoir pris sans la permission de sa Saincteté. Et ainsi il fut couronné à Craconie avec sa femme Hedwigis, l'an 1320.

Casimir second sur- 28. 60.

nommé le grand

Jusques icy, autres n'auoyent regné en Poloigne que ceux du pays un seul Venceslaus Bohemië excepté.
Loys Roy de Hongrie & de Poloigne.

Il regna douze ans seulement en Poloigne, mais en Hongrie 41. & laissa deux filles Marie qui fut Royne de Poloigne avec son mary Sigismund Marquis de Brandebourg, lequel fut depuis Empereur, mais n'ayant point esté agreable aux Polagues en furent demis, & en son lieu fut receüe Hedwigis sa seur puisnee, qui fut marie à Iaghellon. 12. 56.

Iaghellon grand Duc de Lithuanie, surnommé depuis son baptesme Vvladislaus. 48. 72.

Vvladislaus son fils Roy de Poloigne & de Hongrie. 11. 21.

Casimir. 45. 64.

Iean Albert. 9. 41.

Alexandre. 5. 46.

Sigismund. 41. 81.

Sigismund Auguste. 24. 53.

Icy prend fin la race des Princes Lithuaniens, qui ont regné en Poloigne par l'espace de 183. ans.

HENRY premier de ce nom Duc d'Anjou, &c. fils de tresheureuse memoire **HENRY DE VALLOYS** & de **CATHERINE DE MEDICIS**, & frere du treschrestien tresvauleureux & inuincible monarque Charles neuuiesme à present regnant: fut esleu en laage de vingtdeux ans, par la voix & consentement de tous les estats de Poloigne à Varsaue au mois de May 1573. Dieu luy donne honneur prosperité & longue vie, fauorise & benisse tousiours ses vertueux & louables desseins & entreprises, avec accroissement de nouveaux Royaumes & Empires, selon ce que sa grandeur magnanimité & prouesse le meritent.



AVX LECTEURS.

SIL y a riens en ce petit ouurage (benins lecteurs) qui vous puisse cōtenter & estre agreable, cela viendra de vostre honesteté & courtoisie accoustumee, & non du merite d'iceluy. Car auroit il esté possible en si peu de tēps de le limer & pollir à perfection, ne d'y mettre la dernière main, non pas seulement de le reueoir, ne corriger les fautes de l'impression? Il est bien vray qu'en ce qui est de l'Histoire, i'ay suiuy à peu pres, voyre traduit si vous voulez Herburus, lequel a abbregeé & reduit en epitome celle de Cromer. Mais il y a beaucoup de redittes & paroles superflues, au lieu des choses d'importance, tellement qu'il faudroit auoir plus de loisir pour demesler cela, & y donner quelque grace. Car il ne se faut pas attendre de trouuer icy les beaux bouquets & chappeaux de fleurs, dont sont ornez les anciens bons auteurs Grecs & Latins, où il ne se faut que laisser aller presque de mot à mot, pour plaire infiniment aux oreilles des escoutans, pource qu'ils scauent propremēt deguiser vne mesme chose en plusieurs façons, & y donner quant & quāt un air gētil & agreable. La ou vous trouuerez ceux cy un peu plus durs & moins delicats. Si ne sont ils pas toute fois dutout sans quelque fruit, mais ils nous eussent par auenture profité d'auātage, s'ils n'eussent esté si amoureux de la lāgue Latine. Car ce pendant qu'ils s'efforcent d'y reduire & approprier toutes choses, ils nous priuent de la cognoissance des noms propres des personnes, & des pays, villes, mon-

tagnes & riuieres, qui ne peuuent souffrir d'estre trāsportez hors de leur langue propre & naturelle. Quoy que ce soit le tout vous est presenté de bien bon cueur, duquel vous le receutez aussi si vous plaiſt, comme les arres & primices d'autres fruiſts plus meurs & elabourez, lesquels vous seront bien toſt presentez en lumiere DIEV aydāt, auquel ie supplie vous tenir & conseruer tousiours en sa tressaincte & digne garde.

F I N.



DE L'ORIGINE DES POLAQUES.

EST chose assez cognuë par toutes les histoires, que la Sarmatie ou Scythie a esté de tout temps, comme vne tresabondante pepiniere ou seminaire d'où sont sortis les peuples & nations qui ont inundé la plus grand part de l'Asie, de l'Europe & de l'Afrique, ny plus ny moins que de quelque grand & inespuisable lac, partent infinis fleuues, riuieres & ruisseaux, sans que pour cela il en demeure desseché ne tari. Entre lesquels les Cimbres Gots, Vandales & Slauons ont esté les plus fameux & renommez: & mesmement les Slauons qui ont estendu & illustré leur nom autant & plus que nuls des autres. Aussi sont ils dictz de *Slaua*, qui signifie gloire & renommee: toutesfois ils ne commencerēt d'entrer en bruit & reputation, sinon du temps de l'Empereur Iustinian, enuiron l'an 540. de nostre salut, car au parauāt on ne parloit gueres d'eux. Et tout soudain se saisirēt de beaucoup de prouinces de l'empire Romain, comme Misie, Dace, Hongrie, Dalmatie, Istrie & Esclauonie, qui en retient encores le nō. Et feirent de grādes courses & entrees en Macedoine, Thrace, Epire, & tout le reste de la Grece, voire

dans l'Italie bien auant. De sorte qu'ils reduirent en leur obeissance vne bonne partie del'Europe, & de l'Asie, & donnerent commencement aux plus braues & belliqueuses nations, qui ayent point esté en tout le Septentrion, asçauoir les Rutheniens, Bulgares, Polaques, Moscouites, Seruiens, Bosniens, Carniens, Coruartz, Bohemes, Moraues, Pomerans, Maslogitiens, & Silesiens. La plus part desquels toutes-fois (ainsi que par traitt & succession de temps toutes choses se remuent & renuersent) sont depuis venus sous la puissance & dominatió du Turc. Neantmoins les Polaques ont non seulement gardé la dignité & franchise de leurs ancestres: mais d'auantage se sont grandement augmentez & accreus sur leurs voisins. Or tous ces peuples icy ont retenu beaucoup de leur premier & ancié langage, duquel ils vsent encores pour le iourd'huy avec bié peu de difference, si ce n'est de quelques dialectes & façons de parler, comme pourroit estre du Geneuois au Neapolitain, ou du Sauoy sien au François. Et par vn lóg temps garderent semblablement leurs caracteres, & façós d'escrire, qu'ils ont toutesfois depuis changee, & pris en vsage celle des Latins, Italiens, François, & autres nations Chrestiennes catholiques. Car l'Alphabet Slauon ancien, duquel on dict que S. Hierosime mesmes a autres fois vsé, est de ceste sorte.

Al. a.	vidi v conson. vr. vt	buchi. b. br. bo.
Щ щ	Ѣ ѣ	Ѧ ѧ
glagoia g. gd. go.	dobro d. iest e.	exiuit x.
Ѩ ѩ Ѫ ѫ	Ѭ ѭ Ѯ ѯ	Ѱ ѱ

zielo z.	zziema tz.	isse ige.	i i voca.	ige i conf. caco k. ko.
Ѡ ѡ	Ѣ ѣ	Ѧ ѧ	Ѩ ѩ	Ѭ ѭ
luidi. l. mis lit. m.	nas. n. no.	on o.	pococ p. p. po.	
Ѱ ѱ	Ѳ ѳ	Ѵ ѵ	Ѷ ѷ	Ѹ ѹ
reci r	flouo f	terdo r. rb. tu.	huch. y. vel. v.	phert ph.
Ѻ ѻ	Ѽ ѽ	ѿ Ѡ	ѣ ѵ	џ ѡ
chier ch. cho. oto o.	schia r c. vel sch.	ci cco	cierph	
Ѵ ѵ	Ѷ ѷ	Ѹ ѹ	Ѻ ѻ	Ѽ ѽ
scia.	ier.	ier.	ias.	
Ѱ ѱ	Ѳ ѳ	Ѵ ѵ	Ѷ ѷ	Ѹ ѹ

Quant à l'origine d'iceux Slauons, dont le parler s'estéd aussi auât, & plus que nul autre qui soit pour le iourd'huy en tout le monde, ceux qui ont esté curieux de le rechercher iusqu'aux premieres sources & fondemens, les veulent estre descendus des reliques & demeurans de la destruction de Troye, asçauoir d'Eneas & de ses successeurs, iusqu'à vn Alanus second de ce nom, qui passa le premier d'Asie en Europe. Et eust quatre fils, l'aisné desquels fust appelé Vandalus, qui donna le nom (comme l'on dict) au fleue de Vistule, & aux Polaques. Car tout ainsi qu'il eust beaucoup d'enfans, aussi s'estédirent ils en plusieurs & diuerses cōtres de l'Europe, dont ils occuperent la meilleure partie, & donnerent commencement (comme dict est) aux peuples dessusdits, demeurant tousiours le droit d'ainesse & primogeniture par deuers les Polaques. Parquoy il ne se faut pas esbair, si tant pour raison de ce droit (qui en-

tre toutes nations est propre & particulier aux François) que pour estre descendus d'un mesme sang, ils ont si grande conuenance entr'eux: ainsi qu'on a peu assez appercevoir par ceste dernière election, qu'ils ont faicte de l'un de nos tres chrestiens & inuincibles Princes, lequel ils ont de si loin appelé à leur couronne, deuant tant d'autres si riches, grans, & puissans seigneurs leurs voisins. Mais laissant à part les choses plus esloignées de nostre cognoissance, cōme trop obscures & peu certaines: on trouue par les anciens memoires, qu'enuirō l'an 550. les Slauons estās fortis de Sarmatie, se ietterent dans certaines contrées que les Vandales auoyent abandonnees pour passer en Hongrie, & s'en estans aisément emparez, s'y habituerent, dont les vns furent depuis appelez Bohemes, & les autres Polagues: soit que ce nom leur vinst de *Pole*, qui en langue Slauonne, veut autant à dire, comme campagne, ou venerie, (d'autant qu'ils sont volontiers addonnez à la chasse:) ou de Lechus frere de Zechus, qui furent leurs deux principaux capitaines & conducteurs, demeurant iceluy Lechus en Poloigne, & l'autre en Boheme, où chacun d'eux en peu de temps estendirent bien auant leurs limites, cōme preux & vaillans qu'ils estoient.

LECHVS.

LECHVS doncques fust celuy qui dōna commencement au nom & empire des Polagues, ausquels il departit le pais qui auoit esté cōquis. Et y fonda plusieurs petites villes & forteresses d'un costé & d'autre, ez endroits les plus necessai-

5
res pour fermer les passages & aduenues, l'une desquelles il se reserua pour sa demeure, l'ayant bastie à la rustique, de gros arbres tous entiers, & grans pieces de boys de trauesse sans autrement les escarrir ni reparer, en forme toutesfois d'un petit chasteau, planté au milieu d'une belle campagne, enuironnée de eaux & marescages, six lieux loin de la riuere de Vvarte deuers Septentrion, laquelle il appela *Guesne*, c'est à dire Nid, en langage du pays, pour ce qu'il y trouua un aire d'Aigle, ou bien qu'il fit son compte que ce lieu luy seroit une retraicte pour l'aduenir. Mais les Princes & Roys de Poloigne ont tousiours porté depuis en leurs armoiries, pour memoire de cela, une Aigle blanche couronnée avec les ailles, & les serres espanoüies & estendues. Ainsi Lechus commença d'establir la seigneurie & domination, qui est finalement paruenue à la grādeur où elle est de present. Ce Prince se monstra en toutes choses fort sage, prudent & debonnaire, faisant plustost le deuoir & office de pere, que de seigneur: car il se redoit gracieux & humain à tous, leur faisoit bonne iustice, nō point selon la formalité de loix escrites, de Code ny de Digestes, (car ils ne les auoyent pas encores) mais ayant seulement esgard à ce qui estoit de raison & d'equité. Et à la verité aussi estoit il bien requis, que pour le commencement ce peuple si rude & si farouche fust ainsi manié, car ils n'eussent sceu aisément endurer le ioug ou seruitude de quelcun qui leur eust esté desraisonnable & fascheux. Le prince au demourant n'auoit point encores de domaine, ny de rentes & deuoirs propres & à part, mais chascun semoit &

6 CHRONIQ. ET ANNALES
recueilloit pour luy. Car on luy reseruoit certaine portion par forme de tribut, de tout ce que la terre & le bestail rapportoyent. N'ayans point encores aucun vsage de monnoye, ni d'argent, ains s'accommodoyent de tout ce qu'ils auoyent besoin par permutation & eschange. Au regard des faicts & gestes de Lechus, de ce qu'il fist de beau & d'excellent en la paix & en la guerre, combien de temps il regna, ny quelle lignee il laissa apres luy, on n'en scait rien à la verité: Car ils estoient pour lors plus curieux de faire que d'escrire. Toutesfois aucuns ont voulu dire, que luy & sa posterité ont regné en Poloigne bien pres de 150. ans, iusques à l'an 700. de nostre redemption.

LE GOUVERNEMENT des douze Palatins.

A PRES que la race de Lechus fust toute faillie & esteinte, les Seigneurs & Barons du royaume s'assemblerēt à Gnesne, pour l'election d'un nouveau Seigneur. Mais ne se pouuans accorder entre eux, pource que chacun vouloit la principauté pour soy, & le peuple cōmençoit à s'ennuyer du commandement & empire d'un homme seul, & desirer quelque peu de liberté d'auantage, fut aduisé que le Royaume qui estoit diuisé en douze contrees & Prouinces, seroit aussi departi en douze gouuernemēs. Esquels ils establirent douze *Palatins*, ou *Vaynodes*, c'est à dire, Chefs ou Capitaines, qui se maintindrent assez bien pour le commencement, gardans le droict & iustice, ne

DE POLOIGNE. 7
faisans tort ne violence à personne, & ayās soigneusement l'œil par tout. Mais bien tost l'ambition & auarice qui se mist parmi eux, vint à les gaster & rompre. Car ainsi que chacun vouloit tirer à son profit & aduantage particulier l'authorité & puissance de sa charge, & non pas au bien & utilité publique, ils entrerent facilement en noises & debats les vns cōtre les autres. Dequoy les Polagues ennuyez, & craignans que ces partialitez & dissentions ne leur amenassent en fin quelque ruine, auiserēt de retourner à leur premiere façon de viure soubz le gouuernement d'un Prince seul, comme beaucoup meilleure, & plus à propos. Combien ce fust que ces douze Palatins durerent, on n'en scait rien de certain. Toutesfois le nom en est demeuré iusqu'à present, mais avec moins de pouuoir & d'authorité, encores que ce Magistrat soit à vie, aussi bien que sont les Castellans, Capitaines, & gens de iustice, & si ont le premier lieu au conseil Royal apres les Euesques.

C R A C C V S.

LES Palatins demis, apres plusieurs lōgues deliberations & disputes, du consentement de toute l'assemblee, la principauté fut offerte à Craccus homme riche & puissant, qui auoit sa demeure vers les sources de la riuere de Vistule, au pied des mons Sarmatiques, si parfaict & accompli en toutes choses, que les Polagues auoyēt conceu ceste opinion, deuoir estre celuy & non autre qui deuoit rabiller tout ce qui auoit esté gasté au parauant. Mais il feut difficulté d'accepter celle char-

ge, voyant bien que l'estat estoit fort affoibli, tant pour occasion des guerres passees, que des seditions & partialitez intestines, qui estoient encores bien allumees entre les plus grands. A la fin vaincu des prieres & requestes de tout le peuple, & de la compassion & amour de sa patrie, il se laissa aller à leur vouloir. Et certes les Polaques ne firent pas vn mauvais choix, & ne furent point deceuz de la bonne opinion qu'ils auoyent conceuë de sa preud'homme & suffisance. Car incontinent il pacifia ses affaires avec ses voyfins, partie d'amitié par le moyen des alliâces qu'il fit avec eux: partie de force & par armes. Et ayant ainsi ordonné le dehors, se mit à chastier la trop grande licence & audace des mauuais & depravez citoyens, ordonnant de tous costez personages pour administrer la iustice. Puis edifia vne ville sur le bord de la Vistule, où il fit sa demeure, laquelle il appella Cracouie, de son nom, y faisant bastir quant & quant vn beau chasteau dans le mont de Veuel, où il transporta le siege capital de tout le royaume, qui estoit au parauant à Guesne: tellement que ceste cité est venue depuis à estre la premiere de tout le Septentrion. Et fust la renommee de ce Prince si grâde par tout, que les Bohemes (leurs allies) l'esleurent semblablement chef sur eux. Ayant donques ainsi heureusement regné par plusieurs annees, il passa de ceste vie à l'autre: & fust enseveli delà la riuere de Vistule, au mont Lassotin, selon ce qu'il auoit ordonné dans vn grand terre ou motte de terre esleuee artificielement, & par main d'homme, de la grâdeur presque d'vne colline naturelle, ainsi qu'on peut

peut

peut voir encores pour le iourd'huy aupres de l'Eglise saint Benoit. Quant au grand Serpent ou Dragon qui mangeoit bestes & gens, duquel par son industrie il deliura le pays, ce sont plustost fables & comptes, dont les vieilles entretiennent les petis enfans, que quelque apparence de verité & d'histoire.

LECHVS II.

RACCVS enterré, comme il a esté dict, le plus ieune de ses deux enfans appelé Lechus ayant (sous vmbre de le mener à la chasse) destourné son frere aîné au profond d'vne forest en vn lieu à l'escart, l'occit là en trahison, & faignât qu'il fust mort par quelque cas d'auenture, (ce qu'il coloroit encores avec pleurs & larmes simulees) le fait enterrer fort honorablement. Puis se saisit de la seigneurie, qui de droict luy appartenoit apres la mort de son frere. Mais ce forfait ne demoura pas longuement caché, car il vint en lumiere & cognoissance de tout le monde. Et pourtât le malheureux meurtrier & parricide fut chassé, & enuoyé en exil, où il finit miserablement ses iours: les autres veulent dire que picqué d'vn remors de conscience, se voyant estre hay de Dieu & du monde, il s'ennuya si fort, qu'il secha de fascherie & de douleur, & ainsi mourut sans laisser aucuns enfans.

b

V E N D A.

QU'E les Polaques ayent de tout temps esté fort affectionnez enuers leurs Princes & Seigneurs, cela se peut assez voir par tout le cours de leurs histoires. Car encores que le Royaume soit electif, c'est à dire, que les enfans des Roys n'ont point accoustumé de leur succeder, si ce n'est moyennant l'election qui en est faite par les Estats du pays, neantmoins on ne trouue point que iamais ils en ayent defraudé aucun hoir legitime. Mais icy on pourra voir d'auantage que la founenance qu'ils eurent du bon gouuernement de leur Prince Craccus, peur tant enuers eux que non seulement ils continuerent la seigneurie à ses enfans males, mais encores apres leur decez ils la mirent ez mains d'une sienne fille qui restoit, (appelee Venda) esperant que elle qui estoit pourueüe d'un si riche & puissant estat, & avec ce ieune & belle au possible, seroit bien tost requise en mariage de quelque braue & valeureux estranger, qui les viendroit regir & gouuerner, dequoy à la verité ils n'eussent point esté frustréz s'il n'eust tenu à elle. Car Ritiger pour lors fort puissant & renommé entre les Allemans, l'enuoya tout incontinent demander à femme par ses ambassadeurs. A quoy d'un courage plus viril que feminin elle feit responce, qu'elle ne se vouloit point marier, aymant trop mieux demeurer dame & princesse elle mesmes, que d'estre femme du Prince. Ritiger au contraire insistoit fort & ferme en sa demande, iusques à venir aux menaces, si elle ne s'y condescen-

doit. Et à la fin voyant que tout cela ne seruoit de rien, ayât assemblé son armee, se delibera d'auoir par armes, ce que de bõ gré on ne luy vouloit accorder. Venda de son costé aussi mit en ordre ses gés, & vint au deuant de luy iusques sur les frötieres de son royaume, là où Ritiger auant que passer outre, remit sus ses premieres poursuites entremeslees de prieres & de menaces. Surquoy elle luy reprochoit son importunité & sortes amours, indignes d'une si belle armee qu'il auoit. Les ambassadeurs estans retournez luy vindrēt à louer plus que deuant la beauté, la bõne grace, le grand cœur, & la maiesté de ceste Princesse, qui ressembloit mieux vne Deesse, que mortelle creature. Puis luy dirent tout net, qu'ils voyoyent bien que de nopces il n'en failloit plus parler, car ils la trouuoient plus disposee à la bataille. Et pourtant le supplioient au nom de toute l'armee, de vouloir laisser ceste passion, qui n'estoit pas à propos pour l'heure: & pour chose si legere, ne mettre point tant de gens en peril & hazard. Aussi bien quād la victoire luy seroit toute asseuree & certaine, il n'auroit toutesfois point d'honneur d'auoir combatu vne femme. Que s'il ne s'en vouloit deporter, ils estoient deliberez de le laisser là tout seul, & s'en retourner au logis. Dequoy Ritiger fut extremement ennuyé, & apres auoir cherché tous les moyés dont il se peut aduiser pour leur faire changer d'opinion, & qu'il les eust veu du tout obstinez & resolu de ne combatre point: de despit & d'ennuy de se voir ainsi surmonté auant que d'auoir combatu, vaincu aussi d'amour, d'impatience & de desespoir, se donna la mort de sa pro-

pre main, & les Allemans apres auoir fait ie ne scay quel appointment s'en retournerent. Venda toute braue d'un si beau & heureux succez, fait à son retour vne triumpante & magnifique entree à Cracouie. Et apres ses vœuz solennellement rendus, & infinis sacrifices par elle faictz, finalement se resolut de se sacrifier elle mesme aux dieux protecteurs du pays, craignant que quelque defastre ne luy survint qui obscurcist la gloire qu'elle auoit desia acquise. Par ainsi apres plusieurs cerimonies & mysteres obseruez en leur religion, à la veüe de tous se ietta du haut du pont en bas, dans la riuere de Vistule, où soudain elle fut submergee & engloutie des vndes. Tant facile il estoit à ceux qui ignoroyent encores l'adoration du vray Dieu, de commettre sans occasion vn tel & si abominable forfait contre soy mesmes. Son corps fust puis apres trouué, & honorablement enseuely par les Seigneurs du Royaume, en vn lieu haut & esleué à vne lieuë de la ville sur la riuere de Dlubine, où ils luy dresserent pour sepulture vn terre ou motte de terre, semblable à celle de son pere. Dont le village qui est au dessouz a pris son nom de *Mogile*, c'est à dire, terre ou sepulture.

LES DOVZE PALATINS

derechef, & Premislus, depuis nommé Lescus premier.

APREs la mort de Venda, ne demoura plus personne de la race de Craccus, parquoy l'estat fut encores changé, & le gouuernement remis ez mains des douze Palatins : mais finalement

il retourna à vn seul par vn cas assez estrange. Car les Polagues ayãs esté plusieurs fois rompus & defaits par les Hongres & Moraues, auoyët presque du tout perdu & le cœur & l'esperance de se pouuoir plus defendre d'eux: quand tout soudain vn homme de basse condition (Orfeure de son mestier) appelé Premislus ayât assemblé quelque troupe de soldats volontaires, s'aduisa d'vne telle ruse & inuention. Il feit faire provision de force morions, & rondelles de cliuse, d'escorces d'arbres, & autres telles estoffes qu'il peut promptement recouurer. Puis les ayant peintes & enduites partie de fiel de bestes, partie de litarge, les alla secrettement poser de nuict au bord d'vne forest, sur les troncs & branches des arbres, vis à vis du lieu où estoyent logez les ennemis, droict encontre le Soleil leuant, le tout si proprement, que quand il commença à luire & espandre ses raiz là dessus, on eüst dit à les voir de loin, que s'estoyent gens armez tous prests à combattre. Cecy doncques ayant esté descouuert & apperceu par les Hongres, desbanderent soudain quelque nombre de gens pour les aller recognoistre & charger, ne faisans point autrement cas de ceux que si souuent ils auoyent mis en fuite. Mais Premislus qui les pouuoit voir de loin, & auoit tout loysir de iouir son personnage, esuanouit incontinent ses soldats contrefaictz, brullant vne partie, & cachant le reste, de sorte qu'il donna aux ennemis l'apparence d'vne vraye retraicte. Eux au cōtraire se mirent à les poursuivre plus chaudement de çà & delà parmy les bois: tant qu'à la fin estans tous en desordre ils vindrent à donner dans l'embuscade, que

*Premislus
originaire de
Vog de Poloy*

Premisus leur auoit dressée, où ils furent bien aisément deffaits & taillez en pieces. Les Polagues s'estans saisis de leurs armes, s'en allerent soudain au logis des ennemis, qu'ils trouuerent saouls & endormis, ne se doubans de rien. Car ils s'estoyent mis à repaistre & faire bonne chere souz l'assurance de leurs gens, qu'ils pensoyent ou auoir deffait ceux qui auoyent esté descouverts, ou bien, qu'ils estoient apres à les chasser & pourfuyure. Aussi que leurs gardes & sentinelles abusez des armes qu'ils voyoyent aux Polagues, n'auoyent point donné d'alarme, mais les auoyent laissé passer sans mot dire. Ce qui les deceut, & fut cause qu'il y en eut plus grand nombre de tuez: les autres qui ouyrent le bruiet se sauuerent le mieux qu'ils peurent, abandonnans leur camp, leurs hardes & bagage. De ceste faction si heureusement succedee, Premisus s'acquit vn grand bruiet & renom parmy les Polagues. Et à la verité il fut cause d'vn grand bien à tout le royaume: car iusques alors ils ne scauoient que c'estoit de victoire, mais bien de fuir à toutes heurtes. Aussi en recompense de ce si signalé seruice, par la voix & consentement de tous, il fut déclaré Prince & Seigneur, avec le nom de Lescus qu'il print pour estre fort agreable à tout le peuple, à cause de la memoire & souuenance qu'ils auoyent encore de leur premier fondateur si doux, si bening & agreable à tous. Quelques vns veulent que cecy soit aduenü l'an 750. ou 760. Comment qu'il en soit, Lescus passa le reste de ses iours en paix & repos, à bien & sagement gouverner son peuple, sans qu'aucun de ses voyzins s'o-

fast remuer contre luy, pour le troubler ou luy faire guerre. Mais combien de temps il regna, ny en quelle sorte il mourut, on n'en scait rien, ny de ses autres faicts semblablement, sinon qu'il ne laissa point d'enfans apres luy.

LESCVS II.

REMISLVS decedé, se leuerent nouvelles disputes & contentions entre les Seigneurs, pour le gouuernement du Royaume, ne se trouuant aucune bride ne mesure à la grande ambition & conuoitise que chacun auoit de dominer. Parquoy finalement fut aduisé, que le tout seroit remis à la fortune, & que celui auoit la seigneurie, duquel le cheual emporteroit le prix à la course, pourueu qu'il fut aulbere & mouchetté, car autres n'y deuoient estre receus. Paraincy la carriere fut dressée le long de la riuere de Prandianique, où soudain accourut vne grande multitude de peuple, prendre place pour voir l'euuenement de la chose. Or entre les autres qui se deuoient presenter sur les rangs, estoit vn certain Lescus, homme cault & malicieux, qui vint semer secrettement grand nombre de chausse trappes parmi le sable où les cheuaux deuoient passer: afin que dōnans là dedans ils s'enclouassent, & rendissent inutiles à parfourrir le reste de leur course. Et quant & quāt choysit vn destour pour luy, (vn peu plus long,) mais qui estoit seur & hors du dāger. Neātmoins il auoit encor à toutes auētures fait ferrer son cheual de folles & plāches de fer, de peur qu'il ne vint à s'offencer. Ce qui luy succeda fort biē cōme il l'auoit proietté, & desia le peu-

ple à haute voix commēçoit à le proclamer & vainqueur & seigneur tout ensemble, comme si miraculeusement ceste faueur luy fust aduenue, (personne ne s'estant encores apperceu de la ruse,) quand l'artifice vint à estre descouuert. Parquoy tout incontinent il fust saisi, conuaincu, condamné, & desmembré par pieces & morceaux sur la place. Ceux qui s'aduiferent les premiers de la tromperie, furent deux ieunes hommes incognus, & de bas lieu, lesquels auant que le peuple se fust encores assemblé, s'estoyēt mis par esbat & passetemps à courir l'vn contre l'autre, comme s'ils eussent voulu disputer la seigneurie entr'eux. Et s'estans de fortune rencontrez en quelques vnes de ces chauffe trappes, voulurent rechercher la chose plus auant, tant qu'ils descouurent ce que c'estoit, & recogneurent fort bien l'endroit où il n'y en auoit point. Cela fait, le plus dispos des deux se va ranger avec les autres qui estoyent ordonnez pour courir: & tout ainsi à pied qu'il estoit, partist quant & eux. Dequoy se leua soudain vne grande rusee parmi le peuple, avec cris & battemens de mains, qui se renforcerent bien encores d'auantage, quand on veit qu'il prenoit le plus long. Mais luy ne se souciant de cela, alloit tousiours auant apres ce luy qui auoit dressé la tromperie, tellement qu'il fut le second qui paruint le plustost au bout de la carriere, d'autant que tous les autres qui auoyent prins le droict chemin, y auoyent affolé leurs cheuaux: & estoyent demeurez court. Apres doncques que tout eust esté esclarcy, le prix & la seigneurie du consentement de toute l'assemblee luy furent deferez, avec
le

le nom de Lescus, pour le rendre plus recommandable enuers le peuple. Parquoy tout aussi tost qu'il fut paruenu à vn si grand honneur outre son attente (car il n'y auoit iamais pensé:) il mit peine de faire en sorte qu'il ne fut point reputé indigne de sa bonne fortune. Car non seulement il rembarra les courses & inuasions de ses voyfins, mais de gayeté de cœur encores fait la guerre à d'autres qui ne luy demandoyent rien, employāt tout ce qui luy pouuoit rester de temps & de loysir des occupations de la guerre, & affaires publiques à s'exercer & adresser aux armes. Il estoit tresmagnifique enuers les estrangers, liberal à ceux qu'il scauoit meriter quelque chose, ou auoir necessité: doux & benin à tous ceux qui l'abordoyēt, aspre & rigoureux à venger les torts & iniures des pauures gens, tresfobre en son boire & manger, simple & modeste en ses habillemēs, voire qui se seruoit ordinairement de quelques gros draps de vil pris & autres semblables petites estoffes en lieu de tapisseries, si ce n'estoit qu'il fust question de monstrier en public deuant les estrangers sa magnificēce. Car lors il n'y esparnoit riē. Et vouloit tousiours auoir en sa chābre ou garderobbe les pauures & simples accoustremens dont il vsoit au parauāt que venir à l'estat: afin que les ayant continuellement deuant les yeux, il se souuint quelle auoit esté sa premiere condition, & comme de si bas lieu il estoit monté à vn si hault degré. Si abhorrent au reste de l'yurongnerie, qu'incessamment il disoit, ceux là qui estoyent yures, ressembler plustost à des bestes brutes, qu'à creatures raisonnables. Toutesfois ny de toutes ces belles &

louables conditions, ni de la vertu, modestie & temperance de ce Prince, combien il regna, ce qu'il feist de son temps, & comment c'est qu'il mourut, nous n'en auons rien par escrit. Aucuns ont voulu dire, qu'il fut tué en vne bataille qu'il eust contre l'Empereur Charlemagne, estant allé au secours des Hongres & Slauons ses alliez, & que cela aduint environ l'an de salut 805.

LESCVS III.

NEANTMOINS il laissa vn fils apres sa mort appelé semblablement Lescus comme luy, lequel ne degenera en rié des vertus & bonnes parties de son pere. Car il se maintint en toutes choses, tant de la paix que de la guerre, d'une façon que non seulement il sembla auoir atteint & esgalé les perfections d'iceluy: mais les auoir encores de beaucoup surpassées. Il feist aussi la guerre contre aucuns de ses voisins qui le mesprisoient, à cause du lieu dont il estoit sorti, & pourtant s'estoit mis à remuer nouvelles choses. Que s'il est vray ce qui a esté dict de la mort de son pere, il pourroit estre que cestuy cy eut enuoyé deuers Charles fils du dessusdict Charlemagne pour traicter la paix. Il eut au reste vn fils de sa femme legitime, qui eut nom Popiel, lequel il feist nourrir & instruire en toutes bonnes mœurs & vertus, & de son viuant encores le designa pour successeur à la seigneurie.

POPIEL I.

QU'E Popiel paruenu à l'estat, soudain se desbaucha, & ne monstra point auoir rien retenu de sa premiere nourriture. Au cōtraire se rendant du tout dissemblable à son pere, & son ayeul, n'estoit qu'un paresseux & pusillanime, & ne feist en tout son temps chose digne de memoire, sinō qu'il remit la Cour à Gnesne, comme elle estoit du commencement. Mais tout incontinent apres s'en alla demourer à Cruuicie, où il regna quelques annees: puis tomba en vne maladie, dont il mourut. On dict qu'il auoit de coustume à tous propos, & mesmement quand il estoit questiō d'affirmer quelque chose d'adiouster tousiours ces mots. Les Rats doncques me puissent manger, s'il n'est vray. Ce qui aduint depuis à son fils.

POPIEL II.

LE deuoir rendu à Popiel selon la Religion, & coustume du pais, son fils du mesme nō, luy succeda du consentement des principaux, qui luy presterēt le sermēt de fidelité, encores qu'il fust fort ieune. Mais tout aussi tost que la barbe luy cōmencea à poindre, (qui est l'age le plus prōpt à se desbaucher apres les delices & voluptez, pour ce qu'on n'en a point encores tasté, & pourtāt semblent elles plus friandes,) voulut viure du tout à son plaisir & fantasie. Et sans se soucier des remonstrances de ses oncles, (en la tutele desquels son pere l'auoit laissé,) se gouuernoit par le conseil & opinion des ieunes fols & esuentez, à l'appetit desquels il

estoit continuellemēt en festins & banquets, à gourmander, yurongner, & iouer tout le long du iour & de la nuit, ne se donnant peine ny d'administrer iustice, ny d'ouyr les plaintes de ses subiects. Somme, qu'en toutes choses il se monstroit entierement depraué & perdu, sans esprit, sans iugement, voire du tout inepte, & indigne du nom de Prince: de sorte qu'il estoit hay & mesprisé de tous. Parquoy ses oncles le voulāt retirer d'une vie si mauuaise & vicieuse, aduiserent de le marier à vne ieune Damoyelle, fille d'un Prince d'Allemagne, belle en toute perfection: mais pour cela il ne s'amenda de rien, au contraire vindrent à se gaster l'un l'autre. Car estant ceste femme d'un naturel extremement ambitieux & auare, tout incontinant qu'elle eust gousté vn peu de la douceur & du profit qui se trouuent à cōmander, & esprouué quant & quant la lascheté & negligence de son mari, empietta sans mot dire toute l'authorité & le gouvernement du Royaume: vne seule chose luy estoit cōtraire, asçauoir la faueur & credit que ses oncles auoyent acquis enuers le peuple par leurs merites & vertus. Parquoy elle commença à les calumner, en mesdire & detracter, leur mettre sus infinies choses à quoy ils n'auoyent iamais pensé, les rendre suspects à son mary, & luy mettre en teste qu'il s'en falloit deffaire, s'il se vouloit iamais voir asseuré de son estat & de sa vie. Ce qu'il creut facilement, & pourtant arresterēt entr'eux de les faire mourir. Popiel doncques feignit d'estre griefuement malade, & là dessus la femme les enuoye incontinant appeler. Eux estans venus, il commence à leur dire com-

me il se sentoit biē pres de la fin, ainsi qu'ils pouuoient apperceuoir, d'auantage que cela luy auoit esté reuelé, se plaignant tendrement pour mieux colorer la bourde: la femme pleuroit quant & quant, laquelle il leur recommande les larmes aux yeux, avec ses pauures petis enfans. Somme qu'en ces pleurs, dolances & gemissemens toute la iournee se passa, iusques à ce que vers le soir, comme s'il leur eust voulu dire le dernier adieu, les appela d'une voix basse & pitieuse chacun par leur propre nom. Et feignāt de vouloir boire à eux pour la derniere fois, se fait apporter vne grand couppe plaine d'un breuuage empoisonné, où il ne fait que mettre le nez dedans pour contenance, soufflant l'escume qui furnageoit dessus: puis la leur presenta, dont ils beurent chacun vn bō trait. Cela faict tourna la teste de l'autre costé, faisant semblant de vouloir reposer, & eux prindrent congé, & s'en allerent. A peine auoyent ils descendu les degrez, que la poison commença à faire son operation, & à les traouiller: mais ce fut si à coup, qu'il n'y eut ordre de les secourir: car tout incontinant d'une grande violence & furie, ils tomberent roides morts estendus sur les carreaux, au grand scandale de tout le monde. Mesmement de ce que ceste outrageuse femme ne voulut permettre qu'on leur donast sepulture. Ce que la diuine vengeance ne laissa pas longuement impuni. Car de la pourriture de ces deux corps, se procreerent soudain vne infinie quantité de Rats, de grandeur inusitée, qui se mistrent à poursuyure le malheureux parricide, avec la femme & leurs enfans, d'une telle façon qu'ils ne scauoient

où se mettre à sauueté, le feu allumé tout autour d'eux, ne les en pouuoit deffendre, l'eau encor moins; ne les tours & forteresses où ils s'enfermerent. Et encores que ceux de leur garde fussent continuellemēt apres à repoulses ces bestioles, & en tuassent vn grād nōbre, ils ne peurent toutesfois empescher que malgré eux, & tout leur effort, elles ne se iettassent premieremēt sur les enfans, puis sur la femme: & finalement sur le miserable, qu'ils rongerent d'une cruauté nōpareille iusqu'aux os, dās le chasteau de Cruzuicie suyuant l'imprecatiō du pere, laq̄lle se trouua n'auoir point tant de fois esté reiteree en vain & sans effect.

L'interregne, & l'election du Piaſte.

POPIEL & les siens ayās faiēt vne fin si estrāge & malheureuse, les principaux du royaume s'assemblerent en grand nōbre à Cruzuicie pour eslire vn nouveau seigneur: & comme la chose eust esté fort debatue d'une part & d'autre pour raison des factiōs & partialitez ambitieuses qui estoient allumees parmy eux plus que iamais, se departirent finalement sans rien faire. Cependāt le pays se trouuoit en vne grande desolatiō & ruine. Car personne n'obeissoit, ni l'un ne uouloit ceder à l'autre, vsant vn chacun de son autorité & licēce. Au moyen dequoy les estats se rassemblerēt derechef: mais rien ne se relaschoit de leurs contentions accoustumees, au contraire elles s'aggriffoient de plus en plus, de sorte que les choses estoient en fort mauuais train: si miraculeusement, & outre l'esperance de tous elles n'eussēt esté remises de la façō qui s'esuit. Il y auoit vn Bour-

geois de Cruzuicie, appelé le Piaſte, fils de Cossifcon, homme de moyenne taille, massif toutesfois, & robuste de membres, aagé de quarante ans, ou plus: qui viuoit de son labourage, avec quelq̄ petit trafic de miel qu'il faisoit, simple au reste, & de fort bōne vie, qui n'eust point voulu faire de desplaisir à personne, liberal & charitable enuers les pōures & souffreteux selō son peu de moyē & pouuoir. Cestuy ci auoit vn seul fils de sa femme Repicha, de mesmes meurs & façons de faire que son mary. Et cōme (du viuāt encores de Popiel) le tēps fut venu, que suyuant la coustume du pays, il luy failloit tondre sa premiere perruque, & dōner le nō: ces deux bōnes personnes auoyēt cōuiē à ceste cerimonie quelques vns de leurs parēs & amis, tuē vn pourceau, & faiēt prouision d'un pot de breuuage faiēt d'eau & de miel, qu'on appelle du *Medon*, pour les festoyer. Mais auant que le iour fut venu, le Piaſte d'auenture rencontra deux ieunes hommes incognus, & en habit d'estrangers: qui auoyent (ainsi qu'ils disoyent) esté iettez hors du palais du Roy, dequoy ils mōstroyent estre mal cōtens, pour ne sçauoir où se retirer. Luy soudain selō la courtoisie accoustumee les inuita de venir prēdre la patiēce à son logis, où il les mena, & leur mit la nappe, leur presentant ce qu'il auoit preparé pour la feste de son fils. Mais voycivne grand merueille qui aduint lors. Car tout soudain la chair s'augmēta, & le Medon abonda, de sorte qu'il y eust non seulement dequoy traicter ceux qui auoyent esté inuitez: mais encores le Prince & toute sa suite en furent repeus. Quelque temps apres ces deux hostes retournerent de-

uers luy, lors que l'assemblée se tenoit pour la creation du nouveau Seigneur. Et luy ayant commandé d'apporter ce qui pouuoit estre en sa petite despence ou Garde manger, par vn miracle encores plus grand que la premiere fois, cela vint à suffire pour donner à repaistre à toute ceste grâde multitude de peuple, qui à la verité patissoit de viures, & en auoit quelque disette. Ce qu'estant venu en euidence, commencerent tous à crier, que le Piasle, non par voix & suffrages des hommes, mais par la diuine prouidence & election, leur estoit donné pour seigneur: & pour tel le commancerent sur le champ à recognoistre & honorer. Ce que de prime face il ne vouloit accepter iusques à ce que ses hostes luy ordonnerent d'ainsi le faire. Parquoy tout ainsi vestu qu'il estoit d'une belle chiquenie, & de gvestres tissues d'escorce de tilleul, fust conduict de tous les grans du Royaume au palais, où apres que ces deux estrangers l'eurent aussi accompagné soudain s'esuanouirent & disparurent, qu'on ne sceut qu'ils deuindrent. On estime que ce fussent quelques Anges & messagers de Dieu, qui voulut ainsi remunerer la beneficence & hospitalité enuers ceux là mesmes qui n'auoyent encores cognoissance de son nom. Le Piasle ainsi parueni à la seigneurie, ne chagea rien de ces humaines & louables façons de faire. Mais se trouuant augmenté de moyens, de richesses & de puissance, renforcea aussi ses biensfaicts & liberalitez accoustumees: sa femme le secondant fort vertueusement en cela, outre l'ordinaire de celles mesmement qui sont venues de bas lieu. Et furent la debonnairété de ce Prince, & les
bonnes

bonnes parties qui se trouuerét en luy, furent la seule cause d'esteindre & assopir les noises & débats d'ot tout le royaume estoit répli, & les meurtres, larrecins & brigandages qui se commettoyent de tous costez: de refraindre quant & quant & arrester les courses & assaux des ennemis. Car le respect seul qu'on luy portoit, eust plus de pouuoir, que toute la force & rigueur dont il eust sceu vser: principalement pour ce que chacun l'estimoit estre tresagreable & fort recommandé enuers les dieux, puis que par leur prouidence il auoit ainsi miraculeusement esté appelé au gouuernement de la chose publique. Et certes il n'y a rien qui puisse tant enuers les volontez & opinions du peuple, ni qui soit si necessaire & à propos pour le contenir en obeissance, que la Religion quand elle est conseruee & maintenue en son integrité par le deuoir & bon exéple du prince. Le Piasle donques n'vsa point d'autres forces, d'autres moyens ni inuentions pour se faire aymer des bôs, craindre des meschans, & respecter des estrangers. Mais il eust encores cest heur & benediction par dessus tous les autres, que sa race & posterité regna de pere en fils par beaucoup de siecles en Poloigne, iusques au Roy Casimir second, qui seul obtint le nom de grand. Ayant au demeurant en horreur & abomination la demeure de Cruzuicie, pour le forfait que Popiel y auoit commis, & la miserable & piteuse fin qu'il y auoit faite, se retira à Gnesne premier domicile & demeure des Princes de Poloigne, où apres auoir fort longuement & heureusement regné, il deceda aagé de sixvingts ans.

ZEMOVIT.

AV Piasse succeda son fils vnique Zemouit, homme soigneux & vigilant, du tour nay à la guerre, & aux armes: endurci à toute sorte de trauail & de peine, ne se souciât de froid ni de chauld, de la faim, ni de la soif, qui dormoit peu, & ne se monstroit non plus exquis & delicat en son viure & habillemens que le moindre & plus simple soldat de son armee. Curieux & ententif sur toutes choses de gagner l'amitié & bienvueillance des grands & des petis, par vne facilité & douceur dont il vsoit enuers tous. Parquoy ce n'est pas de merueilles, s'il fut tousiours en la bonne grace & opinion de tout le peuple. Car du viuant encores de son pere (à cause de son grand aage & foiblesse) il le soulageoit des affaires de la guerre, & autres choses d'importance, tant au gré & contentement d'vn chacun, qu'apres la mort d'iceluy, tout se trouua si bien ordonné, que bien tost il eust recouuré tout ce qui auoit esté aliené & perdu. Et d'auantage s'accroit encores sur les Moraues & Prutheniens, finalement apres plusieurs belles victoires, & tresexcellés faictz d'armes, mourut à Gnesne, l'antrentevnieme de son regne.

LESCVS IIII.

LEs Seigneurs du Royaume, & tout le peuple regrettans infiniment vn si bon & si vaoureux Prince, & dont ils auoyét esté si humainemēt traitez, ne firent aucune difficulté de recevoir en son lieu son fils vnique Lescus, combien que ce ne fust encores qu'vn ieune enfant. Et neant-

moins apres qu'il fut venu en aage s'adonna plustost au plaisir & repos, qu'à faire la guerre, se contentant de la seigneurie que son pere luy auoit laissée. Mais il en vfa fort modestement durant toute sa vie, parquoy il fut tousiours bien voulu, & aymé de ses sujets, & fina heureusement ces iours.

ZEMOMILE.

SON fils Zemomile luy succeda, gracieux aussi, doux, liberal & charitable Prince. Toutes lesquelles vertus luy venoyent comme hereditairement de ses ancestres & maieurs. Mais estant aussi fort addonné au repos & à la paix, il n'eust pas eu beaucoup de bruiet & de reputation, si ce n'eust esté par le moyen de son fils. Car ayât demeuré quelques annees sans pouuoir auoir enfans, il en eut finalement vn avec la ioye, le plaisir, & contentement tant pour luy que pour tout le peuple, qu'on peut penser: ce que toutesfois ne luy dura pas si longuement, comme l'ennuy & fascherie qu'il en eut apres, pource qu'il se trouua aueugle. Or auoit il desia atteint le septieme an de son aage, qui est le temps auquel les Polagues communement auoyent accoustumé de tondre les premiers cheueux, & donner le nom à leurs enfans en grande pōpe & cerimonie. Parquoy tous les grās seigneurs du Royaume ne faillirent de s'y trouuer, car Zemomile les y auoit inuitez. Et s'efforçoit de leur faire la plus grand chere qu'il estoit possible: mais il estoit tousiours en vn extreme ennuy & fascherie, à cause de l'incōuenient de son fils: ce qui luy estoit autant, comme s'il n'en eust

point eu du tout. Chacun de son costé plaignoit sa defortune, & en auoit pitié. Mais voyci suruenir vne chose qui les resiouist tout à vn instant: car l'enfant sans ayde ni secours des medecins, ni autre remede, soudain commença à veoir clair, au grand esbahissement & plaisir de toute l'assistance, qu'vn si grand bien fust ainsi miraculeusement & hors de toute esperance aduenü à tout le Royaume. Il fut nommé Miecislaus, comme qui voudroit dire, C'est celuy qui doit acquerir bruiet & reputation à la pointe de l'espee. Parquoy aussi tost que la feste fut passée, Zemomille voulut sçauoir des deuins & Prognostiqueurs que cela signifioit, que son filseust par si lóg temps esté priué de la veüe, & puis tout à coup l'eust ainsi recouree. Ils luy feirent responce, que la Poloigne deuoit quelque iour estre grandement illustree & anoblie souz luy. Ce qui fut cause que Zemomille le feit encores plus soigneusement nourrir & esleuer, puis apres la mort de son pere il succeda à l'estat & seigneurie.

MIECISLAUS premier, Chrestien.

PAR le trespas de Zemomile, la seigneurie vint à son fils Miecislaus, qui à la verité faisoit bien ce qui estoit requis à vn bon & iuste Prince: & estoit son gouvernement loué de tous. Neantmoins cela ne respondoit point assez aux grandes esperances qu'on auoit conceuës de luy, selon les predictions qui ont esté dictes cy dessus. Car il ne prenoit aucunemēt à cœur les affaires de la guerre, au contraire ayant espousé sept fem-

mes, selon que les loix du pays luy permettoient, n'entendoit à autre chose qu'à se donner du bon temps, & suyure ses plaisirs & voluptez, & cependant il ne pouuoit auoir enfans. Or y auoit il desia beaucoup de Chrestiens parmi les Polagues, d'autant que ceux du pays qui hantoyent & traffiquoyent ordinairement avec les Bohemes & Moraues, auoyent gousté ceste Religion: & d'auantage il y auoit tousiours force estrangers à la Cour & suite du Prince, qui en estoient. Plus quelques saints & deuots personnaiges çà & là escartez ez lieux solitaires & desuoyez, pour mieux vaquer à cōtemplation, la plus part desquels ne dissimuloyēt point, mais preschoyent tout ouuertement l'honesteté de nostre foy, & la continence recommandée en icelle, promettans tout bonheur, prosperité, biens, & lignee à ceux qui se y voudroyēt ranger. Ceux cy donques feirent tāt par leurs saintes remōstrances & admonestemens, que Miecislaus repudia ses sept femmes Payennes, & espousa vne Chrestienne, fille du Duc de Boheme Boleslaus premier, nommée Dambrouica: & par mesme moyē receut le saint Baptesme l'an 965. Delà il meit incōtinant toute son entente à planter & estendre la foy Chrestienne par tout le pays de son obeissance, où il edifia en diuers endroits iusques à neuf belles eglises, lesquelles il renta, & les pourueut quāt & quant de force riches & precieux ornemens, reliquaires & vtenciles pour le seruice diuin. Puis les ayant departies par Dioceses, en erigea deux en Archeueschez, aſçauoir Gnesne & Cracouie: & les sept autres en Eueschez, Posne, Smorogouie, qui depuis fut appelée

Vvratilauie, Cruzuicie, Plosco, Culme, Lubuzense & Camenez, à toutes lesquelles par edict perpetuel & irreuocable il assigna diuines de toutes choses, rât de ses heritages & possessions propres, que de la noblesse, & du populaire, de quoy la charge fut donnée au Cardinal Gilles, Legat du Pape Jean 13. qui feit plusieurs Prestres. Et ordonna les autres offices & dignitez requises pour le seruice & ministère des Eglises: conferât le tout pour celle fois à des Italiés, Alemãs, & François, hômes de sainte vie, & bonne doctrine, pour ce que les Polagues n'estoyēt encore assez auāçez & instruits es choses de la foy. Toutesfois elle print bien tost vn fort grād accroissement par le bon zele, & soing de Miecillaus & de sa femme, car ils estoyēt incessammēt d'vn costé & d'autre à enhorter leurs suiets, sans pardonner à peine ni trauail quelcōques, gaignant les plus dociles par caresses, dons, hōneurs & biensfaits, & regeant de menaces, ceux qui en faisoient les retifs. Sur ces entrefaites il eust vn beau fils de sa femme Dambroïca, lequel sur les saincts fonts de Baptisme fut appelé Boleslaus du nō de son grād pere maternel. Et aussi tost qu'il fut paruenue en adolescence, son pere le voulant de son viuāt veoir pourueu, le maria avec Iudith fille du Prince de Hongrie Iessa, qu'il auoit eue de sa premiere femme. Car apres la mort d'elle, il espousa Aliz sœur de Miecillaus, qui le sçeut si bien & sainctement admonēster, que le cinquieme an apres la conuersion de la Poloigne, il se feit baptizer avec la plus grande partie de son peuple. Au reste Miecillaus durant 35. ans qu'il regna tint tousiours en fort grande paix &

repos son estat, sans entreprendre aucune guerre, sinō celle qu'il eust par force & comme cōtrainct, contre Volodimir duc des Rutheniés. Finablement voulāt laisser vn plus hault & magnifique titre à ses successeurs, à l'instance & persuasion du Senat, despescha Lābert Euesque de Cracouie deuers le Pape Benoist 7. pour impetrer le nom de Roy. Ce que toutesfois pour certaines causes fut remis à vne autre fois. Du temps de ce Prince fut premierement introduite la coustume que durāt la Messe, ainsi qu'on vient à dire l'Euangile, les Gentilshōmes qui sont presens degainent leurs espees à demy: cōme si par cela ils voyēt tesmoigner que plustost endurerōt ils la mort, que iamais renier la foy qu'ils ont receuē. Et quand l'assistance respond *gloria tibi Domine*, ils la remettēt. Il y auoit aussi alors ez desers de Poloigne deux hōmes religieux, & de fort sainte vie, ayās leur demeure pres la riuiere de Dunaiecie, l'vn desquels appelé Benedic, souffrit martyre par les Hongres, & l'autre qui s'appelloit Svirad, apres auoir mené vne fort austere vie, au monastere de Mōtferrat en Hongrie, où ils s'estoyent retirez, y trespassa en nostre Seigneur. Voyla cōment en Poloigne furēt iettez les premiers fondemēs de la foy, au moins pour le regard du Prince, & de la generalité du peuple, car de plus longuemain il y auoit des Chrestiés, mais en petit nombre, & encores la plus part craintifs & cachez. Ce qui nous peut assez dōner à cognoistre, combien de force & vertu ont l'exemple & autorité d'vn Roy enuers ses suiets, qui ont de coustume auoir ordinairement l'œil à luy, pour le suyure ainsi qu'vn fanal à

l'obscurité de la nuit. Les princes doyuēt doncques estre biē soigneux du salut de leurs peuples, & de les retenir tousiours en l'obeissance de la vraye & legitime Eglise, sans leur rien relascher en cest endroit. Ny penser de leur gratifier & complaire aucunemēt de ceste liberté de conscience (qu'on appelle) ce qui n'est autre chose que leur oster le mors qui les retiennent, & leur adiouster encores des esperons aigus & tranchans pour les precipiter à toute bride à vne ruine & perdition euidente. Car s'ils ne se rēdent obeissans aux superieurs de leurs ames, comme veut on qu'ils obeissent à leurs seigneurs terriens. Le dis que tout empire, royaume, principauté & domination qui est non seulement hors de la foy chrestienne, mais encores hors de l'eglise Catholique (car plusieurs se disent Chrestiens qui pourtāt ne le sont pas) est plus tost tyrannique vsurpatiō que vraye & legitime seigneurie. Et c'est pourquoy qu'aux rangs & precedēces des Roys chrestiens, on ne regarde pas tant à leur noblesse & ancienneté, à la grandeur & estendue de leurs pays, au nombre de suiēts, à leurs forces, puissances & richesses: comme au temps qu'ils sont venus à la vraye foy & religiō, & à la façon dont ils s'y sont portez & maintenus. Au moyen dequoy la monarchie & dominatiō des Polaques, ne se doit compter sinon du temps de ce Prince icy, puis qu'il a esté le premier Chrestien. Vne chose peut on bien dire d'eux, que tout ainsi qu'il n'y a iamais eu Roy de Frāce, depuis que la foy y a esté receuē & introduicte, qui n'ait esté bon Catholique: Aussi n'y en a il point eu en Poloigne, qui se soit estragé du droict chemin, quelques

quelques deprauations & desuoyemens qui ayent peu estre parmy leurs subiects. Ce que par aduēture on ne pourroit pas bien asseurer de tous les autres. Or puis qu'il est question des precedences, & surquoy elles doyuent estre principalemēt fondees, il ne sera point hors de propos, & pour beaucoup de raisons, d'inserer icy le catalogue des Roys Chrestiens, selon qu'ils sont arrangez & mis par ordre dans le cerimonial secret de la chambre Apostolique, avec les temps de leur erection, & qu'ils sont venus à la foy.

ET PREMIEREMENT.

L'Empereur.

Charlemagne Roy de France premier Empereur.

Le Roy des Romains.

Ce n'est qu'une dignité attendant l'empire.

Le Roy de France.

Ceste monarchie treschrestienne n'a pas pris son commencement souz Pharamond (comme aucuns pensent) lequel regna ez Gaules environ l'an 420. Car plus de cinquante ans avant l'aduēnement de Iesuschrist, la Frāce auoit desia ses Roys. Mais le premier Chrestien a esté Clouis.

Le Roy d'Espagne.

Les Gots dont ils sont descēdus iusques à auourd'huy y commencerent à regner environ l'an 450. Et y planterent premierement la foy chrestienne. Mais

L'an du monde

4745.

De Iesuschrist

801.

entachée de l'herésie d'Arrius, l'an 714. Les Sarrazins l'occupèrent presque toute, iusques à ce que Charlemaigne les en chassa, non pas du tout, car ils demeurèrent en Grenade iusques à l'an 1492.

Le Roy d'Arragon.

1016. Ramirus.

Le Roy de Portugal.

1110. Alphonse.

Le Roy d'Angleterre.

Enuiron l'an 580. du temps de l'Empereur Maurice, & de Clothaire second, Roy de France, les Anglois receurent la foy. Mais il n'y eut Royaume certain que depuis l'an 840.

Le Roy d'Angleterre debat de la precedence avec Espagne, Arragon & Portugal.

Le Roy de Sicile.

1008. Guillaume Ferebach Normand.

Le Roy de Sicile, debat avec celuy de Portugal.

Le Roy d'Escoffe.

1110. Edgarus fils de Macolinus Cammorus.

Le Roy de Hongrie.

974. Enuiron l'an 400. les Huns ou Hongres commencerent à regner en Hongrie, au parauant appelée Pannonie. L'an 974. saint Estienne fils de Geissa fut premier Roy chrestien.

Debat avec le Roy d'Escoffe.

Le Roy de Nauarre.

L'an 961. ce pays fut osté de la main des Sarrazins, 961. & reduict au Christianisme par Eneque Comte de Bigorre, qui en fut le premier Roy.

Le Roy de Cypre.

Ce Royaume est des plus anciens, voire auant 1181. deux mille ans, mais il a esté entrerompu, iusques à ce que Richard Roy d'Angleterre, ayant debouté les Grecs de ceste isle, la mit ez mains de Guy de Lusignan.

Le Roy de Boheme.

Erigé en Royaume, & Vratisslaus fait le premier 1086. Roy par l'Empereur Henry quatrieme. Mais le pays auoit receu la foy chrestienne l'an 900. au parauant, souz Borsinoius dixieme Duc.

Le Roy de Poloigne.

Miecisslaus premier Prince chrestien. 965.

Boleslaus Chrobri premier Roy. 1001.

Debat de la precedence avec le Roy de Portugal, & par consequent avec tous les autres qui sont en rang apres iceluy.

Le Royaume de Dace.

Dace anciennement comprenoit les pays de Trāsylvanie, Seruie, Bulgarie & Valachie. Mais icy il est prins pour Dannemarch.

Haraldus conuerti par le miracle de Poppo. 972.

Iusques icy va le cerimonial dessusdict.

1088. Il y a encores d'autres Royaumes chrestiens, cōme Ierusalem, dont il n'y a plus rien que le titre, Godeffroy de Billon en fut le premier Roy, l'an 1088.

Naples.

1077. Rogier, fils de Robert, fils de Tancredi Normand.

Suede.

1000. Olaus, fils d'Erich premier, chrestien, nommé Jacques.

Nordvveg.

1194. Reduits à la foy par Pape Adrian quatrieme, au reste ils ont presque tousiours esté souz l'obeissance de ceux de Dannemarch, tout ainsi que Sardaigne a esté souz la couronne d'Espagne.

Les Moscovites.

908. Quant au grand Duc de Moscouie, qui se peut dire le plus puissant Seigneur chrestien qui soit pour le iourd'huy ne portant point titre de Roy, Chrestien di ie, de la religion Greque ou Ruthenique, & non pas de la catholique Romaine. Volodimerus se fait baptiser avec tout son peuple, l'an de Iesuschrist 908. qui tombe en l'an du monde 4996. selon nostre calcul: mais selon le leur 6497. Car entre autres choses les Rutheniens different en cela de nous, en quoy il y a à dire plus de quinze cens ans.

Les Bulgares.

860. Mais pource qu'il a esté dict au commencement de ceste histoire, que des Slauōs sont descendus be-

aucoup de peuples & nations, & entre autres les Bulgares & Polaques, il fault neantmoins confesser que les Bulgares ont esté les premiers de tous les Slauons qui sont venus à la foy Chrestienne, enuiron l'an 860.

Les Moranes.

Suatapocus Roy de Morauie fait chrestien l'an 895. 895.

La Pomeranie.

Liunionie, l'an 1158. commença à estre frequentee des marchans Chrestiens, dont par la predication de sainct Menrad en fut reduite la plus grande partie, & entre autres Cobbe leur Prince, à l'instance duquel iceluy Menrad fut depuis fait premier Euesque de Righe ville capitale du pays par le Pape Alexandre troisieme. 1112. 1158.

Ceux de Prusse furent contraints de prendre la foy par les Cheualiers, l'an 1225. 1225.

Et les Lithuaniens souz leur Duc Iaghellon, qui fut Roy de Poloigne, comme il sera dict cy apres, l'an 1378. 1378.

BOLESLAVS.

BOLESLAVS doncques succeda à son pere Miecillus, au grand contentement & satisfaction de toute la Poloigne. Car non seulement ses douces & agreables façons de faire, & la grandeur de son haut & esleué courage digne d'un si grand Prince, tenoyent tout le peuple en admiration & esperance de luy merueilleuse. Mais il estoit avec cela sage, prudent & auisé en ses actiōs, voire accōpli en toutes les vertus qui peuuēt estre desirées en vne encores si grāde ieunesse. Et certes il ne deceut point depuis la bōne opinion qu'on auoit conceuë de luy; car il illustra & anoblit grandement le nom & reputation des Polaques, tāt pour le titre royal, que le premier de tous il leur acquit, qu'à cause des alliances qu'il eut avec les plus grans Princes de son temps. La grandeur aussi & l'excellēce de tāt de belles choses par luy heureusement menées à fin, & la bonne discipline qu'il introduict parmi les siens, furent causes d'estendre bien auant au long & au large les limites de son empire. Et qui plus est, il establit la Religion chrestienne à vn bien hault honneur & reuerence, & reduit ce peuple lors assez rude, farouche & sauuage, à de plus douces & humaines façons de viure. De ce temps estoit Euesque de Prage en Boheme Voïcechus, que les estrangers nommoient Adelbert, personnage de noble maison, & de tressaincte vie, lequel voyant que ni par ses remonstrances & exhortations continuelles, ni pour quelques aigres menaces & reproches que par fois

il y entremestast, ne pouuoit pour cela rien profiter enuers les Bohemiens du tout obstinez & endurcis en leurs abus, & folles superstitions, s'en alla premierement à Rome. Et delà par le congé & permission du Pape, passa en Hongrie, où par l'espace d'un an souz le consentement & faueur de Iessa, & de sa femme qui luy tenoyent la main, fait vn grand fruit à instruire & edifier les Hongres en nostre foy. Puis s'achemina en Poloigne, où il fut fort honorablement receu tant des principaux du pays, que de tout le reste du peuple, enuers lequel il fit le mesme deuoir, qu'il auoit desia fait en Hongrie. Tellement qu'estant lors decedé Robert Archeuesque de Gnesne, il fut mis en son lieu, aux grandes prieres & instance du Prince, qui le requit d'accepter ceste charge. Mais peu de temps apres ayant eu quelque reuelation, il s'en demeura, & la laissa à son frere Gaudenrius, pour s'en aller poursuyure ses predications, & semer la foy encores plus auant, asçauoir en Prusse, enquoy il eut vne grande patience, & beaucoup de peines & difficultez. Et finalement pour toute recompense, vn iour ainsi qu'il celebrait les tres saints & sacrez mysteres de la Messe, fut inhumainement mis à mort par ceste cruelle, barbare & impitoyable race de gens, non gueres loing de la ville, qui depuis en Aleman a esté appelee *Fischhausum*, pres le riuage de la mer, le vingt troisieme iour d'Auril, l'an neuf cens nonante sept. Mais bien tost apres Boleslaus racheta le saint corps d'entre leurs mains, & à bon marché. Car les meurtriers ayans conuenu de le redre pour son poix d'or & d'argent: il aduint par

vn tresgrand miracle que la puissance diuine voulut
monstrer en cest endroict, qu'estant mis en la balan-
ce pesa si peu comme rien. L'ayant doncques fait a-
mener en grand honneur & reuerence, il fut premie-
rement mis au monastere de Tremesne, & delà trās-
porté en l'Eglise de Gnesne, où tout incontinant cō-
mencerent à reluire comme vn clair soleil, les mira-
cles qui continuellement se faisoient à l'intercessiō
de ce glorieux Martyr. Dont la renommee estat par-
uenue iusqu'à l'Empereur Ortho troisieme, à son re-
tour d'Italie eut deuotion d'aller visiter son sepul-
chre. Boleslaus le voulut receuoir en la magnificēce
& dignité qui à vn si grand Prince appartenoit, aussi
qu'il s'estoit tousiours mōstré ami de sa maison. Par-
quoy il feit en premier lieu tapisser tout le chemin
par où luy & sa troupe (qui estoit grande) deuoient
passer, trois ou quatre bonnes lieues de long, de fins
draps de laine, de toutes sorte de couleurs, qui puis
apres furent dōnez & departis aux gēs de l'Empereur.
Delà luy ayant par plusieurs iours tenu Cour ou-
uerte, & desfrayé tous ses gens, finalement les trois
derniers il le traicta sans comparaison plus sumptu-
eusement qu'il n'auoit point encores fait. Car à cha-
cun repas la vaisselle, tant de buffet que de cuisine,
qui estoit tout d'or & d'argent estoit changee, & cel-
le qui auoit serui, enuoyee en don: asçauoir de la ta-
ble & seruire de l'Empereur, à l'Empereur. Et des au-
tres tables à vn chacun des Princes & Seigneurs, aus-
quels elles estoient destinees, chāgeant ainsi de vai-
selle deux fois le iour. Tellement qu'ils estoient si
esbais, voire comme lassez de tāt de richesses, qu'ils
ne

ne sçauoyent que dire. Car les tapisseries, liēts & au-
tres vtenciles alloient de mesme, & accompagnoy-
ent la vaisselle, avec infinis habillemens, fourrures,
armes & cheuaux qui y estoient entremeslez. L'Em-
pereur ne sçachant comment, ni de quo yreconnoi-
stre vne telle liberalité, dōna lors à Boleslaus le nom
& titre royal. Et quant & quant le declara son com-
pagnon & associé à l'empire, le feit exempt de toutes
contributions, droicts & deuoirs, foy, hommage &
reconnoissance dont luy & ses successeurs pouuo-
ent estre tenus enuers iceluy. Et en grand pompe &
magnificence, presens tous luy meit la couronne im-
periale sur la teste, voulant que tous ceux qui succe-
deroyent apres luy au Royaume de Poloigne iouis-
sent du mesme honneur, priuilege & autorité. Dont
est venu que les Roys de Poloigne portent la coron-
ne close avec la pomme au dessus, & les autres mar-
ques & enseigne de l'empire. Car quant ils marchēt
on a accoustumé de porter vne espee nuē deuant eux.
Et cela est vne dignité à part qu'on appelle le Porte-
espee: pour ce que le grand Escuyer la porte en-
gainee dans le fourreau, pendue en escharpe à vne gran-
de courroye. L'Empereur d'auantage luy donna l'vn
des clouds dont nostre benoist Sauueur fut crucifié,
avec la lance de saint Maurice, qui sont encores
pour le iour d'huy en l'eglise cathedrale de Craco-
uie, sçachant biē qu'il ne luy sçauoit faire autre pre-
sent si agreable que de ces pretieuses reliques. En re-
compēse de quoy il remporta le bras de S. Adelbert,
qu'on dit auoir depuis esté porté à Rome en l'eglise
S. Barthelemy en l'Isle. Tout ceuy fut fait l'an 1100.

Boleslaus doncques ainsi créé Roy de Poloigne, se meit à faire la guerre à vn autre Boleslaus Duc de Boheme, à causes des courses & dommages qu'il faisoit continuellement dans ses pays, & luy print tout plain de villes & chasteaux, partie de force, partie par composition. Delà fait les Morauies ses tributaires, & l'an 1008. deffit en bataille Iarossaus Duc des Rutheniens, & print Kiouie l'une des plus renommées villes de ce tēps là. Laquelle toutesfois il meit ez mains du Duc Stopelc, frere du dict Iarossaus, duquel il auoit esté chassé, sans y faire autre mal, ni dommage, sinon d'emporter l'argent qu'il y trouua appartenant au Prince, qu'il distribua à ses soldats au lieu du butin & pillage qu'ils attendoyēt. S'en retournant puis apres Boleslaus fut poursuyui de Iarossaus qui de nouveau auoit rassemblé & mis sus vne autre grosse & puissante armee, iusques à la riuiere de Bogus, où il y eut vne plus grande & cruelle rencontre que la premiere fois. Mais par l'effort & valeur du Roy, & la hardiesse & deuoir des Polaqes les Rutheniens furent rompus & mis en fuite avec tel meurtre & boucherie, que par quelques iours l'eau fut toute teincte & coulouree du sang. Et ainsi rempli de triumphes & de victoires s'en retourna en Poloigne, où il accomplit ses vœuz, edifia plusieurs Eglises, & mesmes à Gnesne, qu'il meubla & renta fort richement, & fait de grans dons & recompences à ceux qui s'estoyent bien portez en ceste guerre, tant des grans que des simples Gentilshommes & soldats, enquoy il n'oublia personne. Et lors receut le surnom de *Chrobri*, c'est à dire, aspre &

courageux, lequel les Rutheniens mesmes luy donnerent pour l'excellence de sa vertu & prouesse. Il edifia aussi le monastere de Secehouie, en la contrée de Sendomirie, auquel Secechus Palatin de Craouie, & grand Marechal du Royaume, de la maison des Toporeens, assigna partie de son reuenu, dont le lieu a depuis retenu son nom. Le Roy auoit desia accommodé ces religieux en vn autre endroit au parauant la guerre de Russie, au mont *Lifecien*, qui vaut autant à dire, comme Chauue, à l'instance & priere d'Emery, fils d'Estienne Roy de Hongrie, Prince de sainte & chaste vie, lequel de son bon gré avec Boleslaus le pitoyable son parent s'estoit retiré en Poloigne, & auoit donné à ce monastere vne piece de la vraye Croix que l'Empereur de Constantinople auoit enuoyee à son dit pere, lequel la tenoit en singulier honneur & reuerence, la portant continuellement pendue au col, comme vn infallible preseruatif à l'encontre de tous maux & dangers.

De ce temps là, & encores vn peu au parauant la guerre Ruthenique y auoit six personages qui menoyent vne tres deuote & austere vie en vn desert & solitude de la grande Poloigne, au propre endroit où est maintenant située la ville de Casimirie, cinq desquels Matthieu, Benoist, Jean, Chrestien & Isaac furent miserablement esgorgez par certains brigas, & le sixieme qui n'estoit pas pour lors avec eux, deceda quelque tēps apres de sa mort naturelle, l'occasion de ce forfait fut l'or & l'argent que Boleslaus leur auoit fait presenter pour orner leur oratoire.

Mais les malheureux ne sçauoyent pas qu'ils l'auoyent desia renuoyé par leur confrere Barnabas. Et tiét on pour chose asseuree, qu'apres que ces poures martyrs eurent esté ainsi massacrez, les meurtriers voulurent mettre le feu en leurs loges & cellules, ce qu'il ne leur fut possible de faire, & là dessus comme ils pensoyent s'en retourner, ne peurét iamais trouuer l'issue de la forest, car errans deçà & delà furent attraints & rēcontrez par ceux que Boleslaus auoit enuoyé apres, lesquels les menerent au tombeau des saints personnages, où ils furent liez & attachez, afin de les laisser la mourir de faim pour punition de leur forfait. Toutesfois touchez de repentance, & ayans recours à la misericorde de Dieu, & inuocation de ceux qu'ils auoyent ainsi cruellement mis à mort, furent miraculeusement deliurez. A la verité c'est chose admirable, & qui peut esmouuoir à deuotion tout cœur tendre & pitieux, que de veoir l'affiète & disposition du lieu où ces pauures hermites faisoient leur residence, lors que la foy commençoit seulement à s'introduire, & prendre pied dans la Poloigne, ensemble la façon dont leurs petites demeures estoyent basties & ordonnees. Car il y en auoit quatre en forme quadrangulaire qui seruoient pour leur retraite, & la cinquieme qui estoit desdiee pour le diuin seruire, & pour instruire & prescher le peuple estoit au millieu en telle affiète, que toute personne qui eust voulu estre contemplatif, eust facilement remarqué en cela les cinq playes de nostre Sauueur. L'eglise de Posna fut ornee & enrichie des reliques de ces benoists martyrs, dont la feste & solen-

nité y est celebree le lendemain de la saint Martin, souz le titre des cinq freres Polonois martyrs, comme aussi elle est par tout le diocese de Gnesne.

La guerre Ruthenique heureusement menee à fin, Boleslaus pour ne laisser par trop de repos & oyfueté endormir les siens, afin de rauoir aussi ce que par le passé auoit esté vsurpé sur eux, mena son armee au pays de Saxe, où ne trouuant personne qui luy fait teste (car ils s'estoyent tous retirez ez forests & lieux marescageux & inaccessibles) gasta tout le pays, tout ainsi qu'un gros & impetueux torrent qui vient à se desborder & esprendre à trauers les plaines & campagnes. Tellement que Magdebourg, Misne, Hilden, Mechelbourg & autres plusieurs villes, furent du tout en tout par luy ruinees & perdues, avec le pays d'alentour, iusques aux riuieres d'Albis & de Sala. Puis s'en retourna en Poloigne, où apres s'estre reposé quelque temps, fit vne seconde entreprinse contre les Prutheniens pour venger & punir la cruauté par eux commise enuers S. Adelbert, & par mesme moyen adiouster encores ce peuple à sa couronne. Ayant doncques pris son chemin par la contree de Culme qui estoit de son obeissance, tout aussi tost qu'il fut entré dans leurs limites commença à piller, brusler & saccager tout ce qui se rencontroit deuant luy. Print les forteresses de Razin, Romoue & Balgue qu'il pilla & brusla avec tous les villages de là aupres, au moyē de quoy les Prutheniens vindrent à mercy, qu'ils obtindrent souz condition, que de là en auant ils payeroyent tribut. Mais on leur laissa gens pour s'asseurer d'auantage d'eux, & pour les instrui-

re en la foy. Et ainsi victorieux s'en retournant plantèrent une colonne de fer sur la riuiere Dossa, pres la ville de Rogozno, dont depuis le village qui est au pres fut nommé *Slupi*, c'est à dire, la colonne. Cela faict se reposa par deux ans entiers, durant lesquels il ordonna beaucoup de choses nécessaires, tant pour le faict de la Religion, que pour la iustice & police du Royaume, & les affaires de la paix & de la guerre. Mais ce pendant Iaroslau Prince des Rutheniens luy entrerompit ce repos, car il mettoit sus nouvelles forces pour luy faire la guerre, dequoy aussi tost que Boleslaus eut les nouvelles, tant par le bruiet commun, que par les lettres & aduertissemens de ses Capitaines qui estoient sur les frontieres, s'achemina contre luy, lequel de son costé amenoit de grandes & puissantes forces pour entrer dedans la Poloigne, si on le luy eut permis. Ainsi les deux armées se vindrent rencontrer pres la riuiere de Bogus, & combien que Boleslaus eut deliberé de ne combattre point pour ce iour là, pour le respect & reuerence qu'il portoit au saint Dimanche. Neantmoins comme le plus souuent il aduient, que la fortune est celle qui peut tout es occasions de la guerre, si que de choses bien legeres & de petite importance, s'en ensuyuent de grandes mutations & changemens, outre ce qu'on pourroit auoir preueu & deliberé. Il aduint qu'estât suruenu ie ne sçay quel debat entre les varlets & chartiers des vns & des autres en abbreuant leurs cheuaux dans la riuiere qui faisoit separation des deux camps, l'escarmouche vint soudain à se renforcer de telle sorte par ceux

qui y estoient attirez à la file d'un costé & d'autre, les vns combatans de loing à coups de fleches & de dards, les autres plus aspres & courageux, estans venus aux mains iusques mesmes dedans l'eau: que la bataille s'en ensuyuit. Car les Polaqués s'estans fort promptement rangez en ordonnance, passerent la riuiere sur les Rutheniens, lesquels finalement apres un assez long cruel & dangereux combat ils contraindrent de quicter la place. Leur chef mesmes print la fuite des premiers, & tout le reste apres, dõt en ayant tué un grand nombre, Boleslaus pardonna aux autres qui se voulurent rendre, sans leur imposer plus dure condition que d'un simple & bien petit tribut: encores rendit il tous ceux qui auoyent esté pris, tant en ceste iournee qu'en la guerre precedente. Cela aduint l'an 1018. comme veut Dlugoffus Pistorien.

Ainsi la paix asseuree & establie de toutes parts, & les limites du Royaume bien auant estendus & dilatez, à la grand gloire, honneur, & reputation de Boleslaus & des Polaqués, Il voulut donner le reste de ses iours à ordonner les affaires du Royaume, à quoy il esleut & appela iusques à douze Senateurs, qu'il choisit des plus gens de bien, plus suffisans, & mieux renommez de tous les endroits de la Poloigne, avec lesquels il iugeoit les procez, nourrissant à ses despens les pauvres parties qui n'auoyent dequoy s'entretenir en attendant iustice. Aux indigens faisoit distribuer de l'argent, & à ceux qui ne sçauoyent playder & desduire leur affaire, pouruoyoit d'Aduocats & de conseil, le tout dessus sa bourse,

*Douze Senateurs
origz par
Boleslaus
apud legum*

ne se montrant ce gracieux & debonnaire Roy en nulle autre chose plus rigoureux & seure, sinon à punir ceux qui eussent fait quelque scandale ou desordre ez lieux saints & sacrez, ou tort & iniure aux gēs d'eglise, car de cela il ne laissoit rien passer. Il voulut aussi qu'ils fussent exempts à perpetuité de toutes charges, coruees, tributs, subsides & impositions quelconques: pource qu'il honoroit beaucoup non seulement les Euesques & Prelats, mais aussi les simples prestres. Et vouloit nommément qu'à son exemple ils fussent respectez d'un chacun. Mesmes ne s'asseioit iamais en la presence d'un Euesque, qu'il ne le fait seoir quant & quant. D'autre costé il visitoit par tout les places & forteresses, s'enqueroit du gouuernement de ceux qui les auoyent en charge, s'ils faisoient point de tort & violence à ceux qui estoient dessouz eux, & si tout estoit en bon estat & seureté, comme il deuoit estre. Ayant ordinairement ce mot en la bouche, qu'il ay moit mieux se contenter d'un morceau de pain, & veoir les subiects à leur aise, en repos & tranquillité, que viuant opulemment & delicieusement souffrir qu'on fait tort au moindre d'eux. Il ne faisoit pas au reste grand compte d'argent, mais l'employoit fort volontiers pour l'aduancement & honneur de la foy chrestienne, pour l'entretènement des Eglises, le bien & commodité publique, & la recompense de ceux qui auoyent fait quelque chose de bon. Et comme il se sentist desia cassé d'age & de trauail qu'il auoit enduré, declara son successeur à la couronne son fils Miecislav, au grand plaisir & contentement de tous, luy faisant de belles remon-

strances

And. p. 1. d. 1.

And. ann. 1.
1. 1. 1.

strances & admonestemens, d'auoir sur toutes choses l'honneur de Dieu en recommandation, & en apres la vertu, iustice, douceur, & benignité enuers vn chacun, qu'il portast tousiours respect & reuerence à ceux du Senat: car ils le conseilloyent & adresseroient en tous les affaires, pourueu qu'il l'entretint comme il le luy laissoit. Et que sur tout il meit peine d'estre plustost aymé que craint de son peuple: l'un estoit office de pere, l'autre de tyrā. De fuir aussi l'oyfueté & les voluptez, comme vne tres dangereuse peste. Là dessus sentant sa fin approcher, demanda en grande contrition de cœur, & humilité le S. Sacrement, lequel il n'eust plustost receu, qu'il rendit son ame à Dieu, l'an 1025. apres auoir vescu 58. ans, & regné 25. Son corps fut porté suyuant ce qu'il auoit ordonné, à peu de pompe & cerimonie en la ville de Posnanie, mais tout le royaume vniuersellement le pleura vn an entier, sans que durant tout ce temps fut fait aucun banquet, bal, ny danse, ny autre bonne chere ou allegresse quelconque. Tant peut la vertu, debonnaireté, & bon gouuernement d'un Prince enuers ses subiects.

John. L. 1. 1.

And. 1. 1. 1.

MIECISLAVS Roy.

MIECISLAVS estoit desia d'assez bon age quand il vint à la couronne, car il auoit trentecinq ans. Et pour le commencement ne se portat point en mauuais Prince, mais sur toutes choses la memoire de son pere, & de ses beaux & excellens faits, le rendoyent agreable enuers vn chacun. Au moyen dequoy au contentement de tous,

luy & sa femme Rixa furent solennellement coron-
 nez en l'eglise de Gnesne, par les mains de l'Archeuef
 que Hippolyte, le propre iour de la Pentecoste, tous
 les autres Euesques & Prelats du Royaume presens.
 Le premier voyage qu'il feit fut cõtre les Rutheniens,
 lesquels ayãs sceu les nouvelles de la mort de Boles-
 laus, s'estoyent reuoltez avec leurs Princes Iaroslau
 & Miecislau, mais de pleine arriuee il les rembarra.
 Delà il s'achemina cõtre les Bohemes, pource qu'ils
 refusoient de payer le tribut accoustumé, & auoyent
 couppe la gorge à toutes les garnisons que Boleslaus
 y auoit laisses. Courut quant & quant le pais de Mo-
 ranie, qui pour lors estoit souz l'obeissance des Pola-
 ques, & s'en estoyent emparez. Miecislau ne se vou-
 lut point amuser à assieger leurs places & forteresses,
 mais se iettant sur le plat pays, pilloit les villages, &
 les fauxbourgs des villes de defence, dont il emme-
 na grand nõbre de prisonniers & de bestail. Cela faiet
 retourna au logis, & licencia son armee. Mais cõme
 les Pomeraniens se fussent aussi reuoltez, la rassembla
 derechef, & leur alla faire la guerre, menant avec luy
 Andre, Bela, & Leuenta Hõgres, enfans de Ladislaus
 le Chauue, & cousins germains du Roy Estienne, a-
 pres la mort duquel ils s'estoyent retirez en Poloi-
 gne, pource que Pierre fils de la soeur dudict Estiẽne
 s'estoit faisi du royaume. Miecislau doncques estãt
 venu aux mains avec les Pomeraniens, en eut la vi-
 ctoire, & feit decapiter ceux qui se trouuerent auoir
 esté auteurs de la rebellion, car leur chef estoit de-
 meuré en la bataille: où Bela se porta fort vaillam-
 ment, & mōstra bien l'excellẽce de sa vertu & proues-

se. Ce qui fut cause que le Roy luy donna l'vne de
 ses filles en mariage, avec la Pomeranie pour son a-
 panage. De tous les autres affaires du Royaume
 Miecislau ne s'en donna pas grand peine de là en a-
 uant, & ne se soucia onques depuis de recouurer ce
 qu'il auoit perdu. Mais cõme tout endormi en oy-
 siuete & paresse, se laissa aller negligemment aux vo-
 luptez & excez de la bouche, & des femmes qu'il ha-
 toit outre la sienne: cõbien toutesfois qu'elle le ma-
 niast à sa volõte, & q̄ toutes choses passassent par ses
 mains. De là en auãt le Roy se trouuãt de pl^{us} en plus
 aliené de son bon sens, elle qui estoit importune, en-
 treprenante & auare outre mesure, empietra facile-
 mēt toute l'authoritẽ & administratiõ du royaume,
 dont elle s'acquit vne grande hayne & indignation
 du peuple, lequel desia estoit assez mal affectionné
 enuers elle & son mary. Mais il mourut incontinent
 apres de ceste maladie, l'an 1034. Et fut enterreé à
 Posnanie. Homme lourd, grossier, & paresseux,
 de peu d'entendement, & d'vne legerete plus qu'en-
 fantine, ayant accoustumé d'adiouster plustost foy
 au conseil des ieunes gens, & de sa femme, que des sa-
 ges & aduisez. Aussi vint il bien tost en mespris &
 contennement & des siens & des estrangers, tant a-
 mis comme ennemis. Il regna neuf ans seulement, &
 en vescu quarante quatre. Aucuns veulent dire qu'
 en vn abouchement qu'il eut avec les Bohemes, il fut
 echarmé ou empoisonné, pour le rendre impuissant
 d'auoir lignee, & qu'il mourut bien tost apres son
 pere.

CASIMIR.

VN seul fils Casimir estoit demeuré de Micisslaus, à la naissance duquel aduint vn tremblement de terre, chose si rare & si nouvelle par toute la Pologne, pour estre ainsi esloignee de la mer, que toutes les fois que cela aduint, on le tient pour vn signe & prodige de quelque grad chose auenir. Et d'autant que Casimir n'estoit pas encores en aage pour porter le faiz du gouuernement & administration des affaires, les Seigneurs du pays qui à ceste fin s'estoyēt assemblez en la ville de Gnesne, arresterent de remettre le coronnement du nouveau Roy à vne autre fois. Cependant la Royne manioit tout, mais d'vne façō fort dure & estrange. Car elle chargeoit insupportablement de nouveaux subsides & imposts les pures suiets & laboureurs, aussi bien des heritages & possessions du Roy, que des particuliers: & mesprisoit avec ce les plus grans du royaume, de telle sorte qu'elle faisoit toutes choses, sans appeler autres au conseil, que ses Alemans qu'elle auançoit & introduisoit au lieu de ceux du pays, ce qu'ils ne pouuoient bonnement comporter. Et luy remonstrerent qu'elle deuoit auoir plus de respect à ceux par le sang & armes desquels le royaume estoit gardé & deffendu, qu'aux estrangers, qui n'y auoyēt que veoir ne que cognoistre. Mais quand ils apperceurent que cela ne profitoit de rien, ils commēcerent à murmurer, voire à dire tout ouuertement, que la conuoitise & ambitio de ceste femme ne se deuoit pas toller: car il n'estoit pas raisonnable qu'un peu-

ple si magnanime fut ainsi outrageusement traicté d'vne estrangere. Parquoy elle craignant qu'on ne luy iouast quelque mauuais tour, commença à deliberer de sa retraicte. Et s'estant saisie de tout le thresor, avec les deux coronnes dont on coronnoit les Roys & les Roynes, & infinis autres riches & exquis besongnes d'ineestimable valeur, se desrobba secrettement par lieux secrets & desuoiez, tant que saine & sauue, sans aucun empeschement elle paruint en Saxe. Oū aussi tost qu'elle fut arriuee elle achepta de l'Empereur Conrad les villes de Magdebourg & de Brunfuich, avec leurs appartenances & deppendances, ou bien les eut en don & récompēse des presents qu'elle luy fit. Casimir d'autre costé voyant comme les choses se portoyent, se retira en Hongrie deuers le Roy Estienne son parent, & delà en Saxe vers sa mere. Par la permission de laquelle il s'en vint aux estudes à Paris, puis s'en alla veoir l'Italie, & finalement se rendit moyne à Cluny. Cependant pour l'absence de la Royne & de son fils, toutes choses commencerent à aller sans dessus dessous dans le pays, à s'entretuer les vns les autres, les grans chemins à se remplir de brigans & volleurs, brusler villes & villages, tout estre plain de tumultes & seditions, le peuple s'armer contre la noblesse & ses superieurs, & selon ce que chacun se monstroit plus temeraire & audacieux, aussi estoit il mieux suyui & accompagné à exercer de plus grandes cruautez & forfaites. Les gēs d'eglise mesmes estoyent aussi peu espargnez que les autres. Et les lieux saincts & sacrez non plus respectez que les prophanes: bref n'y auoit rien de seur

quelque part que ce fust. Rien de propre à personne: personne ne se pouuoit exēpter de ces maux. Et desia Maslaus ou Masos homme puissant, qui auoit esté eschāson du Roy Miecillaus s'estoit emparé de la cōtree de Plocence. Et se renforçoit de iour à autre par le moyen de ceux qui continuellement se venoyent rendre à luy, tellement qu'à vn instant il eueut à tel pouuoir & autorité, que son nom demeura à la Prouince, qui fut depuis appelee Masouie. Tous ces maux & calamitez domestiques, estoient encores fuyuis & accompagnez des courses & inuasions cōtinuelles que Iaroslau Duc des Rutheniens, & Predeslaus Prince de Bohemé faisoient dans le pays. De maniere que les Polagues apres auoir esté ainsi tormentez par l'espace de six ans entiers, craignans d'estre reduits à vne plus grande ruine, & que le Royaume au parauant si riche & si fleurissant ne vint à souffrir quelque dernier naufrage, commencerent lors à se rechercher les vns les autres de paix & con corde, mettre en arriere leurs pattialitez & dissenti ons, pour aduifer du salut & conseruation de l'estat. Et à ceste fin feirent denoncer vne iournee à Gnesne, où ne se trouuans point bien d'accord touchant le Roy qu'ils auoyent à eslire, conuindrent tous à la fin, & s'arresterēt là, qu'il failloit s'enquerir où estoit Casimir, & l'aller querir, l'appaiser, & le ramener en quelque sorte que ce fust. Ayans doncques esté deputé certain nombre d'Ambassadeurs, des premiers & plus grans de toute la compagnie, ils s'en allerent premierement deuers la Roynne. Et de là s'acheminèrent à Cluny, où ils trouuerent Casimir qui auoit

*grand du
Gaulois & luy*

*ambassadeurs
Casimir
le premier*

changé de nom, & s'appeloit Charles, lequel estoit non seulement Religieux profes, mais encores promoteu & aduancé aux ordres de Diacre. Là ils se voulurent excuser enuers luy des choses passées qu'ils reiettoyent la plus grand part sur la Roynne, le suppliās d'auoir pitié de son pauure Royaume ainsi affligé, voire quasi du tout destruit: à ce qu'il luy pleust le reprendre en main, & le preseruer de sa totale & derriere ruine & desolatiō. Qu'en luy seul les Polagues auoyent toute leur esperance, dont s'ils estoient exclus & refusez, ils ne voyoyēt point qu'ils ne fussent perdus entierement. Là dessus les larmes aux yeux, il leur respondit fort gracieusement, que de luy il ne leur imputoit point la cause de son exil, mais au secret iugement de Dieu, qui en auoit voulu ainsi disposer. Qu'il auoit grād regret & compassion de leurs maux, mais qu'il n'estoit plus à soy, ains souz le pouuoir & commandement d'autruy, ne pouuant plus se departir de ce qu'il auoit desia voüé & promis à Dieu, & à ses superieurs, sous l'obeissance desquels il estoit.

De ce langage les Ambassadeurs se trouuans merueilleusement contristez & esperdus, s'adresserent à l'Abbé, & luy feirent les mesmes remonstrances & requestes: mais il les reietta, & renuoya au Pape, qui auoit puissance d'en disposer, & non luy. Eux doncques sans se foucier de la longueur, difficulté, & empeschemens des chemins, s'en allerent à Rome, où ils feirent tant par leurs remonstrances & importunitiez enuers le Pape Benoit huictieme, qu'ils obtindrent de luy la dispēce de leur prince Casimir,

Page 4. 1. 1. 1.

*L'ambassade
à Rome
le 4. 1. 1.*

à ce que nonobstant sa professiō & ses ordres, il peut reprendre son Royaume, & se marier. En recognoissance dequoy les Polagues feirent present au siege Apostolique d'une taille qui se leueroit sur eux, asçauoir vne obole pour chacune teste, exceptez les Gentils hommes & gens d'eglise, pour estre à tousiours leuee & employee à l'entretienement d'une lampe en l'eglise de S Pierre à Rome. Dont depuis cela a esté appelé le denier de S. Pierre. Vouèrent & promirent quant & quant que delà en auât ils se feroient tous couper les cheueux en rond, ainsi que les portent les moynes, & ne seroit loysible à personne de les auoir au dessouz de l'oreille. Car selō la coustume des Barbares ils nourrissoient leurs perruques tout aussi longues comme elles pouuoient croistre. Et d'auantage qu'aux iours de feste, les Gentilshommes porteroient durant le diuin seruice vne grande escharppe de toile blanche, pendue au col, en la sorte que les Diacres portent leur estole. Et ainsi à grand ioye & contentement s'en retournerent à Cluny, & emmenerent Casimir, premierement deuers sa mere, & de là en Poloigne, accompagné de six cēs cheuaux que l'Empereur Henry luy donna pour sa garde & conduite. Tout incontinant qu'il fut arriué dans les cōfins de son Royaume, vne infinie multitude de peuple vint au deuant de luy à grans cris & acclamatiōs de ioye, dansant, sautant pour l'heureux retour de leur naturel seigneur, & se prosternans à ses pieds luy requeroient pardon de la faute commise enuers sa maiesté. Luy d'autre costé les larmes aux yeux les reconfortoit à ce qu'ils ne se dōnassent peine des choses

les

ses passees, car ils n'en deuoient craindre aucun mauvais traitement pour l'aduenir, d'autant que tout cela estoit desia oublié, & ainsi en grand triumphe, & allegresse de tous, arriua en la ville de Gnesne, où il receut la couronne.

Tout incontinant apres, il se meit à penser & guerir les playes de son pauvre & desolé pays: & auant toutes choses par edict public, voulut que toutes haynes, rancunes, inimitiez, querelles, partialitez & dissensions fussent assopies & mises souz le pied. Feit aussi punir non toutesfois aigrement pour ce coup, quelques vns qui se monstroyent vn peu durs à se retirer de leurs voleries & destrouffemens accoustumez, afin d'en intimider les autres. Puis à la persuasiō & requeste du Senat, pour mieux pacifier toutes choses fait paix & alliance avec Iaroslau Duc des Rutheniens, prenant à femme sa sœur Marie, la mere de laquelle estoit sœur des Empereurs de Constantinople, & en eut vn gros & riche mariage. Elle fut doncques fort magnifiquement accompagnee & conduite iusques à Cracouie. Delà il la mena à Gnesne, où elle fut coronnee, apres auoir laissé les traditions des Grecs, & receu celles de l'Eglise Catholique Romaine, & au lieu de Marie fut nommee Dobrogneue.

L'annee ensuyuant, il mena son armee contre les Masouiens, qui faisoient de grans maux dedans ses pays. Mais Maslaus l'usurpateur ayant de son costé assemblé ses forces, ne fit point le retif: car tout incontinant il luy vint presenter la bataille, où les Masouiens furent deffaits, & contraincts de venir à mercy. Quant à Maslaus, il se sauua à la fuite, & se re-

h

Apres doncques que de tous costez le Royaume de Poloigne eut esté remis en son premier estat & dignité, & toutes choses pacifiées & bien establies: Casimir se souuenant de sa condition & vie monastique, pour monstrer que de la seule bonté diuine il recognoissoit les victoires qu'il auoit obtenues contre Massaus & les Barbares, despescha vne magnifique ambassade à Cluny, avec force beaux & riches presens, pour leur faire entendre la grace que Dieu luy auoit faicte, & les supplier de l'auoir toujours pour recommandé en leurs deuotes prieres & oraisons: luy voulloit aussi enuoyer quelque nombre de leurs religieux pour en peupler son royaume. Ce qu'ils feirent, & luy en donnerét iusqu'à douze, lesquels il meit partie au chasteau Triuecien, à vne lieuë de Cracouie, sur la riuere de Viistule: & leur donna plus de cent gros villages pour leur entretenement. Le reste il les enuoya en la ville de Lubense sur la riuere Dodre, & leur assigna semblablement plusieurs villages, censés, mestairies, & autres reuenus & domaines, faisant aux vns & aux autres bastir des Eglises & Conuents, & deliurer tout ce qui estoit necessaire, tant pour le seruice diuin, que pour leur vsage. Il feit encores infinies autres belles choses tresutiles pour l'exaltation & maintenement de la foy, & des commoditez publiques. Et tint son Royaume tant qu'il vescu en si grande paix & repos, que delà il obtint le ritre de *Restaurateur pacifique*. Il eut de sa femme Dobrogneue quatre enfans masses, Boleslaus, Vuladiflaus, Miescho, & Otho, avec vne seule fille Suentochna. Otho du viuant du pere encores ieune enfant,

& Miescho vn peu plus grandet, huiët ans apres la mort d'iceluy decederent. En fin Casimir l'an 18. de son regne tomba malade, & apres auoir esté fort trauaillé vn moys durant, le 28. iour de Nouembre, l'an 1058. ayant receu tous les Sacremens, passa de ce monde en l'autre, au tresgrand regret de tous. Car à la verité il auoit esté vn tresbon, sage & debonnaire Prince. Il fut enterré en la ville de Posnanie. Et sa fut mort anôcée par vne Comete qui apparut quelques iours au parauât, tout ainsi comme sa naissance auoit esté accompagnée d'vn tremblement de terre. Ainsi ce Prince fut illustré de deux bien notables signes, lesquels Conrad Licosthenes a remarquez en son liure des Monstres & Prodiges.

BOLESLAUS II.

Les Estats assemblez en la ville de Gnesne, Boleslaus, fils aîné de Casimir fut sans aucune remise ny difficulté coroné Roy au grand plaisir & contentement de tous, combien qu'il fust encores fort ieune, car il estoit d'vn naturel si vif & si prompt, si liberal & courageux, cupide de gloire & honneur sur tous autres, qu'on ne pouuoit esperer de luy, sinon toutes grandes choses à l'aduenir. Aussi dès les trois premieres années de son regne se vindrent rendre à luy trois grands & illustres personages, qui luy apprestérét l'occasion de plusieurs belles & glorieuses entreprises, comme il sera dit cy apres. Ceux cy furent Izasslaus prince des Kiouiens, fils de Iarosslaus, frere de la Roynie Dobrogneue: Bela Prince de Hongrie, frere du Roy André: & Iaromir

fils de Predislaus Duc des Bohemiens, à tous lesquels
 Boleslaus donna tel ayde & secours qu'il leur fut be-
 soin pour rentrer en leur heritage. Mais Vuratisslaus
 Seigneur de Boheme, indigné que son frere eut esté
 ainsi receu en Poloigne, craignant qu'avec l'ayde &
 support qu'il en pourroit auoir, il ne luy fait beau-
 coup d'ennuy & fascherie, voulut preuenir: & se mit
 le premier aux champs, entrant avec son armee dans
 la Poloigne. Où il ne fit pas long sejour, quant il fut
 aduerti que Boleslaus le venoit trouuer, d'autant
 qu'il cognoissoit assez la puissance des Polagues, &
 ne voyoit pas que ce fust son profit de venir aux
 mains avec eux.

Parquoy il se retira de bonne heure afin de prou-
 uoir aux affaires qui luy venoyent desia sur les
 bras. Car Boleslaus ne l'ayant peu attaindre, s'e-
 stoit mis à piller & saccager son pays, & se prepa-
 roit pour luy faire encores vne plus forte guerre l'an-
 nee d'apres. Mais il fit tant par le moyen de ses a-
 mys, qu'il eut la paix, prenant en mariage pour mi-
 eux asseurer les choses, Suentochua sœur de Boles-
 laus.

Cependant les Prussiens ne faisans point de cas de
 Boleslaus à cause de son ieune aage, aussi qu'ils le
 voyoyent bien empesché, ce leur sembloit, apres ce-
 ste guerre de Boheme, se reuolterent. Et passans la
 riuiere de Vistule, entrèrent dedans la Pomeranie,
 où ils fortifierent le chasteau de Grodec, pour leur
 seruir de retraicte: car ils sortoyent tous les iours de
 ce lieu sur le plat pays, où ils faisoient de grands
 maux & pilleries. Boleslaus tout incontinant s'y a-

chemina avec son armee. Mais quand il veit que ce-
 ste place ne se pouuoit auoir de force, il aduisa d'vser
 de quelque ruse & stratageme. Faignant doncques
 de s'en retourner, s'arresta tout court en des forests
 & lieux couuerts, non gueres loing de là. Tellement
 que les ennemis le cuidans estre desia bien aduancé,
 sortirent en campagne, en intention d'aller faire
 quelque raffle dans la Poloigne. Et comme ils se fuf-
 sent acheminez assez auant, Boleslaus sortit de son
 embusche, & les vint enuelopper par le derriere, lors
 qu'ils ne se doutoyent de rien, tellement qu'apres en
 auoir mis à mort la plus grand part, il remit le reste à
 son obeissance.

La guerre de Hongrie suyuit incontinant celle
 de Prusse. Car Boleslaus pressé des prieres & reques-
 tes de Bela & de sa femme, tante d'iceluy Boleslaus,
 entreprit de les remettre en leur Royaume. Par-
 quoy il entra dedans le pays par trois diuers en-
 droitcs tout à vn coup, ayant en sa compagnie ledict
 Bela, auquel plusieurs Hongres se venoyent iour-
 nellement rendre, de sorte qu'on en fait encores vne
 quatrieme troupe. André Roy de Hongrie de son
 costé ne s'endormit pas, mais leur vint brauement
 à l'encontre, iusques à la riuiere de Tibiscus ou Of-
 sa, avec vne grosse armee de Hongres, Alemans, &
 Bohemes.

Se confiant doncques là dessus, vint passer la ri-
 uiere à leur veüe, & leur presenter la bataille, que
 les Polagues ne refuserent point. Là fut tres vaillam-
 ment combattu d'vne part & d'autre par vne bonne
 espace de temps, & sans aucun auantage, mais à la

fin les gens d'André commancerent à s'esbranler & ouvrir, au moyen dequoy les Hongres qu'il auoit de son costé passerent à Bela. Et les Alemans & Bohemes ainsi abandonnez, ne la feirent pas longue apres qu'ils ne se missent en fuite, où il y en eut grād nombre de tuez & de pris. Et entre autres Vuratislaus avec les chefs & colonnels des Alemans. Quant au Roy André ayant passé plus auant, il fut à la fin accōsuyui aux portes de Mosouie, & là pris par les Hongres mesme, desquels il fut si mal traité, qu'il en mourut en la forest de Voconie.

Après ceste victoire Boleslaus alla remettre Bela en son Royaume, en la ville d'Albe royale, où il eut de grans dons & presens de luy, pour departir à son armee, laquelle il remena en Poloigne. Puis aux prieres & instance des Seigneurs du pays, il prit à femme vne ieune Damoyelle d'excellente beauté, nommee Visseslaue fille vnique & heritiere d'un Prince de Ruffie. Puis s'en alla remettre Izasslaus son allié en la seigneurie de Kiouie, dont Visseslaus l'auoit debouté. Cela fait departit son armee deçà & delà en garnison, & luy seulement avec quelques vns qu'il voulut retenir aupres de soy, passa le reste de l'Esté, & tout l'hyuer encores en la ville de Kiouie, attiré de la plaifance du lieu, & des bonnes cheres qui s'y faisoient. Mais sur le renouueau il sortit de fort bone heure à la campagne, & se ietta dans le territoire des Premilliens. S'il feit cela pour se venger de quelque desplaisir qu'ils luy eussent fait, ou pource que s'estoit l'heritage de sa femme, ou bien pour le seul desir & conuoitise de dominer, on n'en scauroit que dire à la verité.

verité. Comment que ce fust il se faist de plaine arriuee de toutes les villes & places non fortes. Mais quand ce vint à celle de Premillie, qui du costé de Septentrion estoit close de la riuere de Saue, & par tous les autres endroiets fortifiée d'un bon & large fossé, avec le rampart de mesmes par le derriere, il y trouua que faire & que dire: car elle estoit quant & quant garnie de grand nombre d'hommes, tant des habitans, que des Gentilshommes, & autres du pays d'alentour, qui s'estoyent mis à sauueté là dedans: d'auantage à vn des coings y auoit vne citadelle bié forte, qui commandoit quasi par tout. Nonobstant tout cela Boleslaus ayant passé la riuere à gué, combien qu'elle fust assez profonde & dangereuse: & que les Rutheniens se fussent mis en deuoir de les empescher, vint si brauement assaillir la ville & d'un tel effort, que ceux de dedans voyās qu'à la longue ils ne pourroyent durer, l'abandonnerent, & se retirerent au chasteau, apres auoir resisté autant qu'il leur fut possible. Parquoy Boleslaus entra dedans le quatrième iour apres son arriuee. Il y trouua infinité de richesses avec force viures & autres commoditez, qu'il donna tout en proye & pillage à ses soldats. Et se mit à ferrer & enclore de tous costez la forteresse, en esperance de l'emporter par famine, car il y auoit grand nombre de gens plus que de l'ordinaire, à cause de ceux qui s'y estoyent sauuez, & n'auoyent pas des viures à suffisance, neantmoins ils enduroyent fort constamment & d'une grande opiniastrété toutes ces difficultez, iusqu'à ce que les bestes par faute de fourrage vindrent toutes à mourir: & de là vne pe-

ste à se mettre parmy eux, dont ils furent finalement contraints de se rendre sur la fin de l'Esté: leurs vies sauues seulement, avec ce que chacun pourroit emporter sur luy, & non d'auantage. Le Roy y passa puis apres tout l'hyuer ensuyuant, qui fut l'an 1069.

Celle mesme année Boleslaus remeit aussi les enfans de Bela, qui estoient encores en Poloigne, en certaine portion du Royaume de Hongrie: à telle condition, que Salomō fils du Roy André (que l'Empereur Henry quatrieme son parent, taschoit de restablir, apres la mort d'udit Bela,) auroit le titre Royal, avec les deux parties du Royaume, & eux se contenteroyent de la troisieme, avec le nom de Duc seulement. Puis apres Boleslaus ayant trouué à son retour que Izaus auoit esté mis hors de Kioie, l'Esté ensuyuant mena son armee en la terre des Voliniens, où il meit le siege deuant la ville de Luschi, qu'elle soustint par six mois entiers. Et au dernier n'en pouans plus se rendre par composition, leurs vies & bagues sauues.

L'année suyuant Boleslaus s'achemina vers Kioie, & Vvissuoldus de son costé avec vne grosse armee qu'il auoit amassée, tant de ses forces, que de celle de ses freres luy vint au deuant, où il y eut vne grosse bataille. Mais les Rutheniens ne peurent longuement supporter le faiz des Polaqes, ains se meirent à la fuite, quel que deuoir que Vvissuoldus feist de les rallier & retenir. Parquoy il fut contraint de les suyure, & laisser à Boleslaus plaine & entiere victoire, non toutesfois sans grand perte de ses gens, dont il fut contraint de raffreschir le reste par quel-

ques iours sur le lieu mesmes du combat. Puis tira outre vers Kioie, en deliberation d'y mettre le siege, toutesfois se voyans pressez de viures, ils vindrent à mercy, & rendirent la ville à Boleslaus. Lequel ainsi qu'il estoit à l'entree de la porte, desgaina son espee: comme si par cela il eust voulu monstret qu'il la prenoit en sa protection & sauuegarde. Aussi sur l'heure mesme il fait deffendre tres expressement qu'on n'eust à faire tort ny iniure à personne, & pour cōtenter ses soldats, leur fait departir l'argent à quoy les habitans de leur bon gré s'estoyent cottizez.

La Russie estant ainsi pacifiée, Boleslaus meit des tributs & impôts par tout, non seulement en deniers, mais de toutes choses necessaires pour l'usage de l'homme, & laissa à Izaus l'entier gouuernement du pays. Quant à luy, afin qu'il y peust mieulx establir son empire, & rendre sa domination plus seure & autorisée, ou bien pour pouuoir plus longuement iouyr des plaisirs & bonne chere qu'il y auoit goustées à l'autre voyage, delibera d'y passer son hyuer. Mais cependant il ne s'aduisoit pas que ses gens se perdoyent apres les delices & allechemens d'une desbauchee & voluptueuse cité. Que de fiers, robustes, bien disciplinez, & endurcis qu'ils estoient, venoyent à se rendre mols, flagues, languides, & effeminez. Et que ceste armee victorieuse de tant de peuples & nations, de soy mesmes abaiffoit les enseignes, & ioignoit les mains aux lasciuetez & dissolutions de ses propres serfs & esclaves. Ce qui fut cause de plusieurs grands maux, qui depuis embroulerent bien la Poloigne. Car ce-

pendant que les Polagues estoient comme attachés aux friandises & desbauchemens de Kiouie, sans espargner aucune sorte de plaisirs, voire les plus nouueaux & inusitez entr'eux: leurs femmes & leurs filles qu'ils auoyent laissées à la maison (il y auoit tantost sept ans) ne pouuans supporter vne si longue absence, ioinct qu'ordinairement leur venoyent nouuelles, (& assez plus qu'elles n'en eussent voulu sçauoir), de la vie de leurs maris, commencerent de leur costé à iouer leurs ieux, & leur rendre la pareille. Toutesfois parmi cela se monstra vn exemple de vertu & pudicité fort notable, en Marguerite femme du Conte Nicolas de Zembocine, laquelle craignât qu'un tas de folastres ieunes gens qui furetoyent partout, n'apportassent quelque scandale à son honneur, se referra dans le clocher du lieu où elle demouroit, avec deux de ses sœurs, où par vn long temps elle demeura cachée, se faisant donner par vne corde, ce qu'il leur failloit pour leur viure. Comme doncques toutes ces choses eussent esté rapportees aux Polagues qui se hyuernoient à Kiouie & es enuirons, la plus grand part commença à gronder: principalement ceux à qui il sembloit que le cas touchast de plus pres, & vindrent demander congé à Boleslaus. Mais ne le pouuans auoir, s'en allerent à la desrobee par petites troupes du commencement, puis en plus grand nombre: tant que le Roy estoit en danger de demeurer seul. Au moyen dequoy craignant que les Rutheniens pour le veoir ainsi peu accompagné, ne luy iouassent quelque mauuais tour, se mit aussi en chemin pour retourner à Cracouie, où il ne fut pas

plustost arriué, qu'il fit decapiter tous ceux qui auoyent esté auteurs de ceste retraicte: les autres il les punit ou de confiscation de leurs biens, ou de prison, & n'espargna non plus les femmes qui se trouuerent auoir donné occasion de faire retourner leurs maris, encores qu'eux leur eussent pardonné tout ce qu'elles auoyent fait durant leur absence, attendu la fragilité de leur sexe, & aussi qu'ils sçauoyent bien leur en auoir donné occasiō. Mais Boleslaus les chastia d'une façon bien estrange. Car on dict que leur ayât fait oster les enfans qu'elles auoyent eu illegitimement & en adultere, leur fit donner des ieunes chiées pour les allaiter. Meit avec cela de grandes charges & impositions sur le commun peuple, ne se souciant plus de faire iustice, ny d'ouyr les plaintifs de ses pauures suiets, & encores moins de punir les torts & iniures qu'on leur faisoit, & s'addonna du tout à des plaisirs assez ords & infames dont il ne relaschoit riē. Car entre autres choses il osta de force vne Damoyelle nommee Christine, à son mary Miecillus, laquelle il entretenoit publiquement.

Meit de cecy (comme il estoit bien raisonnable) Stanislaus Euesque de Cracouie, homme de bien, & de noble maison s'en vint trouuer le Roy. Et l'ayant tiré à part, luy remonstra combien telles façons de faire estoient desplaisantes à Dieu, & indignes du lieu qu'il tenoit: que s'il ne s'en retiroit, il se braseroit quelque grand malheur, tant pour luy, que pour tout le Royaume. Car cōbien que le peché fust tousiours de soy fort grand & detestable, il l'estoit toutesfois beaucoup plus en vn Roy, qu'en vne person-

ne priuée, d'autant qu'il est exposé à la veüe d'un chacun, qui prend garde à ses actions & comportements ausquels facilement il se range, & y prend exemple. Au moyen dequoy de tant plus qu'il est grand & puissant, qu'il est heureux & bien fortuné, de tât plus aussi doit il tascher de rendre sa vie pure, nete & irreprehensible enuers Dieu s'il est possible, à tout le moins enuers les hommes. Que s'il ne le faisoit, il estoit à craindre que la diuine Maiesté ne s'irritast contre luy, & du haut degré où il estoit constitué, ne le precipitast en quelque abyssme de calamité & misere, & finalement ne luy changeast ses plaisirs & voluptez de petite duree, en peines & tourmens perdurables. Toutes ces saintes & gracieuses remōstrances n'eurent aucun lieu enuers le Roy, au contraire irrité au possible, vint aux iniures & menaces contre le bon Prelat. Et pource qu'il sçauoit assez qu'il estoit bien malaisé de le calumnier, & qu'il ne se pourroit rien trouuer contre luy, il s'aduisa de l'assaillir par un autre endroict. Quelques trois ans au parauant Stanislaus auoit acheté le village de Petravine, en la contrée de Lubline, d'un Gentilhomme Polonois appelé Petrique, lequel en auoit receu l'argent, mais il estoit mort depuis. Cependant Stanislaus tant pour occasion de la guerre, que des vacatiōs, n'auoit sçeu faire insinuer son contract, ny satisfaire à quelques autres formalitez vsitées au pays, ainsi qu'il luy estoit requis pour sa seurte. Dequoy fut incontinent aduerti Boleslaus par les flatteurs. Prenant doncques ceste occasion en main, suscita les parés de Petrique, pour faire appeler l'Euesque, en quoy il leur promettoit

son ayde & faueur. Eux tât pour obeir à la volôté du Roy, que pour l'esperance du profit qui se presentoit si inopinément, firent tout ce qui leur estoit ordōné. Or il aduint q̄ suyuāt l'anciēne coustume le Roy deuoit tenir ses iours, qu'on appelle les Colloques & termes generaux, soubz les tentes & pauillons, en la prairie qui est entre Solecie & Petravine, où l'Euesque ayāt esté adiourné ne faillit de comparoir, & dict auoir acheté le village, & l'auoir payé de ses deniers, & là dessus produict ses tesmoins, mais ayans esté intimidés par le Roy, personne n'osa déposer. Dequoy se trouuant tout confus le pauure Stanislaus, & en un extreme ennuy, non tant pour crainte de perdre l'heritage, comme pour la playe & interest qu'il voyoit par là estre brassée contre son honneur, entreprit vne chose incroyable, & surpassante toute puissance humaine. Car ayāt demadé terme de trois iours seulement, il s'en alla à Petravine, où le Gentilhomme auoit esté nagueres enseuely. Et là ayāt employé ces trois iours en cōtinuels ieusnes, prieres, & oraisons, & en grāde afflictio d'esprit, inuoqué l'ayde & misericorde de Dieu, s'en alla au tombeau, où d'une grāde foy vint à toucher le corps ainsi puant qu'il estoit, luy commandant au nom du Pere, du Fils, & du S. Esprit de se leuer. Ce qu'il fit incontinent, & le mena Stanislaus deuant le Roy, où il confessa auoir vendu le village, & receu l'argēt, le ransant asprement d'auoir ainsi iniustement trauaillé ce personnage. En telle maniere Stanislaus gaigna sa cause. Delà s'en retournāt avec Petrique, le mit en choix de demeurer encor en ceste vie, ou retourner en l'autre: il respōd q̄ l'eternel-

le luy estoit plus agreable, que ce peu qui luy pou-
uoit rester de la presente, pourueu qu'il luy pleust
par ses prieres & oraisons impetrer la remission du
temps qui luy restoit encores de sa penitence. Ce que
l'Euesque luy ayât accordé, de son bon gré il retour-
na à sa sepulture, & là derechef rendit l'esprit. Tous
ces miracles n'amollirent de rien le cœur de Bolesla-
us desia trop endurci en son peché, mais s'aigrit d'a-
uantage contre Stanislaus. Lequel d'autre costé voy-
ant son obstination, & qu'il ne se vouloit ny amen-
der, ny recognoistre, commença à proceder plus ri-
goureusement & vser de sa puissance & autorité.
Car il interdit le seruice diuin par tout le royaume,
afin que la clameur du peuple, (qui ne faudroit se
voyant ainsi priué de la pasture spirituelle, de crier &
tempester de toutes parts) l'intimidast, & fait venir à
correction. Boleslaus irrité, ne cherchant sinon l'oc-
casion de le mettre à mort, le faisoit continuellemēt
espier: tant qu'un iour ce pauvre homme s'en allant à
petite compagnie, & encores de Prestres, & gēs d'E-
glise, chanter la messe en l'Eglise S. Michel, qui est au
haut du rocher sur la riuere de Vistule, viz à viz du
Palais, il enuoya apres quelques Archers de sa garde,
lesquels tout aussi tost qu'ils eurent le pied dans l'E-
glise furent tellement esblouys d'une lumiere qui
leur vint donner dedans la veuë, qu'ils furent portez
par terre. Le Roy l'ayant entendu, y en enuoya d'au-
tres, & d'autres encores: tant qu'à la fin outré de co-
lere & impatience, il y alla luy mesmes l'espee au
poing, dont il donna à trauers la teste de ce pauvre
martyr si rudement qu'il le coucha mort à ses pieds,
& la

& la ceruele en volla contre la prochaine muraille.
Ses gardes se ruans soudain sur le corps en feirēt plu-
sieurs pieces qu'ils ietterēt là bas dans la prairie pour
seruir de pasture aux bestes & oyseaux. Mais Dieu ne
le permit pas: car on dit que quatre Aigles d'une grā-
deur non accoustumee se presenterent tout inconti-
nant pour le deffendre, & y demurerent deux iours
entiers, iusques à ce que les prestres festans aucune-
ment rassurez vindrent enleuer les membres escar-
tez çà & là. Lesquels ayans esté rassemblez, & mis en
leur ordre & assiette, miraculeusemēt se reprindrent,
comme quāt il estoit en vie, & ainsi l'enterrerēt. Ce-
cy aduint le huitiesme iour de May, 1079.

Toutes ces choses furent incontīnāt sceuës à Ro-
me. Parquoy le Pape Gregoire 7. enuoya deffendre
& interdire le seruice diuin par toute la Poloigne, &
excōmunia quant & quant de grandes & espouuen-
tables execrations Boleslaus, le priuāt du Royaume.
Toutesfois il regna encores vn an depuis, mais mal
voulu au possible de tout le peuple, & encores plus
desdaigné des estrangers: tellemēt que les Rutheniēs
tant de fois par luy subiuguez, vindrent à se rebeller.
Il y eut aussi quelque coniuration contre luy, ce qui
fut cause qu'il se retira en Hōgrie, à bien petite com-
pagnie, avec son fils Miesco, & fut là le fort biē venu
du Roy Ladislaus, frere de Geisa, qui auoit esté par
luy remis en son estat. Mais cōme vn remors de con-
science d'un si cruel forfait par luy commis luy fust
continuellement deuāt les yeux, & saugmentassent
de iour à autre les furies qui le tourmentoyent, ou-
tré de rage & desespoir se donna luy mesme la mort,

l'an 1081. qui fut fort notable & remarquée, pour les grandes chaleurs & seichereffes qui lors regnerent. Aucuns ont voulu dire qu'il se desroba secrettemēt, & sen allant vagabond deçà & delà, paruint à la fin à vn Conuēt de Religieux, pres la ville d'Enipont, ou de Vvilhac dans les montagnes, où pour penitence il employa le reste de ses iours au seruice de la cuisine. Et ainsi en grand mesaise peine & trauail fina sa vie. Il auoit autrefois acquis le tiltre de hardy & liberal, qui luy demeura encores apres sa mort. Au demeurant il regna vingtdeux ans, estant venu à la couronne qu'il n'en auoit pas seize accōplis, & ediffia le monastere de Mogilne, où il meit des religieux de l'ordre saint Benoit: Brief qu'il fut en son tēps vn brave, excellent, & tres heureux Prince, fil n'eust abusé de la fortune qui luy auoit tousiours esté si favorable, & ne se fust point desbauché & rédu si insolent. A la verité c'est chose bien plus difficile, mais aussi plus digne de louange & recommandation, de commander à soy mesmes, & dompter ses passions, coleres, & concupiscences, que de dominer & tenir en subiection les plus feroces & superbes nations qui puissent estre.

VVLADISLAUS.

BOLESLAUS ainsi ietté hors de son Royaume, le conseil ne peut auoir si tost le moyē de remettre les choses, & prouoir à ce qui estoit necessaire pour la seureté de l'estat: que les Rutheniens souz la conduite de leur Prince Basile, fils de Roscilaus n'entraissent dans la

Poloigne, mettans tout à feu & à sang. Parquoy les Estats s'assemblerent & meirent le gouvernement es mains de Vvladislaus, autrement appelé Herman frere de Boleslaus. Toutesfois il ne voulut point prendre le nom & tiltre de Roy, fust pource qu'il n'auoit point encores esté sacré & couronné selon la coustume, ou bien qu'il pēfast que son frere deust quelque fois reuenir. Il print seulement le nom de Prince & heritier du Royaume: & certes il se mōstra sage, prudent & debōnaire, plustost toutesfois incliné au repos & à la paix, qu'à la guerre & aux armes. Et auant toutes choses depescha deuers le Pape pour auoir abolition des censures & interdictions qui auoyent esté iettees à raison de l'homicide de l'Euesque Stanislaus, Dequoy eut la charge Lābert, Chanoine de Cracouie, lequel par mesme moyen fut pourueu de l'Euesché, & rapporta la plaine & entiere absolutiō du Royaume. Cela faiēt Vvladislaus de l'opinion & volōté du Senat print à femme Iudith, fille de Vvratisslaus, Prince de Boheme, laquelle n'ayant peu par vn long temps auoir enfans, eut à la fin vn fils comme miraculeusement par l'intercession de l'Abbē S. Gilles. Car son mary & elle se trouuans extrememēt ennuyez de se veoir ainsi sans lignee: elle cōme tresdeuote & religieuse qu'elle estoit, eut recours aux prieres, ieusnes, & aumosnes, à quoy elle estoit continuellement addonnée, implorant la grace diuine. Et finalement par le conseil de l'Euesque Lambert se voia à ce benoist saint, auquel elle enuoya force offrandes & riches presens, à son eglise qui est en Lāguedoc, pres Aigues mortes, où apres que les Moy-

nes eurent ieusné par trois iours, l'un d'entr'eux eut en reuelation que leurs prieres auoyent esté exaucees. Et ainsi s'en retournerent les Ambassadeurs pleins de toute bonne esperance, tellemēt que bien tost apres elle acoucha d'un beau fils. Mais il n'auoit pas encores attraits l'aage de quatre mois qu'elle deceda. Ce fut en son temps vne tres deuote & charitable Princesse, & grande aumosniere, qui employoit ordinairement iusques à ses propres bagues & ioyaux pour nourrir les pauures, pēser les malades, & faire du biē aux eglises. Car elle obtint du Roy son mary le Conté de Croppen pour les Chanoines de Cracouie: le territoire de Lagouic, pour l'Euesque Vvladislaus: & les biens de Xansnicie pour le monastere le tout à perpetuité.

Vvladislaus puis apres à la persuasion & instance de Ladislaus Roy de Hōgrie, se maria avec Sophie, vesue de Solomon aussi Roy de Hongrie, & sœur de l'Empereur Henry quatriesme: laquelle depuis la mort de son mary auoit esté de luy fort honorablement maintenue & traitee. De ceste cy il eut trois filles. Et au mesmes temps il rengea à la raison ceux de Prusse & de Pomeranie, qui s'estoient rebellez. En quoy il fut fort bien seruy de la prouesse & vertu de Secechus Palatin de Cracouie, general de l'armee. La premiere rencontre qu'il eut contre eux, fut le propre iour de l'Assumption nostre Dame, combiē que pour le respect & reuerēce du iour, il eust bien voulu se passer de cōbatre, si n'eust esté prouoqué d'eux, voire force de venir aux mains, mais la victoire luy demeura. L'autre d'apres fut que les Prusiens & Po-

meraniens festans de nouveau reuoltez, Vvladislaus pensoit assopir tout incontinent ce tumulte, qui ne faisoit encores que poindre. Parquoy il les alla trouver à fort petite compagnie: mais quant il eut apperceu leur grand nombre il commença lors à se repentir d'estre venu à si foible & petit equipage. Et les ennemis au cōtraire à reprendre cueur, si que sans marchander, d'une grande furie ils le vindrent charger à l'instant mesmes. Mais les Polagues ne pouuās comporter qu'on les eust veu tourner le doz, non point cōtre quelques braues & redoutables ennemis, mais à des villains, rebelles, & desloyaux esclaves, aymerēt mieux demeurer sur la place, faisant vaillamment le deuoir, que d'abādōner vne si lasche victoire à ceux que par tant de fois ils auoyent mis en fuite. A ceste cause fut tres opiniaistrement combatu d'une part & d'autre depuis le matin iusques au soir, que la nuit separa la meslee: mais les ennemis se retirerent comme vaincus, & les Polagues en signe de victoire demurerēt sur le champ. Cecy aduint la veille de Pasques Fleuries, & pource que la sainte sepmaine approchoit, & qu'il falloit se reconcilier à Dieu, & vacquer à toutes bōnes ceures, ils ne se voulurēt point arrester à les poursuiure dauantage, combien qu'ils les veissent ainsi estonnez, & la plus grand part defaits. Mais bien tost apres Vvladislaus ayāt rasteschy & augmenté grandement son armee, entra à bon escient dans la Pomeranie, où personne ne se presentāt pour luy faire teste, il se meit à gaster le plat pais: & finalement assieger la forteresse de Nakle, pour lors bien remparee & munie pour attendre vn siege.

Ce pendant, toutes les nuicts ceux qui estoient en garde voyoyent apertement à la lueur de la Lune, cōme de grandes troupes & esquadrons de gens armez, courās à toute bride au trauers de la plaine, iusques dedans leurs tentes & pauillons, maugré tous les fossez & tranchees qui estoient au deuant: encores qu'on feist tout ce qui estoit possible pour les repousser. On estime que ce fussent quelques fantomes & esprits nocturnes qui par la permission diuine les venoyent ainsi tourmenter, parce qu'à l'autre voyage tout le long du Careme sans aucun scrupule ils auoyent mágé de la chair, & autres choses prohibees de l'Eglise Catholique durāt ce sainct temps. Au moyen dequoy ils furent contraints de leuer le siege, tant pource que l'hyuer approchoit, que pour la frayeur que ces illusions leur apportoyēt. Toutefois l'esté ensuyuāt ils retournerēt encores, & acheuerent de dompter du tout ces deux peuples, par tāt de fois contumaces & rebelles.

Les Rutheniens & Pomeraniens ayans esté ainsi rangez, Boleslaus s'adressa aux Bohemes, qui s'approprioyēt toute la Poloigne: combien que de droit ils n'y eussent point autāt de terre, qu'on en pourroit seulement couvrir avec la semele du pied. Et pource qu'il se trouuoit pour lors mal disposé, il bailla la charge de l'armée à Secechus Palatin de Cracouie, homme excellent & fort experimenté au fait de la guerre. Cecy fut l'an 1094. quāt Vvladislaus estant apres à depescher Secechus, & luy dōner ses memoires & instructions, de fortune le petit Boleslaus se trouua lors presēt, qui n'auoit encores que neuf ans,

lequel neātmoins escoutoit tout fort attentiuemēt. Et tout ainsi qu'un ieune lyonceau qui n'a point encores les dens ny les griphes bien renforcees, se delecte neantmoins de les mettre & enfoncer dedans le carnage, & les fouiller en la chair & au sang. En semblable le courage genereux & magnanime de cest enfant sauteloit desia tout dedans sa poitrine, & y brusloit d'un desir & conuoitise de gloire bellique. Parquoy ne se pouuant plus contenir se vint ietter aux pieds de son pere, le baisant, embrassant & caressant, iusques à ce qu'en fin il luy ottroya qu'il iroit à ceste guerre avec Secechus, à qui on le dōna en charge. Aussi tost doncques que ce ieune Prince fut arriué à l'armée soudain il commença à auoir l'œil trescurieusement à tout ce qui se faisoit, aller par les rangs d'un costé & d'autre, rire, faire caresses & bonne chere à vn chacun, s'accoustumer à la pluye, & au vent, coucher sur la terre, faire la ronde, visiter les gardes, & faire toutes autres choses qui surpassoyent de beaucoup la portee de son aage. De sorte que cela denotoit assez quelle seroit sa vertu & grādeur de courage à l'aduenir. Ils ne feirent pour ceste fois que courir & gaster la Morauie, qui estoit lors vnie à la Boheme, & toutes deux souz l'obeissance d'un mesme Prince. Parquoy ayās deffait quelques troupes de cauallerie qui estoient comparuës, Secechus remena l'armée toute chargee de butin & de pillage, avec Boleslaus: lequel son pere receut à telle ioye & plaisir qu'on peut penser. Mais ne tarda gueres qu'on vint aduertir Vvladislaus, cōme de nouueau les Pomeraniens festoyēt reuoltez, & auoyent prins le cha-

steau de Medirecie. Boleflaus impetra encôres de son pere (combien que ce fut à toute difficulté) d'aller à ceste guerre: & eut la charge de luy & de l'armée Secechus ainsi qu'à l'autre fois. Estâs doncques arriuez deuant Medirecie ils commencerent à la battre fort furieusement, de façon que ceux de dedans desesperez, & de secours, & de la pouuoir tenir à la longue se rendirent leurs bagues sauues. Et ainsi Boleflaus & Secechus en peu de iours furent de retour deuers Vvladislaus, qui les receut à grand triumphe. Or Secechus auoit beaucoup de credit & de faueur auprès du Roy, comme à la verité il le meritoit bien, & s'estoit par ce moyen acquis vne grande autorité & puissance par tout le Royaume: tellemēt que tout despendoit de luy seul. Mais cela luy apporta aussi beaucoup d'enuies & malveillâces, pource que plusieurs auoyent esté priuez par luy, de leurs biens & heritages, & d'autres bānis: tous lesquels se retiroyēt en Boheme deuers Predislaus. Cestuy cy apres auoir entendu leurs affaires, & ce dont ils se plaignoyent, s'aduisa pour se venger au peril & despens d'autruy, des dommages qu'il auoit receus, de leur mettre en teste qu'il leur falloit tascher par armes & de force à retourner en leur pays, leur promettant son ayde & secours. Et quant & quant leur donna pour chef & conducteur Sbignee, bastard de Vvladislaus, lequel l'auoit eu auant que d'estre venu à la couronne. Mais depuis l'auoit enuoyé en Saxe, & fait prédre l'habit de religion. Sbignee doncques ayant fait iusques à sept gros esquadrons de tout ce peuple, avec vn bon nôbre de Pomeraniens & Prutheniés, qui s'estoyent

venus

venus rendre à luy, s'en vint à enseigne desployee cōtre son pere Vvladislaus, qui le venoit aussi rencontrer. Et là y eut entr'eux vne grosse & sanglante meslee. Toutesfois ceux du Roy combatans de plus grand cueur & effort renuerserent les autres, iusques sur vn lac prochain delà: où il y eut si grand meurtre & tuerie, & tant de gēs noyez, que pour raison du sang & des corps morts, l'eau n'en fut de long temps bonne à boire, ne pour les personnes, ne pour le bestial. Sbignee s'estoit cependant sauué à Cruzuicie, mais il fut rendu vif entre les mains de son pere, lequel par despit de ce que ceux de la ville auoyent ainsi receu celui qui s'estoit rebellé contre luy, la donna en sac & pillage à ses soldats. Toutesfois à la priere & intercession de l'Archeuesque Martin, & autres grans personages, qui vindrent à la trauersse, il pardonna à Sbignee, & le receut en grace, l'aduouant pour son fils. Et deslors luy assigna certaine contree, & à Boleflaus aussi pour leur entretenement. Peu apres Vvladislaus se trouuant aggraué de maladies & d'enuys, receut ses Sacremens par la main dudict Archeuesque, & ainsi passa de ce monde en l'autre, le vingtieme iour de Iuillet 1102. Il vescu cinquante six ans, dont il en regna vingt: & est enterré en la grand Eglise de Plosco.

BOLESLAUS III. *surnommé*
Criuouste.

VLADISLAUS enterré en la pompe & magnificence qu'à vn tel Prince appartenoit, Boleslaus surnommé Criuouste, laissa à son frere Sbignee les pays de Cujauie, Masouie, & Leucise, & retint tout le reste avec la souveraine autorité & commandement. Mais la memoire de son pere luy estoit encores si recente, & le regret de sa mort si auât imprimée dans le cœur, que d'vn lōg temps il ne se peut abstenir de le plaindre. Et pour tout reconfort portoit continuellement pendue au col vne medale d'or, où estoit entaillée au vif son image & ressemblance, afin que d'heure à autre la memoire luy en fust renouuelee & rafraeschie. Et que ce qu'il feroit & diroit, fust ny plus ny moins, comme si son pere estoit present, lequel veist & ouist le tout, tant grande fut l'amour, le respect, & souuenance de ce ieune Prince.

L'an de ce dueil ainsi accompli, les instances & prieres de tout le conseil feirent tant à la fin enuers luy, qu'il se maria, & prit à femme Sbilauie fille de Michel, Seigneur de Kiouie, avec dispence toutesfois, pour raison de la parenté qui estoit entr'eux. Et comme les Morauies fussent entrez en son pays, il les enmeit bien tost dehors. Et tout de ce pas se ietta à son tour bien auant dedans le leur, où il brussa plusieurs bourgs & villages, & en ramena grande quantité de butin. Il vainquit aussi plusieurs fois les Pomeraniës,

lesquels pour se venger, ayant espié qu'il fust sur leurs confins à certaines nopces bien peu accompagné, vindrent s'embuscher iusques au nombre de trois mille cheuaux en vn boys prochain de là, où il alloit ordinairement à la chasse: tellement qu'vn iour qu'il n'auoit avec luy que cent hommes seulement, il ne se donna garde qu'il se trouua enuelpé au milieu d'eux. Mais luy ne s'estonnant de rien, les chargea si viuement, qu'il passa & repassa deux ou trois fois tout à trauers. Et apres en auoir tué grand nombre, se retira encores maugré eux tous avec biē petite perte des siens. Cela l'anima depuis à leur faire plus forte guerre: toutesfois il voulut sonder premierement leurs volontez, par le moyen de deux rondelles qu'il leur enuoya, l'vne toute blanche, qui denotoit la paix: & l'autre rouge, qui estoit la guerre: afin qu'ils choisissent laquelle il vouloyent de ces deux. Mais ils retindrent l'vne & l'autre, avec vne fort arrogante response: Que quant à eux ils esperoyent obtenir la paix, par vne victoire anoblie & illustree du sang des Polaquies.

Parquoy tout incontinent Boleslaus mena son armee deuant Vialogrod, l'vne des principales & plus peuplee ville qui fut pour lors en toute la Pomernie: & ayant fait en grande diligence ses approches & tranchees, dressé ses gabions & platte formes, il comença de la battre furieusement avec ses engins & machines, où luy mesme mettāt tout peril en arriere estoit tousiours des premiers, sans craite aucune des coups de traiēt qui pleuuoient incessamment de dessus

les murailles:ny de ceux qui en estoient meurtris & affolez à ses pieds. Car nonobstant tout cela il s'approcha d'une grande assurance vers l'une des portes pour la rompre, & y faire ouuerture, cependant que ses gens vindrent à gagner le haut du rempart, & en debouterent ceux qui estoient à la defence. Par ainsi ils entrerent dedans par deux costez, tuans & massacrans tout ce qui en ceste premiere furie se trouua deuant eux. Mais le reste du peuple mettant les armes bas, eurent recours à sa misericorde, auxquels il pardonna, & feit soudain sonner la retraitte, afin que la ville ne fust point dauantage endommagée. De ceste victoire, & de la douceur & clemence dont il y auoit vſé, les villes de Colberg, Camene, Vellene, Cosmin, & autres de Pomeranie, vindrent bien tost apres à la mercy & obeissance. Mais sur ces entrefaictes vne troupe d'iceux Pomeraniens auoyent à l'impourueu surpris le bourg de Spicimir, où de fortune se trouuoit lors le deuot & venerable vieillard Martin Archeuesque de Gnesne, lequel sentant le bruiet & tumulte des ennemis, s'en alla soudain cacher dans les voultres de l'Eglise. Parquoy cuidans de l'Archediacre du lieu que ce fust luy, l'emmenèrent prisonnier. Mais on dict que tous ceux qui participerent à ceste prise, & au pillage de l'Eglise, estans de retour en leurs maisons, eux, leurs femmes, & enfans avec toute leur famille, voire leurs parens, amis, & alliez perirent mal heureusement du haut mal, se cassans la teste contre les murailles, ou bien deuenus phrenetiques & enragez, se deschiroyent aux ongles & aux dens les vns les autres.

Ce qu'ayant esté apperceu du reste du peuple, renuoyèrent incontinent à grand honneur & reuerence l'Archediacre, & tout ce qui auoit esté pillé en l'Eglise. Il y en a qui dient que de ce temps les Pomeraniens vindrent à receuoir la foy & religion Chrestienne. Quoy que ce soit Boleslaus en feit tout son deuoir, & pource que son frere Sbignee fut attainct & conuaincu d'auoir par plusieurs fois conspiré contre luy, le conseil le condamna à perdre la vie: toutes fois il ne le voulut punir sinon de bannissement. Parquoy il se retira deuers l'Empereur Henry cinquieme.

L'an puis apres 1109. la Germanie se meit en armes contre Boleslaus, mais ceste guerre ne dura pas longuement, neantmoins elle fut d'un tres heureux succez, & reuint à grande gloire & honneur pour toute la Poloigne. Car l'Empereur irrité du secours que les Polagues auoyent donné aux Hongres, & de quelques courses & dōmages que par mesme moyē ils auoyent faictz en Boheme, faisoit de grans preparatifs, enflambé encores à cela des persuasiōs & promesses de Sbignee, qui luy donnoit esperance de se pouuoir fort aiseement & en peu de iours faire maistre & seigneur du Royaume. Car tout aussi tost qu'il comparoistroit, les principaux ne faudroyent à l'euie l'un de l'autre de se venir rendre à luy. Ainsi sur le cōmancemēt de l'Esté il entra dans ceste partie de Poloigne, qu'on appelle maintenāt, la marche de Brā debourg, & la Silesie, où ayāt pris quelques places il mena son armee deuant Glogouie, qu'il assaillit fort asprement. Car de vray combien que pour lors la

ville fust des plus peuplees, si n'estoit elle pas forte assez, ny en estat pour endurer vn tel siege & effort. Ce que ceux de la ville cognoissoyēt bien. Au moyē de quoy craignans que si elle estoit prise de force, ce ne fust leur totale & derniere ruine, ils demanderent trefues de cinq iours seulement, dedans lesquels s'ils n'auoyent secours, promettoyent de se rendre, & pour seureté donnerēt en ostage les enfans des principaux & plus grands d'entr'eux. Là dessus ils depecherent vers Boleslaus pour luy faire entendre le danger où ils estoient, & ce qu'ils auoyent faict avec l'ennemy, le requerans de leur enuoyer promptemēt secours. Boleslaus approuua ce qui estoit passé, & leur promit d'estre luy mesmes biē tost vers eux: que si touteffois il y auoit quelque retardemēt ils ne laissent cependāt de se deffendre. Et que s'ils le faisoient autremēt il ne faudroit de les ruiner & destruire de fond en cōble tout aussi tost que l'Empereur seroit parti. Ces paroles avec la loyauté qu'ils portoyēt à leur Prince, eurent plus de force & de credit enuers les Glogouiens, que la pitié & commiseration, que le danger eminent leur mettoit deuant les yeux de leurs femmes & enfans, de leurs biens & fortunes, voire de leurs propres vies. Doncques les deux iours durant qui restoyent encores des trefues, se preparerent soigneusement pour soustenir l'effort & assault des ennemis. Car aussi tost que le cinquieme fust venu, l'Empereur ne faillit de les faire semondre de leurs promesses & conuenāces. Mais comme il veit qu'ils auoyēt changé d'opiniō, sans plus differer feit assaillir de tous costez la place fort viuement, & lier les o-

stages au deuant des pallissades qu'on auoit dressees pour se couvrir: à ce que ceux de dedans craignans de les blesser, ne tirassent point, & par ce moyen laissent approcher ses gens tout à leur aise, & en seureté iusques dans le fossé. Eux au cōtraire n'ayās point d'esgard à cela, se meirent brauement en defence, & à tirer infinis coups de pierres & de flesches. De quoy l'Empereur tout esbahy pour veoir vn tel courage & constance, meuaussi à compassion de la perte des siens, qu'il voyoit blesser & meurtrir à ses pieds, les fit retirer, sans toutesfois pour cela abandonner le siege.

Desia à Boleslaus estoit arriué le réfort & secours qu'il attendoit, outre les bādes qu'il auoit d'ordinaire. Par quoy sans plus attēdre il s'approcha de l'ennemy, ne voulant pas neantmoins encores venir au cōbat, cōbien que ses gens l'en pressassent fort. Mais se mit à les traouiller par les menus, maintenāt dressant quelque grosse embuscade, tātost escarmouchāt les fourrageurs, & cōtinuellemēt tenant en eschee tout le camp. Car il ne passoit nuit qu'il ne leur feist donner quelque alarme, avec grand bruit & son de trōpetes, & le plus souuēt tailloit en piece leur sentinelles & corps de garde, tellemēt qu'ils n'auoyent loysir de prendre aucun repos, & encores moins de vaquer aux affaires du siege. Dont le nō de Boleslaus vint à telle estime & reputation parmy eux, que tout estoit rempli de ses louāges & vertus, de son sçauoir & suffisance militaire, & n'oyoit on autre chose que des chāsons cōposées à son hōneur, lesq̄lles l'Empereur feit deffendre sur peine de la vie. Mais cependāt il se

trouuoit enueloppé comme dict le Prouerbe, entre l'enclume & les marteaux, & pressé tout à vn coup de deux extremités, monstrant plustost d'estre assiégé luy mesmes que d'assiéger. Parquoy Boleslaus estimant que par raison il deust estre matté & ennuyé de ceste guerre, puis qu'il voyoit qu'elle luy succedoit ainsi mal, aussi que l'hyuer approchoit. Et pourtant que plus aiseement il viendroit à quelque paix & appoinctement, enuoya deuers luy pour en ouurir le propos. A quoy soudain l'Empereur proposa ces deux conditions, de remettre en premier lieu Sbignee. En apres que les Polagues eussent de là en auant à estre tributaires de l'Empire. Les Ambassadeurs trouuerent cela bien dur, ne pensant pas que leur maistre voulust iamais accepter & receuoir vn tel party. Mais l'Empereur d'vn grand orgueil & arrogance leur faisant veoir son thresor, qui à la verité n'estoit pas peu de chose, Et voicy dit il ce qui domptera les Polagues. Lors tout soudain le Comte de Scarbic chef d'eux tous, qui estoit de ceste noble famille & maison, qui en leur deuse portent vne double **XXX** prenant la parole tira vn anneau de son doigt, & le ietta au milieu de ce thresor, en disant: Puis qu'ainsi est, adioustons or sur or. Ce que l'Empereur voulant destourner & tirer en autre sens, repliqua ces deux mots en Alleman, *Hab danck*. Qui veulent autant à dire comme, le vous en remercie, dont depuis est demeuré à ceste maison le surnom des Abdances.

Les Ambassadeurs doncques estans de retour vers Boleslaus luy rapportèrent ce qui estoit passé avec

avec l'Empereur, & les conditions qu'il proposoit, lesquelles luy semblerent trop iniques & defraisonnables: & ne se pouuoit assez esbahir de l'orgueil & presumption de cest homme, qui (tout ainsi que sil eust eu plaine & entiere victoire, & que l'euement de ceste guerre n'eust plus esté en doute & incertitude, leur vouloit donner la loy. Au moyen dequoy il se meit à chercher avec les armes, ce que gracieusement il n'auoit peu obtenir. Et commença à presser l'Empereur de si pres que son armee n'auoit aucun moyen d'aller au fourrage, ne recouurer du bois, ny autres necessitez quelconques: non pas seulement de sortir hors de leur cāp, dequoy ils estoient reduits à vne grande extremité. Et craignās d'auoir encores pis, conclurent de tirer la guerre autre part. Par ainsi se leuerent de deuant Glogouie, & prirent leur chemin vers la ville de Vvratisslauie, où finalement ils paruindrent, non sans grand' peine & difficulté, perte & dommage de leurs gens. Tout aupres de Vvratisslauie y a vne grad plaine & campagne ouverte de tous costez, qui sembla fort à propos à Boleslaus, & aux Polagues, pour y donner la bataille, à cause de leur caualerie qui estoit fort grande: Toutesfois legerement armee, & pourtant pouuoient là escarmoucher, s'aduancer, & retirer fort à leur aise, selon leur façon & vsance de combattre. Apres dōcques qu'en peu de paroles il eust harangué les siens, il les mena tout de ce pas droit au combat, qui dura depuis Soleil leuāt iusques à midy. Et sembloit pour le commencement que les Allemans deussent auoir du meilleur, pource qu'estant fortement armez ils

combatoyent de pied ferme à l'aduantage, & repouffoyent brauemēt leurs ennemis. Mais Boleslaus qui auoit songneusement l'œil par tout, & d'une grande promptitude accouroit où le besoin se presentoit, menant luy mesmes les troupes de secours à ceux qui se trouuoient lassez & recreus, où esbranslez, criant apres ceux qu'il voyoit refroidis, & combatāt avec ce luy mesmes fort brauement de sa personne, remeit sus la bataille en peu d'heure: tant qu'à la fin par l'effort & prouesse des Polagues & Silesiēs, la victoire tourna de son costé. Lors y eut grand carnage & boucherie d'une part & d'autre, dont la campagne fut incontinant couuerte de corps morts, (spectacle certes biē piteux & horrible). Et quāt aux Polagues qui estoient demeurez en la meslee, ils furent cherchez & enseuelis: mais les Allemans on les laissa là pour repaistre les oyseaux & les chiens, qui y aborderent en si grand nombre, qu'on n'y eust pas seurement passé de long temps apres à petite compagnie. Dont ce lieu fut depuis surnommé *Le chāp des chiens*, & garde encores pour le iourd'huy le mesme nom, le village de là aupres, tant en langue Germanique que Polonoise, distāt seulement d'une lieuē de la ville d'Vvratisslauie. On dit qu'outre ceux qui demeurèrent sur la place vn fort grād nombre furent emmenez prisonniers à Cracouie, & que pour tesmoignage de ceste victoire on leur couppa les barbes, qu'ils portoyent longues & espoisses, lesquelles furent perduës avec les enseignes qui auoyēt esté gaignees sur eux, aux voutes de la grād Eglise, où on les peut encores veoir pour le iourd'huy. Depuis ceste rencōtre

les Allemās cōmencerent d'auoir en autre reputatiō Boleslaus & les Polagues: au moyē dequoy l'Empereur ne cherchoit sinō occasion de faire la paix. Mais il trouuoit trop desauantageux & peu honorable, que apres l'auoir tant de fois refusée, il fust cōtraint de la venir luy mesmes mendier. Finablement il apposta quelques vns comme neutres & cōmuns amis, pour se mettre à la trauerse à moyenner cela, lesquels feirent tant enuers Boleslaus qu'ils luy persuaderent de la demander, l'asseurans qu'elle ne luy seroit point refusée. Et ainsi le conduirent à Bamberg, ville de Franconie, deuers l'Empereur, où il fut le fort bien venu. Là fut auisee la paix & amitié entr'eux. Et pour plus grande assurāce on feit le mariage de Boleslaus avec Alyz sœur de l'Empereur: & de sa fille Christine à Vvladislaus fils de Boleslaus, auquel elle fut seulement fiancee pour celle fois, d'autant qu'ils estoient tous deux encores trop ieunes. Les nopces dōcques paracheuees à grand pōpe & magnificence, & force dons & presens faicts d'une part & d'autre, Boleslaus sen retourna en Poloigne.

Sur ces entrefaictes les Prutheniēs & Pomeraniēs auoyēt faict quelques courses & entrees dās le pays de Masouie, & y ayans pillé tout plein de villages se retiroient en diligēce avec leur butin, quād le gouuerneur de la Prouince, avec ce peu de force qu'il peut assembler soudainement, se meit à les poursuyure. Et environ le poinct du iour les ayans atteincts, ainsi qu'ils se reposoyent, apres auoir repeu & faict bonne chere, tous las & trauallez de la lōgue traicte qu'ils auoyent faicte, les chargea de telle sorte qu'il

entua iusques à six cens, & en ramena deux fois autant de prisonniers. Mais puis apres non contant de cela, Boleslaus assembla son armee à Cruzuicie pour aller sur eux, & cōme il estoit prest à partir, apparut tout en plain iour vn tresbeau iouuēceau au feste de l'Eglise vestu de blanc, reluisant à merueilles, qui en grande admiration de tout le monde se lancea du hault en bas. Puis se meit à guyder l'armee, laquelle d'une grande allegresse, pour se veoir vn tel conducteur se meit à le suyure: tant qu'estans paruenus deuant la ville de Nakle, capitale de Pomeranie, ce iouuenceau vint à ruer de fort grāde roydeur contre les murailles vne pōme d'or qu'il tenoit, puis tout soudain disparut & s'esuanouit, qu'on ne sceut qu'il deuint. La place fut lors tres estroitement assiegee de toutes parts, dont ceux de dedans estans intimidez, vindrent à demander trefues de quinze iours, qu'ils impetrerent. Et ce pendāt enuoyerēt querir secours aux Prutheniens & autres Pomeraniens, lesquels à grand puissance s'en vindrent secrettement à Nakle, esperans de surprēdre au despourueu l'armee de Boleslaus. De fortune cettoit lors le iour de la feste du glorieux martyr saint Laurens, qu'ils celebroyent en grande deuotion & reuerence, ne se doutans de riens, aussi que les trefues duoyent encores, quant apres le diuin seruice, cōme ils s'en retournoyent de tous costez à leurs logis, voicy qu'ils cōmencerent à descouurir les ennemis, qui rengooyent desia leurs gens en bataille, à mesure qu'ils sortoyent hors des boys prochains de là. Parquoy chacun courut incōtinant aux armes, en grand' confusion toutesfois & embarrasement, non point tant pour paour qu'ils

eussent de se veoir tant de gens sur les bras, que pour la difficulté en quoy ils se trouuoient de pourueoir & donner ordre à tāt de choses tout à vn coup, avec si peu de temps & de loysir. Mais les autres s'estans amusez à se réparer & fortifier de paulx aigus fichez en terre, & de picques & iauelines entrelassees à trauers à guise d'une haye, leur donnerent ce pendant la commodité de se recognoistre, & de s'armer, & mettre en ordre tout à leur ayse. Le combat à la verité estoit assez desauantageux & difficile pour les Polaques, à cause du rempart qui estoit au deuant des ennemis. Mais Boleslaus s'estant pris garde que le derriere estoit tout desgarny & descouuert, ordonna à Scarbimir Marechal de l'armee, cependant qu'il les assaudroit par le deuant & à la teste, q̄ luy avec quelques troupes qu'il luy dōna, les allast charger viuement en queuē. Ce qu'ayant esté fort bien executé se esleua soudain de ce costé là vn grand bruit & confusion: car Boleslaus au mesme instant auoit forcé les tranches, & enfoncé leur bataillon. Au moyen dequoy ils se trouuoient enuolopez des deux costez, sans pouoir reculler ny fuir, tellemēt qu'il y en eut bien xxvij. mille qui demeurerēt sur la place, sans ceux qui se perdirent dans les lacs & marecages de là autour, & deux mille de prisonniers. Ceste deffaitte meit tout incōtinant Nakle, & les autres places de Pomeranie es mains de Boleslaus, où il laissa Suētopelc, l'un de ses capitaines & conseillers, de la maison des Griphons, personnage fort renommé, non point tant pour sa noblesse & ses richesses, comme pour sa vertu & longue experience.

Peu apres se ralluma la guerre de Boheme, que Boleslaus impatient de tout repos & oysiuete entreprit souz couleur & pretexte de vouloir remettre Sobeslaus, frere de Vvladislaus, Prince des Bohemiens, duquel il auoit esté chassé, & festoit retiré en Poloigne. Et pour ceste occasiō Boleslaus auoit despesché ses Ambassadeurs à iceluy Vvladislaus, pour luy faire instāce de la restitutiō de son frere, & qu'il eust à luy faire part de la seigneurie. Ce que n'ayant obtenu il entra avec son armee dās la Boheme, où il pillā & gasta tout ce qui se rencōtra en son chemin: mais auant que de vouloir venir aux mains avec ses ennemis, il feit fort solennellement & en tresgrande deuotion, à la fin de la Messe cōmunier tous les gens, puis de ce pas les mena au combat. Oū de premiere rencontre il tua de sa main celuy des ennemis qui le premier se presenta sur les rangs, dont estant creu le cœur à ceux qui le suiuoient, tournerent incontīnāt en fuite les Bohemiens. Par ainsi ayans obtenu ceste victoire redoublerent vne autre course dans le pays, ou ils feirent encores vn fort grād butin, & de là s'en retournerent en Poloigne.

La mesme annee, qui fut IIII. Boleslaus avec vn camp volant entra en Prusse, où il brusla, pillā, & saccagea plusieurs villages, & en rapporra de grādes richesses, personne ne luy osant faire teste, ny luy donner empeschement, de sorte qu'il emīena vn grand nōbre de prisonniers, lesquels il departit deçā & delā par la Poloigne, pour labourer les terres. Il y a encores iusques à auourd'huy quelques villages qui ont tousiours retenu le nom des Prussiens.

Adoncques Sbignee ayant perdu toute l'esperance qu'il auoit mise de sa restitution sur les Bohemes & Pomeraniens, fut contrainct de recourir à la mercy de son frere, deuers lequel il enuoya promettre & iurer toute fidelité & obeissance pour l'aduenir: puis que Dieu & ses vertus l'auoyent constitué seigneur dessus luy. Ce langage amoht le cueur de Boleslaus, assez pitoyable de son naturel, & fut Sbignee rappelé sans aucun cōtre dit de personne: mais il ne remeit rien de son arrogance accoustumee. Car combiē que ses gens eussent promis que fort simplemēt & en petit estat il viēdroit se prosterner aux pieds de son frere, il se presenta tout au rebours, en grand pompe & orgueil, avec force trompettes & tabourins, faisant porter vne espee nue deuant luy, selon l'ordinaire & coustume du Prince. Parquoy Boleslaus commença à se repentir de l'auoir rappelé, cognoissant assez que l'outrecuidāce de cest homme, ne se pourroit iamais dompter. Et comme tous les plus grands du conseil fussent desia fort animez & aigris contre luy, aussi enflamberent ils facilement le cueur de Boleslaus, & par maniere de dire ietterent de l'huile sur le feu ia espris, tellement qu'il le feit mourir. Dequoy toutesfois il eut tout incontīnant tant de regret & repentāce pour auoir ainsi par ce seul acte contaminé toute la bonne reputation, qu'il festoit iamais acquise, que de long temps apres il ne feit que gemir & soupirer, faisant de grands ieusnes, aumosnes, & pelerinages: & ainsi taschoit de purger ce meffait. Il feit aussi mettre en prison Scarbimir Palatin de Cracouie, dont a esté parlé cy dessus, & luy creuer les yeux

apres l'auoir cassé de l'estat de Conseiller, & cōtraint de se demettre luy mesmes de l'vne & de l'autre charge : tant pour auoir esté en partie instigateur de la mort de Sbignee, que pour s'estre trop enflé & enorgueillly des choses par luy faictes à la guerre (à la verité belles & heureuses) dont arrogamment il faattribuoit toute la gloire & honneur, se fiant à la grace & faueur du peuple, qu'il pésoit par là auoir acquise, & faisoit bien peu de compte de son Roy, lequel il mesprisoit, blasmoit, & en detractoit par tout: & n'attendoit on plus autre chose de ces insoléces, sinon quelque prochaine rebellion qui eust esté assez dommageable & dangereuse. Cela fut cause que deslors le Castellan de Cracouie, qui estoit vne dignité assez inferieure à celle du Palatin, eust deuant luy le premier & plus digne lieu au conseil.

L'annee ensuyuante m8. Boleslaus ayant asseuré de toutes parts ses affaires domestiques, estoit en volōté de donner sur les Prutheniés & Pomeraniés, qu'il auoit desia fort affoyblis & mattez, afin d'acheuer de les dompter du tout. Mais les grands pluyes qui suruindrent & durerent tout le long de l'annee, & les eaux qui desborderēt de tous costez n'auoyent permis de faire aucunes femailles, ny recolte: non seulement dans la Poloigne, mais par tous les pais & Provinces d'alentour. Dequoy il fut cōtraint de remettre ceste entreprise à vne autre fois. On dit que ce mauuais temps auoit esté annoncé au parauant par certain prodige: qu'vn soir apres le coucher du Soleil, par plus de trois grosses heures on veit le ciel tout enflabé & ardēt. Et encores apres que les pluyes furent

furēt cessées, regnerēt par vn long tēps de fort grands vents, tempestes & orages: aussi tost toutesfois que l'air fut bien rassis, Boleslaus ne differa point d'auantage de poursuyure ses premieres deliberations, dequoy les Prutheniens & Pomeraniens estans fort espouuentez, & craignans que ceste guerre ne leur admenast vne extreme ruine ou desolation, armerent toute la ieunesse des artisās & des laboureurs. Et ainsi s'en vindrent d'vn grand courage à l'encontre de Boleslaus, resoluz & deliberez de tēter le hazard du combat. luy aussi de son costé ne refusa pas de venir aux mains avec eux, combiē qu'ils fussent plus forts & en plus grand nombre. Or ce pēdant que ceux des premiers rangs, où estoient tous les nerfs & la force de leur bataillon, cōbatirent, les choses furent aucunement en ballāce & en doute: mais apres qu'ils eurent partie esté tuez, partie mis en routte & desordre par les bandes que Boleslaus auoit expressément attirées à ceste fin, tout le reste qui n'estoit pas aguerry tourna biē tost le dos, & se meit en fuite. Toutesfois Boleslaus ne voulut point qu'on les poursuiuist d'auantage, de paour que le pays ne demeurast despeuplé, & vuide d'habitans & de laboureurs. Ce qui fut cause qu'il y en eut biē plus de pris que de morts. les autres se rēdirēt avec les villes & places fortes qu'ils tenoyent: tellement qu'il n'y auoit plus que Suentopelc, Capitaine & gouuerneur de Nakle, lequel pour desir & conuoitise de commander, faisoit vn peu le retif: & se monstroit plus dur de venir à raison, s'estāt à ceste fin ligué avec les Pomeraniens, ennemis des Polonois. Et ce pēdāt par personnes interposées il fai

soit fonder l'intérieur de Boleslaus, lequel ne voulût pas laisser cela impuny, de paour que de cest exemple les autres ne prissent envie de faire le semblable, s'en alla mettre le siege deuant Nakle. Mais pource que l'hyuer luy rendoit toutes choses difficiles & incommodés, il prit vne bonne somme d'argēt avec le fils de Suentopelc pour ostage, & ainsi leur ottroya finalement le pardon, que si longuement il leur auoit refusé. Toutesfois l'esté ensuyuant Suentopelc & les Nakliēs festās de nouueau reuoltez, il retourna cōtre eux avec telle obstination, que toutes choses desesperees ils furent contraints de se rēdre à luy, leurs vies sauues seulement. Quant à Suentopelc il fut confiné en prison perpetuelle, & soudain tout le reste de la Pomeranie vint au pouuoir des Polonois, reprenās pour la troisiēme fois avec leur Duc Varcislaus la Religio Chrestienne, que desia par deux fois ils auoyent receue, & par deux fois reiettee. Ils l'ont neātmoins gardeē tousiours depuis, iusques à l'heure presente.

Ainsi Boleslaus apres auoir pacifié toute la Pomeranie retourna en Poloigne & licentia son armee: & l'annee suyuāte fit les nopces de son fils Vvladislaus avec Christine fille de l'Empereur Henry, qui l'auoit desia fiancee, estāt encores tous deux en bas aage, cōme il a esté dit cy dessus. Là furent faictz de grands triumphes & magnificences: car Estienne Roy de Hongrie, ensemble les Ducs de Russie, & de Bohēme s'y trouuerent.

L'annee d'apres, qui fut 1121. Alyz, femme de Boleslaus, qui par l'espace de dix ans n'auoit sceu auoir

enfans, acoucha d'vn fils, qui eut nom Casimir. Et en ce mesme tēps Volodor, Duc des Premissiēs, faisant l'estat de volleur, plustost que de Prince, brigandoit incessamment la Poloigne de tous costez, & ne s'en desistoit, quelques admonestemēs qui luy y eussent esté faictz. Mais il fut à la fin pris & defait pres Vuifokie, & admené à Boleslaus, duquel il se rachepa pour vingt mille marcs d'argēt qu'il paya de rançon.

L'an 1124. il entreprit le voyage de Dannemarch, en faueur d'vn nomē Pierre, de noble & illustre maison, de ce pays là. Cestuy cy estant ieune & de bon cœur, estoit venu à la Cour de Boleslaus, laquelle auoit lors le bruit & reputation enuers les estrangers, sur toutes autres: & principalemēt pour le faict de la guerre & des armes. Et cōme il fust d'vn gētil esprit, hōneste, gracieux, & vaillāt de sa personne, aussi vint il fort aysemēt en grand faueur & credit aupres de Boleslaus: tellemēt qu'il luy fit tout plein de biens, & mesmes luy donna la Cōté de Scrimnie, & le maria avec vne Dame de grande maison, de la race des Ducs de Russie, proche parētē de Sbillaue sa premiere femme. Il auoit quant & quant si bien & parfaitement appris la langue Polonoise, & festoit tellement façonné aux meurs & cōditions du pays, qu'il estoit en grace d'vn chacun: si que personne ne portoit enuie aux biens & auancemens qu'on luy faisoit. Or le pere de ce Pierre, nommē Guillaume, estoit l'vn des premiers & plus grands de tout le Royaume de Dannemarch, & qui pouoit le plus enuers le Roy Henry, duquel il estoit ordinairement employé aux plus grādes charges & importants affaires. Mais apres que

Abel, frere du Roy l'eut mis à mort, & se fut saisi du Royaume, Guillaume qui auoit la garde du thresor, où il y auoit de fort grâdes richesses, aduertit secrettement son fils, que sil se vouloit approcher avec quelque nombre de gens, il luy mettroit le tout entre les mains. Pierre en aduertit soudain Boleslaus, qui le trouua bõ, & luy promit de luy ayder de tout ce qu'il auroit besoin, tât pour l'amitié qu'il luy portoit. (& pourtant desiroit le gratiffier) que pour l'enue qu'il auoit d'estendre sa renommee, & faire cognoistre quelque chose de ses faicts & proüesses, es regions Septétrionales: aussi que par mesme moyen il en esperoit rapporter quelque grad butin. A ceste cause il feit soudain equipper vne armee de mer, au port de Dantzik, où il s'embarqua tout incontinent que la saison fut venue propre pour nauiger. Et ayât eu le temps à souhait, prit terre en Dannemarch auât qu'on sceust rien de son entreprise, ny qu'on se peust mettre en deuoir de luy faire resistâce, & donner aucun empeschemēt. Ayant dõcques par le moyen des amis du Comte Pierre, & de ceux qui s'entendoyent avec luy, faict entendre souz main aux principaux de la noblesse & du peuple, qu'il n'estoit venu pour autre effect que pour chastier le traistre qui ainsi malheureusemēt auoit mis à mort son frere & son Roy, & remettre le Royaume en liberte: il gagna tellemēt le cœur de tous, que le Tyran abādonné des siens, fut contraint de s'en fuyr, & quitter tout es mains de Boleslaus, qui leur remeit incontinent toutes les fortes, & leur feit créer vn Roy tel qu'ils le voulurent ellire. Puis s'estant saisy du thresor, emmena avec luy

toute la parenté de Pierre, & s'en retourna en son pays. On dit que par succession de temps ce Pierre icy ediffia iusques au nombre de soixante & dixsept Eglises, toutes de pierre de taille, avec deux Monasteres, l'vn d'hommes, l'autre de femmes, ausquels il assigna vn bon & gros reuenu. Il s'en veoit encores pour le iourd'huy assez de son nom, & de ses armes, qui portent vn Cigne d'argent en champ de gueules, dont ceste maison à prins le nom des Labancins.

Boleslaus dõcques estant ainsi occupé à ce voyage de Dannemarch, Volodor Duc des Premilliens, contreuenant à ce qu'il auoit promis & iuré entra de plus beau dans la Poloigne, bruslant & saccageant tout iusques à la ville de Biece, & emmena grand nombre de prisonniers, avec force cheuaux & bestial, au moyen dequoy Boleslaus estant de retour se meit tout incontinent à luy faire la guerre. Et le vainquit brauement en plaine bataille, beaucoup de nobles & vaillans personages des Premilliens y estans demeurez. Mais Volodor se sauua en Halicie. Ceste victoire facilita assez à Boleslaus, & luy feit plus libre l'entree du pays des ennemis, lequel il gasta & pillà à son tour, & leur rendit bien ce qu'ils luy auoyent presté, voire avec interest & vsure. Cela faict il se reposa par quelques annees, d'autant que tous ses voyfins estoient lors detenus & occupez apres leurs guerres & dissensions ciuiles.

Par ainsi estant de loysir il tourna toute son entente aux deuotiõs, & à ce qui despédoit du seruice di-

uin, & en premier lieu repara la grâde Eglise de Cra-
couie, dôt il haussa les murailles, & y fait deux belles
tours aux deux costez, y donna de fort riches ornemēs,
vstenciles, & reliquaires d'or & d'argent, & adiousta
encores vingt Chanoines au nombre ancien, dont il
laisa la disposition à l'Euesque, à ce que de là en auāt
il peust conferer les prebendes. En ce temps il eut vn
fils, qu'il appela Boleslaus de son nom, qui fut depuis
surnômé le Crespelu, à cause de ses cheueux crespus
& vndoyez. Et combien que par le moyen de ses bō-
nes œuures & bien faits, pour tant de deniers deu-
temēt employez à l'ornemēt & reparation des Egli-
ses, à l'entretienement des Prestres & Religieux, à la
nourriture des pauures & malades, qu'il visitoit à
toutes heures, iusques à leur lauer & nettoyer les
pieds, pour ses cōtinuelles larmes, ieusnes, & oraisōs,
Et pour l'austere vie qu'il menoit, car il portoit le pl^r
souuēt la haire: Chacun pensast que le crime par luy
cōmis enuers son frere Sbignee, deust estre suffisam-
ment purgé & satisfait, neantmoins ne se contentans
pas de cela, si dauantage il ne s'affligeoit encores par
le travail, & mesaise de quelque lōg & laborieux pe-
lerinage, apres auoir ieusné au pain & à l'eau tout le
lōg du Carême, & porté la haire presque tousiours:
acompañné seulement de quelques gens d'Eglise, &
autres saincts personages, & encores en bien petit
nombre, entreprit de visiter le sepulchre de mōsieur
sainct Gilles, auquel il auoit fort grâde deuotion, &
fait la plus grâde partie du chemin les pieds nuds, ne
se rencōtrant Eglise, Monastere, ny Hospital, pre-
stres, pauures, ou mendians qui ne se sentissent de ses

charitez & aumosnes. Il demeura au reste quinze
iours entiers au sainct lieu, estant tousiours en con-
tinuelles prieres, ieusnes, veilles, & oraisons. Et com-
me il fust retourné en Poloigne, il entreprit encores
vn autre pelerinage au sepulchre de sainct Estienne,
fils de Geissa, premier Roy Chrestien de Hongrie, où
il alla à pied fort deuotement. Et tout soudain apres
fait le troisieme en la ville de Gnesne, deuers le glo-
rieux sainct Adelbert, qui n'agueres auoit esté transf-
laté par Iaques Archeuesque du lieu, apres auoir esté
fort longuement caché, & comme enseuely, depuis
que les Bohemiēs eurent gasté & destruit la ville, du-
rant l'exil & bannissement de Casimir. Il fait là de
grands dons & offrâdes, & entre autres donna qua-
tre vingts marcs d'or, & force pierreries pour faire
la chasle. Peu de tēps apres il perdit son fils Casimir,
qui estoit encores fort ieune, mais en recompence,
pour allegement de sa douleur, il en eut vn autre, ap-
pelé Miecisslaus, qui eut le surnom de Vieillard, pour
le sens & grauité dont il estoit plein. Il en eut encores
vn autre l'annee ensuyuante 1132. lequel du nom de
son grand pere maternel, & de son oncle (tous deux
Empereurs) fut appelé Henry.

Apres toutes ces choses, Boleslaus meit sus vne
fort grosse & puissante armee, avec laquelle il sache-
mina en Hongrie, pour remettre les enfans du feu
Roy Estienne, que les Hongres auoyent priuez du
Royaume, & esleu Bela l'aveugle. Et comme Albert
Marquis d'Austriche, qu'on appelle la haute Hōgrie,
qui auoit espousé la sœur de Bela, le fust venu ren-
contrer iusques en Scepusie, avec toutes les forces

de Hongrie & d'Austriche, il y eut la vne fort braue & cruelle meslee entre eux. Finablement par l'effort & assurance des Polaques, & la vertu & experience de Boleslaus, les ennemis furent rompus, & mis en fuite. Mais il n'osa passer outre à poursuyure sa victoire, car les Bohemiés qui estoient entrez dans la Poloigne le contraindrent de retourner: & d'autre part les Russiens se remuoyent, & faisoient quelque semblant de se vouloir departir de l'obeissance & subiection des Polaques. Ce qui meit en grand peine Boleslaus, se voyant tout à vn coup auoir affaire & estre attaché en tant d'endroits: parquoy il assembla le Senat, où auant toutes choses il meit en auant ceste rebellion des Rutheniés ainsi soudaine & inopinée. Et là dessus chacun donnât son opinion, Pierre Vulostrouic, Comte de Xiansa, personnage de grand esprit & autorité, prit la parole, & cōmença à remonstrer que bien aysémēt, & à peu de peine ceste rebellion (qui ne faisoit encores que poindre) se pouuoit assoppir, si le chef d'icelle Iaropelc venoit à estre retranché: mais que cela se pouuoit mieux faire par ruse & astuce que de force, & par armes: & qu'il n'estoit point autremēt deffendu qu'une desloyauté fust vengée par fraude & trōperie, à quoy il s'offroit de s'employer loymesmes, & du reste qu'on ne se souciait de rien. Par ainsi accompagné de quelques vns à qui il se fioit, lesquels toutesfois ne scauoient point son entreprisé, s'achemina en Russie deuers Iaropelc, feignant de s'en estre fuy de la cruauté de Boleslaus, qu'il chargea fort & ferme, des torts & outrages qu'il faisoit à vn chacun, & dont il estoit venu
à telle

à telle hayne & indignation enuers tout le peuple, qu'il estoit bien aisé d'en auoir la raison, car il n'auoit plus de pouuoir ny d'autorité. Adioustant à cela beaucoup d'autres choses qu'il pensoit estre les plus agreables à Iaropelc: lequel il supplioit de le vouloir recevoir, & luy donner sauconduict & assurance. Cela pleut infiniment au Barbare, estimant d'auoir comme miraculeusement recouuré vne telle & si propre occasion pour l'executiō de ses desseins. Parquoy il commença à se fier du tout au Comte, & luy communiquer tous ses secrets & deliberations, & pressa quant & quant les siens le plus qu'il peut de se declarer. D'auenture Iaropelc s'en voulut aller esbattre aux champs à bien petite compagnie, & mena Vulostrouic avec luy, lequel se voyant vn tel moyen & commodité entre les mains, fit soudain signe à ses gens, cependāt que l'autre disnoit de le saisir, ce qu'ils firent, & le chargerent sur vn cheual, l'emmenans lié & garroté à Boleslaus: car le Comte auoit au parauant fait provision de cheuaux de relai, & de barques en tous les endroicts & passages par où ils s'en deuoient retourner. Boleslaus le remercia infiniment de ce deuoir, & du danger où ils estoit mis, & luy fit de fort grās dons & recompences. Puis mit Iaropelc en bonne & seure garde, toutesfois auant que l'an fut passé, il fut mis en liberté, moyennant vne grosse somme d'or & d'argent que son nepueu Basile apporta pour sa deliurance. Et ainsi s'en retourna en son pays, apres auoir donné sa foy & son serment à Boleslaus de luy estre à l'aduenir fidelle & obeissant. Mais il ne tint pas longuement sa promesse,

car voulant rendre le tour qu'on luy auoit ioué, il suborna vn Hongre d'assez bon lieu, & au reste caut & malicieux au possible, lequel s'en vint rendre à Boleslaus, souz couleur de s'en estre fuy pour auoir tenu le parti des enfans du Roy Estienne, ne cherchant sinon l'occasion à propos pour le tuer, ou faire quelque autre notable exploict & d'importance, qui peust estre dommageable aux Polagues. Ce Hongre icy ioua de telle forte son personnage, & donna si bien du plat de la langue à Boleslaus, que tout incontinant il entra en grace si auant, que mesmes il l'appelloit au conseil des plus grands & plus secrets affaires, & luy donna quant & quant le gouuernement de Vislicie. Au moyen dequoy voyant que Boleslaus estoit allé deuers l'Empereur Lothaire pour accommoder quelques affaires de Boheme, soudain il despescha à Iaropelc, à ce qu'il eust à se trouuer avec ses gens à Vislicie, au huietieme du mois de Feurier ensuyuant. Puis quand les nouvelles de la venue de Iaropelc furent esbandues, fait commandement à tout le peuple d'alentour de se retirer incontinant dans la ville avec leurs biens, femmes & enfans. Ce que chacun fit volontiers, aussi bien les Gentilshommes cōme les autres, pour se veoir par ce moyē en lieu de seureré, & hors du danger & pouuoir des ennemis. Les Rutheniens d'autre costé ne faillirent d'arriuer au iour nommé: mais ce fut par vne nuit obscure & pluuieuse, à la faueur de laquelle il les introduict dedans, qu'on ne s'en apperceut point, iusques à ce qu'ils commencerent à tuer, massacrer, & mettre tout au fil de l'espee hommes, femmes & en-

fans, sans auoir pitié ny esgard à sexe ny aage. Bruslerent quant & quant la ville, & emmenerent les Gētilshommes, & les plus riches prisonniers avec tout le butin qui y estoit. En recompēce de ce bon office, Iaropelc luy fait soudain couper la langue, creuer les yeux, & arracher les genitoires. Et ainsi le malheureux paya par vne peine & punition condigne le forfait de sa meschaceté. Car l'ordinaire des Princes & grās seigneurs, est de hayr à mort les traistres, cōbien qu'ils aymēt leurs trahisons & desloyautez, dont ils se seruent aucunesfois en leurs affaires. Boleslaus retourné d'Alemagne, apres auoir entēdu ce qui estoit aduenū à Vislicie, entra en vne extreme colere cōtre les Rutheniens & Iaropelc, pour auoir ainsi faucé sa foy. Et ayāt amassé vne puillante armee nō seulement de la noblesse, mais aussi des villes & des payfans, En telle rage & furie, que feroit vne Ourse ou Lyōnesse à qui on eust osté ses faons, entra dās la Ruffie, où perſōne ne se presenta pour luy faire teste. Car Iaropelc cognoissant sa faute, & le peu de forces qu'il auoit pour résister à vne telle puillance, s'estoit retiré es forests & lieux marescageux. Parquoy il pillā, brusla & faccagea tout ce qui se rencontra, & ainsi chargé de proye & despouilles des ennemis s'en retorna en son pays. De ce dōmage Iaropelc & les autres Seigneurs de Ruffie plus aigris & irritez, que mattez & desconfits de courage, consulterent entre eux ce qui estoit de faire, & s'accorderēt finalement à cela, q̄ de faire guerre ouuerte aux Polagues ce n'estoit pas le plus expediēt. Mais qu'il estoit besoin y proceder de ruse & de finesse & nō de force. Puis qu'ils ne pouuoient

estre esgaux à eux. Et là dessus se presenta vne occasion fort à propos. Car Iaroslau seigneur d'Halicie, soupçonné de s'entendre avec les Polaqes, & qu'il leur descouuroit tous les secrets & entreprises des Rutheniens, auoit esté par eux chassé de son estat, & ainsi s'estoit retiré deuers Boleslaus. Les Haliciens doncques subornez par ceux de Russie, firent semblant d'auoir vn grand regret de l'absence de leur Prince, & de desirer infiniment son retour. A ceste cause ils enuoyerēt vers Boleslaus, pour le supplier de uoloir tant faire pour eux, que de le leur ramener: d'autant que les Rutheniens propres estoient marris qu'il eust esté chassé. Quelques seigneurs Hongres voisins des Haliciens, iouoyent encores ce mesme personnage avec eux, pour donner plus de couleur à la conspiration. Ce qui fut cause que Boleslaus (assez ouuert & legier à croire de son naturel,) y adiousta plustost foy, & ainsi se mit aux chaps avec vn equipage qui à la verité estoit bien assez suffisant pour remener Iaroslau: Mais non pas pour resister aux forces que les Rutheniens secrettement luy auoyent preparees, aussi ne se doubtoit il de rien. Mais aussitost qu'il fut arriué pres Halicie, les premieres troupes des Hongres vindrent au deuant de luy, comme pour le saluer, en bataille toutesfois & ordonnance, & de là passerent iusques aux derniers rangs de ses gens, où ils s'arrestèrent pour les enfermer & enclore par le derriere. Les Haliciens les ayans suivis faisoient tout le mesme, quand voyla tout au mesme instant apparoitre de loing la bataille des Russiens que Iaropelc amenoit à grand haste. Au

moyen de quoy Boleslaus cogneut bien lors qu'il auoit esté deceu & trahy. Et combien qu'en toutes sortes il fust trop plus foible que ses ennemis, neantmoins ayāt tousiours accoustumé de vaincre, il voulut plustost attēdre ce qui pourroit aduenir en combatant honorablement, que de se mettre à vne vilaine & honteuse fuite, & quitter laschement la victoire à son ennemy. Ayant doncques ordonné ses gens le mieux qu'il peut, selon le peu de temps & de loysir qu'il en eut, & donné le signe du combat, alla luy mesmes faire la premiere charge: où se commença vne tresforte & cruelle meslee, & pour quelque temps sembla que les Polaqes deussent auoir du meilleur. Mais tout à coup les escadrons de Boleslaus vindrēt à s'esbranler & mettre en desordre: l'occasion de ce mal estant venu d'vn des Palatins, qui s'estoit effrayé & mis en fuite, & la plus grand part de l'armee apres luy. Toutesfois pour tout cela Boleslaus qui vouloit cheremēt vendre sa vie, ne laissoit de combattre fort valeureusement & d'vn grand effort, encores qu'il n'eust qu'vn bien petit nombre d'hommes avec luy, tous presque blesez ou recreus, estimant trop indigne pour luy de fuir. Et comme son cheual eust esté tué deffoubz luy, soudain vn simple & incogneu soldat luy vint presenter le sien, le suppliant auoir plus d'esgard au salut & conseruation du Royaume, qu'à la gloire & reputation, qui n'estoit pas à propos pour la presente necessité, & par ainsi qu'il luy pleust se sauuer. En telle maniere ce puissant Prince & si grand Capitaine, qui par quarante sept fois auoit combattu en bataille rangee, & tousiours remporté la victoire,

fut desconfit par la lascheté d'un de ses plus grans, & sauué par le bon cueur & franchise d'un des moindres de son armee. Parauenture que Dieu le voulut ainsi permettre afin de le matter, & rendre plus humble. Et pour luy faire aussi recognoistre de plus pres la certaine & infallible vanité de la douteuse & peu asseuree gloire & felicité de ce monde. Au moyen dequoy quād il fut de retour en Poloigne, il enuoya soudain au Palatin (guide & autheur de la fuite) la peau d'un lieure, vne quenouille, & des fuzeaux, luy reprochant par là sa lascheté & couardise. Dont l'autre eut tant de honte, que de desplaisir il se pendit luy mesmes. Quant au soldat qui l'auoit secouru, en premier lieu il l'anoblit luy & toute sa posterité, luy fit de grands dons & bienfaicts, tant en argent cōptant, qu'en possessions & heritages, & l'esleua à de grandes dignitez & honneurs. De là ouurit son espargne pour le rachapt & rançon des prisonniers. Mais il estoit tousiours en vn profond ennuy & melancolie, comme il aduient facilement à ceux qui ayās accoustumé en toutes choses d'estre heureux, se voyent arriuer quelque desconuenue. Et monstrois d'auoir honte voire s'ennuyer de soy mesmes, pour ce qu'il sçauoit assez que sa trop facile credulité, & son peu d'aduis & iugement auoyent esté la seule cause de toute ceste perte & desastre. Au moyen dequoy il fuyoit toute compagnie & conuersation, & ne se laissoit veoir que le moins qu'il pouuoit. Ce qui luy aduança beaucoup ses iours. Sentant doncques que sa fin approchoit, car desia il auoit par vn an entier gardé le liēt, & se trouuoit fort debilité, il feit appe-

ler tous les principaux du royaume, lesquels à cause de leurs charges & offices estoient là pour lors. Et apres les auoir exhortez à paix, amitié & cōcordevint à partir les terres & seigneuries de la corōne de Poloigne à ses quatre enfans: voulant que l'authorité souveraine demeurast à Vvladislus l'aîné de tous. Et quāt à Casimir qui faisoit le cinquieme, & estoit nay seulement l'annee au parauant, il ne luy ordōna rien. Dont les Seigneurs presens, pensans que ce eust esté par oubliance, luy en touchèrent quelque mot, afin que ce pauvre petit Prince ne demeurast point ainsi desherité. Mais il leur respōdit, qu'il l'auoit fort bien pourueu. Et comme ils s'esmerueillassent de cela. Ne voyez vous pas dit il, qu'en vn chariot il y a quatre rouës, & ce qui faict la cinquieme partie d'iceluy est cela où les gens se mettent eux & leurs hardes, qui est tout soustenu & porté sur ces quatre rouës. En semblable aussi cest enfant quelque fois obtiendra le cinquieme lieu entre ses freres, & à son tour leur succedera & regnera. Si cela luy fut diuinement reuelé, ou que selon l'ordinaire de ceux qui sont prochains de la mort, & desia alienez de leur sens, se mettēt à de uiner, on ne le sçauoit pas biē dire à la verité. Quoy que ce soit bien tost apres ces paroles, & qu'il eust acheué de receuoir tous ses Sacremens, il rendit l'esprit au grād regret de tout le pays, l'an 53. de son aage apres auoir regné 36. ans, depuis la mort de son pere, aupres duquel son corps fut solennellemēt inhumé en la ville de Plosco. Au demeurant pour ce que dès son ieune aage il auoit eu ie ne sçay quel charbon ou apostume à la bouche, dont elle luy estoit demeurée aucunement torse, il fut surnommé Criuouste.

Ce Prince icy fut tousiours d'un tresgrand & magnanime courage, ne tenant conte de peril ou danger qui se presentast, grand amateur de droict & de iustice, fort prompt à exercer toute sorte de liberalité, d'une singuliere douceur & gracieuseté enuers vn chacun, trescurieux de louage & de gloire, non du tout ignorant des affaires de la paix, mais plus excellent beaucoup & plus versé au fait de la guerre & des armes, à quoy de ses premieres & plus tendres ongles (comme l'on dit) il s'estoit du tout addonné. Parquoy il y passa tout le cours de son aage, trespreux & treshardy combatant, sage, aduisé & courageux Capitaine, & heureux en toutes entreprises, ceste bataille d'Halicie exceptee tant seulement. Il trespassa l'an de nostre Seigneur 1139.

VVLADISLAUS II.

BOLESLAUS decedé, les Seigneurs & Barons du pays preuoyans que tant de freres n'estoyent pas pour longuement se maintenir en paix & accord ensemble, quelque bon ordre que le pere y eust mis auant que mourir: s'assemblerent à Cracouie, où fut aduisé, pource que les brigues de ces ieunes Princes ne permettoient pas que l'autorité entiere vint es mains d'un seul, que necessairement il failloit venir à ce que Boleslaus auoit ordonné, asçauoir de partager les Prouinces entre ses enfans, neantmoins que la puissance souueraine de la paix & de la guerre demurerait à l'aîné. Vvladislus doncques eust à sa part, Cracouie, Syradie, & Lencise, avec le pays de Silesie. Boleslaus sur-

nommé

nommé le Crespelu, Masouie, Cujauie, Culme, & Dobrine. Miecislus, Gnesne, Posne, Calisse & Pomeranie. Et Henry Sendomirie, & Lubline. Car l'infant Casimir le plus ieune de tous, suyuant la volonte & disposition du pere, ne deuoit point auoir de partage. Parquoy il fut mis es mains de son frere Vvladislus, qui eut charge de l'eleuer & entretenir. Tout cecy aduint l'an 1140.

La forme & gouvernement du Royaume estans ainsi changez, les armes de leurs voyfins ne demurerent pas aussi longuement en repos. Dont le premier de tous fut Sobeslaus Duc de Boheme, lequel mettant en oubly l'alliance que n'a gueres il auoit iuree avec Boleslaus & toute la Poloigne, entra avec son armee dans le pays de Silesie, qu'il courut & pillala d'un bout à autre, & faisoit bien desia son compte d'auoir empietté ceste Prouince, quand tout à coup surpris d'une fieure, il mourut, pour payement de sa desloyauté & mauuaise foy. Mais Vvladislus cependant ne mostroit pas se soucier beaucoup de ce que les Bohemiens entreprenoyent sur luy, indigné à la verité, & ne pouuant bonnement se contenter, que le Royaume qu'il estimoit à luy seul appartenir, fust ainsi deschiré en tant de pieces & morceaux. Enquoy il estoit aiguilloné de sa femme Christine, Allemande superbe & ambitieuse, qui crioit incessamment apres luy avec pleurs, larmes & dolances: quel creue cœur ce deuoit estre à elle qui estoit fille d'Empereur, & niepce d'Empereur, qui s'attendoit, & auoit esté mariee souz ceste esperance, de se veoir Dame d'un beau & puissant Royaume, & neantmoins qu'il

114 CHRONIQ. ET ANNALES
endurast ainsi pusillaniment d'estre reduict à vne trespetite portion d'iceluy? Avec telles & semblables querimonies elle enflamba Vvladislau à entreprendre vn cas meschant & detestable, & qui en fin fut pernicieux pour l'vn & pour l'autre. Car il vint premierement à imposer sur les terres & Prouinces de ses freres de grandes sommes de deniers par forme de contribution, afin que s'ils mettoient quelque empeschement là dessus, il eust couleur & pretexte de leur faire la guerre, car s'estoit où il visoit plus qu'à l'argent. Mais voyant q̄ liberalement ils le souffroyent, il passa outre à l'execution de ce qu'il auoit desia proietté, qui estoit de leur oster tout ce qu'ils renoyent. Et pource qu'il se doutoit bien que les Polagues ne luy assisteroyent pas volontiers en chose si desraisonnable, aussi ne se voulut il pas en cela seruir d'eux. Mais fait secrettement venir vn grand nombre de Russiens, avec lesquels il estoit allié du costé de sa mere. Et commença lors d'entreprendre tout à descouuert sur les pays de ses freres, ordonnant tresexpressément que nul quel qu'il fust n'eust à obeir à autre qu'à luy. Ceux qui y contreuoyent, il les chastioit tresrigoureusement, les vns d'outrages, les autres de prison, & les autres de la confiscation de leurs biens. Les ieunes Princes voyans l'inique intention de leur frere, tout au rebours de ce qu'ils auoyent esperé & attendu de luy, consulterent avec les leurs ce qui estoit de faire. Et pource qu'ils les voyoyent fort abhorrens d'vne guerre ciuile, & ne se trouuoient assez puissans pour resister aux forces qui estoient toutes prestes & appareillees con-

DE POLOIGNE. 115
tre eux, ne sçachant faire autre chose, eurent recours aux Seigneurs & Barons du pays, leur remettant deuant les yeux les biensfaicts & bons traictemens de leur feu pere, & sa derniere volonté & disposition, suyuant laquelle les terres & pays dont ils iouyffoyent, leur auoyent par eux mesmes esté assignez & departis. En fin se recommanderent à leurs loyau-
tez & protection. Et de là s'en allerent trouuer leur frere, se prosternant encores aux pieds de sa femme, qu'ils sçauoyent assez estre la seule occasion & motif de toutes ces nouuelletez. Mais ils auoyent affaire à trop dures oreilles, car elle ne se fleschit en rien, & ne tint aucun compte de leurs prieres & remonstrances. Ceste indignité esmeut plusieurs de la noblesse & des plus grans, tant pour la pitié & compassion qu'ils eurent de ces pauures ieunes Princes, que de la hayne qu'ils auoyent desia conceuë de l'arrogance & auarice de ceste femme qui auoit ainsi esmeu son mary à cruauté, & mauuais traictement enuers ses propres freres, inuenté avec cela certaines nouvelles exactions & imposts au parauant iamais non ouys ny accoustumez. Entre les autres le Palatin de Sendomirie, & le Comte de Scriennie furent ceux qui plus hardiment en parlerent à Vvladislau. Mais luy ne pouuant rien retenir, qu'il ne communiquast à sa femme, le luy dit incontinant, parquoy elle attitra contre ce pauure Comte vn certain Dobessus, qui le cheualla si diligemment, que lors qu'il faisoit les nopces d'vne sienne fille en la ville de Vvratislauie, sans se doubter de rien, cestuy cy estant fort, & accompagné, l'empoigna,

116 CHRONIQ. ET ANNALES
& l'amena prisonnier à Vvladislaus, qui à l'instâce & importunité de sa femme luy fait couper la langue, & creuer les yeux. neâtmoins il vescu encores quelque temps apres. Vvladislaus dōcques qui se sentoit fort à cause de ses Russiens, commēca sans plus rien dissimuler à poursuyure tout ouuertemēt ses freres, & les despouller de leurs heritages. Et desia auoit osté à Henry la Sendomirie, & à Boleslaus Plosco, & toute la Masouie. Tellement qu'il ne restoit plus que Miecislaus deuers lequel les autres freres s'estoyent retirez en la grande Poloigne. Mais tout incontīnāt Vvladislaus y mena son armee aux plus grandes iournees qu'il luy fut possible, & ayant mis le siege deuant la ville de Posnanie, les Russiens faisoient cependant infinis desordres & cruautez, iusques à tuer les pauues gens, forcer femmes, brusler & saccager tout. Dequoy esmeu à pitié & cōpassion le bon vieillard Archeuesque de Gnesne, vint trouuer Vvladislaus en esperance que ses remonstrances & exhortations feroient quelque chose enuers luy: mais ce fut en vain. Et cōme il veit qu'il n'en tenoit compte, lors fort hardiment & sans monstrier aucune crainte luy fit de trescruelles execrations & menaces de la vengeance diuine qui ne lairroit cela longuement impuni. Et là dessus sortant d'vne grand colere & ardeur pour s'en retourner, vne des rouēs de son chariot choqua si rudement contre le mast du pauillō, qu'il alla par terre. Ce qu'on prit à mauuais augure. Aussi peu de iours apres, quelques fois que les Russiens s'estimans estre en toute seurté, faisoient assez mauuaise garde, ces trois Princes assiegez sortirent à l'impour-

DE POLOIGNE. 117
ueu si furieusement sur leur camp, qu'ils en tuerent la plus grand part, & meirent tout en route & en fuite, dont beaucoup se noyerent dans les riuieres de Vvarte & Glouune prochaines de là. Vvladislaus mesmes avec quelques Capitaines des Russiens, & aucuns de ses favoris fut contrainct de se sauuer à course de cheual, sans s'arrester iusques à Cracouie.

Ceste victoire ainsi inopinée, voire miraculeuse, amena vn grand changement, car de tous costez on se venoit rendre aux vainqueurs, dont leurs forces se trouuoient grandement augmētees, & les places & forteresses qui peu au parauant auoyent esté prises retournoient de leur bō gré en la puissance de leurs Seigneurs legitimes. Lesquels ne se cōtentans pas de recouurer ce qui leur auoit esté osté, voulurent aussi à leur tour s'esuertuer de iouer le semblable à leur frere, & tascher à l'exterminer du tout. Parquoy l'Esté ensuyuāt, ayans mis sus vne grosse & puissante armee tirerent à Cracouie, où Vvladislaus ne se fiāt pas assez, ny de la forteresse du lieu, ny du courage des siēs, ne les osa attēdre. Aussi qu'il n'esperoit point de misericorde de ses freres, puis qu'il n'en auoit point voulu vser enuers eux. Laisant donc sa femme & ses trois enfans au chasteau de Cracouie, se retira en Allemagne par le pays de Silesie, deuers l'Empereur Cōrad tiers de ce nom, qui estoit cousin germain de sa femme pour luy demāder secours. Mais ceux de Cracouie se voyās pressez, & le voyage de leur Seigneur estre lointain ouurirent les portes, & bien tost apres le chasteau aussi fut rendu, où les ieunes Princes se monstrerent fort modestes & humains. Car encores

que leur Belle sœur eust esté la seule cause de tous leurs maux: Neantmoins ils pourueurent qu'à elle & ses enfans ne fust fait aucun tort ny desplaisir, combien que le peuple & les principaux fussent fort aigris & irrités contre elle. Et la firent conduire avec tous ses meubles iusques en lieu de seurté, là part où elle se voulut retirer. Ainsi l'infortuné Vvladislaus qui aux persuasions de sa femme s'estoit mis iniustement apres les biens d'autrui, vint à perdre iustement les siens propres. Et ne s'estant sçeu contanter d'une si belle & plantureuse fortune, comme d'auoir la prerogatiue & authorité souueraine d'un tel royaume, vint à finir pauurement ses iours en un exil miserable avec sa mauuaise conseillere de femme, n'ayant regné gueres plus de six ans. En ce mesme temps l'annique Euesque de Vvratisslauie, & depuis Archeuesque de Gnesne, de la noble famille des Griphons, fonda le Monastere d'Anderouie, auquel il assigna de son propre ladiete ville d'Anderouie, avec sept gros villages à l'entour, & l'enrichit & augmenta encores beaucoup depuis.

Vvladislaus ayant ainsi esté chassé avec sa femme & ses enfans, la seigneurie & authorité, avec tout ce qu'il possedoit vint à Boleslaus, comme le plus aagé apres luy, & luy fut semblablement commis & donné en charge Casimir. Cestuy cy se gouerna bien mieux que l'autre en toutes choses, & mesmement enuers ses freres, qu'il traicta fort humainement, & leur vsa tousiours d'une grande douceur, amitié & liberalité. Et combien que l'Empereur eust par plusieurs fois enuoyé deuers luy pour la restitution de

Vvladislaus, il ne peut toutesfois rié faire. Car on alleguoit tousiours là dessus les torts & iniures qu'Vvladislaus leur auoit faits, & à tout le pays sans en auoir eu occasiō. Et qu'il les auoit iniustement despouillees des terres & seigneuries que leur pere & le Royaume leur auoyēt assignees. Parquoy n'ayāt peu obtenir paix avec luy à cōditiōs raisonnables, ils auoyēt cherché de deffēdre leur vie, puis qu'il ne leur restoit autre chose. Que s'estoit un vray dissipateur de tout droit diuin & humain, tyrā & vsurpateur intollerable à tous peuples libres, le q̄l pour auoir voulu chasser ses pures freres à luy tresobeissās, sans l'auoir en rien offensé, auoit aussi esté puny d'un bannissement perpetuel au grand contentement de tout le peuple. Non tant par le moyen de leurs forces & pouuoir, que par celuy de la diuine vengeance qui auoit ainsi voulu punir son impieté. Que l'Empereur doncques ne les requist point de cela, que sans le grand dommage & incommodité de la chose publique, ils ne luy pouuoient accorder. Car le deuoir d'un tel & si grand Monarque estoit plustost de subuenir aux affligés iniustement, que d'ayder à ceux qui s'ingèrent de les outrager, & leur faire iniure. Enquoy personne ne deuoit estre fauorisé de sa Maiesté, qui estoit tenue de se formaliser tousiours pour l'innocēce cōtre la meschanceté, pour le droit cōtre le tort, la douceur contre l'arrogāce, l'equité cōtre l'iniustice, & finalement pour la pieté cōtre le parricide. Ces choses adoucirent aucunement l'Empereur, qui sçauoit bié à la verité cōme tout estoit passé. Toutesfois il ne laissa de leur denoncer la guerre, plustost pour

fatisfaire à son deuoir, que pour enuie qu'il en eüst. En quoy Boleslaus monstra sa valeur, sa prudence & bonne conduicte. Car tout aussi tost que l'armee des ennemis qui estoit grosse à merueilles, & biē à craindre, comme estant composee d'Allemans, de Bohemiens & Moraués, fust arriuee sur les confins de Poloigne, luy avec quelques troupes de cheuaux legers qu'il auoit tout à propos esleués & choysies de toutes les forces du Royaume, leur donna tant d'empeschemens, maintenant leur coupant les viures, tātost leur rompant les chemins, vne fois se montrant à la teste de leur camp, puis tout soudain sur la queue, & ainsi les tenāt en alarmes cōtinuelles, avec quelque bonne & grosse embuscade que tousiours il leur entremesloit, que l'Empereur apres l'auoir souz son assurance faicte venir parler à luy, eut à grand ioye & plaisir de s'en retourner, sans faire autre chose, ioinct aussi que ses affaires propres ne luy permettoyēt pas de se tenir plus longuement esloigné de ses pays.

La paix ainsi faicte avec l'Empereur, ou pour mieux dire, la guerre remise iusqu'à vne autre fois, Boleslaus & son frere Miecislus prirent à femmes les deux sœurs, filles du Prince d'Halicie, asçauoir Boleslaus Anastasie, & l'autre Eudoxie. Hēry ne se voulut point marier, mais s'en alla en la terre sainte avec vne bonne troupe de Polagues, où par l'espace d'vn an qu'il y demeura fait beaucoup de beaux faits d'armes sur les Turcs & Sarrazins. Puis à son retour fonda au bourg de Zagofce sur la riuere de Nyda vne Cōmanderie pour les Tēpliers avec vn bō & gros reuenu. Iaxa aussi de la susdite race des Griphons, qui auoit

le voyage avec Henry, ramena vn des Chanoines du saint Sepulchre, de ceux qui sont de l'ordre saint Augustin, & portent vne double croix rouge. Ce fut le premier qui introduit ceste religion en Poloigne, leur ayant basti en son bourg de Miechouo, qui est maintenāt ville close, à cinq lieuës de Cracouie, vne eglise & vne demeure aupres, avec le reuenu de deux villages, il fonda encores depuis en l'vn des faubourgs de Cracouie, vn Monastere de Nonnains, de l'ordre de Premonstré, appelé *Zuerinec*, qui vault autant à dire comme le Viuiet.

Quelque temps apres, à sçauoir l'an 1153. l'Empereur Conrad mourut, auquel succeda Frederic Barberousse, fils du Duc de Suauue. Et bien tost apres en faueur de Vvladislaus, il entreprit la guerre pour le remettre en son estat, mais auant que passer plus outre, enuoya ses Ambassadeurs deuers Boleslaus & ses freres pour la leur denōcer, fils ne receuoyent Vvladislaus, où ne payoyent tribut delà en auant à l'Empire: leur donnant le choix de ces deux, & ce pendāt tout le long de l'hyuer il fit ses preparatifs. Les Polagues feirent responce qu'ils auoyent plus cher de se soumettre à tout hazard, que de receuoir iamais vn homme si facheux & turbulēt qu'estoit Vvladislaus. Et quant au tribut qu'ils ne sçauoyent encores que c'estoit. Parquoy l'an 1158. l'Empereur avec vne forte & puissante armee d'Allemans & de Bohemiens sachemina en Poloigne, par le pays de Saxe. Et sans trouuer empeschement passa la riuere d'Ordre, car les Polagues, combien qu'ils eussent d'assez raisonnables forces, ne trouuoient pas toutesfois à pro-

pos de se ietter temerairement au deuant d'une telle puissance, mais trop bien de les escarmoucher, tãtoſt d'un coſté, tantost d'un autre, les tenã les plus ferrez qu'ils pouuoient. Pource que ceux qui ſ'escartoyẽt vn peu au loing estoient incõtinãt trouſſez. Ils feirẽt auſſi le gaſt par tout où l'armee del'Empereur deuoit paſſer, de telle ſorte qu'ils ne trouuoient que mãger, dont ils commãcerent à patir beaucoup. Et là deſſus leur ſuruint vne maladie d'intẽſtins, laquelle outre les autres incommoditez, où ils ſe trouuoient, & les alarmes continuelles qui ne leur permettoient de faiſer & prochaffer, ny de prẽdre aucun repos: commença à les deſcourager fort, & à les faire murmurer, ſi que l'Empereur, lequel d'ailleurs estoit neceſſairement rappelé des affaires d'Italie, ne cherchoit ſinon quelque honneſte occaſion pour ſa retraite. Parquoy il attitra le Prince de Boheme, qui feit tant enuers les Polaques, qu'ils vindrent à parlementer avec luy, & là fut faiçte la paix, à telle cõdition qu'Vladislaus auroit la Sileſie & riẽ plus. Et que Boleslaus & ſes freres fourniroyent trois cens lances à l'Empereur pour la guerre de Lombardie. Par meſme moyẽ pour touſiours mieux aſſeurer les choſes, fut faiçt le mariage d'Alyz, niepce de l'Empereur, de par ſa ſœur avec Miecilaus, qui estoit veuf pour la ſeconde fois. Et deſia ſe preparoit Vvladislaus, pour retourner en ſon pays, dont il auoit eſté abſent enuiron treze ans. Mais en chemin il fut preueni de la mort, & enterré en la ville d'Oldemburg en Holface, que les Slauons anciennement auoyent fondee. Il veſcut cinquante cinq ans, ſix deſquels ſeulement il commãda en Po-

loigne, ayant laiſſé trois enfans maſles, Boleslaus, Miecilaus, & Cõrad, leſquels par le moyen de l'Empereur Frederic entrerẽt en poſſeſſion de Sileſie, qui eſt vn pays ſeparé du reſte de la Poloigne, par de grands bois & forests qui ſe treuuent entre deux, & de là ſ'eſtend iuſques en Saxe & Boheme. Mais ce fut à telle condition qu'ils recognoitroyent touſiours la courone de Poloigne, & ſe garderoient d'eſtre imitateurs de la felonnie & mauuais comportement de leur pere.

BOLESLAUS IIII. *ſurnommé*
le Creſpelu.

Les enfans d'Vladislaus eſtãſ ainſi remis en partie de l'heritage de leur pere, Boleslaus leur oncle du cõſentement de ſes freres, & de tout le conſeil fut eſtably au gouuernement & ſouueraine autorité du Royaume. Où luy voyant toutes choſes tranquilles & pacifiées, ſe tourna à faire la guerre aux Pruſſiens, qui ſ'eſtoient tout à coup departis de la religion Chreſtiẽne, & de l'obeiſſance des Polaques. Mais eux ne ſe ſentans pas aſſez forts pour reſiſter, depeſcherent incontinent leurs Ambaſſadeurs pour demander la paix, & offrir de ſe ſoumettre à tout ce qu'on leur voudroit ordõner. Boleslaus leur feit reſponce, que de paix ils n'en pouuoient auoir ſils ne delaiſſoyẽt leurs faux Dieux, & ne ſe retiroyent de leurs ſuperſtitiõs & abus, pour reprendre la foy Chreſtiẽne, ce qui leur ſembla fort dur: toutesfois eſtãns forcez & cõtraints de la neceſſité preſente, ils receurent les cõditions, demolirent

leurs temples & autels, meirent bas les simulachres, & desdierent le tout au souuerain Dieu, que nous adorons, & feirent instruire leurs enfans aux poincts & articles de nostre foy. Brief se rengerent du tout au Christianisme, au moins en apparence, & pour euitier le dāger, car ce n'estoit pas du cœur qu'ils le faisoient. Pource qu'aussi tost que Boleslaus eut remmené son armee, & qu'ils se veirent hors de crainte & de peril, retournerent incontinant à leurs premieres erreurs & folles fantasies, tellement qu'auant que l'an fust passé, ils eurent du tout exterminé les prestres, prophané les Eglises & lieux saints, & aboly toutes ceremonies & obseruations Chrestiennes. Mais se doutans bien que cela ne passeroit pas sans quelque chastimēt & penitēce pour eux, voulurent preuenir, & enuoyerent deuers Boleslaus avec force presens. Offrans de demeurer en toute fidelité & obeissance, & faire tout ce qu'on voudroit, pourueu qu'ils ne fussent point forcez de quitter leur religion, en laquelle de si longue main ils auoyent esté nourris & instituez, pour en prendre vne nouvelle, à eux inconnue. Ce q̄ le peuple ne feroit iamais: plustost s'exposeroit il à tout ce qui pourroit aduenir, voire abandoneroit le pays. Boleslaus à la verité n'embrassa pas cest affaire cōme il deuoit, monstrant d'auoir en plus de recommandation la foy que ce peuple luy promettoit, que celle qu'il deuoit garder à son Dieu. Car il renuoya les Ambassadeurs d'une façon, comme s'il eust approuué leur legation, & s'en fust cōtenté: fust ou qu'il eust esté gaigné de leurs abus, ou que pour lors il eust eu l'esprit ainsi perdu & offusqué, d'autāt

qu'il ne prenoit pas garde que rien ne doit auoir lieu enuers vn Prince, là où il est question de l'hōneur de Dieu, & du salut des ames qui sont souz son gouuernement, dont il doit quelque fois rēdre compte. Ou bien si on ne veult point auoir d'esgard à cela, mais seulement à ce qui est du monde, & que nous n'ayōs le cœur à autre chose, qu'à veoir succeder noz affaires selō nostre desir: Encores fault il auoir cecy pour vne maxime infallible, que si nous fleschissons es choses qui despendent de nostre foy & religion, il ne faut iamais de nous arriuer quelque malheur que la punition diuine enuoye sur nous, pour chastiment de ce meffect, qui luy est desagreable sur tous autres. Dauantage, il est fort dangereux de lascher la bride à vn peuple, & luy agreer à tout ce qu'il veult, ny de penser luy complaire en choses desraisonnables. Car cela luy hausse le cœur, & le rend plus insolent à desirer & entreprendre puis apres choses plus iniques. Nous pouons bien vser aucunes fois de quelque dexterité d'esprit, & de ruse encores, pourueu qu'en cela il n'y ayt point de mauuaise foy. Mais quelle plus mauuaise foy y scauroit il auoir, que de corrompre & alterer celle que nous deuons à nostre Dieu, ou permettre à noz subiects de le faire, qui est vne mesme chose, car puis qu'ils sont noz subiects il les fault tenir en obeissance: Premièrement de ce qui est deu à Dieu, & puis apres à nous. En cela certes les hommes faillent grandement de mettre leurs commoditez deuant la gloire & honneur de leur Createur, & ne leur en scauroit iamais bien prendre, comme aussi ne fait il à Boleslaus. Car les Prussiens

voyans que ce qu'ils auoyent faict estoit ainsi passé doucement, sans aucun chastiment ny reprehensio, s'enhardirent de passer encores outre, & chasserent les receueurs & officiers de la gabelle du Prince. Puis ayans en toute diligence assemblé vne grosse troupe de gens de toutes sortes entrerent à l'impourueu, & sans que les nostres se doutassent de rié, dans Culme & Masouie, où ils feirent vn merueilleux eschec, emmenât grand nōbre d'ames & de bestial. Dequoy aussi tost que Boleslaus fut aduerty, sans temporiser ny attendre de plus grands forces, avec ce peu de gēs qui pour lors se trouuerent autour de luy, & ceux qu'il peut amasser par les chemins, se hasta d'aller au secours des siens, mais les autres ayās faict leur main festoyent desia retirez. Parquoy cognoissant la faute qu'il auoit faicte, & ayant de cela vne merueilleuse cōpunction de cœur, l'annee ensuyuant, qui fut 1167. avec vne plus grande puissance que l'autre fois entra en Prusse, où par la fraude & trahison de quelques vns du pays, feignans festre venus rendre à luy, auxquels il se fia trop legerement, toute son armee fut rompue & deffaite. Car ceux cy ayās eu la charge de la guider, l'allerent engager dans vn marais, où les gens de cheual ne se pouuoient manier ny ayder, au contraire s'abyismoient là dedans, dōt la plus grand part furent noyez, & le reste tuez à coups de flesches & de traict, par les ennemis qui festoyēt embuschez à pied là aupres. Le Prince Henry (entre les autres) y demeura combatant tres vaillāment, avec plusieurs grands & valeureux personages, tellement que des lors en auant les forces des Polques demurerent si

affoiblies & diminuees, que d'vn lōg temps apres ils ne se peurent remettre.

Henry mort ainsi sans enfans, les seigneuries de Sendomirie & de Lubline, qui estoient de son apavage, vindrent à Casimir, le dernier de tous qui n'auoit encores rien eu. Et en ce mesme temps, Vernerus, Euesque de Plocense, personnage de fort saincte vie, & grande doctrine, fut malheureusement mis à mort, par vn gentilhomme nommé Bolesta, en haine du village de Carschum, qu'il auoit perdu contre luy par procez. Parquoy l'Archeuesque de Gnesne, du cōsentement des autres prelates du Royaume l'excommunia, & Boleslaus luy ayāt faict faire son procez, & ordonné de deffendre luymesmes sa cause en sa presence, le fait bruiler tout vif en la grād place de Gnesne. Le corps de Vernerus ayāt depuis esté porté en la ville de Plosco, commença soudain à faire plusieurs miracles, dont on l'eut en fort grand honneur & reuerce. Et quelques annees apres, à sçauoir, 1173. Boleslaus deceda, aagé de quarāte six ans, l'an vingt-septiesme de son regne, & fut enterré à Cracouie, ayant laissé vn seul fils, qui fut par apres surnommé Lescus le Blanc. Auant son trespas Gedeon de la Famille noble des Griphōs, dont a esté parlé cy dessus, edifia la ville de Kelce, au milieu d'vne grāde & profonde forest, & y bastit vne eglise de pierre de taille, où il meit des Chanoines, avec grosses rentes & reuenus, de villages & decimes pour leur entretenemēt, & quasi au mesme temps le siege Episcopal de Cruzuicie fut transporté à Vvladislauie, par Honoldus Italien, qui en estoit Euesque.

MIECISLAUS LE VIEILLARD.

ABoleslaus succeda son frere Miecislaus, surnomé le Vieillard, auquel ceste qualité fut donnée, estant encores bien ieune, pour sa prudence & gravité. Mais quant il fut plus aduancé en l'aage il trompa ceux qui auoyent conceu de luy vne si bonne opinion. Car tout au commencement de son regne il se monstra ennuyeux à tout le monde, tant pour les nouveaux subsides & impositions qu'il meit sus, que pour la rigueur qu'il tenoit en toutes choses, iusques à confisquer tous les biens d'un Gentilhomme qui eust tué quelque Ours, Cerf, ou Cheureul: d'autant que pour lors il n'estoit loisible à hōme quel qu'il fust, de chasser, s'il n'en auoit le congé & permission du Prince. Il vendoit dauantage les estats de iudicature, & autres charges & offices publiques, & ne vouloit point ouyr les plaintes de ses subiects: mais mal gracieusement repoussoit ceux qui pour ceste occasion se presentoyent deuant luy. Tellement qu'on ne s'esbahissoit pas si les officiers de leur costé faisoient encores pis, puis qu'il leur en monstroit le chemin, dequoy tout le peuple estoit comme au desespoir pour les torts & iniures qu'on leur faisoit cōtinuellement. Gedeon Euesque de Cracouie, homme de grand cœur, entreprit de luy en faire à part quelques remonstrances: mais il n'en rapporta autre chose que sa male grace & indignation: & neantmoins pour cela il ne se desgousta pas de persister en ce bon office, mais aduisa de l'aborder avec vne telle ruse. Il attira vne femme, qui en fort piteux & miserable

miserable estat se vint ietter aux pieds de Miecislaus, criant, lamentant à haute voix, & demātant iustice. Importuné de ces pleurs & crieries il luy demanda qu'elle auoit. Sire ce dit elle, tout mon bien cōsistoit en vn troupeau de Moutons que i'auois baillé en garde à vn mien fils, mais s'en estāt remis sur des garçons, par leur nōchalāce tout a esté māgé des Loups. Et ainsi me voyla reduite à vne extreme pauureté, parquoy ie vous requiers que celuy par la faute duquel ceste perte est aduenue, soit condamné à me la reparer. Les garçons furent appelez là dessus, qui estoient semblablement embouchez, & nierent fort & ferme cecy estre aduenu par leur negligence, mais de la faute de l'autre, qui à la verité n'estoit pas fils d'elle, mais de sō mary, & d'une autre femme: lequel addonné à ses plaisirs entretenoit tout plein de dogues & autres chiēs cruels, qui festoyent ruez sur le troupeau, dont ils auoyēt deuoré vne partie, & escarté le reste, que les Loups auoyēt acheué, parquoy festoit à luy à respondre de cela. Le ieune homme estoit aussi present, & tout de propos deliberé faisoit quelque semblāt de vouloir deffendre sa cause, mais il n'alleguoit point de raisons si suffisantes qu'elles le peussent excuser. Parquoy Miecislaus le condamna à payer à sa belle mere le dommage, que par sa faute & negligence elle auoit receu. Et certes dit lors Gedeon vous auez iustement & prudemment iugé, Sire, puis que cestuy cy nourrissoit de tels chiens, que non seulement ils n'ont deffendu le troupeau de la gueulle des Loups, ains le leur ont exposé, pour deuorer, & quāt & quant en ont mangé leur part. Mais

vous aurez de tous poincts accompli le deuoir d'un bon & iuste iuge, si vous mesmes mettez à executiō vostre sentence, & que ce que vous ordonnez aux autres, vous le beau premier l'accomplissiez. Car si vous y pensez bien, vous vous estes iugé vous mesmes, vous mesmes vous estes condamné. Vous estes le fils de ceste n'aguere tant belle & fleurissante Republique, & toutesfois vous ayez mieux qu'elle vous soit en lieu de Marastre, que de propre mere. Mais cela ne procede pas tant de vostre faute, comme de celle des autres. Ceste cy vous a enfanté, vous a tendrement nourry, esleuë à l'honneur & aduancement où vous estes, vous a donné son troupeau en garde, elle mesme s'est mise en vostre main: & n'obstant cela vous auez exposé le tout à dogues & chiens cruels & affamez: Ce sont les iuges & officiers venaux. A des loups rauissans insatiables, voz courtisans & favoris, qui souz vostre vmbre & autorité deuorent les autres moins puissans, du sang desquels vous les engraissez. Sçachez, Sire, que quelque fois vous auez à en rendre compte, & si ce n'est deuant les hommes, au moins ce sera deuant Dieu, la iustice duquel personne quelque grand, sage, caut & puissant qu'il puisse estre, ne peut à la fin fuyr ny euitier. Retournez doncques à vous, & regardez vostre pauvre & desolee mere, qui vous tend les bras en si piteux estat & equipage, là où vous l'auiez trouuee si fleurissante & entiere. Et n'acheuez pas de perdre & ruiner ce que vous deuez garder auant tous autres. Car estimez que ce que ie vous dis, c'est tout l'estat en general de ce Royaume, qui est prosterné à

voz pieds, pour vous faire ses plaintes & doleances, lesquelles si vous reiettez & n'en tenez compte, on pourra parauenture estre dailleurs diuinement secouru & assisté. Mais aussi donnez vous garde ce pendant de la vengeance de celuy qui ne laisse rien impuny, & d'en estre pirement traité que le Roy du mesme nom que vous Miecisslaus, que Boleslaus deuxiesme, que vostre frere Vyladisslaus, & tous autres, quelque part que ce soit, où ils ayent auarement & cruellement regné: Puis que par leurs exemples & disconuenues vous ne vous fleschissez point. De ceste harengue si aigre, si libre, & si hardie, Miecisslaus fut irrité outre mesure, & sortit du conseil, menassant Gedeon, & les autres qu'il voyoit luy adherer & approuer son dire, dont il deuint encores plus fier, insolent & desbauché, & se meit à faire pis que deuant. Sur ces entrefaictes il aduint qu'il feit vn voyage en la grande Poloigne, parquoy les principaux du conseil sestans assemblez, pour aduiser ce qui estoit de faire, arresterent de luy oster le gouuernement, & le mettre es mains de Casimir son frere, duquel tout le peuple auoit desia conceu vne fort bonne opinion, à cause de ses douces & gratieuses façons de faire. Il estoit mesmes n'agueres aduenu, qu'un de ses Gentilshommes luy auoit donné vn soufflet par collere, en desespoir d'auoir perdu tout son argent au ieu contre luy, dont ayant esté condamné soudain à perdre la vie, Casimir la luy sauua. Et ne voulut permettre qu'il eust aucun mal, ains luy pardonna liberalement, & luy rendit encores son argent, le remerciant de ce que par là il luy auoit

apris de ne faire plus aucun acte indigne du lieu d'où il estoit sorry. Ainsi les Barons luy enuoyerent signifier son election. Ce que du commēcemēt pour le respect & amitié qu'il portoit à son frere, il ne voulut accepter: Mais à la fin vaincu de leurs prieres & des plaintifs qui se presentoyent de toutes parts de la tyrānie & mauuais gouuernement de Miecisslaus, aussi qu'il craignoit qu'ils ne vinsēt à disposer autrement de l'estat, & ne prinssent quelque autre party, s'achemina à Cracouie. Toutesfois à peu de gens, & avec son train ordinaire seulement, afin qu'on ne pensast pas que par force, & sans y auoir esté appelé, il se voulust introduire à la principauté. Miecisslaus incontinant qu'il eust les nouvelles de ce qui s'estoit fait se retira à Ratiborie avec sa femme & ses enfans, & de là s'en alla trouuer l'Empereur Frederic son allié, lequel il trouua si empesché apres les affaires d'Italie, & les preparatifs de son passage en la terre sainte, qu'il n'en peut tirer aucun secours, Parquoy ne luy restant plus autre moyen, fut contraint recourir par personnes interposees à la grace & misericorde de son frere, lequel vaincu de compassion de veoir ainsi en vn instant vn tel changement que celuy qui n'agueres commandoit superbement à tous fut contraint de s'humilier & venir aux prieres & requestes, proposa au conseil sa restitution, ce que tous les seigneurs prirent en si mauuaise part, qu'ils vindrent à le tanter fort asprement, de ce qu'il vouloit auoir plus d'esgard à ie ne sçay quel petit friuolle deuoir & office de frere, qu'au bien, salut, & conseruation de la chose publique. Parquoy qu'il se de-

portast sil ne vouloit encourir la mesme indignation de tout le peuple qu'auoit fait son frere, & encore parauenture plus aigre & dangereuse. Casimir intimidé de ce langage n'osa passer plus auant & feit contenance de se sentir trop obligé à eux de la bonne volonté & affection qu'ils auoyent enuers luy. Et de là en auant ne parla plus de rappeler Miecisslaus: mais secrettement se sentant de plus en plus toucher au vif d'vne pitié & amour fraternelle, le fauorisoit souz main en tout ce qu'il luy estoit possible, le faisant aduertir & instruire de ce qu'il pensoit luy estre plus à propos pour rentrer en son authorité. En quoy de sa part il luy assisteroit de tout son pouuoir. Or Miecisslaus auoit vne fille mariee avec Mescingus, Gouverneur de Pomeranie, parquoy il aduisa de se retirer deuers luy. Et feit tant avec son ayde & moyē, qu'il prit d'emblee la ville de Gnesne, non toutesfois au desceu de Casimir, mais luy mesme y consentant, & tenant la main. De là en peu de iours il prit plusieurs autres places & forteresses, les vnes de force, les autres par composition. Tellement qu'au bout de deux ans qu'il eust esté deietté il recouura de rechef la seigneurie de toute la grand Poloigne, qui estoit le partage a luy escheu par le testament & ordonnance de son pere.

CASIMIR.

CASIMIR tout aussi tost qu'il eust esté appelé au gouvernement du Royaume, abolit les charges & impositions que Miecislus auoit mis sus, reforma la iustice, & ramena à certains termes & limites la trop grande licence & autorité dont les Magistrats & officiers vsoyent à la decision des procez. Et d'autant que les seigneurs & Gentilshommes festoyent rédus si desbordez & insolens à opprimer non seulement leurs subiects, mais ceux des autres encores, qui estoient proches & voisins d'eux, que les pauures laboureurs & paisans ne pouuoient plus supporter le faix des torts & violences qu'incessamment on leur faisoit. Il feit tout expres vne assemblee à Lencise, où on pourueut à ces desordres & vsurpations. Il appaisa aussi par mesme moyē, mais fort gracieusement & sans mettre la main aux armes, quelques tumultes & seditions qui estoient desia bien aduācees. Et ainsi suiuant le deuoir & office d'un bon Prince, alloit de tous costez, donnant ordre & remediand aux choses, qui par le passé auoyent esté deprauees & corrompues.

L'an puis apres 1182. mena son armee en Halicie, pour remettre son nepueu Miecislus, fils de sa sœur, en son estat, dont il auoit esté chassé par ses propres freres, comme illegitime. Et l'an 1185. estant iceluy Miecislus mort de poison, Casimir soupçonnant les Hongres auoir tramé ceste meschanceté, car ils festoyent emparez du pais de Halicie, se preparoit pour leur faire la guerre. Mais tout le peuple commença à

murmurer, disant qu'on ne deuoit pas ainsi legerement rompre la paix & alliance qu'ils auoyent avec vn peuple si vaillant, aguerry & redoutable. Et là dessus se meirent à conspirer contre luy, & à rappeler Miecislus, ce pendāt qu'il estoit allé en Russie, pour appointer quelques differents qui y estoient suruenus, faisant courir le bruit qu'il auoit esté empoisonné. Miecislus accourut incōtinant, & luy furent les portes de Cracouie ouuertes, où on le receut à grād ioye & acclamations de tout le peuple, & de la plus part des principaux. Mais l'Euēque Foulques & le Palatin Nicolas, qui auoit la garde du chasteau (deux freres de la maison des Liffiens où Vvlpies) qui ne estoient pas du party des autres, luy en refuserent brauement l'entree, & tindrent bon là dedans avec leurs gens, & ceux de la garnison qui y estoit d'ordinaire. Casimir aduertuy de tout cecy, ordonna aux Ducs Vvolodimir, Romain, & Vvssuolode, d'assembler leurs gens, pour luy faire compagnie, & leua quant & quant le plus qu'il peut de soldats, tant mercenaires que volontaires, avec lesquels il vint en toute diligence à Cracouie, & là d'un grand effort assiegea la citadelle que Miecislus y auoit bastie, laquelle il prit incōtinant: neātmoins il ne feit aucun tort ou iniure, ny aux fils de Miecislus, ny aux autres qu'il trouua dedans, tous lesquels il réuoya sains & sauues, avec force dons & biens faits, de laquelle courtoisie & bonté il gaigna tellement le cœur de son frere & de ceux de son party, que depuis ils n'attenterent plus rien de son viuant.

Ayant doncques ainsi pacifié toutes choses, &

faict appointment avec les Hongres, il se meit à faire la guerre aux Prussiens, tant pour venger la honte qui n'agueres auoit esté receue souz son frere Boleslaus, & la mort de Héry, que pour auoir en fin la raison de ce peuple si barbare, seditieux & rebelle. Mais apres plusieurs bruslemens, saccagemés & ruines par eux endurees, ils vindrent à requerir la paix, payerēt tout ce qu'ils deuoient de tribut du passé, & promirent d'obeir inuiolablement à tout ce qu'on leur ordonneroit. Ceste guerre paracheuee il se resolut de passer le reste de ses iours à réparer les places & forteresses de son Royaume, & reduire à quelque bonne forme la police & les coustumes de Poloigne. Il obtint aussi du Pape Lucius troisieme le corps de saint Florian: au deuant duquel fort deuotement & avec vn tresgrand honneur & magnificence, il alla sept bonnes lieuës hors de Cracouie, avec tout le Clergé, & vne infinie multitude de peuple, & luy bastit vne tresbelle Eglise, au fauxbourg de Cleparie, qui est du costé de Septentrion, avec force riches & precieux ornemens, & vn College de Chanoines bien rentez. Passant tousiours de là en auant la feste de ce glorieux martyr, dans son Eglise, en aumosnes, oraisons & autres bonnes œuures, car il estoit d'vn naturel fort deuot, & de son temps fit beaucoup de biés aux Eglises. Mesme auāt qu'il paruint à la principauté, il fonda le Monastere de Solerue de l'ordre de Cisteaux, au Diocèse de Gnesne, sur la riuere de Pilce. Et celuy encores de Coprounic de mesme ordre. Lequel ceux de la maison de Bogorie & Abdace enrichirēt beaucoup depuis. Car c'est l'ordinaire qu'on

s'addonne

s'addonne tousiours volōtiers à ce où l'on cognoist que le maistre prend plaisir. Finablement Casimir l'an 1194. le dixseptieme de son regne, faisant vn festin solennel aux Seigneurs & Barons du Royaume, ainsi qu'il eust beu vn mediocre traict s'esuanoüit, & bien tost apres trespassa. Parquoy on ne sçait pas à la verité, si ce fut de maladie naturelle, ou de poison. Il vescu cinquantesix ans, & laissa deux fils en bas aage, Lescus, surnommé le Blanc, de la couleur de ses cheveux, & Conrad avec vne fille nommee Aliz, qui deceda dixsept ans apres la mort de son pere, ayant fort saintement & religieusement passé tout le cours de sa vie. Il est enterré en la grande Eglise de Cracouie.

LESCVS LE BLANC.

GRANDE partie de la noblesse se trouua aux funerailles & enterremēt de Casimir. Parquoy tout de ce pas sans differer d'auantage ils entrerent à l'election du nouveau Roy, ou apres plusieurs choses alleguees & debatues d'vn costé & d'autre, Lescus fils aîné de Casimir fut receu en la place de son pere. Toutesfois durant son bas aage, sa mere Helene deuoit auoir le maniment, à la charge qu'elle ne feroit rien d'importance sans appeler l'Euesque, & le Palatin de Cracouie qui furent dōnez pour curateurs & gouuerneurs du ieune Prince. Ces choses rapportees à Miecisslaus il eut grand despit d'auoir esté ainsi mis en arriere, & là dessus vint à aigrir ceux de la grande Poloigne, ausquels il

f

commandoit, & les Silesiens: leur mettant deuant les yeux le peu de compte qu'on auoit tenu d'eux, d'auoir procedé à ceste election, sans les y appeler & daigner attendre. Parquoy ayant assemblé son armee s'en vint en grande diligence droit à Cracouie, & desia estoit arriué iusques à la riuere de Mosgane, & y auoit planté son camp, sept lieuës seulement loing de Cracouie, quand voicy arriuer le Palatin avec vne grosse puissance, d'ot il eust plustost la veüe que l'aduertissement, de façon qu'il ne se donna garde qu'il les eut sur les bras. Neantmoins il se prepara incontinant au combat, & là fut vne braue & cruelle meslee, qui ne passa pas sans grande effusion de sang d'une part & d'autre. Mais Miecisslaus y perdit son fils Boleslaus, & ayant esté blessé & prins, apres qu'il eust osté son habillement de teste, & faict voir qui il estoit, on le laissa aller, & ainsi se sauua à la fuite.

Ceste disconuenue si grande arriuee à Miecisslaus, combien qu'il en fust deuenun peu plus craintif & pesant à entreprendre choses nouuelles, si ne pouuoit il routesfois demeurer en repos de son esprit. Ains aspiroit tousiours au recouurement de la principauté dont il auoit desia tasté. Mais voyant que ouuertement & de force il ne pouuoit rien faire, il eut recours aux ruses & finesses. Et pource que le naturel des femmes est fort enclin à croire legerement, & se laisser aller à ceux qui les scauent flatter, selon ce qu'il leur reuient, & ont le plus à cœur: il se adressa à la Princesse Helene, luy faisant remon-

strer la ruine & desolation que ce seroit pour le royaume, si ces dissensions & partialitez alloient plus auant. Que quāt à luy, il estoit desia sur l'aage, & luy restoit peu à viure: Et qu'il mourroit plustost assez, que son fils ne seroit en aage de commander. Parainfi qu'il seroit beaucoup plus raisonnable que luy qui estoit son oncle eust cependant le gouuernement & administration, que non pas les autres, qui par auenture ne luy seroyent pas si fidelles, mais tascheroyent à faire leurs besoignes à ses despens, là où il n'auroit l'œil à autre chose, qu'à luy laisser l'estat florissant & paisible. Avec beaucoup d'autres belles paroles & persuasions qui eurent si bien lieu enuers la Dame, qu'elle se laissa aller à ce que Miecisslaus voulut. Car il deuoit iurer & faire serment solennel, que aussitost que Lescus seroit paruenu en aage, il luy remettroit la Seigneurie entre les mains. Et là dessus fut pris iour de se trouuer à Cracouie, à la sainct Barthelemy prochaine, où Miecisslaus ne faillit de venir bien accompagné. Les sermens receus d'une part & d'autre, Helene se retira avec son fils en Sendomirie, & Miecisslaus demeura restabli en son autorité pour la troisieme fois. Peu de temps apres qui fut l'an mille deux cens, le vnzieme iour de May, sur le Midy, suruint vn horrible tremblement de terre qui dura quelques iours, & ruina beaucoup d'edifices par toute la Pologne, chose peu souuent aduenue en ce pays là. Parquoy cela fut tenu pour quelque prodige & mauuais augure. Cependant combien que le temps fust venu que Miecisslaus se deuoit demettre de l'estat es mains de son nepueu.

il ne faisoit toutesfois pas grand semblant de vouloir satisfaire à ses promesses, quelque instance que luy en feist Helene, tant par lettres qu'ambassades, s'excusant vne fois sur les affaires publiques, vne autre sur son indisposition. Tant que finablement elle mesmes le vint trouuer en personne, & là luy remettant deuant les yeux ce qu'il auoit promis & iuré, à quoy elle le prioit de satisfaire, du commencement il la voulut contenter de belles paroles & promesses: mais voyant qu'elle le pressoit, & commençoit d'entrer en reproches & doleances, lors sans plus dissimuler luy dict tout ouuertement, Que ny les conuenances passées entre eux, ny le serment par luy donné, ne le pouuoient pas auoir obligé contre le droit de nature, & celuy qui est commun à toutes gens. Qu'il auoit s'uyuant iceluy des heritiers naiz, ses enfans legitimes, & ne luy estoit pas permis de les priuer de la succession qui leur appartenoit apres sa mort. Elle bien esbahie & confuse, commença lors à cognoistre la faute qu'elle auoit faicte, de s'estre trop legerement fiee à luy. Toutesfois elle ne perdit point le cœur pour cela, mais depescha soudain de toutes parts à ceux qu'elle pensoit auoir encores quelque memoire & souuenance de son feu mary Casimir, leur remonstrant la mauuaise foy dont on vsoit à son fils. Et implorant là dessus leurs loyautéz, avec promesses de grandes recompences, leur remettoit encores deuant les yeux le mauuais traictement qu'ils auoyent receu de Miécislaus, & la iuste hayne & indignation que le peuple auoit conceuë contre luy. Aussi auoit il grandement irrité les plus grands du pays, &

ceux de la noblesse, pour leur auoir osté certaines possessions & heritages, d'ot de tout temps ils auoyent iouy, pour les donner à de ses favoris & courtisans de la grand Poloigne, aufquels il conferoit aussi les charges & offices que ceux du pays deuoient auoir. Au moyen dequoy tous les premiers de Cracouie vindrent à conspirer contre luy, dont le Palatin Nicolas fut le chef, prenant l'occasion à propos, de ce que Miécislaus estoit absent. Parquoy il fait en diligence venir Helene & son fils, aufquels il assigna la ville avec le chasteau, & tout incontinent apres les autres places d'alentour vindrent en leur puissance. Car ceux qui les auoyent en garde les rendirent de leur plain gré, aussi tost qu'ils cogneurent que cecy auoit esté fait de l'authorité & cōsentement du Senat. Miécislaus toutesfois ne laissa pas d'aspirer encores à la Seigneurie pour la troisieme fois, & ne fut point deceu de son esperance. Car retournant aux ruses & artifices dont il s'estoit autresfois aydé enuers la Princesse Helene, il trouua moyen de l'approcher encores avec force belles paroles & excuses. Qu'il n'auoit pas tenu à luy qu'il n'eust satisfait à ce qui auoit esté conuenu & accordé entr'eux. Mais à ceux de Cracouie, & nommément au Palatin Nicolas. Que maintenant il se vouloit tout nettement acquiter de sa parole, & sans plus attendre luy rendre la Prouince de Cujauie. Et quant aux autres choses puis apres, ils y regarderoyent tout à loysir, car il envouloit faire entierement à son appetit. Mais qu'il la prioit que cecy fust tenu secret, & sur tout que le Palatin n'en sceust rien, lequel il luy conseilloit d'enuoyer bien
f iij

loing si elle vouloit la seureté & repos d'elle & de ses enfans. Ceste femme qui de son naturel croyoit & craignoit toutes choses, se laissa incontinaut aller aux persuasions de Miecislaus, d'autant mesmes que il n'y auoit pas faute d'enuieux entour elle qui desouz main allumoyent le feu, & prestoyent des charitez au Palatin. Aussi est ce l'ordinaire de ceux qui sont constituez es grandes charges & maniemens, de ny pouuoir longuement durer qu'ils n'offencent beaucoup de personnes. Auec ce que l'enuie ne fait iamais d'accompagner les beaux & excellens faictz. Mais luy aduertit de toutes ces brigues & menées, s'en alla trouuer la Roynes, & luy meit en auant ses seruices, son deuoir, & sa loyauté: la suppliant que elle ne creust point ainsi legierement à ceux de qui elle s'estoit desia trouuee trompee. A tout le moins qu'elle ne l'abandonnast point à leur mercy, car ils ne cherchoyent que d'auoir sa vie, son honneur, & sa reputation. Mais quand il veit que tout cela ne la pouuoit appaiser, il s'aduifa de la preuenir, & s'en alla luy mesme trouuer Miecislaus en Posnanie: encorés qu'il sceust bien, qu'il n'auoit point vn plus mortel ennemy. Toutesfois il fut contrainct d'ainsi le faire, tant pour eschapper le peril qu'on luy brassoit, que pour se uenger tout à vn coup de ses aduersaires, & d'vne femme mesconnoissante, & ingrante. Et à la verité les excellens & valeureux personages n'endurent pas fort volontiers vn outrage & iniure, car cela est cause bien souuent, que n'estans pas leurs maistres, l'impatience les poulse & precipite à des choses bien mauuaises & dangereu-

ses, voire le plus souuent à la ruine & desolation de leur propre pays. Apres donc q̄ le Palatin eust faict quelqs excuses enuers Miecislaus, & qu'il l'eust supplié d'oublier les choses passees, car pour l'aduenir il seroit du tout à luy, & le seruiroit tres fidellemēt: il fut receu de luy fort amiablemēt. Et apres luy auoir faict de grands presens, & de plus belles promesses le renuoya. Aussi feit il de façon que Miecislaus recouura bien tost le pays de Cracouie. Parquoy ne se contentant pas de ne rendre point à ses nepueux la Cuiuie, suyuant ce qu'il auoit promis: leur osta d'abondāt le pays de Vislicie, & trois chasteaux de la seigneurie de Sendomirie, alleguant pour toutes raisons, que cela estoit de son propre. Mais comme il estoit apres à remuer toutes ces choses aspirant encores à la souveraine authorité & puissance, il fut soudain preuenu d'vne maladie qui l'emporta l'an mille deux cens deux, estant aagé de soixante treze ans. Il fut enterré à Calisse en l'Eglise de l'Apostre saint Paul, où il auoit fondé des Chanoines. Toutesfois ayant depuis esté transportees, & la ville, & l'Eglise autrement, sa sepulture demeura à descouuert au milieu de la campagne. Il feit encores beaucoup d'autres biens ailleurs. Car il fonda fort richement les Monasteres de Landense & Vagrouec, avec vn Hospital pour receuoir les pauures passans qui despend neantmoins de Vagrouec. Car il fut depuis (il y a environ cinquante ans) rebasti & augmenté de reuenue par vn nommé Sbilud, comme on peut veoir dedans les tiltres & chartres de ce Monastere.

Ce Sbilud icy (Polaque de nation) fut tres soigneux de chercher de tous costez les bōs & deuots personages, qui morts au monde sont viuās en Iesuschrist, religieux, non de professiō & habit seulement, mais d'œuvres, de vie, & de faict: Pleins d'amour de Dieu & du prochain. Ceux là doncques il assembla en ce lieu, & en feir vn Ordre, souz l'authorité & approbation de Iean Archeuesque de Gnesne, Estienne Euesque de Posnanie, & le Duc Mezicon qu'il assembla pour cest effect l'an 1153. regnans en Poloigne Boleslaus, Mezicon, & Henry freres germains. Mais pour retourner à Miecisslaus il laissa seulement deux fils apres sa mort, asçauoir Otho & Vvladislaus, car les autres estoyent desia decedez, & Otho ne suruesquit pas longuement à son pere, mais il laissa vn fils encores ieune enfant, nommé Vvladislaus, lequel fut depuis appellé le Cracheur, pour la mauuaise accoustumance qu'il auoit de cracher incessamment. Lequel fut quelque temps souz le gouvernement & tutelle de son oncle Vvladislaus: surnommé le Grand, & Lasconogue aussi, pource qu'il auoit les iābes fort foibles & menues.

VVLADISLAUS LASCONOGVE.

MIECISLAUS le Vieillard decedé, l'affection & faueur de tout le peuple se renouuela incontīnāt apres Lescus le Blanc. Parquoy les Estats ne furent point d'aduis d'entendre à autre election, tant qu'il viuroit, puis que legitime-ment & par la voix & consentement de tous il auoit desia esté receu. Trop bien toutesfois voulurent ils
enuoyer

enuoyer deuers luy, pour luy signifier ceste confirmation, qui estoit à la charge & souz cōdition, qu'il banniroit Gouoric Palatin de Sendomirie. Ce que de pleine arriuee il trouua fort estrange. Et comme il fust en doute & suspēs là dessus, ne sçachant bonnement comme il en deuoit vser, le Palatin (qui estoit aduertī du tout) le vint supplier que pour l'honneur de Dieu, il ne laissast point perdre vne telle occasion & commodité. Qu'il valloit mieux qu'il feir ses affaires, que si pour vn pauure vieillard, qui n'auoit plus que trois iours à viure, la seigneurie tomboit en autres mains. Et que tres volontiers il prendroit en gré non seulement l'exil dont il estoit question, mais la mort encores, pour le service & aduācement de son Prince. Ces paroles accompagnées de sa loyauté ancienne, & de la grandeur de son courage, esmeurent tellement à pitié & compassion le cœur de Lescus, que sans deliberer d'auātage il feir responce aux deputez, qu'il n'auoit pas si grande affection à la principauté & seigneurie, que pour y paruenir il voulust abandonner vn tel personnage, lequel il auoit tousiours cogneu si homme de bien, & si fidelle & bon conseiller: ny le priuer tout à vn coup de ses estats & de son pays. Au demeurant qu'on sçauoit assez que le royaume luy appartenoit doublement, tant pour ce qu'il estoit heritier de Casimir, que pour auoir desia long temps en pleine assemblee esté esleu, sans en auoir depuis esté demis. Mais que la tyrannique parole ne luy pourroit plaite ny reuenir. *Si est besoīn de corrompre le droit & raison, cela se doibt faire pour regner. En toutes autres choses il faut estre homme de bien*

& conscientieux. Car il auoit appris de son pere & de ses ancestres à gouverner son peuple d'autorité royalle iustement & raisonnablement. Pourtant que les Estats de Cracouie aduifassent de chercher quelque autre Prince qui s'accommodast à leurs intétions & volontez: car quant à luy, il vouloit plustost se contenter de ce que son pere luy auoit laissé, que si quelque fois il luy estoit reproché d'estre paruenü à la corone par meffait & ingratitude. Ceux de l'assemblee de Cracouie ayant entendu tout cela, se remirent de nouveau à deliberer: & finalement s'arresterēt à Vvladislau Lascougue, fils de Miecislau le Vieillard, comme vray & legitime heritier d'iceluy, & enuoyèrent à ceste fin deuers luy, pour luy faire entendre l'electiō qu'ils en auoyent faicte. Mais il la refusa tout à plat, sinon en cas que Lescus n'en voulut point, & à ceste cause enuoya deuers luy pour l'aduertir de l'offre qu'on luy faisoit, & de sa respōce là dessus, l'asseurant qu'il ne vouloit rien faire qui le deust offencer. Car il n'estoit point si ambitieux que pour cōuoitise de dominer, il voulut enfreindre le deuoir de la proximité du sang qui estoit entre eux. Lescus le remercia, & dict n'auoir point autrement refusé la corone, mais qu'il ne se vouloit pas soubzmettre aux conditions que ceux de Cracouie luy auoyent proposées, parquoy il ne luy feroit point de tort si la receuoit, puis qu'on la luy offroit. Ce que Vvladislau ayant entendu, s'en alla avec les Ambassadeurs à Cracouie, où il fust receu à grand ioye & contentement. Aussi se maintint il en bon, iuste, & sage Prince, de sorte qu'il estoit fort aymé & bien voulu de tous.

Ce temps pendant Romain Duc de Vvladimirie & Halicie, apres auoir par toutes sortes de tourmens & cruautez exterminé presque toute la noblesse de Halicie, ayant communement ce mot en la bouche, qu'il n'estoit possible de goustier seurement & à son aise le miel, que premierement les mousches ne fussent ostees: Voyant que Lescus auoit esté ainsi reiecté du Royaume, eut à mespris le peu de cœur qu'il pensoit estre en luy, & son bas aage aussi. Mais pour le commencement il le voulut essayer par quelques petites courses qu'il enuoyoit faire à l'emblee dedans les pays, sans autrement les aduouer: Puis faisant destrousser les Polaques qui alloient & venoient pour cause du traffique: & finalement à tout vne grosse & puissante armee, entra dedans la Polaigne bien auant, brauant & menaçant de destruire & aneantir du tout & le pays & la religion qu'ils tenoyent. Mais Lescus luy alla au deuant, & l'ayant rencontré aupres de la ville de Zauicost, sur la riuierē de Vistule, le deffait & mit en route, par la vertu de Cristin Godouie, Palatin de Plocense, homme vaillant & tres expert au faict de la guerre, qui estoit general de l'armee. Quant à Romain il prit la fuite aussi bien que les autres, en laquelle il fut rattaché par les Polaques, & mis à mort avec tous ses gens, tellement que à grand peine en reschappa il vn seul pour en porter les nouvelles. Son corps puis apres ayant esté recogneu entre les morts fut porté à Sendomirie, & là honorablement enseuely en la maistresse Eglise. Mais quelque temps apres Lescus le rendit aux Russiēs qui le vindrent demander, & en eschāge

deliurerent tous les prisonniers qu'ils auoyent, avec mille marcs d'argent qu'ils payerent. Puis l'emporterent à Vvladimirie, où il fut mis en la sepulture de ses ancestres. Ce fut l'an 1205. que ceste bataille fut donnée pres Zauicost, le propre iour des benoists Martyrs saint Geruais & saint Prothais. Au moyen dequoy Lescus feit depuis bastir vne belle chappelle en leur nom en la grande Eglise de Cracouie.

De ce mesme temps les Lithuaniens gens sauages & incogneus commencerent à pratiquer la Russie, & à y faire souuent des courses, mais finablement ils y furent deffaits, & contraints de payer de là en auant vn tribut bien estrange & fantastique, asçauoir du liege avec des cordages & faisceaux de feuilles, dont ils se seruent en ce pays là aux estuues pour se prouoquer la sueur.

Ceste victoire Ruthenique tourna à grand gloire & recommandation pour Lescus, tant enuers les siens que les estrangers. Car on ne parloit que de sa vertu, de sa sage conduicte & de son bon heur, dont on le mettoit iusques au ciel. Ce qui le feit derechef desirer de tout le peuple, & des principaux du conseil qui commencerent à ne faire plus cas d'Vvladiflaus. Parquoy ils resolurent de luy oster le royaume, & le restituer à Lescus, qui ne le refusa point ceste fois. Car ayant entendu la volonté de toute l'assemblée, il s'achemina à Cracouie avec les Ambassadeurs qu'on auoit despechez deuers luy, & là sans difficulté ny contradiction de personne receut la principauté. Car Vvladiflaus (homme fort doux & modeste) & qui aymoit le repos, voyant la résolution du Senat

se demeit volontairement, & s'en alla en Posnanie. Tout cecy aduint l'an 1206. Et l'annee ensuyuante Foulques Euesque de Cracouie, passa de ce monde en l'autre, au lieu duquel succeda maistre Vincēt Cadlubcus homme de saincte vie, & de fort bonnes lettres, qui le premier a escrit l'histoire de Poloigne.

Lescus rentré en sa principauté, eut quelques choses à demesler avec les Rutheniens, qui de nouueau s'estoyent mis à piller & enuahir la Poloigne. Contre lesquels ses Capitaines & Lieutenans generaux eurent quelques rencontres, car il ne s'y trouua pas en personne. L'an puis apres 1211. au mois de May, l'espace de dixhuiet iours, fut veuë vne Comete horrible & espouuantable, ayant sa queuë & cheuelure tournée du costé d'Orient. Ce qui fut le signe & prediction des grans maux & calamitez qui suruindrent bien tost apres, & dont l'vne & l'autre Sarmatie furent si affligees. Car l'annee suyuate les Rutheniens se trouuerent vn nouueau & tres cruel ennemy sur les bras, dont ils furent du tout prosternez & abbatuz, si que depuis ils ne se peurēt iamais plus ressouldre ny remettre. Et non seulement ceux cy qui estoient les premiers & plus prochains: mais encores assez d'autres nations Chrestiennes qui en estoient plus esloignes, en furēt par successio de temps presque du tout subuerties & esteintes. Ceste peste & vermine icy furent les Tartares peuples de la Scythie, soit qu'ils ayent pris ce nom du fleuve qui est ainsi appelé, ou de leur grand nombre & multitude qui est comme infinie. Car s'estans iusques alors contenus au dedans du mont Imaus, par delà la mer Caspie,

deuers Soleil leuât, sans aucune reputatiō, & dutout incogneus aussi bien aux Grecs comme aux Latins. Enuiron l'an 1202. ou ainsi que veulent quelques vns 1188. sortirent tout à coup de leurs anciennes demeures & limites, & apres auoir mis à mort vn Roy Iuif qui les dominoit, s'espancherent tout incontinent presque par toute l'Asie. De là retournans vers le Soleil couchant, passerent le grand fleuue de Rha., autrement appelé la Volghe, & coururent sus aux Polomiciens, que les modernes appellent Gots, les autres Chunes ou Cumans qui habitoient és plaines & campagnes entour le fleuue Tanaïs, & les marests Mœotides, & les desseirēt en plaine baraille avec les Rutheniens qui estoient venus à leur secours. Puis s'emparerent tout incontinent des places & forteresses, tellement qu'ils se firent maistres & seigneurs de tout le pays, qui est le long d'iceluy Tanaïs, & de la Mœotide, ensemble de ceste langue de terre, qui s'estend en la mer, qu'on appelle communement la Taurique Chersonese, où ils ont tousiours habité depuis. Mais pour retourner à Lescus, de là en auant il n'eust plus de guerre, ains print plaisir de passer le reste de ses iours en paix, tranquillité & repos d'esprit, vsant d'vne singuliere iustice & modestie enuers vn chacun. Il raccoustra plusieurs edifices ruinez, & en fait tout plein de nouveaux, visitoit tous les ans les Prouinces de son Royaume, & cognoissoit luy mesmes des differens & procez d'entre les parties, & les iugeoit. Rigoureux à chastier les calumnieurs & malicieux, & fort enclin & pitoyable enuers les pources & les simples, la cause desquels

il fauorisoit volontiers contre les plus aisez & puissans dont ils estoient molestez. Et d'autant que s'estoit vne trop grande incommodité à ceux de Pommeranie de venir plaider si loing, & poursuyure l'expédition de leurs affaires & differens, il y commit Suentopele avec plaine & entiere puissance & autorité sur tous les Magistrats & Officiers, voire sur les Palatins & gouuerneurs de Dantzik & de Suece, à la charge toutesfois qu'il presteroit le serment de fidelité & obeissance, & enuoyeroit par chacun an mille marcs d'argent au fisque royal. Il dōna aussi du consentement du Senat à Conrad son frere puisné les pays de Masouie & Cujauie pour son partage, & à leur requeste prit à femme Primiſlaue fille de Iaroslau Duc de Russie, de laquelle au bout de l'an il eut vn fils qui fut appelé Boleslaus surnommé le Chaste. & quelque temps apres, vne fille nommee Salomee.

Souz ce Prince icy le zele & deuotiō furent si ardens par toute la Poloigne, qu'il n'estoit questiō d'autre chose que de l'exaltation & aduancement de la foy chrestienne, s'efforçans tous à l'enuy les vns des autres à qui feroit le mieux son deuoir. Mesmemēt Vincent Euesque de Cracouie, apres auoir employé de grans deniers pour la reparatiō & embellissement de son Eglise, se demit de son plain gré, quelqs prieres & remonstrances q̄ luy firent le Prince & tout le Clergé, & se retira au monastere d'Anderouie, où il passa le reste de ses iours, q̄ furent seulement 5. ans, apres auoir tenu le siege 10. ans. Yuō fils de Saul luy succeda, le q̄l estât allé à Rome, eut en telle admiratiō la doctrine

& la vie de saint Dominique, qui florissoit pour lors & auoit desia donné commencement à l'ordre des Freres prescheurs, qu'il en fait prendre l'habit à Iacinctus du pays d'Opolie, son proche parent, lequel estoit Chanoine de Cracouie. Et fut pour sa bonne & sainte vie canonizé apres sa mort, & reduict au nombre des saints. Il fait doncques instruire & enseigner iceluy Iacinctus & trois autres avec luy en la regle de saint Dominique par la propre bouche d'iceluy. Et apres les ramena à Cracouie, où il leur donna l'Eglise de la Trinité, pour faire leur seruice, & en ediffia vne autre au nom de nostre Dame, où il transporta la Paroisse. Il fonda aussi le monastere de Cacicense de l'ordre de Cisteaux, qu'il remua depuis à Mogile, sur le bord de la riuere de Vistule à vne lieuë de Cracouie, ainsi appellé du tertre ou motte de terre, où auoit iadis esté enterree la Princesse Venda. Il fait d'auantage vn fort bel Hospital à Cracouie pour y receuoir & traicter toutes sortes de pauures, de malades, & vieilles gés qui ne pouuoÿt plus gagner leur vie, lequel il vnit à l'Eglise du saint Esprit, qu'il auoit edifiée. D'autre part Henry Archeuesque de Gnesne, fils du Duc Theodorich de Berne, & de sa femme Eudoxie Polonoise fait beaucoup de biens aux Eglises. Car par le moyen de son autorité & credit qui estoient fort grans il obtint du Prince, des Seigneurs & de tous les Estats que les gens d'Eglise, & leurs sujets seroyent exempts à tousiours de toutes les iustices seculieres, voire de celle des Ducs & du Prince mesme. De sorte que pour quelque occasion que ce fust ils ne pourroyent estre tirez par deuât vn iuge lay, lequel

lequel priuilege leur fut depuis confirmé par le Pape, & le saint siege Apostolique. Il fait d'auantage vne Synode, où les prestres furent contraints de laisser les femmes qu'ils auoyent, aucuns comme legitimes & espousees selon la religion Grecque, & les autres comme leurs concubines: ayant pris de tous serment solennel qu'ils le feroient ainsi, & obtint le droit de legation perpetuelle pour les Archeuesques de Gnesne.

Le deuxiesme an d'apres sa mort, qui fut mil deux cés dixneuf, le dixneufiesme de son Episcopat, la Pologne fut estrangement endommagée par les grandes pluyes, qui sans intermission continuerent tout le long de l'esté, avec de si grands rauines d'eaux, que beaucoup de bourgs & villages en perirent, tous les gros bleds furent noyez & perdus, & n'y eut moyen de semer les petits, tellement que l'hyuer ensuyuant ayant esté rude & aspre en toute extremité, la famine s'en ensuyuit avec la peste, qui durerent par trois ans entiers, avec fort grande mortalité de personnes & de bestial. Parmy ces grâds maux & calamitez, les charitez & aumosnes de l'Euésque Yuon vindrent fort à propos, pour garentir beaucoup de pauures souffreteux. Car il ne refusoit personne qui eust necessité, & certes cecy est fort admirable, que le reuenue de l'Euésché, qui estoit lors beaucoup moindre qu'il n'est à present, peust suffire aux grands frais qu'il fut contraint de faire, tant pour subuenir à vne disette de si longue duree, que pour les bastimens, reparations, & entretenemēt des eglises, & de ce qui estoit requis pour le seruice diuin, en quoy il employa de

grâds deniers. Mais cela vient de quelque grace particulière, & benediction de Dieu, qui a accoustumé d'ottroyer pleine & abondante moisson à ceux qui sement liberalement & de bon cœur. Car le deuoir & office d'un bon pasteur, est d'auoir tousiours cela en memoire, & deuât les yeux, qu'il n'est pas maistre & seigneur des biens qu'il a en main, mais seulement fidelle dispensateur.

En ce temps là Henry le Barbu, Duc de Vvratisslauië, à la priere & requeste de sa femme Heduigis, fort sainte & deuote dame, bastit d'une magnificence & sumptuosité Royale, le beau Monastere de Nonnains, de l'ordre de Cisteaux, qui est à Trebnice, trois lieuës loing de Vvratisslauië, auquel icelle Heduigis du consentement & permission de son mary, donna la seigneurie du lieu, avec plusieurs gros villages à l'entour. De façon que le reuenu annuel estoit suffisant pour nourrir mille personnes. A l'imitation de quoy Nicolas Henricouien Gentilhomme fort aysé, qui auoit esté du conseil de Henry, donna aux Religieux du mesme ordre, tout son bien & patrimoine, & leur feit bastir un Couuent en son bourg d'Henricouie, où luy mesmes se rendit, & y passa le reste de ses iours.

Suentopelc dont nous auons parlé cy dessus, auquel Lescus auoit laissé le gouvernement de Pomeranie, se trouuant auoir amassé de fort grâdes richesses & thresors, tant par la terre que par la mer, estoit monté en un orgueil & insolence telle, (avec ce qu'il se voyoit auoir fort gagné le cœur & bien veillance de tous ceux du pays,) qu'il enuoya deuers Lescus

pour auoir la Duché de Pomeranie en propre pour luy, & ses successeurs, à la charge toutes fois qu'il la tiédroit en foy & hommage des Roys de Poloigne. Ce que Lescus luy refusa tout à plat. Dont il demeura si indigné, qu'il n'eut plus le cœur à autre chose, qu'à se rebeller, & deslors ne tint plus de cōpte d'enuoyer le tribut accoustumé. Au moyen de quoy on aduisa de faire vne assemblee à Gansauë, qui est vne cēse du monastere de Tremesne, pres la ville de Zne-ne, en la grand Poloigne, où tous les grands du Royaume ne fallirent de se trouuer au iour nommé. Il ny auoit que Suentopelc qui temporisoit & tiroit en arriere, attendant quelque occasion à propos pour executer son mauuais vouloir. Car soubz vmbre de faire ses excuses, il auoit enuoyé espier & recognoistre ce qui se faisoit à l'assemblee, & comme toutes choses y estoient disposees. C'estoit desia le quatriesme iour de la Diette, durant lequel on ne faisoit rien, mais estoyēt tous par cy & par là à leurs affaires particulieres. Lescus mesmes & Henry Duc de Vvratisslauië estoyēt allez aux estuues pour se baigner, quant voyci soudainement arriuer Suentopelc avec vne troupe de gens armez, choisis tout à propos, qui festoyent recellez là aupres, espiāt leur party & commodité, lesquels donnerent de grâde furie & impetuosité à trauers les tentes & pauillons renuersans & tuans tout ce qui se rencontroit deuant eux, avec vne grande confusion & estonnement de tous pour chose si inesperee & non attendue. De quoy Lescus ayant ouy le bruit sortit dehors à grâd haste, & ayant de fortune trouué un cheual se meit à

la fuite, mais voyant qu'il ne pouuoit eschaper (car desia Suétopelc luy estoit aux espauls) ralliât ce peu de gës qui se sauuoient avec luy tourna visage, & fit teste fort vaillamment pour quelque temps, encores qu'ils fussent tous desarmez. Mais à la fin il fut tué sur la place tout aupres le bourg de Marcinavv. Hérry d'autre costé, chargé d'ans & de vieillesse, apres plusieurs playes & blessures par luy receuës dans l'estuue mesme, fut laissé pour mort avec vn estrangier de sa suite, natif de Vvisssembourg, qui l'estoit mis au deuant de luy, pour recevoir les coups. Mais apres que les autres qui cuidoyent les auoir acheuez furent partis, on trouua moyen de l'enleuer secretement dans vne litriere iusques à Vvratisslauie, où il fut guery bien tost apres. De ceste heure là Suétopelc commença à se porter pour Duc & seigneur de Pomeranie. Et le corps de Lescus fut conduit à Craouie, & enseuely en la maistresse eglise, fort plainct & regretté de tous. Cecy aduint l'an mille deux cens vingtsept.

En ce mesme temps Conrad, Duc de Masouie se trouuoit fort empesché, pour les continuelles courses & dommages que les Rutheniens faisoient dans ses pays. Parquoy ayant fait assembler les estats, pour regarder ce qui estoit à faire, à la persuasion de l'Euesque Crescian, il depescha à Rome, pour appeler à son ayde les cheualiers Theutons, qui auoyent nagueres esté chassés de Surie par les Sarrazins. Lesquels estans arriuez deuers luy, il leur donna la contree de Culme, avec tout le pays, qui est entre les riuieres de Vistule, Mokre, & Deruance, à condition

que de là en auant ils feroient la guerre de tout leur pouuoir contre ceux de Prusse. Et qu'apres qu'ils les auoyent subiuguez ils rendroyent Culme, mais la conqueste seroit departie entre eux & luy, & ses successeurs, selon le dire de gës à ce cognoissans. Qu'ils n'attenteroyent aucune chose contre les Polaqes, & ne receuroyent ny porteroient faueur à leurs ennemis, & que toutesfois & quâtes qu'il en seroit besoin ils leur donneroyent secours, & les accompagneroyent contre les Barbares infideles. Ce furent les conuentions d'entre Conrad, Duc de Masouie, & les cheualiers de l'Hopital nostre Dame en Ierusalem, qui furent confirmées & ratifiées depuis par le Pape Gregoire 9. Cela aduint l'an 1228. que ces Croisez se chargerent de deffendre la Masouie & Polaigne des inuasions des Prutheniens, & leur oster d'auantage leur propre pays. Aussi en peu de temps, moyennant l'ayde & secours que les Masouiens leur donnerent, & d'autres encores qui meus de zele & deuotion de combattre pour la foy, volontairement se venoyent réger avec eux, les rembarrerent en peu de temps bien auant dans leurs limites. Car ils se feirent forts sur les frontieres, Et y bastirent plusieurs places, d'où continuellement ils leur faisoient la guerre.

BOLESLAUS, surnommé le Chaste, fils de Lescus, apres la mort de son pere, & plusieurs troubles & seditiōs esmeuës par son oncle Conrad, Duc de Masouie, qui aspirait à la couronne: N'estât encores qu'un enfant, fut enleué par le commandement d'iceluy, & mis en bōne & seure garde, avec sa mere Grimislaue, dans le Monastere de Secehouie, qui est sur la riuere de Vistule, en la contree de Sandomirie. Toutesfois par le moyen & diligence de l'Abbé Nicolas le Frac, qui auoit en partie gaigné & corrompu ses gardes, partie les auoit enyurez & endormis, il eschappa durant vne nuit obscure, & se sauua sur des cheuaux qu'on luy auoit preparez à ceste fin. Et combié qu'il se fust facilement emparé de Zaucost, & de Sandomirie, il n'y osa toutesfois s'arrester. Ny en autre endroit de ses pays, craignant les Masouiens que Conrad auoit departy par toutes les places & fortresses, lesquels luy estoient fort fidelles & affectionnez. Au moyen dequoy il se retira en Silesie, deuers Henry le Barbu Duc de Vvratisslaue, duquel il fut fort humainemēt receu & traicté. Car il meit tout incontinent vne armee sus, en intention de remettre Boleslaus, & chasser Conrad, de laquelle les Masouiés intimidéz, soudain qu'elle comparut quitterent tout là. Et par ce moyen au grand plaisir & contentement de tout le peuple Boleslaus recouura le pays de Cracouie, Sandomirie, & Lubline. Mais d'autant que Henry auoit fait de grands frais à ceste entreprise, il cōsentit que

la seigneurie de Cracouie, & le pays d'alentour, luy demeurast, & les autres deux prouinces vindrent à Boleslaus, lequel esleut iceluy Héry pour son tuteur au lieu de son oncle Conrad. Et certes il fait aussi beaucoup de bié à tout le Royaume. Car il cassa & annulla plusieurs ordonnances & constitutions fort mauuaises & dangereuses, & en introduit d'autres meilleures & plus vtilles. Confirma aux eglises leurs priuileges & immunitéz. Pourueut de gens de bien suffisans & capables aux charges & offices publiques. Punit fort asprement les mal faicteurs & calumnieurs, & osta aux Templiers la ville d'Opotanie, avec seize villages, dont ils auoyent iouy par un long tēps donnant le tout à l'Euesque de Lubusse, du consentement & permission de Boleslaus. On dit qu'en ce mesmes temps Miecislaus ou Miesco, fils de Conrad qui luy auoit donné le pays de Cujauie, où il faisoit infinis maux & tyrannies, & principalement sur les pauures veufues & orphelins, ayant esté en un bāquet soudainement assailly d'une infinité de rats, fut contraint de se sauuer dans vne nasselle. Mais pour cela ne laisserēt de le poursuiure à trauers l'eau, tant qu'à la fin l'ayant atteint le rongerent & deuorerent iusques aux os pour seruir d'exemple aux autres de ne s'engresser pas ainsi du sang, & des rapines des pauures despourueuz de support, qui en demandent vengeance à Dieu. Bien tost apres Henry ayāt receu ses sacremens, fina ses iours en bon Chrestien, & fut fort honorablement inhumé par son fils Henry, nommé le pitoyable, dās le Monastere de Trebnice, où desia long temps au parauant sa femme Hedugis s'estoit

retiree, menant là vne fort deuote & saincte vie. Car mesmes elle ne voulut point sortir pour aller visiter son mary en sa maladie, ne l'accompagner à son enterrement, n'aller au deuant du corps quant on l'apportoit, de paour que cela ne la destournast de sa deuotion. Dauantage au milieu de tous les pleurs & regrets qu'hommes & femmes faisoÿt en ce dueil, elle seule d'vne grande vertu & cōstance ne fait aucun semblant de tristesse, combien qu'elle aymast parfaitement son mary, autāt que femme pourroit aymer le sien. Disant estre chose mauuaise & illicite de vouloir contredire à la volonté & disposition diuine. Et de son viuant encores le voyoit peu souuent, si ce n'estoit pour luy recommander les affaires de ceux à qui on eust fait quelque tort & outrage. Car par l'espace de plus de trente ans tous deux d'vn mutuel cōsentement s'estoyent separez pour viure en chasteté & continence. Mesmement depuis le temps que Héry commença à laisser croistre sa barbe, dont depuis il fut surnommé le Barbu.

Quelque temps apres, qui fut l'an 1279. Boleslaus prit a femme Kinga, ou Cunegunde, fille du Roy de Hongrie Bela, quatriesme de ce nom, belle ieune Princeesse, tres uertueuse & de saincte vie, laquelle eut en mariage quarante mille escus. Et encores que pour auoir rencontré vne si belle, si noble & si riche espouse, Boleslaus se deust tenir pour bié heureux, toutesfois pour les premiers iours des nopces il ne la toucha point, & depuis l'estās de plus en plus accoustumez à ceste continence vouierent chacun à part soy chasteté perpetuelle. C'est pourquoy il fut
depuis

depuis surnomé le Chaste. Ce pendant Conrad, Duc de Masouie fait mettre prisonnier Iean Ciapla, grand Iurifconsulte, Chanoine de Vvladislauie, & Plosco, qu'il auoit doné pour precepteur à son fils Casimir, le soupçonāt d'auoir mis en fantasia à ce ieune Prince d'attenter ie ne sçay quoy contre luy. Et combien qu'il n'y eust pas grande apparence, si luy fait il toutesfois doner la question forte & roide, & puis apres mener au gibet, où les freres prescheurs ayans despēdu le corps le portoyent solennellement enterrer en leur eglise. Quant Agathie, femme de Cōrad passant par là, afin que de son costé elle secondayt la cruauté de son mary le leur fait oster, & charger sur vne charrette à bœufs, pour plus grande ignominie. Puis sur l'heure mesmes le fait pendre à vne nouvelle potence, tout au deuant de la porte de leur eglise. Ny pour cela les freres ne s'estonnerent point, car ils le despēdirent la nuict, & luy donnerent sepulture. Dequoy aussi tost que Pierre, Archeuesque de Gnesne fut adty, soudain interdict & excommunia tout le Diocèse de Plosco. Conrad de prime face s'en voulut mettre en collere, mais apres venant à recognoistre son meffaiēt, s'en vint à Lencisie, deuers l'Archeuesque, suyuant ce qu'il luy auoit ordonné, auquel en satisfaction de la mort de Ciapla, il donna & à ses successeurs à perpetuité le lieu de Louicie, avec les bois & forests prochaines de là. Et l'Archeuesque de son costé retira ses censures. Cecy aduint l'an mille deux cens quarate. Et quasi en ce mesme temps Boleslaus le Chaste, aux prieres & requestes de sa mere, edifia à Cracouie le couēt des Cordeliers, qu'elle auoit fait

venir de Prage.

En ceste mesme annee les Tartares ayans couru & gasté toute la Ruffie, & subiugué la plus grād part d'icelle, entrèrent dans la prouince de Lubline voisine de là, où ayans mis le feu à la forteresse du mesme nom, saccagerent tout le pais au long & au large iusques à la riuere de Vistule, bruslerent quant & quāt le chasteau de Zaucost, & puis s'en retournerent en Ruffie, où apres auoir mis le butin en seureté, retournerent tout incontinent en Poloigne durant l'hyuer. Et ayā passé la Vistule sur la glace, car l'eau estoit adonc toute prise & gellee, assaillirēt & forcerēt Sendomirie. Et de là passerent outre, (personne ne leur donnant empeschement) iusques à Vislicie, & Scarbimirie, qui n'est qu'à sept lieuës de Cracouie: puis s'en retournerent chargez d'infinies richesses, chassans deuant eux vn grand nombre de prisonniers, hommes & femmes, filles & garçons, en fleur d'age liez & garrottez, à guise de bestes. Et ce pendant Boleslaus se tenoit renfermé dans Cracouie, sans s'oser mettre au deuāt d'vne telle multitude. Mais Vvolodimerus Palatin du lieu, ayāt assemblé quelques gēs à la haste, se meit à leur queue, & les vint atteindre empres le village de Turschum, à vne lieuë de Polanecie, où sans se douter de rien ils festoyēt campez: parquoy les ayans pris au despourueu il feit de premiere venue vn grand eschet dedans eux. Mais apres que les Tartares se furent apperceus de leur petit nombre, & rassurez aucunement, meirent bien tost en fuite les Polaques. Si estoient ils de leur part en bien grand crainte & desordre, car laissans sur le lieu les

malades & bleslez, ils se retirerēt à grād haste en vne forest prez Secechouie, appelee Strenech, où ils demurerent quelques iours cachez pour se reposer, & de là s'en retournerent en Ruffie. Mais peu de temps apres avec de plus grands forces retournerent pour la troisieme fois en Poloigne d'vne grand colere & furie: & par deux iours demurerēt campez es environs de Sēdomirie, où pour faire tout à vn coup plus d'execution, se partirent en deux. Les vns prirent le chemin de Lencise, & Cujauie, souz la cōduite d'vn de leurs capitaines, appelé Kaidan. Et leur Empereur & chef souuerain batus avec le reste de ses troupes, s'en alla piller la contree de Sendomirie, le long de la riuere Camiona. Ils assaillirent aussi le chasteau d'Ilze, avec la ville, appartenās à l'Euésque de Cracouie. Mais les seigneurs & Gentilshommes de Cracouie, & Sendomirie ne pouuans comporter de veoir deuant leurs yeux ainsi perdre & ruiner le plus beau, & le meilleur de tout leur pays, outrager leurs parens & amis, leurs trescheres femmes & enfans de toutes sortes de villenies, les vns estre cruellement massacrez, & les autres plus insupportablement encores emmenez en seruitude. Les lieux saincts & sacrez, les eglises, Religions, & Monasteres estre polluz & contaminéz du sang des pauures prestres, & de toutes especes de meurtres & paillardises. Le tres saint corps de nostre Seigneur estre foullé aux pieds, de ces Chiens mastins abominables. Ne pouuāt doncques cōporter de veoir ces calamitez, auoyent repris courage, avec ce qu'ils estoient encores tous glorieux de la rencontre qui leur estoit assez heureusement suc-

cedee l'an passé pres Turschum. Et s'estans assemblez & mis en ordre au mieux qu'il leur fut possible vindrēt trouuer les Tartares en vn lieu appellé Chmelic, non gueres loin de la ville de Sidloue, où ayant fort asprement combattu par quelques heures, à la fin les ennemis ayans perdu vn bon nombre des meilleurs hommes qu'ils eussent furent cōtraints de quitter la place & se retirer à leur grosse troupe, & les Polaqes qui pēsoyent auoir tout gagné, leur chausserēt les esperons de si pres, que pelle & mesle ils arriuerēt quant & eux. Mais le cōbat se renouuella là plus fort que deuāt. Car ils receurent soudain au milieu d'eux ceux qui estoyent blesez & recreus. Et avec d'autres tous frais & reposez, feirent teste. Neātmoins les nostres ne monstrent pour cela aucun mauuais sembālt, ny ne perdirēt point le cœur, se resoluās de faire là leur dernier effort, ou de vaincre, ou de mourir en gēs de bien, pour la defence du pays: iusques à ce que finalement ayans perdu tous leurs chefs, avec les meilleurs de leurs soldats, & ne se trouuās plus sinon qu'vn biē petit nombre, encores fort mal menez, furent contraints de tourner le dos, & se mettre en fuite. En ceste meslee demeurerēt morts sur la place entre les autres plus renōmez & valeureux personnages, Christin Sulcouicie, Albert Stempolt, Nicolas Vitouie, Zementa Grambin, & Sulislaus. Cela fut le 18. iour de Mars: & ce pendant Boleslaus avec sa mere Grimislaue, & Kinga sa femme se tenoit enfermē à sauueté dedans le chasteau de Cracouie, mais quāt les nouvelles de ceste deffaiete furēt venuēs soudain il troussa bagage, Et avec toute sa maison & famille

se retira en Hongrie deuers son beau pere. Plusieurs autres des plus riches & plus puissans feirent le semblable à son exemple, & s'en allerent partie en Hongrie, partie en Allemagne.

Incontinant apres ceste victoire de Chmelic, les Tartares poursuiuās leur fortune, s'en vindrent droit à Cracouie, & l'ayāt trouuee vuide de gens (car personne n'y estoit demeuré) deschargerent leur courroux sur les maisons & edifices, mettans le feu par tout. Neantmoins l'eglise de sainct André, qui estoit hors de la ville, fut defendue & sauuee. De là ils se ietterent dans le pays de Silecie, & ayans trouué tous les ponts de la riuiera d'Odre rompus, allerent passer celle de Ratiborie sur des clayes & radeaux, qu'ils feirent promptement. Et en grand diligence tirerēt outre vers Vvratisslauie qu'ils trouuerent desia bruslee, car les habitans ayans entēdu leur venue l'auoyent abandonnee, & s'en estoient fuys avec leurs hardes & bagages, pource qu'ils ne voyoyent pas qu'elle peust tenir. Mais ceux qui estoyent à la garde du chasteau, craignās que les Tartares ne s'en preuaussent pour delà les offencer, y meirent le feu. Dont ils furent si collerez, qu'ils s'arrestèrent à assieger le chasteau. Toutesfois ils y eurent vne frayeur & espouuentement par quelque signe miraculeusement adueni, qui les contraingnit de leuer le siege, & s'en aller à grand' haste & desordre. Car Cresslau, Prieur des Iacobins de Vvratisslauie, soudain que le bruit vint de l'arriuee des Tartares, festoyent iettez avecques ses confreres dedans la forteresse,

& là en continuelles larmes & prieres inuoyoyent la misericorde de Dieu, à ce qu'il luy pleust les preferuer d'un si grand peril, quāt voicy vne grosse colomne de feu apparoitre en l'air, qui espouuēta les ennemis, de sorte que sur l'heure mesme ils deslogerēt. Et ayās entēdu que le Duc Hēry festoit fortifié à Legnicie, avec vne grosse armee, pour leur faire teste tirerent incōtināt celle part. Henry d'autre costé ayāt fait mettre ses gens en bon estat, & les reconcilier à Dieu, se resolut ou d'emporter vne braue & signalee victoire à iamais, ou bien de mourir combatāt vaillamment pour le pays, & pour le peuple. A quoy sa mere Hedugis l'encourageoit dauātage, non qu'elle ne sceust biē ce qui en deuoit aduenir, car ses merites, sa deuotiō & grāde sainctetē de vie luy auoyēt descouuert le tout, mais elle ne pēsoit pas estre chose licite de contreuenir à la volontē & disposition diuine. Au dessouz dōcques de Legnicie, le long de la riuere de Nisse, se vindrent rencontrer les deux armees en vne belle plaine, appelee le bō Champ, où il y eut vne trescruelle & sanglante meslee, mais les Tartares par le moyen de leurs sortileges & enchantemens obtindrent finablement la victoire. Car ainsi que les Polaques estoyēt en la plus grāde ardeur du combat, & qu'ils tenoyēt les ennemis de fort court, soudain vn de ces Chiens galoppant tout à l'entour de la bataille, cōmença en lāgage Tartaresque à crier hautemēt & d'une voix horrible, *Byegayce, Byegayce*, c'est à dire, fuyez, fuyez. Tellement que les Polaques sans sçauoir pourquoy, furēt si effrayez qu'ils se meirēt en fuite. Et neātmoins par la vertu & prouēsse du

Duc Hēry ils festoyēt encores ralliez, & de nouveau ratachez au combat, quant voicy arriuer à course de cheual vn autre enchāteur, qui portoit vn estādart au poing, où pour deuise & cognoissance estoit peinte ceste lettre X. Et sur la pointe estoit fichee la teste d'un homme tout freschement coupee, hideuse & espouuētable au possible, de couleur bazanee & ternie, les yeux enfoncez & ardens, avec vne barbe longue rude, & mal testonnee. Et ainsi voltigeant d'un costé & d'autre, alloit branslant fort rudement ceste lance. Au moyen dequoy tout à vn instāt vne grosse & espoisse fumee vint à sortir de la gueulle de ce mōstre, qui non seulement ostoit aux Polaques la veuē de leurs ennemis, mais de sa puāteur & infection les empoisonna, de sorte qu'ils tomberent à la renuerse tous esuanouis sans se pouuoir remuer ny defendre, ce qui fut cause de leur defaictē. Le Duc Hēry mesmes fut tuē sur la place, ayāt tout le iour combatuēs premiers rangs fort valeureusement, & fait au reste tout deuoir de bon & excellēt capitaine. On dit que le nombre des Chrestiens, qui demeurerent en ceste iournee fut si grād que les Tartares ayāt depuis coupē à chacun vne oreille, eurent assez dequoy emplir neuf grāds sacs, qu'ils remporterēt pour tesmoignage de ceste victoire. Mais entre les plus renōmez personnages furent Estienne Virbenie, avec son fils André, Clemēt Pelcinicie, Thomas Pietricouitz & Pierre Kuza. Apres ceste defaictē les Tartares retournerent de rechef en Ratiborie, & gasterent toute la cōtree par l'espace de huit iours qu'ils y demeurerent. De là entrerent en Morauie, ou ils eurent beau loisir

de faire leurs besongnes tout à leur ayse, par l'espace d'un mois entier. Tellement qu'ils la saccagerēt toute, iusques aux frontieres de Boheme & Auftriche, car personne ne se presentoit pour leur donner empeschement. Leur Roy propre (Venceslaus) se tenoit clos & couuert bien auant dans la Boheme, finalement ils passerent les forests & montagnes & vindrent en Hongrie.

Au beau milieu de toutes ces calamitez & miseres la seule Heduigis, mere de Henry, ne se mōstroit aucunement dolente ne contristee, toutesfois ne festimāt pas estre assez seuremēt au Monastere de Trebnice, festoit retiree à Crosne, avec toutes ses Religieuses, auāt l'arriuee des Tartares, & auoit aussi emmené Anne, femme de son fils, la fortune duquel elle supportoit d'une grand constāce & magnanimité. Car quant les nouvelles de sa mort, & de la perte de la bataille furent sceuēs, & que là dessus toutes ces pauvres creatures se fussent prises à crier & lamēter, elle toutesfois ne s'en esmeut, mais les reconfortoit elle mesme, rendāt graces à Dieu, qu'il luy eust pleu luy donner vn tel fils, duquel elle auoit en premier lieu tousiours esté si bien traitee, & qui à la fin eust ainsi abandonné sa vie, pour le maintenement de la foy, & le salut & defence de son pays.

Henry le Pitoyable, & tāt degēs de biē morts avec luy (ne se scachāt aucunes nouvelles de Boleslaus) & tout le païs, mesmes les villes & villages reduits à vn vray desert & solitude, la noblesse de Cracouie & Sendomirie craignant encores pis, pour se veoir sans Prince ny gouverneur, sans magistrats, sans cōseil ny conduite

conduite, s'assemblerent pour aduiser ce qui estoit de faire, & à la fin se resolurent de mettre le gouuernemēt es mains de Boleslaus le Chauue, fils aîné de Henry, lequel tout incontinant departit les charges & dignitez du Royaume, & donna le Palatinat de Cracouie à Clement de Ruffie, fils de Salislaus de la maison des Griphons. Ce que Conrad Duc de Masouie ayant entendu, porta fort impatiemment, de veoir ainsi qu'un estranger tel qu'estoit Boleslaus, eust esté preferé à luy, qui estoit fils du Prince Casimir frere de Lescus le Blanc. Parquoy il trouua moyē de parler au Duc Suentopelc, avec lequel il feit alliāce, & en obtint secours. Mais cependant que Conrad faisoit ses preparatifs, voyci tout à vn coup arriuer les Tartares, lesquels estās sortis de Hongrie, s'estoyent coulez par le pays de Scepucie dans la Poloigne, iusques aupres de Cracouie, auant qu'on sceust aucunes nouvelles d'eux. Parquoy ils eurent moyen de surprendre & saccager la ville, avec plus grande tueurie & occisiō que l'autre fois. Et ainsi chargez de butin, tout aussi tost comme ils estoyent venus, s'en retournerent par le territoire d'Osuecimense, en Hongrie, où ils demurerent trois ans depuis. Conrad cependant s'estant equippé de ce qui luy faisoit besoin mena son armee au pays de Sendomirie, & de Cracouie, & fort aiseement meit en sa puissance toutes les forteresses par le moyen de Zegotas de la race des Toporiens. Car toute ceste famille & leurs adherēs se vindrent incontinant rendre à luy, & ainsi s'empara de la principauté. Mais il se rendoit dur & insupportable à chacun, surchargeant de nouveaux sub-

fides, impofts & coruees, auffi bien les Gentils hommes & gens d'Eglife, comme les marchans & laboureurs. Au moyen dequoy tous eftoyent ennuyez de fon faiçt. Et Clement Palatin de Cracouie, apres s'eftre faiçt le plus fort dedans la ville, & en auoir ietté hors la garnifon que Conrad y auoit laiffée, trouua moyen que Boleslaus fut rappelé, avec fa femme. Au deuant defquels vne infinie multitude de peuple accourut les receuoir à grand ioye & acclamations, & luy fut derechef faiçt & prefté le ferment de fidelité par les Seigneurs & Barons du Royaume. Conrad aduerti du retour de Boleslaus affembla incontinât fes forces qui ne fe trouuerent pas petites. Car il appela à fon fecours Premiflus & Mieciflaus, l'vn Duc de Pofnanie, & l'autre des Opoliens. Plus les Lithuaniens & laziges qui vfont d'vn mefme langage avec ceux de Lithuanie, mais font bié de mœurs plus estraiges fauuages, auffi leur contree eft appelee *Podleffe*, comme qui diroit, Forestiere. Avec tous ceux cy, & ce qu'il auoit de fes pays, se ietta dans la Sendomirie, qu'il pilloit d'vn bout à autre, quand Boleslaus ayant auffi affemblé fon armee, le vint rencôtrer au bourg de Suchodol. Et cōbien qu'il fust beaucoup plus foible, toutesfois voyant qu'il n'estoit plus temps de tēporifer, il vint à la bataille, où Dieu voulut fauorifer la meilleure & plus iuste caufe. Car exauçant la voix & prieres de tout le peuple, il ottroya la victoire à Boleslaus, demeurant ceste forte & puiffante armee de fes ennemis rompue & deffaicte. Toutesfois Boleslaus en vfa fort humainement, & ne voulut point qu'on pourfuyuiſt d'auantage ceux qui fuyoyent, au

contraire il feit foigneufement penfer les bleffez, & renuoya tous les prifonniers. Auffi cueillit il bié toſt le fruiçt de ceste courtoifie & douceur. Car tout le reſte de la nobleſſe de Sendomirie ſe vint incontinât rendre à luy. Ainſi ayant en peu de temps recouuré ce que durant ſon abſence auoit eſté perdu, il ſ'en retourna à Cracouie, où il fut receu à grād ioye & contentement.

La grand Poloigne depuis la ruine qu'y auoyent faiçt les Tartares, ne fut pas auffi de ſon coſté exempt de troubles & de tumultes, & ny demurerent pas longuemēt les choſes en repos. Car par le decez de Henry le Pitoyable, la ſeigneurie eſtoit venue és mains de Boleslaus le Chauue ſon fils ainé, duquel a eſté parlé cy deſſus. Mais de pleine arriuee il ſe monſtra ſi rigoureux à tout le peuple, & ſi hault à la main enuers les plus grands, iuſques à leur preferer les moindres Allemans qu'il euſt autour de luy, & les auançer & fauorifer en toutes occaſions par deſſus eux: que ſ'eſtans par pluſieurs fois plainçts les vns autres de ce mauuais traictement & arrogance de leur Prince, ils vindrent finalement à conſpirer contre luy. Et eſleurent pour leur chef & conducteur en ceſt affaire, Bogumile Palatin de Poſnanie, où ils ſ'affemlerent, & enuoyerent querir Premiflaus & Boleslaus enfans de Vvladiſlaus le Cracheur, deux ieunes Princes de fort douces mœurs, & bien conditionnez. Entre les mains deſquels ils ſe mirent, eux & la ſeigneurie, & leur conſignerent les places & les fortereſſes. Ce que Boleslaus porta patiemment, eſmeu des remonſtrances de ſa

grand mere Hedugis, que ce n'estoit pas bien fait de retenir ainsi iniustement le bien d'autrui. Tellement que puis apres il fait alliance avec Premislaus, & bien tost apres (ce fut l'an 1243.) Hedugis passa de ce monde en l'autre, laquelle fut enterree à Trebnicie. On dict que son corps qui durant son vivant estoit si iaulne, passe & descouloré pour l'austere vie qu'elle menoit, & ses ieufnes continuels, & grã de abstinence, apres sa mort chãgea tout soudain de couleur, & fut veu beau, blanc & delicat, clair & luyfant comme vn cristal. En quoy il pleut à Dieu rendre tesmoignage de la saincteté de ceste deuote Princesse. Aussi fut elle le 23. an d'apres canonizee, & reduite au nombre des Saints, par Pape Clement quatrieme, non sans auoir esté premierement bien instruit & acertené de sa bienheureuse & recommandable vie.

Conrad Duc des Masouiens s'estant de nouueau remis sus, vint vne autre fois contre Boleslaus, & l'assiegea dans Cracouie. Mais voyãt qu'il ne faisoit que perdre temps, fait vn fort ou bloccu à vne lieuë pres de la ville, sur la riuere de Vistule, pres le monastere de Tinece, & vn autre à dix lieuës de là, ioignant la ville de Lelouie, qu'il donna en garde à son gendre Micislaus, & meit vne bonne & forte garnison à Tinece. Cela fait se retira en Masouie. Mais le tout vint incontinãt es mains de Boleslaus, de façon que tous les efforts & entreprises de son oncle, son labeur & sa despence s'en allerent en fumee sans aucun effect. Et mourut bien tost apres, laissant trois fils Boleslaus Casimir & Zemouit, l'an 1247.

Boleslaus l'aisné ne luy suruescut que bien peu. Dont Casimir ne se contentant pas de Lencise & Cuijauie que son pere luy auoit laissees encores de son vivant se fait de Siradie, Spicimir, & Rospre trois places fortes bien remparees & munies, & meit quãt & quant Zemouit prisonnier avec sa femme Gertrude. Boleslaus alors se trouuãt en paix & en repos par la mort de son oncle, commença à recueillir les pieces de son naufrage, remettre au mieux qu'il peut les choses qui par si long temps auoyent esté dissipées & perdues, & ramener ce qui auoit esté depraué & corrompu, se monstrant en tous endroicts iuste, gracieux & modeste. Dequoy il s'acquist vn fort bon bruit & reputatiõ enuers ses voyfins, & certes ce fut vne grand merueille de veoir que les affaires de Poloigne, qui au parauant auoyent tant eu à souffrir, fussent si tost ramenez à vn tel repos & tranquillité. Car toutes les autres parties de l'Europe estoient à leur tour enflãbees de guerres, troubles, & seditions.

Sur ces entrefaictes arriua deuers luy Iaqués Archediacre de Leodie, Legat d'Innocent quatrieme, qui l'auoit despeché tant pour pacifier la Poloigne, que pour demander secours contre l'Empereur Frederic second, duquel il estoit fort molesté. Parquoy ayant fait conuoyer le Synode des Euesques & Prelats à Vvratislauie, on luy accorda vn cinquieme de tout le reuenu de l'Eglise pour trois ans. Et en faueur de cela le Pape relascha aux Polaqes partie du Quaresme qu'ils auoyent accoustumé de faire selonc l'ancienne institutiõ durant neuf sepmaines, & le reduit à six & demie cõme nous l'obseruõs maintenãt.

L'an 1252. les minieres de sel furent premierement descouuertes pres du bourg de Bochne, cinq lieues loin de Cracouie, dont est venu fort grand profit & reuenu au Roy, & non moins de commodité à toute la Poloigne, & pays circonuoyfins. On refere ce bien là aux bonnes œuures & grande saincteté de la Royne Kinga, à qui Dieu fait la grace que cela aduinft durât son regne. Et encores bien tost apres il fut suyui & accompagné d'un autre bien plus precieux thre for & richesse, en ceste sorte. Car Stanislaus le saint martyr au parauant Euesque de Cracouie, à l'instance & poursuite de Boleslaus & Prendota lors Euesque, apres que la chose eust assez longuement, & par fort meure deliberation esté examinee & debattue par le Pape Innocent quatriesme, & tout le consistoire, fut canonizé & inscrit au Catalogue des Saincts, cent soixante quinze ans iustement apres sa mort, qui fut l'an mille deux cens cinquente trois. Et comme là dessus à cause d'une si grande longueur de temps, se presentassent beaucoup de doubtes & difficultez: le tout fut demeslé & esclarcy par plusieurs miracles qui furent faicts. Et en premier lieu Regnault Euesque d'Hostie, personnage de grande autorité, l'un de ceux qui se formalisoient le plus en cest affaire, fut soudain espris d'une grieue maladie, & fort tourmenté par quelques iours. Tant qu'à la fin ce benoist saint Stanislaus s'apparut à luy en songe, & apres luy auoir gracieusement demandé, pourquoy il luy estoit ainsi contraire, s'esuanoüit, le laissant tout guarry. Le Pape meue de ce miracle, ne voulut remettre

l'affaire en plus grande longueur, mais le propre iour de la nostre Dame de Septembre, ayant celebré luy mesme le seruire diuin en vne Eglise des Cordeliers, on luy vint apporter vn ieune garçon mort vn peu au parauant. Le saint Pere prosterné en terre, fait adoncques son oraison à Dieu, à ce qu'il luy pleust (rendant la vie à ce pauvre enfant, en faueur de son glorieux Martyr saint Stanislaus), donner par là clair tesmoignage du merite & saincteté d'iceluy. Il n'auoit pas encores prié longuement, que le mort se leua soudain en pieds, Au moyen de quoy le seruire paracheué, & le Pape ayant faict vn beau sermon à toute l'assistance, de la vie & des faicts du saint martyr Stanislaus, le canoniza, & desdia la solemnité de la feste, au huitieme iour de May, auquel il auoit souffert mort. A ceste cause l'annee ensuyuante l'Euesque Prendota en fort grande pompe & reuerence translata le corps, pour estre delà en auant reueré & inuocé comme les autres Saincts approuuez de l'Eglise. A ceste cerimonie, outre les Prelats & le Clergé, le Prince Boleslaus, & les autres grands Seigneurs & Barons du Royaume qui y assisterent: aborda si grande multitude de peuple, de tous les endroits de la Poloigne, & des pays de Silesie, Morauie, Boheme & Hongrie, que la ville quelque grande & ample qu'elle fust ne peut estre suffisante pour les receuoir, mais furent contraincts la plus part de loger par troupes deçà & de là à la campagne d'alentour.

L'an 1257. Premissus aagé seulement de 36. ans, mourut le quatrieme iour de Iuing, & fut enterré à

Posnanie. Ce fut l'un des plus doux & benins Princes de son temps, sage, discret, & prudent plus que son aage ne portoit, & avec tout cela d'une si grande iustice & consideratiō à faire droict à vn chacū, qu'ocques personne ne murmura de iugement qu'il eust donné, iamais homme ne le veit troublé de vin ny en colere, si deuot au reste, & de si sainte & reformee vie, que tout le long du Quaresme il portoit la haire. N'usant que de vin fort attrempé, ou de bien petite & legere ceruoise: Toutes les nuicts lors qu'on pensoit qu'il deust prendre son repos, il estoit en continues prieres & oraisons. Et le iour du leudy saint ne failloit iamais de lauer les pieds à douze pauures, les leur baiser en toute humilité, & les faire repaistre & reuestir. Il fonda le monastere de Nonnains de l'ordre de Cisteaux, qui est à Ouensco sur la riuiere de Vvarte, transporta à Posnanie celui des Iacobins de Srodec, & donna l'Hospital de Gnesne aux cheualiers du saint Sepulchre, qu'il souzmit au ressort & iurisdiction de Methouic. Et entre ses autres fondatiōs & biensfaicts, il donna aussi à l'Eglise de Gnesne le bourg de Cirnelin, & à celle de Posnanie la ville de Bucco, non sans grand mescontentement de ses Barons. Il laissa de sa femme Elizabeth quatre filles, & vn Posthume qui fut nay quatre moys apres son trespas, & porta son nom. En ce mesme temps Iacicus ou Iacinctus prit l'habit de saint Dominique apres plusieurs trauaux par luy endurez, tant en Poloigne qu'en Russie pour la deffence de la foy. Et bien tost apres passa de l'exil de ceste miserable vie à la beatitude de l'habitation eternelle, le propre iour de l'Assumption

sumption

sumption de la tressacree & glorieuse vierge Marie.

L'an ensuyuant qui fut l'an 1258. suruint vn merueilleux & horrible tremblement de terre, chose si estrange & nouvelle en ces quartiers là, qu'elle mit vne grande frayeur & espouuatement à tout le peuple, prenans cela pour quelque prodige & predictiō des maux qui aduindrent depuis. Car tout incontinent apres commencerent à s'allumer les troubles & seditions par tout le Royaume, voire entre les propres parens, amys & alliez plus proches. Et cependāt qu'ils estoient ainsi aux espees & aux cousteaux, à s'entretuer les vns les autres, vne grande multitude de Tartares souz la conduicte de Nogai & Celebug leurs souuerains Seigneurs, se ietterent à guise d'un torrent desbordé dans la Poloigne, où les Rutheniens leur donnerent entree & passage par leur pays. Toutes les riuieres estoient lors prises & glacees. Parquoy n'y ayant rien qui les destournast du droict chemin, s'en vindrent en vne diligence incroyable dans la cōtree de Lubline, de laquelle Daniel Roy de Russie, quelque temps au parauāt s'estoit emparé, apres que les Lituanienens l'eurent miserablemēt saccagee, où il auoit fait vn fort & mis garnison dedās. Parquoy sans y seiourner d'auantage passerēt outre en Sendomirie, où ayans surpris le peuple au despourueu, ils eurent moyen de faire beaucoup de maux & cruautez. Ils pillerent entre autres le monastere de Zauicost, que Boleslaus auoit fondé n'agueres, & doué de 25. gros villages à l'environ, & y auoit mis des Nonnains. Plus, vn autre qui est dans le mont Lissicien, bruslerent en outre la ville de Sendomirie, & assiegerent fort e-

estroitement le chasteau de toutes parts, en vain toutesfois & sans y pouuoir rien faire. Car il estoit brauement defendu, aussi y auoit il grand nombre de gens qui s'y estoient retirez. Mais les Ducs de Russie Leon & Romain enfans de Daniel, & Basilisque leur oncle qui estoient en l'armee des Tartares, trouuerent moyen de negocier avec le Gouverneur de la place, Pierre Crempa, par personnes interposees pour le commencement, & puis apres eux mesmes en personne, leur mettant en auant que pour sauuer, & le chasteau & leurs vies, il estoit besoin qu'il vint baiser les mains aux Empereurs Tartares. Et que là facilement & pour bien peu, les choses se pourroyent accommoder avec eux, tellement qu'ils leueroient le siege, & s'en iroyent, l'asseurās sur leur foy, qu'en cela il n'y auoit aucune doute ny dāger. Ce qu'il creut: car il ne pouuoit penser, que les Rutheniens qui estoient Chrestiens aucunement, les eussent voulu trahir, & rapportoyent tout ce qu'ils en faisoient à la pitié & compassion qu'ils auoyent de les veoir en ce peril. Ainsi Crempa avec son frere Sbignee, & autres des principaux s'en vindrent au camp, ou s'uyāt l'instruction qui leur auoit esté donnee par les Princes Rutheniens, estans arriuez dans le pauillon des deux Empereurs se prosternerent à leurs pieds & les adorerent, ainsi qu'il est accoustumé parmy eux, les supplians de leur ottroyer les vies, & la forteresse qu'ils auoyent en garde. Mais ils furent là massacrez apres leur auoir faict endurer quelques tourmēs. Car ces Barbares ont de tout tēps accoustumé de negarder foy ni parole. Et de là soudain à grās cris

& vrlemēs accoururēt vers le chasteau qu'ils trouuerent desgarny de defence, personne ne se doutant de rien, pource que leurs chefs s'en estoient ainsi allez parlementer. Au moyen dequoy ils furent fort aisément surpris, & en fut faict vn estrāge deluge & execution. A la fin ces Chiens enragez se trouuās lassez, & non toutesfois saouls de respandre le sang de ces pures miserables, se mirent à les rouler du haut des murailles en bas dās la riuere de Vistule qui passe au pied, laquelle demeura lōguement teinte & coulourée du sang qui y descouloit le long des rues: & des corps qui furent precipitez dedās, si grand fut le nombre de ceux qui perirent là. Les Tartares ne s'y arrestent point d'auantage, mais en toute diligence tirerent vers Cracouie, les Rutheniens leur seruant de guides & conducteurs. Et ny trouuant personne qui leur resistast (car Boleslaus avec sa femme s'en estoient fuys derechef en Hongrie) bruslerent entierement la ville. Delà mettant tout à feu & à sang iusqu'en Bithonie & Opolie, chargez de butin & richesses inestimables retournerent en Russie, trois moys apres qu'ils furent partis de leurs cōtrees. Cecy aduint l'an 1260. En memoire dequoy, & d'une si grande effusio de sang, qui auoit esté ainsi espādue par les ennemis du nom Chrestien, l'anniuersaire de ces saincts martyrs se solemnise encores iusqu'à auourd'huy à Sendomirie, le 2. iour de Iuin. Où vne infinie multitude de peuple acourt de toutes pars, pour les grās Pardōs & indulgēces que le Pape Alexandre 4. y a ottroyez. Quelque temps apres Daniel fils de Romain Duc de Russie, ayāt rāgé à son parti tous les autres Princes &

grans Seigneurs qui luy tenoyent pied. Les vns d'amirié & par moyens, les autres tout ouuertement de force & de contraincte, s'acquit la souueraine autorité & puissance de toute la Ruffie meridionale. Mais pour la rédre encores plus celebre s'aduifa d'enuoyer vne Ambassade vers Obisson, qui pour lors estoit Legat de nostre saint Pere en Poloigne, afin d'obtenir le nom & titre royal pour luy & ses successeurs, offrant en recognoissance de ceste grace, de se reduire avec tout son peuple à l'obeissance & traditiōs de l'Eglise catholique Romaine. Et que pour l'aduenir il prendroit en main la protection & defence des nations chrestiennes, cōtre les efforts & entreprises des infidelles, mesmemēt des Tartares qui estoient desia si crains & redoutez de toutes parts. Mais apres auoir impetré ce qu'il demandoit, il ne fit pas grand compte de satisfaire à ses promesses, tout au rebours il retourna plus auant que iamais à ses premieres heresies & erreurs. Et tant s'en fault qu'il supportast ou aydast aux Chrestiens, que luy mesmes se rengea avec les ennemis pour leur nuire, & les endommager. Car en celle mesme annee les Rutheniens vindrent piller presque toute la Masouie, & la plus grand part de Cujauie. D'un autre costé les Lithuaniens l'esté ensuyuant entrerent dans Masouie, mais le butin qu'ils y faisoient ne satisfaisant pas à leur conuoitise insatiable, tirerent plus auant dans le territoire de Louicense, où ils mirēt tout à feu & à sang. Parquoy Boleslaus ne voulant point laisser perdre ceste occasion de se venger des Iaziges qui ne bougeoient de ses pays à les courir & molester, mena son armee cō-

tre eux, où encores que de la premiere rencontre ils eussēt perdu leur chef & Capitaine Conath, ils ne laifserēt toutesfois de combattre iusqu'au dernier soupir, avec telle opiniastrété & ardeur que tous demurerent taillez en piece sur la place. De façon que delà en auāt le nō en est presque du tout demeuré aboly & esteinct. Boleslaus s'estant tout de ce pas saisi de leurs pays, & iceluy reduict en sa puissance, voulut que tout ce peude gēs qu'il y trouua de reste, receussent la foy chrestienne sur peine de la vie à qui en seroit refusant. Et afin q̄ la cōtree ne demeurast point du tout despeuplee & deserte, il y en enuoya encore d'ailleurs pour y habiter. Et moyenna enuers le Pape Urbain 4. que l'Archeuesque eut charge de la sainteté, de dresser là vn Diocese, qui est ce me semble l'Euesché de Luceorie. Cecy aduint l'an 1264. Quelques moys au parauant s'estoit apparue vne Comete dont l'effect & signification vint tōber sur le bestial de Poloigne, qui mourut presque tout de ie ne sçay quelle peste & contagion qui se mit parmy. Et sur les Cheualiers de Prusse, qui furēt presque tous deffaits par les Barbares, ayans eu vne fort malheureuse rencontre avec eux.

L'annee suyuant les Rutheniēs souz la conduite de leur Duc Suarno entrerēt à grand puissance dans la Sendomirie, où toutesfois ils furēt deffaits, & mis honteusement en fuite par la noblesse du pays, qui leur vint audeuant outre leur espoir & attente. Et là dessus Boleslaus s'estant eschauffé plus que de son ordinaire, pour les maux & dommages que ceux cy faisoient continuellement dans ses pays, delibera de

leur faire la guerre à bon escient, & pour cest effect fait assembler vne grosse armee autour de la ville de Ropscie, dont il donna la charge à Pierre Palatin de Cracouie. Car il n'alla point à ceste entreprise & execution, mais demeura à la maison avec sa femme Kinga, vaquans incessamment à prieres & oraisons, à ce qu'il pleust à Dieu auoir pour recōmandee leur armee, & luy donner victoire. Le Palatin s'estant mis aux champs entra dedans le pays des ennemis fort sagement, & avec vn grand aduis & conduicte. Aussi n'eut il gueres allé auāt qu'il rencōtra Suarno Duc des Rutheniens, en vn lieu nōmé Pieta, avec vne grande puissance, tant des siens, que des Tartares, dont il auoit vn bon nombre. Au moyen dequoy le iour ensuyuant, qui fut le dixneuuieme de Iuin, le Palatin se souuenant qu'à semblable iour les Polagues (il y auoit desia assez long temps) auoyent eu vne fort heureuse iournee contre les Rutheniens, aupres de Zauicost, mit ses gens en bataille. Ce que fait aussi Suarno de son costé. Et pour le commencement s'escarmouchoyent de loin, les Polagues à coups d'arbaleste, & les autres avec l'arc & les flesches, dont ils auoyent vn fort grand auantage. Car la portee en estoit plus longue, & pour vn coup en tiroient vingt tout à leur aise. Ce qui fut cause que les Polagues se hastèrent de venir aux mains, à coups de lances & de coustelatz, où ils feirent vn tel eschec qu'ils tournerent incontinant les ennemis en fuite, leur chaussant les esperons de si pres, qu'ils en tuerent vn grand nōbre, & prindrent beaucoup de prisonniers. De ceste desconfiture les Rutheniens se trouuerent si fort ab-

batus, que de long temps apres ils ne se peurent resouldre, ny rien entreprendre. Boleslaus aussi se contentant d'auoir donné vne telle estrette à ses ennemis, demeura en paix & en repos de son costé, à quoy de son naturel qui estoit doux & paisible, il estoit plus enclin qu'à la guerre. Aussi on a opinion que ceste victoire vint plustost des saintes & deuotes prieres de luy & de sa femme, que du deuoir & effort des hommes. Car les ennemis estoient quatre pour vn. On dict d'auantage, que ainsi que la Roynie Kinga estoit en oraison, se presenterent deuant elle deux ieunes hommes vestus de blanc, qui luy annoncerent l'euuenement de la bataille. Et pour ce que ce fut le iour de saint Geruais & saint Prothais, qu'elle fut donnee, on estime aussi que ce furent ces deux benoists saints qui ainsi s'apparurent à elle.

En ce mesme temps Solomee Roynie d'Halicie, sœur de Boleslaus, qui depuis la mort de son mary Coloman s'estoit retiree au monastere de Zauicost, & apres en celuy de Scalense, où elle auoit mené vne tressainte & bien heureuse vie, estant desia fort aagee, passa de ceste vie à l'autre, & fut son corps porté à Cracouie, en l'Eglise des Cordeliers. Duquel comme l'on dict par plusieurs iours apres son decez, sortit continuellement vne tres souefue & agreable odeur. Et sua quāt & quant de grosses gouttes d'huile, dont tous les malades qui furent oincts, se trouuerent incontinant gueris.

L'an puis apres que l'on comptoit 1269. se presenterent beaucoup de monstres, & choses estranges en

184 CHRONIQ. ET ANNALES
Poloigne, Car la femme du Comte Viribolau, nom-
mee Marguerite fort honeste & vertueuse Dame ac-
coucha le 20. iour du moys de Ianuier de 36. enfans
tout d'une vètree. Et en Calisse durât les octaues de
Noël nacquit vn Veau, avec deux testes & les dêts de
chien, & sept pieds de Veau. La plus grâde des testes
estoit en son propre lieu & assiette, & l'autre deuers
la queue: Estant mort les bestes ny oyseaux n'envou-
lurēt gouster. Suruint aussi au mesme temps vne cho-
se fort estrâge, toutesfois plusieurs personnes dignes
de foy la resmoignerēt. Ce fut qu'un Gentilhomme
fort magnifique, mais de mauuaise cōscience, & tres-
aspre à raut le bien d'autruy, estant en extremité de
maladie, plusieurs gens de bien le vindrent admone-
ster de penser au salut de son ame, & se reconcilier à
Dieu. Mais il respondoit tousiours, qu'il estoit trop
rard, & n'y auoit plus d'esperance ny lieu de pardon
à ses pechez & meffaiçts qui estoient si grans, que par
le iugement diuin, il estoit desia deliuré & mis és
mains de l'ennemy pour estre tourmenté & puny e-
ternellement. Et là dessus ceux qui estoient presens,
oyoyent vn grand bruiçt comme de coups de verges
& de fouët, d'ôt on eust battu cruellemēt quelqu'un,
& voyoyēt par tout son corps la trace & marque des
coups qu'il auoit receus. Dont incontinent apres il
rendit l'ame: mais ce fut à trois fois, & avec vne ex-
treme peine & violence. Ayât à la veuë de tous com-
mencé icy en ce monde le tourment & supplice qu'il
deuoit perpetuellement endurer en l'autre. Ce qui
doit bien seruir d'exemple à ceux qui ne font point
scrupule de s'enrichir iniustemēt des biens d'autruy.

L'an

DE POLOIGNE. 185
L'an 1273. fescment vne sedition contre Boleslaus,
pretendant le peuple auoir mal esté traicté de luy en
plusieurs sortes. Et premierement que sans les appe-
ler & assembler les estats, comme estoit la coustume
il auoit decerné son heritier & successeur au Royau-
me Lescus le Noir, Duc de Siradie, son proche parēt.
Dauâtage, que par vne nōchallance & paresse il per-
mettoit aux fausetez & calumnies auoir lieu és iuge-
mens, de façon que les simples, & ceux qui n'estoyēt
pas rusez & pratiques en telles chiquaneries, & les
autres qui estoient despourueus de conseil & sup-
port, venoyent à endurer beaucoup, partie perdans
leurs biens & heritages, qui leur estoient vollez, par-
tie estans condamnez en de grosses amendes & des-
pens qu'ils n'auoyent moyen de payer. Il y auoit en-
cores plus. C'est qu'à cause de ses cōtinuelles chasses
& desdruits, il fouilloit par trop la noblesse, pource
qu'il faut que lors ils nourrissent & deffrayēt le Prin-
ce par tout où il passe, avec ses cheuaux, chiens, oy-
seaux, & tout son train & equippage. Tellement que
beaucoup de gens se sentoient offencez de luy, & se
persuadoyent que changeans de seigneur, ils chāge-
royent par mesme moyen de condition, & seroyent
deliurez de tous ces maux & incommoditez. Quel-
ques vns doncques des principaux s'assemblerent se-
cètement, & furent d'aduiz d'enuoyer deuers Vv-
ladislaus, Duc des Opoliens, luy presenter la seigneu-
rie. Ce qu'il ne refusa pas, mais il voulut qu'eux mes-
mes le vissent trouuer, afin que les choses passassent
plus seurement, & que de bouche & par escrit il se
peust assurez de leurs volontez. Ce qu'ils feirent, &

A

à grands troupes commençoient desia à se retirer deuers luy, quant Boleslaus aduertit du tout retourna soudain d'Opauie. Ne voyant pas estre besoin de laisser passer plus auant ceste conspiration & monopole. Et avec ce peu de gens qu'il auoit de sa cour & de son train accoustumé, les vint rencontrer sur le chemin, auprès d'un village appelé Bogucin, le deuxiesme iour de Iuin, où il les chargea à l'impourueu, neantmoins ils se meirent en defence. Mais à la fin la victoire luy demeura, & fut par ce moyen ceste sedition appaisée, qui estoit pour venir à plus grande conséquence, si on n'y eust pourueu d'heure. Bien tost apres ceste guerre ciuile les Lithuaniens entrerent dās la contree de Lubline, où ils feirent vn grand butin, personne ne leur y dōnant empeschement. Mais Boleslaus courroucé, & non sans cause contre Vvadiflaus, de ce qu'il auoit entrepris sur luy, mena son armee au pays d'Opolie & de Ratiborie, où il fit beaucoup de dōmage, iusques à bruller les fauxbourgs des principales villes. Toutesfois par le moyen de Boleslaus, Duc de Calisse les choses furent rappointees, & la paix faicte entre eux.

Autre chose digne de memoire ne se presenta durant le reste de l'annee, ne l'autre ensuyuāt, sinon deux Mōstres qui se trouuerent dans le territoire de Cracouie, à sçauoir, vn enfant qui sortit du ventre de la mere, avec toutes ses dents, & se meit à parler distinctement, si qu'on le pouuoit entendre: iusques à ce qu'ayant esté baptisé il perdit, & la parole & les dēt. L'autre n'ayāt que six mois, predict haut & cler la venue des Tartares qui deuoyēt (cōme il disoit) coup-

per les testes aux Polagues. Sur quoy ayant esté enquis comment il le sçauoit, & si ne craignoit point la sienne, si fais, ce dit il, & en tremble desia tout de paour, car elle me sera abatue aussi bien comme aux autres. Ce qui aduint douze ans apres.

L'an 1276. ceux de Prusse, & de Lithuanie feirent vne grande desolation & ruine en Masouie, Culme, & Cujauie, dont ils emmenerent plus de quarante mille ames. On dit qu'alors fut veu ce prodige à Cracouie, la nuict precedēte du premier iour de l'an, que le ciel se trouua tout soudain espris, d'une claire & gracieuse lumiere, qui dura quelque temps. Ce qui signifioit comme on cogneut depuis la prochaine mort du Prince. Car sur la fin de l'an qu'on comptoit 1279. Boleslaus à bon droit surnōmé le Chaste, passa de ceste vie, à vne plus heureuse, le dixiesme iour de Decēbre. Et fut son corps mis en sepulture en l'eglise des Cordeliers de Cracouie, qu'il auoit fondez. Ce fut vn fort doux, benin, & Catholique Prince, charitable enuers les pauures, & les ministres de l'eglise. Car de son temps tous les prestres, religieux, & autres constituez en dignité sacree, furent exempts de toutes charges, tributs, impositions, & redeuances quelconques, ensemble des iurisdiccions de tous les magistrats, voire de celle du Roy mesmes. Et voulut que l'Euesque de Cracouie, iouist du droit & priuilege de Duc par toutes ses terres. Il fonda aussi le Monastere des Religieuses de Crisanouicie, sur le bord de la riuier de Nyda, de l'ordre de Premōstré. Et vn autre de Mendians, à saint Marc de Cracouie, appelé la Penitence des martyrs. Au demeurant il regna,

où pour parler plus proprement, il vescu cinquante deux ans, depuis la mort de son pere. Sa femme Kinga porta sa mort fort patiemment, comme celle qu'il n'auoit iamais cogneuë, & estoit encores vierge, rendât graces à Dieu, qu'à la fin elle eust esté du tout deliuree des liens de mariage. Parquoy tout incontinant avec sa sœur Yolád (qui depuis le decés de Boleslaus, Duc de Calisse, son mary, s'estoit retiree avec elle) departirent tous leurs biens aux pauvres, & prirent l'habit de la Religion sainte Clere, de l'ordre saint François. Puis s'en allerent (quelques remonstrances que leur feissent les seigneurs du Royaume) à Sandicie la vieille, où elles acheuerent le reste de leurs iours dans le monastere que Boleslaus y auoit fondé.

LESCVS LE NOIR.

A Boleslaus le Chaste succeda Lescus le Noir es seigneuries de Cracouie & Sendomirie, lequel estoit son proche parét, & ne luy fut pour ce commencement donné aucun destourbier ny facherie, de paour des Russiens, dont la crainte ne donnoit loysir à personne de rien remuer ny entreprendre. Car Leon, fils de Daniel, le plus puissant de tous les seigneurs de Russie, apres la mort de Boleslaus, en plein cœur d'hyuer estoit entré dans la prouince de Lubline, avec vne grosse armee de Russiens, Lithuaniens, & Tartares, & l'ayant pillée estoit passé outre, dans le pays de Sendomirie, où il mettoit tout à feu & à sang. Quant Varsie, Castellan de Cracouie, avec Pierre & Iean, tous deux Palatins, l'un de Cracouie, & l'autre de Sendomirie, le vindrent rencontrer pres

lebourg de Goslice, beaucoup plus heureusement que sagemet, car ils estoient en bien plus petit nombre que les ennemis. Neantmoins ils en eurent la victoire, & les meirent en fuite, & dit on qu'il y en eut iusques à huit mil de tuez, & deux mil de prisonniers. Lescus puis apres voulant poursuyure ceste victoire passa avec son armee en Russie pour se venger de Leon, lequel ne s'estant pas encores bien rassuré & refaict de sa perte, s'estoit retiré bien auant dans le pays, tellement que Lescus eut tout loysir de iouer son ieu, & de courir la contree à son aysé, iusques à la ville de Leopoly, dont il ramena vn grand butin. Et l'an ensuyuant, qui fut mille deux cens octante vn, il fit la guerre contre le Duc de Vvratisslaue, Henry quatriesme, pour raison de ce qu'ayant semonds & appelé à vn abouchement Premissus, Duc de la grãd Poloigne, Hery, fils de Boleslaus le Chauue, Duc de Legnicie, & Henry, fils de Conrad, Duc de Glogouie, qui ne se doutoyent de rien, les auoit tous arrestez prisonniers.

Peu de tēps apres les Lithuaniens, avec les demeurans des Iaziges, qui estoient encores sur pied, s'estas departis en trois troupes, entrerent soudainement & au despourueu dans la contree de Lubline, qu'ils pillerent cruellement, ce pendant que Lescus estoit à Cracouie, où il donoit audience aux parties selon la coustume, & expedioit les procez. Lequel aussi tost qu'il eut les nouvelles de leur venue, se meit incontinant apres: mais ayant entendu, comme chargez de butin & de richesses ils estoient partis, & desia fort esloingnez: Tout las & trauaillé du chemin,

& de despit qu'ils luy fussent ainsi eschappez, s'endormit iusques au lendemain matin, qu'ayant faict assembler ses gens, leur racompta d'un visage riât & asseuré, que l'Archage de Dieu saint Michel, festoit apparu à luy en songe, lequel l'auoit asseuré qu'ils rattraindroyent les ennemis, & en auroyent la victoire. Parquoy tout de ce pas se meirent alaigrement à les poursuyure, les suyans tousiours à la piste, iusques à vn lieu estroit & ferré entre les riuere de Narua & de Nemene, de toutes parts enuironné de forests, où il rāgea ses gēs en bataille, ne faisant qu'une troupe, tant à cause du lieu, que du peu de nombre qu'ils estoient. Les Barbares de leur costé vindrent brauement à la charge: Mais ce pendant qu'ils combatoyēt front à front, ceux qu'ils emmenoyent prisonniers, ayās apperceu de loin les enseignes de ceux qui venoyent à leur rescouffe, s'esuertuerēt, & festās saisis de quelques armes qu'ils trouuerēt tout à propos, les vindrent assaillir par derriere, le reste qui estoient desarmez, & les femmes aussi les animoyent à haute voix, & ainsi leur dōnoyēt courage, & quant & quāt terreur & espouuementement aux ennemis, de se veoir ainsi enuelopez de deux costez, parquoy ils se meirent à fuyr es forests prochaines. Mais Lescus & les prisonniers les poursuyurent chaudemēt s'encourageās les vns les autres, iusques à ce que la nuict les fait retirer. En ce combat les Iaziges qui auoyent resisté plus opiniastrement, & qui auoyent desia renié la foy Chrestienne furent du tout acheuez, & n'en eschappa non plus gueres des Lithuaniens qu'on dit auoir esté au nombre de quatorze mille hommes.

Mais ce qui est bien admirable, & se doit referer du tout à la grace & bonté diuine, n'en demeura des nostres vn seul. Lescus doncques ayant rescous les prisonniers & le butin, & adiousté à cela les despouilles des ennemis, s'en retourna tout victorieux en Poloigne, & fait bastir à Lubline vne fort belle eglise à l'honneur de monsieur saint Michel, en memoire & souuenance d'une si belle victoire qu'il luy auoit annoncée & promise.

Mais l'an derechef 1283. au mois d'Octobre, les Lithuaniens entrerent en la cōtree de Sendomiric, par le territoire de Luconie, sans qu'on s'en prist garde, & y feirēt beaucoup de dommages & ruines. Lescus estant semblablement à Cracouie, occupé à ses affaires & iours ordinaires, toutesfois aussi tost qu'il eut les nouvelles, prit les armes. Et avec la Noblesse qui de toutes parts accouroit à luy, se meit à les poursuyure, puis quāt il se vit n'estre plus gueres esloigné d'eux, voulut que ses gens (afin qu'ils combattissent plus asseurement & de meilleur courage contre les ennemis de la foy) se cōfessassent & communiasent. Et à la verité il fait cela bien Chrestienement, mais ce pendant les ennemis ayans eu le vent de sa venue, & se souuenās encores de l'estrette de l'annee passée, se retirerent es prochains bois, pour aduiser ce qu'ils auroyent à faire: & soudain à grands cris & vrlemēs se vindrent ruer sur les Polaques, lesquels ils effrayèrent de ceste premiere venue, pource qu'outre toute esperance les estoient venus ainsi resolument charger ceux qu'ils auoyent desia veus prendre la fuite. Neantmoins ils se rasseurerent tout incontinent, de

façon que les Barbares ne la feirent pas longue depuis, ayant esté leur choc & impetuosité rebouchee par l'effort des nostres. Ny plus ny moins que fils fuf sent venus donner de la teste cõtre quelque muraille forte & espoisse.

L'annee ensuyuant, Henry Duc de Vvratisslaue, homme malin, & si remply d'auarice & conuoytise, que mesmes il ne s'abstenoit pas de mettre la main aux choses sacrees, & aux personnes Ecclesiastiques, chassa l'Euesque Thomas hors de son Euesché, & se meit dans ses biens, & ceux de tout le Clergé, sans leur en vouloir faire raison aucune. Au contraire ayãt pour ceste occasion esté excommunié par l'Archeuesque de Gnesne, força l'Euesque, & tous les prestres encores de s'en aller ailleurs, dequoy le pauvre Prelat bien dolent & cõtristé se retira à Ratiborie, où il fut fort humainement, & à grand honneur receu du Duc Casimir, frere de Vvladislaus. Mais tout incontinant Henry luy enuoya faire ses plaintes, de ce qu'il auoit retiré son ennemy, le menaçant de luy faire la guerre, s'il ne le chassoit: dequoy Casimir n'ayant tenu compte, l'autre avec son armee le vint assieger dãs Ratiborie, où apres que le siege eut duré quelque temps, & que le commũ peuple commença d'auoir faute de viures, tous se pirerẽt à murmurer contre l'Euesque & les prestres. Ce qu'estant venu à sa cognoissance, leur dit qu'il n'estoit pas raisonnable, que pour occasion de luy, & d'un petit nombre de pauvres exilez, ceste ville dont ils auoyent receu tant de biens & de faueurs, patist aucun inconuenient où d'ãger. Et là dessus s'estant reuestu de ses ha-

bits

bits & ornemens pontificaux, & ordõné aux prestres de faire le semblable de leur costé, tout ainsi que s'ils eussent voulu celebrer le diuin seruire, sortirent dehors, & s'en allerent droit vers le camp des ennemis. Ce que Henry ayant apperceu de loin, tout esbahy, & touché de quelque inspiration & repentance, sortit hors de son pauillon, & se vint ietter aux pieds de l'Euesque, luy requerãt pardon de sa faute, car il luy sembloit auoir recogneu quelque chose en luy, de plus auguste & venerable que la condition de l'homme ne porte. L'Euesque le receut fort benignement, les larmes aux yeux, & festans retirez à part en vne chappelle de saint Nicolas prochaine, se reconcilierent, & feirent leur paix. Puis Héry restitua à l'Euesque, aux eglises, & au Clergé, ce qu'il auoit vsurpé sur eux.

Sur ces entrefaictes, en la petite Poloigne, les seigneurs s'esleuerent derechef contre Lescus, à la persuasion de Paule, Euesque de Cracouie, qui les irritoit contre luy, pource que durãt le regne de Boleslaus le Chaste, ayant esté pris par quelques Gentilshõmes & mené à Siradie, Lescus l'auoit tenu en prison l'espace d'un mois entier, toutesfois fort honorablement. A ceste cause Conrad, Duc de Masouie, fut appelé pour receuoir la seigneurie, au deuant duquel ainsi qu'il s'en venoit avec son armee. Varsia Castellan, Zegota Palatin, & Christin Castellã, avec l'Euesque, & grand nombre de noblesse, allerent iusques à Sendomirie, pour le receuoir, & prester le serment, & ainsi sans aucune cõtradiction ny empeschement, entra en possession de toute la contree de Cracouie.

B

& de Sendomirie, tellement qu'il ne restoit plus que la ville de Cracouie, où Lescus & sa femme s'estoyēt enfermez. Mais se voyant abandonné de tous meit le chasteau és mains des habitans, à la loyauté & mercy desquels il fut contraint de recourir, & se retira en Hongrie, deuers le Roy Ladislaus. Les citoyens ayans pris en main la garde de la forteresse, aduiferent (pource que la ville n'estoit gueres bien remparée, ne munie, & qu'ils n'estoyent pas assez de gens pour la garder) de se retirer au chasteau avec leurs femmes & enfans. Ce que les seigneurs ayant entendu, enuoyerent deuers eux, pour les desmouuoir de leur entreprise, & tascher de les faire rendre à Conrad, les menaçant s'ils le faisoient autrement. A quoy ils feirent responce qu'il ne leur estoit loysible, ny honneste d'aller encontre le serment qu'ils auoyent vne fois donné à Lescus, & qu'on fasseurast qu'ils estoient deliberez de perdre plustost tout ce qu'ils auoyent le plus cher en ce monde, voyre la vie propre, que de faillir à cela. Voyans doncques ceux de dehors, qu'ils n'en pouuoient auoir autre raison, s'en vindrent avec Conrad, planter le camp deuant Cracouie. Mais pource qu'ils cognoissoyent assez, que le chasteau estoit mal ayse à forcer, meirēt le feu à la ville, pensans par là estonner les autres, quant ils verroyent perdre & ruiner leurs maisons, & leurs biens. Et ce pendāt Lescus auoit obtenu du Roy Ladislaus vn secours de Hongres, & de Cumans, qui n'estoit pas à mespriser, & s'en venoit à grandes iournees pour leuer le siege. Mais Cōrad avec son armee luy vint au deuant, & se rencontrerent aupres du

bourg de Bogucice sur la riuere de Raba, où ils vindrent aux mains, & fut Conrad defaict, lequel sans farrester s'enfuit iusques en Masouie. Ainsi l'euenement de la chose, monstra lequel des deux auoit plus iustement pris les armes. Lescus toutesfois vfa fort gracieusement de la victoire, car il meit incontinent en liberté tous ceux qui auoyēt esté pris, & pardōna aux seigneurs, lesquels luy requierent mercy. Et aux habitans de Cracouie il feit de grands remercimens, de leur bon deuoir, & de la loyauté qu'ils luy auoyent gardee. Puis feit fortifier la ville, & la mettre en meilleur estat qu'elle n'estoit au parauant, & en bailla la garde aux Allemans, qui s'estoyent si fidelement portez enuers luy.

Toutes ces choses aduindrent l'an mille deux cēs octante cinq, durant lequel la Prusse fut fort moleste, d'vne nouvelle espece de vermine, ayant des queuës semblables à celles des escreuisses, & vn esguillon au bout, dont tous ceux qui estoyēt picquez mouroyent dans le troisieme iour. Et ne sçauoyent comme les appeler, toutesfois il faut que ce fussent scorpions, que iamais ces regions froides n'auoyent cogneus au parauant, ne par auenture depuis. Mais cela vint de quelque constellation particuliere, autrement il seroit bien mal ayse d'en assigner la cause.

L'annee ensuyuant Lescus alla piller d'vn bout à autre le pays de Masouie, vsant en cest endroit d'vne ruse & finesse pour les surprendre. Car il feignit de vouloir aller contre les Lithuaniens, venger le tort & iniure qu'ils auoyent faicte à son frere Zemouit, de luy gaster son pays de Dobrine, mais de là en auāt

la fortune qui luy auoit tousiours si biē dit luy tourna visage. Et sa prosperité accoustumee se changea en malheur, afin de ne laisser passer sans chastiment la fraude & tromperie dont il auoit voulu vser enuers Dieu & enuers les hommes, & couvrir du manteau de deuoir & pieté, sa rancune & desir de vengeance. Au moyen dequoy il perdit alors grād nombre de gens aux passages des riuieres. Et les Tartares d'autre costé avec les Russiens, par le pays de Russie entrerent dans la contree de Lubline, & de Masouie, & de là dans les pays de Lescus, ou à guise de sauterelles rongerent tout, sans pardonner à cruauté ny excez de feu, ny de sang quelconque. Dont Lescus fut cōtraint de se retirer, ou pour mieux dire de s'en fuir en Hongrie. On dit que lors ces canailles emmenerent vn si grād nombre de prisonniers de Pologne, qu'estans venus à en faire la reueuē à Vladimirie pour les partir, se trouua iusques au nombre de vingt & vn mille filles non mariees, qu'ils emmenerent: Tout le reste passa au fil de l'espee, hommes femmes & enfans. Les Russiens aussi, combien qu'ils fussent alliez des Tartares, & leurs tributaires furent payez tout contant par eux, car à leur partement de Russie ils empoisonnerent toutes les eaux. Iettans dās les puys, fontaines & riuieres les cœurs des pauvres captifs, embrochez à douzaines, qu'ils leur auoyent arrachez du ventre, en les massacrat, & iceux confis & saupoudrez de tresfors & puissans venins, prompts & violens au possible, dont infinie multitude de peuple mourut miserablement. Au moyen dequoy Lescus se voyant tant de miseres & infortu-

nes, les vnes sur les autres, & quant & quant estre en fort mauuaise reputation enuers tous, se contrista de sorte, que d'ennuy & fascherie il vint à seicher sur pied: Et tomba finalement en vne maladie dont il mourut le dernier iour de Septembre mille deux cēs octante neuf. Il fut enterré hōnorablement en l'eglise de la Trinité, aux Iacobins, ayant toute sa vie esté tenu pour bon, modeste, & gracieux Prince: heureux aussi, si les dernieres fortunes eussent respondu aux premieres.

BOLESLAUS, HENRY, VVLA-
DISLAUS LOCTIQUE, ET
Henry derechef.

LESCVS le Noir mort sans enfans, les seigneuries de Cracouie, Sendomirie, & Siradie, estoient sur les rangs: Dont les vns par droit de successiō, les autres par la faueur du peuple, & les autres par force se meirēt en possession. Et tout premieremēt Vvladisslaus Loctique, frere de pere du defunct, se saisit de Siradie, qui de son bon gré se rendit à luy. Mais les estats de Cracouie & Sendomirie esleurent Boleslaus Duc de Plocence, frere de Cōrad ayant planté là iceluy Cōrad, auquel ils festoyēt dōnez par deux fois, du viuāt de Lescus. Cestuy ci estāt venu prēdre possession de la seigneurie, fut en grand pōpe & magnificēce cōduit à Cracouie. Mais biē tost apres Hēry, Duc de Vvratisslauie, appelé secrettemēt d'aucuns citoyens, y arriua avec son armee, & luy furēt les portes ouuertes. Dequoy se trouuāt Boleslaus estōné, cōme d'vne chose nouvelle & inopinée

se desroba secrettement du chasteau, & tout stomaché sen retourna en Masouie, quelque chose que luy sceussent dire les seigneurs qui tenoyent son party, lesquels estoient apres à amasser gés, pour s'opposer à Héry. Sur quoy il ne leur alleguoit autre chose, sinon qu'ils l'auoyent appelé à vne seigneurie paisible comme ils disoyent, & non pas pour faire la guerre. Le chasteau fut aussi rendu apres son partement. Et toutesfois Henry ne iouyt gueres du Royaume, car Vvladislus Loctique, desia Duc de Siradie, ne pouuant endurer de veoir qu'un autre luy fust preferé à la succession de son frere Lescus, assembla son armee & sur le commencement de la Primeuere marcha droit à Cracouie, pour en ietter hors la garnison que Henry y auoit laissée, lequel estoit retourné en Silesie. Mais soudain qu'il fut aduertie de ces preparatifs il depescha Henry, Duc de Legnicie, avec vn camp vollant, pource qu'il se trouuoit lors mal disposé, lequel vint rencontrer Vvladislus pres la ville de Seuerie, où estans venus aux mains, plusieurs y perderent la vie d'une part & d'autre, toutesfois Vvladislus eut la victoire, parquoy il poursuyuit son chemin à Cracouie, ou on luy ouurit liberalement les portes. Et là du consentement de l'assemblee, qui y estoit fut derechef proclamé seigneur. Ce qui ne luy dura pas longuement, car Henry n'ayant point perdu le cœur, pour la deffaicte precedente, enuoya vne autre armee contre luy, laquelle par vne nuict obscure, lors que chacun prenoit son repos, sans se douter de rien, fut introduite par ceux qui tenoyent son party. Mais le cry festant soudain leué, car les Sile-

siens mettoient tout au fil de l'espee, Loctique se doutant bien de l'affaire, se retira au cōuent des Cordeliers, où ayant plus particulièrement entendu le traictement qu'on faisoit à ses gens, & qu'on le cherchoit de tous costez, prit l'habit d'un des freres, & se coulla par vne corde de la muraille en bas, tellement qu'il eschappa. Tout le reste retourna depuis souz l'obeyssance de Henry, lequel mourut bien tost apres, l'an 1290.

L'an mille deux cés nonante deux, Kinga, où Kunegūde, veue de Boleslaus le Chaste, femme de tres-saincte vie, passa de ce siecle en l'autre, laquelle ayāt tousiours vescu en virginité, durāt mesmes la vie de son mary, apres la mort d'iceluy festoit retiree au Monastere de Sandecie, ou par l'espace de plus de douze ans continuels elle auoit mené vne fort dure & austere vie. Parquoy la saincteté de ceste Princesse fut approuuee, par plusieurs miracles qu'elle feit durant sa vie, & apres sa mort, à sa tumbé & sepulture. L'annee ensuyuant, qui fut mille deux cens nonante trois les Lithuaniens entrerēt à l'impourueu en Cracouie, ou ils feirēt vn tel butin de creatures, que chacun d'eux en eut vingt chefs pour sa part. Et si on dit que leur nombre estoit de dixhuiet cens, qui seroyēt enuiron trente six mille ames qu'ils emmenerent.

PREMISLV S.

En nom & tiltre Royal auoyēt desia par l'espace de deux cens quinze ans esté intermis & discontinué, quant les estats festās assemblez en la ville de Gnesne, l'an de nostre seigneur mil

deux cés nonāte cinq, Premillus, seigneur de la grād Poloigne, homme courageux & de grande entrepri-
se, aagé de quelques 38. ans, fut esleu Roy, & sacré à
grād pompe & cerimonie, par Iacques Suinque, Ar-
cheuesque du lieu. Auant toutes choses il se meit à
chercher les moyens comme il pourroit pacifier les
diuisions, & partialitez du pais, & reduire en vn seul
corps, & à vn mesme vouloir & consentement, tant
de pieces desmembrees. Mais ses vertueuses & loüa-
bles deliberations furent empeschees & preuenues
d'vne trop aduancee & dōmageable mort pour tout
le pays, car le sept ou huictiesme mois de son regne,
il fut surpris par les Marquis de Brandebourg en cer-
taines embusches qu'ils luy auoyent dressées, & pi-
teusement mis à mort. Son corps fut retiré, & porté
à Posnanie, aupres de ces aneestres, ayant de son vi-
uant fondé vn hospital és fauxbourgs de Calisse, & à
Posnanie vn Monastere de Nonnains, de l'ordre S.
Dominique.

VVLADISLAUS LOCTIQVE.

LE vingtdeuxiesme d'Auril, iour dedié à la so-
lennité de sainct Adelbert, les principaux du
Royaume avec la noblesse, & ceux de Pome-
ranie s'assemblerent en la ville de Posnanie pour l'e-
lection du nouveau Roy, où la Princesse Rixa, fille
de Premillus fut mise en auant, mais l'importance de
la guerre qu'ils auoyent contre les Marquis de Brā-
debourg, & les cheualiers de Prusse leur remarquoit
assez le besoin qu'ils auoyent pour lors, de quelque
braue

braue & vaillant capitaine, & non pas d'vne ieune &
craintifue Damoyfelle. Parquoy Vvladislaus entre
tous fut iugé le plus capable & à propos pour demef-
ler cest affaire, & ainsi fut creé Roy de la voix & con-
sentement de tous, qui luy feirent sur le champ le
serment de fidelité. Toutesfois il voulut remettre
son sacré & coronnement à vne autre fois, & mesme
ne prit pas le titre de Roy. Mais seulement d'heritier
du Royaume. Delà il s'achemina premierement en
la grand Poloigne & Pomeranie. Puis l'annee ensuy-
uante vint en la petite Poloigne, où il se rua sur les
garnisons des Bohemes, & ceux qui fauorisoient
leur party, & pilla d'vn bout à autre la Silesie, dont il
ramena vn grand butin, sans que personne luy don-
nast empeschement. Cela faict, remmena son armee
en la grand Poloigne, & là s'addonna aux plaisirs &
oyfuetez, qui luy furent à la fin fort pernicieuses, &
non sans l'auoir bien meritē. Car les soldats ayās ac-
coustumé de viure en toute licence à la guerre: pil-
ler & faire comme bon leur sembloit, ne se pouuo-
ent contenir durāt la paix, qu'ils ne fissent beaucoup
d'insolences. Rançonnoient les poures gens, pilloy-
ent les Eglises, prenoyēt à force filles & femmes ma-
riees, dequoy luy ne les chastioit, ny reprenoit. Mais
leur laissoit tout en abandon, nourrissant de plus en
plus parmy eux ceste mauuaise discipline, & depra-
uees façons de faire. André Euesque de Posnanie l'en
reprit & admonnesta souuent, mais ce fut en vain.
Parquoy il interdit & feit cesser le diuin seruice par
tout son Diocese. Et là dessus s'estans les Estats assem-
blez en la mesme ville, par leur commun consente-

ment le Royaume luy fut osté, cependât qu'il estoit allé faire vn tour en la petite Poloigne, & mis és mains de Venceslaus Roy de Boheme. Cela aduint l'an 1300. On dict qu'en la mesme annee, vn certain Ottoman homme incogneu & de bas lieu, donna commencement à l'empire des Turcs, qui depuis est monté à telle grandeur & puissance, où on le voit maintenant.

VENCESLAUS BOHEMIEN.

VENCESLAUS ayant esté mandé avec vne magnifique & honorable ambassade, vint tout incontinant, & fut sacré à Gnesne, suyuant la coustume, par l'Archeuesque Iaques. Puis à la requeste des Princes & Seigneurs prit à femme Rixa, autrement nommee Elizabeth, fille du feu Roy Premissus, afin de s'asseurer tousiours d'auantage au Royaume. Mais cependant qu'il estoit apres à recouurer ce qui auoit esté perdu & aliené, les Russiens entrèrent à grand effort dans la contree de Sendomirie, où ils feirent beaucoup de maux & de dommages, & s'en retournerent, chargez de grandes richesses, auant que Venceslaus en peult auoir les nouvelles. Lequel apres auoir ordonné ce qui estoit requis, & laissé deux Seigneurs Bohemiens pour administrer le Royaume en son absence, asçauoir Nicolas Duc d'Opauie, en la petite Poloigne. Et en la grande Frici Silesien, s'en retourna en Boheme, que iamais plus il ne reuint. Toutesfois les choses ne laisserent d'estre par tout en fort grande tranquillité & repos, cependât qu'il vescu, sinon que ceux de la petite Poloigne courroucez du pillage q̄ les Russiens auoyēt

faict autrefois en Lubline, & de leur derniere course en Sendomirie, se preparerēt pour leur faire la guerre. Dequoy les Russiens estans aduertis, mirēt sus de leur costé de grâdes forces, tant de leur païs, que des Lithuaniens & Tartares, qu'ils appellerent à leur secours, & s'en vindrent au deuant des Polaques iusques apres de Lubline, où ils leur presenterent la bataille, se confians sur le grand nombre de leurs gens. Et cōbien à la verité que les Polaques fussent beaucoup plus foibles, si ne la refuserent ils pas. Mais cōbatans d'vn grand effort, mirent les autres en route, où il y eut vn grand nombre de tuez, tant des Russiens que de leurs estrangers. Et en fust bien demeuré d'auantage, s'ils ne se fussent sauuez en la forteresse de Lubline prochaine de là. Toutesfois ils ne tindrent pas longuemēt. Car estâs tenus de court & pressez de famine, furēt cōtraints de se rēdre. Par ce moyē ceste place 57. ans apres qu'elle eust esté occupee des Russiens, retourna derechef en la puissance des Polaques.

VVLADISLAUS *Loctique, derechef.*

NOVVELLES esperances de recouurer le Royaume esguillonnerent lors l'entendement de Loctique, pource que l'ambition & auarice des Bohemiens cōmançoit d'oresenauât à estre fort odieuse aux Polaques, & avec cela Venceslaus se trouuoit biē empesché en la guerre d'Hōgrie. Parquoy Vvladisslaus s'en vint en Poloigne avec quelques bādes de Hōgres, & à son arriuee prit le chasteau de Pelcisque, voyfin de Villicie, d'où avec la faueur des habitans, il chassa la garnison des Bohemes qui y estoit, & prit semblablement la forteresse de Lelouie.

De sorte que le pays d'alétour partie de crainte, partie de force, se venoit de iour en iour rendre à luy. Et là dessus la fortune le fauorisa encores. Car Venceslaus estant deuenu malade d'une fièvre en mourut finalement à Prage, le 24. iour de May 1305. Et ainsi les affaires d'Vladislaus commencerent à prendre un peu meilleur train, car ceux de Cracouie ne feirēt point de difficulté de luy ouvrir les portes à son arriuee, à la persuasion de l'Aduocat Albert. Les Bohemiens par mesme moyen luy rendirent le Chasteau, & les Seigneurs avec la noblesse se rangerent à son party. Parquoy ayant esté l'assemblee publiee à Cracouie du consentement de tous, il fut vne autre fois créé & esleu Roy. Il n'y auoit que ceux de Posnanie & de Calisse qui fussent absens, pour les mauuais traitemens qu'ils auoyent autresfois eus souz luy, dont ils se souuenoyent encores, & pourtant l'auoyent à contre-cœur. Aussi qu'ils craignoient que pour auoir esté les premiers auteurs de le chasser, il ne s'en voulust ressentir, & leur faire quelque facherie. Ce qui fut cause que ces deux Prouinces se separerent du reste de Poloigne, & se donnerent à Henry fils de Conrad Duc de Glogouie, qui estoit fils de la sœur de Premisus. Mais Vladislaus luy alla incontinent faire la guerre. Et pource qu'il ne comparoissoit nulle part, & ne faisoit aucun semblant de resister, apres auoir pillé & gasté tout le long de l'Esté son pays, s'en alla en Pomeranie, où en la ville de Dantzik, receut le serment de fidelité des Pomeraniens.

La mesme année qui fut 1306. le feu se mit en la grande Eglise de Cracouie, dont elle fut bruslee avec

tout le reste du chasteau aussi qui estoit de boys. Et quatorze ans apres l'Euesque Nauclere, Gentilhomme Silesien, de la contree d'Oxoïs, les refit tout à neuf en la forme & grandeur qu'ils sont maintenant, ayans contribué à ceste reparatiō non seulement l'Euesque & Chappitre, mais tout le Clergé de Cracouie, avec la demie année des fruiets de tous les benefices qui vindrent lors à vaquer, lesquels furent employez à cela.

Les affaires de Pomeranie ne demeurèrent pas longuement paisibles, car Pierre Chancelier du pays, fils du Palatin de Dantzik, se mit à susciter nouveaux troubles. Toutesfois l'entreprise fut descouuerte, auant que d'auoir esté gueres auancee, & Vladislaus y accourut soudain, qui se saisit de luy, & l'emmena prisonnier à Cracouie, où bien tost apres il fut relasché aux prieres & requestes de ses freres, qui se constituerēt pleges pour luy, lesquels n'estās pas fort soigneusement gardez, trouuerēt moyē d'euauder depuis. Et tout incontināt appelerēt les Marquis Ieā & Voldeemar, qui entrerent avec leur armée en Pomeranie & y prirent plusieurs places & forteresses. Puis s'en allerent deuant Dantzik, où les habitans qui estoient desia la plus grand part Allemans, ne feirent difficulté de leur ouvrir les portes. Mais quant au Chasteau le iuge Bogussa y tint bon avec les Gentilshommes de Pomeranie qui n'auoyent point voulu participer à la rebellion de Pierre. Et pource qu'il craignoit d'estre reduict à la necessité de quelque long siege sans estre secouru, & pourtant contrainct de se rendre, il le leur laissa en garde: Et avec un autre Gentilhom-

me appelé Nemira, s'é alla deuers Vvladislaus lequel il trouua à Sédimirie, & luy fit là entendre l'estat des affaires de Pomeranie, & le dâger où estoit la forteresse de Dârzik, si elle n'estoit prôptement secourue, ce que le Roy luy promit de faire. Mais Bogussa craignant que cela n'allast en l'ogueur, luy proposa le secours des Cheualiers de Prusse, que Vvladislaus ne trouua point mauuais. Et luy fait donner sur le châp vne depeche au grand Maistre, avec laquelle Bogussa estant arriué deuers luy, & fait les promesses, dôt il auoit charge, conuindrent ensemble, Que les Cheualiers garderoyēt la moitié du chasteau à leurs despens, par l'espace d'vn an entier. Et que de là en auant tous les fraiz qu'ils y feroient, Vvladislaus seroit tenu de les rembourser, & ne seroyent tenus d'en partir qu'ils n'eussent esté entieremēt payez & satisfaits. Souz ces conditions ils s'en allerēt enfermer, & portèrent quant & eux grande quantité de viures & munitions. Puis ayant party leur quartier avec les Pomeraniens, cōmencerent à faire la guerre tout d'vne autre façon. Car ils ne se cōtentoient pas de deffendre la place qu'ils ne fortissent à toutes heures sur les ennemis, de façon qu'ils les contraignent de se retirer dans la ville. Et finalement de leuer du tout le siege pource que l'hyuer approchoit apres y auoir laissé vne garnison. Au moyen de quoy la place n'auoit plus de besoin des Cheualiers. Mais pource qu'ils se sentoient plus forts que les Pomeraniens, cōmencerent lors à les brauer, & se porter insolēment enuers eux. Puis à se faire les maistres tout ouuertemēt. Et la dessus mirēt en prison les principaux avec Bogussa, qui

ne trouua meilleur moyen sinon de leur quicter du tout le chasteau, à telle condition qu'ils le rendroyēt au Roy toutes fois & quâtes qu'il en seroyēt requis, en leur payant ce qui leur seroit deu. Ce que luy ayāt esté rapporté à Cracouie où il estoit, cōmença lors à se repentir d'auoir appelé les Cheualiers à son ayde. Car il se voyoit (cōme l'on dict) auoir dōné au Loup les brebis en garde, & qu'il ne s'estoit pas demeslé d'vne guerre, mais l'auoit redoublée. Et pour vn ennemi, en auoit acquis deux. Toutesfois il esperoit q'son autorité les pourroit amener à quelque raisonnable parti. A ceste cause il prit iour avec le grand Maistre Henry, de s'entrouoir au bourg de Cracouie en la cōtree de Cujauie, où se trouuerēt aussi les principaux de leur conseil. Et là Vvladislaus par vn lōg discours cōmença à se plaindre du tort qu'on luy faisoit de luy retenir ainsi ceste place. A quoy les autres firent respōce, qu'ils estoyēt prests de la rēdre en les payāt. Ce que le Roy trouua raisonnable, & luy demanda à quelle somme cela se mōtoit. Alors le Grād. maistre ne pouuāt plus dissimuler ce qu'il auoit sur le cœur, demāda cent mille marcs de gros Bohemiens, forte mōnoye, qui passent de quart ceux de Poloigne, qui arriuent à enuirō six vingts cinq mille escus de Frâce. Vvladislaus alleguoit cela n'estre aucunemēt raisonnable, & qu'il s'en vouloit rapporter au iugemēt de gens de bien, tels qu'ō voudroit eslire. Eux insistoyēt au cōtraire que si estoit, & qu'ils vouloyēt auoir nōmément ce qu'ils auoyēt demādé. Ceste somme à la verité estoit trop grāde, & mesme que les bleds estoient lors à vil prix Parquoy sans faire autre chose q'de s'aigrir d'auārage les vns cōtre les autres se departirēt.

Les Cheualiers auoyent desia conçu en leur entendement toute la Pomeranie. Parquoy l'an 1310. ils enuoyerent faire vne grande leuee en Allemagne, & entrerent en alliance avec les Marquis de Brandebourg. Qu'ils retiendroyent ce que ces dernieres guerres ils auoyent pris sur les Polaqués, mais aussi qu'ils leur lairoyent les fortresses de Derfaue & Suece, situees sur la riuere de Vistule. Et de vray il est bien aisé d'estre liberal des biens d'autruy. Cela fait ils amenerent leur armee deuant la ville de Dantzik, ayant espié qu'elle fust remplie d'une infinie multitude de peuple qui y estoit venue de plusieurs endroits es foires qui s'y tenoyent lors. Neantmoins ils se defendoyent brauement, & n'en eussent pas eu si tost la raison, si ce n'eust esté que les Allemans qui estoient dedans, leur ouurirent de nuict l'une des portes. Et par ce moyen y entrerent, faisans vne cruelle boucherie de tout ce qu'ils y trouuerent, tellement qu'on a opinion que iamais ne fut plus respandu de sang Polonois, à la prise d'une seule place. Ayans pris Dantzik en telle sorte, ils eurent aussi Derfaue par trahison. Mais ils demorerent plus longuement deuant le chastean de Suece, qui leur fut à la fin rendu par composition. D'autre costé en ceste mesme annee la grande Poloigne vint à l'obeissance de Vvladislaus, qui en chassa les garnisons des Silesiens par le moyen de Dobrogost Samotulien fils de Thomislas Palatin de Posnanie, qui y fit vn fort grand deuoir. Et eut aussi vn fils de sa femme Heduigis.

Le grand Maistre voyant qu'il n'y auoit ordre de impetrer de luy à tiltre la seigneurie de Pomeranie,
afin

afin de donner quelque couleur & pretexte à son v-surpatiō, l'acheta des Marquis de Brandebourg Iean & Voldemar son oncle & tuteur, (combien que par leur trāfaction ils s'en fussent departis, & n'y eussent plus que veoir). Et ce pour la somme de dix mille escus. Ce que depuis il trouua moyé de faire ratifier par l'Empereur Henry, pour luy & ses successeurs Grands maistres à l'aduenir. Puis tout incontinant apres se ietta non pas plus iustemēt ny avec meilleure cause, sur le pays de Liuonie, où il prit la ville de Righe, & tout le territoire d'alentour qu'il osta à l'Euesque. Sur quoy fut meu procez en cour de Rome, qui dura plus de quatrevingts ans. Mais finablement Boniface 9. l'accorda aux Cheualiers, moyennant la somme de quinze mille ducats qui luy en dōnerent.

Enuiron ce temps, les Templiers (qui estoit aussi vn fort riche & puissant ordre), furent nō seulement supprimez, mais exterminiez par toute la Chrestienté. Ainsi que si le Pape qui estoit lors au concile de Vienne, eust donné vn signe general de ceste execution. Car ils estoient si meschans & vicieux, & avec ce, auoyent de si estranges & sinistres opinions de la foy, que cela ne pouuoit plus estre tolleré.

Or Vvladislaus ne se peut véger pour ce coup des outrages & iniures de ceux de Prusse, ny recouurer les choses qui luy auoyent ostées, ayant esté empesché de ce faire par quelques troubles & seditions domestiques: Et mesmes de la rebellion de Cracouie, qui s'estoit soubseuee cōtre luy à l'instigatiō de l'Aduocat Albert, leq̄l auoit esté auteur de faire appeler Albert duc d'Opolie, & la luy mettre entre les mains

Toutesfois le chasteau tint bon, parquoy il f'estoit fortifié avec ses gens en la maison dudit Aduocat, ioignant les murailles de la ville, auprès de la porte saint Laurés. Dequoy aduertiy Vvladislaus enuoya soudain quelques vns deuers Boleslaus l'aduertir, qu'il feroit mieux de se retirer de son bon gré, que de venir aux armes: ce qu'il fit, & s'en alla. Les chefz de la sedition le suyurent incontinant apres, & demorerent depuis en Silesie, & Boheme. Parquoy Vvladislaus cōfisque leurs biens, & abolit le reuenu & les droictz de l'estat d'Aduocat qui estoyent fort grāds. Il fit quant & quāt cruellement executer quelques vns des principaux citoyens, aucuns mettre sur la rouë, les autres tirer à quatre cheuaults, & osta à la cité tout le droict qu'elle auoit de creer les Senateurs, & le cōfera au Palatin. Jean Muscata Euesque de Cracouie, fut aussi sospçonné d'auoir esté cōsentāt de ceste rebelliō, à quoy on adiousta tāt plustost foy, pour ce qu'il estoit Silesien. Parquoy le Roy luy osta le territoire de Biece, qui depuis est demeuré aux Roys.

L'an 1315. regna vne si grād famine par toute la Poloigne par quelques annees, que le poure peuple ne sabstenoit pas des plus ordes, falles & infectes imundices: non pas mesmes de la chair humaine. Car Dlugoffus escript, que les peres & meres se ruoyent sur leurs propres enfans, & eux reciproquement sur ceux qui les auoyent engendrez, & portez. La peste puis apres s'en ensuyuit selon la coustume.

Mais apres que tous ces maux furent vn peu apaisez, Vvladislaus depescha deuers le Pape, pour auoir le nom & titre de Roy, estimant que cela auoit

porté malheur à Premissus, de l'auoir pris sans la permission de sa sainteté, puis que les Princes de Poloigne en auoyent esté priuez pour le meurtre de S. Stanislaus. Ceste grace ayant esté ottroyee, les Estatz s'assemblerent à Cracouie, où Vvladislaus fut coroné avec sa femme Heduigis par l'Archeuesque, & les autres prelatz, en la grād Eglise, selon les cerimonies & solennitez accoustumees, l'an 1320. Et ont depuis ce temps là esté transportez de Gnesne à Cracouie, le droict de coronner les Roys, avec les marques & enseignes seruās à cela, à cause de la grādeur & beauté de la Ville, & des commoditez qui y sont. Incontinant apres le Roy maria sa fille à Charles Roy de Hongrie, desia veuf pour la seconde fois, laquelle il luy enuoya à Bude, en fort sumptueux equipage, richement accompagnee.

De ce temps les Lithuaniens qui estoyent continuellement dans la Poloigne à la destruire & gaster, pillerent la ville de Pulrusco, appartenant à l'Euesque de Plocense, & bien 130. gros villages au pays de Masouie, lesquelz ils bruslerēt. Ce n'estoit pas chose fort aisee de deffaire ces gens là. Car hors de leur pays ils ne venoyent iamais au cōbat si leur estoit possible, mais apres auoir fait leur main s'enfuoyent incontināt, & dedans iceluy ils se retiroyent es profondes forestz & lieux marescageux & inaccessibles, à cause des grosses riuieres nō gayables qu'ils laissoyēt toujours audeuant pour se couvrir. De façon que si estoit question de leur faire guerre, il se falloit resoudre de n'auoir pas moins d'affaire à combattre. ces difficultez & empeschemens, que l'ennemi propre

qui estoit au reste fort prompt, rusé & malicieux. Au moyen dequoy Vvladislaus s'aduifa d'essayer vn seul remede q̄ restoit, aſçauoir de les auoir par douceur, & les faire venir à quelque amitié & appointment, s'il y auoit ordre. Ce qui pleut à tout le Senat. A ceste cause il enuoya ses Ambassadeurs deuers Gedemin grand Duc de Lituanie, pour faire alliance avec luy, & demâder sa fille en mariage pour Casimir son fils. Et pource qu'il sçauoit biē qu'il n'estoit pas des plus aisez & pecunieux, ils eurent charge de ne demander autre chose pour son dor, sinō tous les Polaques quil tenoit prisonniers. A quoy Gedemin consentit fort volontiers, & ayant dés l'heure mesmes passé les articles de leurs conuenâces, sans remettre la chose en longueur leur deliura la mariee. Laquelle estant suy- uie d'vne infinie multitude de poures captifs, de toutes sortes d'aage, de sexe, & de cōdition arriua à Cra- couie, où elle fut instruiete en la foy par l'Euesque Nauclerus, & puis baptizee, prenant le nom d'Anne. Cela faiet Casimir l'espousa, qui n'auoit encores que seize ans, l'an de Iesuschrist 1325. Au moyen dequoy la Poloigne presque du tout deserte & deshabitee à cause des guerres passees, commença lors vn peu à respirer, & se repeupler de nouveau, ayans esté depar- tis çà & là, ceux qui auoyent esté ramenez pour cul- tuer & labourer les terres.

La paix & alliâce ainsi establie avec les Lithuaniēs, Vvladislaus eut vn peu plus de moyen d'entendre à la guerre de Prusse. Et auant toutes choses alla dōner sur les Masouiens, & ceux de Saxe & de Brâdebourg qui s'estoyēt liguez avec les autres. Et pour ceste fois

se contenta de piller la Masouie, où il mit tout à feu & à sang. Mais l'annee ensuyuante il fit vn voyage tout expres en la marche de Brâdebourg, accōpagné d'vn grand nombre de Russiens & Lithuaniens. Tel- lement qu'il passa iusqu'à Francfort sur Odre, & em- mena vn grand nombre de prisonniers, & d'autre bu- tin. En quoy les Barbares se porterēt fort cruellemēt car ils mettoyent tout à mort, sans espargner per- sonne. On raconte vn acte plein de grād vertu & honne- steté d'vne Religieuse, laquelle ayant esté prise d'vn Lithuanien, ainsi qu'il la vouloit forcer, le requit de ne luy vouloir point faire ceste iniure, & qu'en recō- pense elle luy apprendroit vne recepte qu'il ne pour- roit iamais estre offençé d'aucū ferrement. Et afin dit elle que vous adioustiez foy à mō dire, faites en tout presentement l'esprouue sur moy mesme. Lors apres auoir faiet semblant de se frotter le col de ie ne sçay quelles poudres, luy dit, frappez hardiment, car vous ne me sçauriez plus blesser. Le Barbare curieux d'ap- prendre ce beau secret, meit la main à son Simeterre, & d'vn coup luy aualla facilement la teste de dessus les espauls. Ainsi ceste saincte & vertueuse Dame, par vne mort digne de perpetuelle louāge sauua son hōneur & pudicité, qu'elle offrit en son dernier souf- pir à celuy auquel elle l'auoit voueē.

L'annee ensuyuant les Cheualiers de Prusse avec Vencellaus Duc de Masouie, entrerēt à leur tour dās le pays de Cujauie, où ils prirent le Chasteau de Co- uale & le bruslerent. Parquoy Vvladislaus ne voulāt plus lōguement differer de leur faire la guerre à bon escient mis sus vne grosse & puissante armee, tant de

Polaques que du secours qu'il eut de Charles Roy d'Hôgrie son gēdre, & des Lithuaniens & Russiēs prochains de luy. Et avec toutes ces forces entra dans le pais des ennemis gastant & pillāt la cōtree de Culme d'un bout à autre, iusquā la riuere d'Ossa. Les Prussiēs de leur costé avec ceux de Masouie se ietterent dans Cujauie, où les Polaqes estās accourus en diligence vindrent aux mains avec eux, & les deffirēt. Mais les Masouiens se sauuerēt de bōne heure à la fuite, avec leur duc Venceslaus, & les Cheualiers cōbatans fort vaillāmēt furēt tous taillez en pieces, iusqu'à vn seul sur la place, & le Cōmandeur de Torune quāt & eux.

L'annee ensuyuant Iean Roy de Boheme, appelé à leur secours, s'en vint en Prusse sur le cōmencemēt du Printēps avec vne forte & puissante armee, & prit par composition la forteresse de Dobrin, osta aussi le territoire de Cechocinie à l'Euēsque d'Vladislaus Mathias Golaucenio Toporeen: De la naissance duquel on raconte vne chose merueilleuse, que sa mere accoucha de 12. enfans tout à vne fois, desquels il n'y eut que luy q' eut vie, les autres moururent aussi tost qu'ils furent nez. Delà les Prussiēns & Bohemes estās entrez en Masouie, cōtraindrent le Duc Venceslaus de recognoistre à seigneur souuerain, le Roy Iean, cōme vray & legitime Roy de Poloigne. Et par mesme moyē les cheualiers, afin d'oster tout souspecō qu'il se fussent sans aucū titre ny raison emparez de Pomeranie, luy en firēt foy & hōmage, & il les en inuestit. L'estē ensuyuāt iceux cheualiers ayās appelé vn grād nombre d'Alemās & Bohemes à leur solde, allerent enuahir les cōtrees prochaines de la Poloigne, où ils

pirēt la forteresse de Vissegrade en Cujauie, & celle de Nakle, nō toutesfois sans grād perte de leurs gens, puis la bruslerēt, delà s'en allerēt deuāt le chasteau de Racionzo, appartenāt à l'Euēsque d'Vladislaus, où ils demeurèrent plus lōguement qu'ils ne pensoyēt. Mais à la fin leur ayāt osté le puy q'estoit toute l'eau qu'ils auoyēt, le prirent, & y exerçerent vne merueilleuse cruauté enuers toutes sortes de persōnes. Et là dessus ils eurent nouuelles cōme Vladislaus les venoit trouuer avec vn grād réfort de Hōgres, Austriēs & Lituaniens, parquoy sans s'arrester d'auātage à affaillir d'autres places se retirerent pour deffendre les leurs. Ce qui fut vn moyen au Roy (pource qu'ils ne voulurēt point venir ceste fois à la bataille) de se promener tout à son aise par leur pays, ou son armee feit de grās maux & dōmages, sans pardonner à aucune espece de cruauté, tāt ils estoient animez les vns cōtre les autres. Par ainsi ne restoit pl' aux cheualiers que la Prusse, qui est au delà de la riuere d'Ossa, laquelle desia leur estoit toute paisible. Craignās dōc qu'Vladislaus ne voulust donner iusques là, le Grād maître & quelques vns des principaux Cōmandeurs qui estoient à Gruzanze, le firent recercher de paix & appointment. Mais il y eut seulement trefues pour vn an soubz condition encores qu'ils rendroyent Dobrin, & le territoire d'alentour avec celuy de Bidgostie. Parquoy Vladislaus remmena son armee, mais les Cheualiers s'ennuyèrent bien tost de la paix, & pour bien peu d'occasion recōmancerent la guerre l'annee ensuyuant 1331.

Cependāt Vladislaus sur le commencement de l'Estē tint l'assemblee à Chencin, où du consentemēt

du Senat & des Estats, se voyant desormais pesant & cassé, & ses forces diminuer de iour en iour, à cause du trauail & des fascherics endurees toute sa vie, laif sa le gouuernement de la grād Poloigne à son fils Casimir aagé de 21. an. Et en demeit Vincent Samotulié afin que pour la crainte & respect de ce ieune Prince les Bohemiens & Saxōs fussent plus timides & retenus à rien entreprēdre. Et aussi que s'il luy suruenoit quelque incōuenient en ceste guerre de Prusse, il fut en seurté, & hors de danger. Mais Vincent Palatin de Posnanie, ayāt vn grād despit que son gouuernemēt luy eust esté ainsi arraché des poings à sa grāde hōte & deshōneur, accōpagné de deux tresmauuais & dāgereux conseillers, la colere & souspeçō, se retira secrettement deuers le Grand maistre à Margebourg, ou il luy fit entendre l'occasiō de sa venue, qui estoit pour luy faire quelque bon seruice s'il vouloit. Et là dessus luy mit en teste fort aisement de reprēdre les armes cōtre les Polaqes. De fortune Casimir estoit lors en la ville de Pisdres: Parquoy ils despecherent sur le chāp quelques troupes de gēs les plus dispos pour l'aller surprendre là dedās, & de faiēt à leur arriue assaillirent si viuement la place qu'ils l'emporterēt. Mais l'euenemēt ne respōdit pas à leur esperāce. Car vn peu auparauāt Casimir ayāt eu le vent de leur venue, s'estoit avec quelqs vns de sa maison retiré es forests prochaines. Ce qui fut cause que les Prussiens faschez d'auoir failly à leur entreprise, se vengerent sur les pures habitans, ou ils exercerent toute espece de cruauté, & pillerent le pays d'alentour, deçā & delà la riuere de Vvarthe, dont ils emmenerent vn

vn grād butin. Puis leur estant venu le renfort qu'ils auoyent enuoyé querir en Liuonie, & en la basse Allemagne, se ietterent soudainement dans le pays de Cujauie, par la contree de Lencise, où ils prirent le chasteau d'assault & le bruslerent. De là tournerent vers Calisse où ayans pillé, & saccagé tout le plat pays, ne peurent toutesfois auoir la ville. Mais en furent brauement repulsez avec beaucoup de perte de leurs gens. Y ayans doncques seiourné l'espace de cinq iours passerent plus auant, à Gnesne, Suene, Nakle, Srodde, Pobedisc, Clecco & Costrin, qu'ils pillerent: & bruslerent tous les villages d'alentour, ne sabstenans pas de plonger leurs polluēs & sacrileges mains, iusques au plus profond des Eglises & Monasteres, & des choses y dediees à l'hōneur & seruice de Dieu. Mais ils ne trouuerent pas le corps de saint Adelbert. Car les prebstres l'auoyent fort songneusement destourné. Ayans doncques derechef couru & gasté la contree de Siradie, s'en retournerēt au siege de Calisse, où ils ne feirēt autre effect, sinon de perdre encores quelque nombre de leurs gens. Car ceste place est fortement situee au milieu d'vne plaine, noyee d'eaux, quant on veult, qui y regorgēt, de la riuere de Progne passant là aupres. Vvladislus de son costé s'estoit mis aux champs avec vne grosse troupe: toutefois il ne fesoit arrester de pied ferme nulle part, ne venir à la bataille, tellement qu'apres auoir faiēt infinis discours en son esprit, il ne trouua point d'autre expedient plus propre pour remedier à tous ces maux & ruines, que de rappaiser le Palatin Vincent. Parquoy il luy enuoya souz main, remon-

strer les dommages dont il estoit cause, & qu'il deuroit au moins auoir pitié de son pays desia presque reduit à vne derniere ruine & desolation, que sil se vouloit recognoistre, il luy promettoit pardon de tout le passé, & de le reprendre en grace mieux que iamais. Cela ne luy succeda point mal, car tout incōtinant le Palatin commença à se repentir de ce qu'il auoit faict, & mesmement quant il vint à examiner de pres la honte & infamie perpetuelle qu'il festoit acquise à luy, & toute sa race, d'auoir ainsi abandonné son Prince & son pais. Voulant doncques effacer ceste tasche, & la reparer par quelque nouueau & signalé seruice, sortit vne nuict du camp des ennemis, souz couleur de vouloir aller apprendre quelques nouuelles. Mais il s'en vint trouuer le Roy, auquel il persuada de venir au combat, pource que parmy le grand nombre des ennemis, il y auoit beaucoup de canaille qui ne seruiroit d'autre chose que d'espouuenter & mettre les autres en desordre, & prit quant & quant la charge sur luy de les abuser, & leur iouer d'un tour dont ils ne se douteroyent point: car aussi tost qu'il seroit venu aux mains avec eux, il ne faudroit de les charger par le derriere avec ses gens. Les choses ainsi arrestees s'en retourna en leur camp, & leur fait entendre qu'ils ne deuoient rien craindre, car le Roy & les Polaques tous craintifs & esperdus, auoyent deliberé de rompre leur armee, au moyen dequoy il ne se falloit plus attendre d'auoir la bataille. Cela fut cause qu'ils se meirent au rerour, & assez nonchallammēt & en mauuais ordre. Desia leur arrieregarde estoit arriuee au village de Plouuce où de

Bleré pres Radeouie, ou il y a vne belle cāpaigne plus à propos beaucoup pour les Polaques qui estoient forts en caualerie que pour les Prussiés. Quant (ainsi que le iour ne commençoit qu'à poindre) ceux qui estoient en garde vindrent à descouurer l'armee du Roy qui approchoit, dont soudain ils donnerent l'alarme. Mais on ne les pouuoit bonnement croire, d'autant mesmes que le Palatin asseuroit tousiours auoir bien recogneu toutes choses, iusques à ce que le bruit des armes, & le hannissement des cheuaux fust tout clairement apperceu. Et encores ne pēsoyēt ils pas que les Polaques eussent ceste volôté de venir à vne bataille determinee: Mais seulement les suyure & escarmoucher sur la queuē à leur retraite. Toutefois quant ils les eurent veus venir contre eux en ordonnance rangee, alors ils coururent aux armes de toutes parts en grād desordre & cōfusion, car estans troublez d'une chose si inesperee, n'auoyent ny le temps ny le loysir de faire leur deuoir. Neantmoins ils dresserent leur bataillon le moins mal qu'il leur fut possible, ayant entrelassé vne grand chesne de fer à trauers les courroyes du pan des corselets de ceux qui estoient és premiers rangs, tant au front qu'és costez pour les tenir fermes, & garder que la caualerie des ennemis ne les enfonçast, & meist en desordre. Le Roy de son costé ayāt harengué les siés sur ce qu'ils auoyent à faire, commanda qu'on chargeast, ce que fait auant tous autres l'un des cinq escadrons qui estoient souz sa cornette, d'une fort grande hardiesse & impetuosité. Et tout le reste se mesla incontinant apres, combattans les vns & les autres.

fort courageusement & d'une grande opiniastreté, car personne ne vouloit desmarcher vn seul pas, mais estoient plus ententifs à frapper, qu'à se couvrir & deffendre. Et cependant Vladislaus accouroit par tout pour encourager les siens, & pour veoir de secours & gens frais, où il en estoit besoin, au lieu de ceux qui estoient blesez, morts, où recreus, luy seul ne pouuant estre lassé, quelque grand aage qu'il eust. Et ainsi les choses alloient aucunement en doute & suspens, iusques à ce que le Palatin, suyuant sa promesse vint soudain à grands cris donner sur le derriere des ennemis, qui n'attendoient rien moins que ceste charge, au moyen dequoy ceux qui combattoient és premiers rangs oyans ce bruit, tournerent la teste de ce costé là, s'entre demandans les vns aux autres que ce pouuoit estre, & pourtât combattoyēt plus mollement. Ce qui donna moyen aux Polagues de les presser de plus pres, tant qu'ayant mis à mort la plus grand part des chefs & capitaines, le reste du bataillon vint à s'ouuir & renuerser fort aysément, où il y eut bien plus grand meurtre & execution qu'il n'y auoit eu durant le combat, car ils ne se pouuoyēt sauuer à la fuite, estans pressez & poursuyuis par vne caualerie legere, là où eux & leurs cheuaux estoient pesamment chargez d'armes. Avec ce que de leur naturel ils n'endurent gueres bien le travail, tellemēt qu'on dit qu'il y en demeura vingt mille. Dlugossus parle de quarante, & toutesfois des Polagues n'en y eut que cinq cens, & non plus, ou bien comme les autres veulent, trente seulement, & encores des simples soldats, car de personnes signalees ne s'en perdit

sinon douze. Tant peu cousta ce iour là aux Polagues vne si noble & glorieuse victoire. Tout incōrriant leur camp fut pris & pillé, auquel y auoit infinies richesses, & les morts recherchez pour despoiller les vns & enseuelir les autres. Entre lesquels, ainsi que le Roy alloit & venoit d'un costé & d'autre, il aperceut vn Gentilhomme couché à la renuerse, bleffé en plusieurs endroits, qui avec les mains taschoit à repousser & remettre ces boyaux dās le ventre. Lors se tournant vers ceux qui le suiuyoient, Mon Dieu, dit il, quelle douleur doit endurer ce pauvre homme, voyez le courage qu'il a. A quoy l'autre respondit soudain, que le tourment de celuy estoit encores plus grand, qui en vn mesme village auoit vn mauuais voysin, tel qu'il l'auoit esprouué. Le Roy luy repliqua qu'il ne s'en donnast point de peine, car s'il eschappoit, il le deliureroit biē de ce mal là, & de fait l'ayant fait emporter & guerir, luy donna depuis le village tout entier, & en meit dehors l'autre dont il se plaignoit. Voulut dauantage, que pour memoire du deuoir qu'il auoit fait en ceste iournee, luy & ceux de sa race, qui portent en leurs armoiries trois lances en trauers, eussent de là en auant le nom d'Iliens, c'est à dire, de boyaux ou entrailles, qui estoient au parauant appelez Koslerogy, ou cornes de bouc, & fut cestuy cy vn Florian, surnommé Sary. Quant au Palatin Vincent, en recompence de son seruice, non seulement on luy pardonna le passé, mais fut encores de tous points remis en son honneur. Toutesfois l'annee ensuyuant il fut tué, par quelques

Gentilshommes, qui se voulurent vèger sur luy des pertes qu'ils auoyent receues à son occasion. On essaya puis apres de faire la paix entre Vvladislaus & ceux de Prusse, au dire & arbitrage de Charles Roy de Hongrie, & Iean Roy de Boheme, toutesfois elle ne vint pas à effect, pource qu'ils ne voulurent rēdre la Pomeranie, & ne demeurerēt gueres depuis qu'ils ne vinssent avec vne nouvelle leuee d'Allemands piller vne autre fois le pays de Cujauie, où ils prirent presque toutes les petites villes. Car Albert Coscelesti (c'est vne bien ancienne maison), Palatin de Breste deffendit brauemēt le chasteau de Pacosso. Et ne porta pas peu de dommage & d'ennuy aux ennemis. Le Roy de son costé mena bien tost apres son armee par le pays de Masouie, en la contree de Culme, qu'il pillā du long & du large. Au moyen dequoy les cheualiers vindrent à demander trefues pour vn an, lesquelles ayans esté arrestees il s'en alla en la cōtree de Silesie, pour se venger de ce que l'an precedent ils auoyent pris les armes contre luy. Mais ne se presentant personne pour luy resister & le combattre, prit plus de cinquāte forteresses, lesquelles il brusla toutes. Et assiegea la ville de Costene, enuirōnee de tous costez de marescages & estangs, & pourueue quant & quāt d'vne bonne & forte garnison, parquoy s'asseurans sur l'un & sur l'autre, se mocquoient de son entreprise. Mais Casimir en estant indigné, toute crainte laissée en arriere s'approcha fort hardiment des murailles avec ses troupes, & commença à donner l'assaut, auquel tout le reste de l'armee accourut soudain, & ne se voulurēt retirer qu'ils n'eussent em-

porté le chasteau. Ceux de la ville se rendirent incōtinant apres. Ce fut icy le dernier chef d'œuvre de Vvladislaus, quāt au faict de la guerre, & autres choses aussi. Car estāt de retour à Cracouie il deuint biē tost malade, dōt il mourut le dixiesme iour de Mars 1333. Et fut enterré en la grand eglise, à main gauche de l'autel. On dit que son corps plusieurs iours apres sa mort demeura ce pendant qu'on preparoit les obseques, sans aucune corruption ne mauuaise odeur. Au reste il regna depuis le iour qu'il fut couronné, treize ans entiers, & plus: s'estant tousiours monstré Prince de grande patience & douceur, tres facile & benin à ceux qui l'abordoyent. De petite taille, mais fort adroit à toutes choses, & courageux. De si grande constance & magnanimité, iusques à la fin de ses iours (car il fut assez de fois, & en plusieurs sortes & manieres tenté & essayé de la fortune) qu'on le peut hardimēt mettre en toute comparaison avec les autres plus grands Roys, d'autant plus mesmemēt qu'il trouua le Royaume si desmēbré, & en piteux estat.

CASIMIR SECOND,

surnommé le Grand.

LES obseques de Vvladislaus paracheuees, son fils Casimir fut esleu Roy, à l'instāce de Charles Roy de Hongrie, avec ce que toute la noblesse facilement y inclina. Il n'y eut qu'vne difficulté mise en auant par Heduigis sa mere, qui ne vouloit consentir, que durant sa vie la ieune Royne fust couronnee, mais vaincuē des prieres de son fils

elle fleschit, & se retira en vne religiō de saincte Cle-
re, dont elle prit l'habit. Par ainsi le vingtcinquesme
d'Auril 1334. Casimir avec sa femme furent couron-
nez en la grād eglise de Cracouie, par l'Archeuesque
Janislaus, à grand pompe & cerimonie. Et pource
qu'ils estoient encores fort ieunes tous deux, leur
fut donné pour conseil Jean Milstiuiz, Castellan de
Cracouie, personnage prudent, & de grande autho-
rité, aymant sur tous autres le bien & repos public.
Mais durant toute ceste annee, & l'autre ensuyuant
n'aduint rien de memorable, sinon que le 23. iour
d'Auril, par l'espace de cinq iours continuels, cheut
vne fort grande quantité de neige, laquelle outre l'es-
perāce de tous, rendre les champs beaucoup plus fer-
tiles, & leur feit vn fort grand bien, tout ainsi que si
on les eust fumez. L'annee ensuyuāt, qui fut 1335. sur-
uint vne si grande abondāce de sauterelles, que tout
ainsi que si c'eust esté quelque grosse nuee, empes-
choyent laueur du soleil, & vindrent à tomber en
relle espoisseur qu'elles surmontoient le pasturon
des cheuaux. Parquoy ayant rongé tous les biens, ce
qui estoit sur la terre, admenērent vne cherté pour
quelque temps. Le mois de Nouembre ensuyuant la
paix fut faicte entre Casimir & les cheualiers de Pruf-
se, par le moyen des Roys de Hōgrie, & de Boheme,
qui traitterent cela à Vviffegrade, beaucoup plus au
desauātage de Casimir que des autres, & toutesfois
il la receut fort volontiers, comme celuy qui aymoit
plus le repos que le travail des armes, car les articles
portoyent que les cheualiers, souz le consentement
& permission de Casimir, iouiroient de Pomeranie,

& semblablement du chasteau de Nessouie, sur la ri-
uiere de Vistule, & luy lairroyent Dobrine & Cujau-
ie, sans excepter ce qui de droit appartenoit au Duc
Casimir, fils de Zemouit, luy payeroyēt aussi la som-
me de dix mille florins, pour les dōmages qu'ils luy
auoyent faicts en ses terres, dequoy toutesfois ils ne
feirent rien, car ils ne rendirent ne Cujauie, ne Do-
brine. Ce qu'ayant esté remonstré à l'assemblee cela
fut trouué de tous fort indigne & desraisonnable, q̄
ayans eu les conditions de la paix si auantageuses, ils
voulussent neantmoins entreprendre quelque cho-
se encores par dessus. Au moyen dequoy le conseil
arresta qu'il valloit mieux venir à vne guerre iuste &
raisonnable, que de tenir vne paix si inique & igno-
minieuse: toutesfois qu'ils ne commenceroient pas,
mais si les autres les venoyent assaillir, ils se met-
troient en deuoir de se deffendre. Et cependāt qu'on
enuoyroit vers le Pape, qui estoit lors Benoist dou-
ziesme, pour se plaindre de leurs torts & iniures, car
ils estoient à cause de leur ordre souz son obeysfance.
Et eut ceste charge Jean Grot, Slupecien, Euesque de
Cracouie, lequel par son industrie & diligence, feit
tāt que le Preuost Galard, & Pierre Geruais, Chanoi-
ne d'Anicie, furent deputez commissaires pour aller
en Poloigne & en Prusse, faire restituer au Roy Cu-
jauie & Dobrine, avec dix mille florins, en quoy les
Cheualiers furent cōdamnez entiers luy. Mais pour
tousiours eschapper, & trouuer quelque couleur &
pretexte à leurs chiquaneries, mesmemēt de ce qu'ils
n'obeyffoyent ny à la saincteté ny à ses commissaires

trouuerent moyen enuers l'Empereur Louys, qu'il enuoya, faire tresexpres deffences soubz de grandes peines au Grād maistre Theodoric d'Altemburg, & à tout l'ordre, de se garder bien de faire rien des terres qui estoient en dispute, sans son consentement, quelque chose qui leur en eust esté ordonnee d'ailleurs. Mais les deputez du Pape, apres auoir par quelque temps demeuré à Varsouye, & ouy leurs friuoles excuses, subterfuges, & remises. Finablement l'an 1339. adiugerent à Casimir & aux Polaques les seigneuries de Pomeranie, Cujauie, Dobrine, Culme & Michalouie, & condamnerent quant & quant les Cheualiers en neuf vingts quatorze mille cinq cens escus, pour les despens dommages & intereits. Et à reparer aussi à leurs propres frais, les Eglises & Monasteres qui és guerres precedentes auoyent esté ruinees en Poloigne. A quoy n'ayans point obey, fut procedé contre eux par censures & excommunimens.

Casimir, combien qu'il fust encores au meilleur de son aage, se voyant n'auoir aucuns enfans, sinon vne seule fille, assembla les estats à Cracouie, au mois de May 1339. pour designer vn successeur au Royaume, où luy mesme moyenna l'election de son neveu Loys, fils de Charles Roy de Hôgrie, mary de sa seur, lequel de ce pas il alla trouuer à Vvissgrade, où l'ancienne alliance & confederation de ces deux peuples fut entre eux renouuelee.

L'annee suyuante, pource qu'en la basse Ruffie, meridionale à la Poloigne, les hoirs massés du Roy Da-

uid estoient faillis & esteints, Casimir embrassant ceste occasion à propos, pour recouurer ce que la negligéce de ses predecesseurs auoit laissé perdre, amassa en toute diligence ses forces, & entra à l'impourueu dās le pays, ou de plaine arriuee il assiegea la ville de Leopoli, capitale du Royaume, laquelle en peu de iours luy fut réduë, ensemble les deux citadelles, celle d'enhaut, & l'autre qui est en bas, ou il trouua grande quantité d'or & d'argent, & force precieux meubles, qui de l'ogee main y auoyent esté amassez. Et entre autres choses deux grands croix toutes d'or enrichies de pierreries, en l'une desquelles estoit enchassée vne piece de la vraye croix, qui est encores pour le iourd'huy en l'Eglise Cathedralle de Cracouie. Quelque temps apres il y retourna avec de plus grands forces, & bien aysement recouura tout le reste, à sçauoir, Primiſlie, Sanoque, Halicie, Trebouulle, Lubassouie, & autres forteresses, iusques à Camenetz. Cela faict, apres auoir assemblé les estats des Ruffiens, il comit dessus eux des Palatins, Castellans, Gouverneurs, Iuges, & autres Magistrats, pour les regir & gouverner, selon les vs & coustumes des Polaques, reduisant par ce moyē le pays en forme de province à luy subiette. A son retour sa femme estāt decedee il espousa en secondes nopces Heduigis, fille du Landgraue de Hesse, mais pource qu'elle estoit vn peu layde, il s'en faschea bien tost, & l'enuoya en la forteresse de Zarnoue, pour plus librement pouoir iouyr de ses plaisirs, à quoy de son naturel il estoit assez enclin & adonné. Ce qui fut cause que plus

liberalement il cōsentit à tout ce que les Cheualiers de Prusse voulurēt de luy, car par lettres patētes seel-
lees de son seau, & des principales citez de son royau-
me, il leur delaiſſa pour tousiours, ſans que luy ny les
ſiens y peussent plus rien pretēdre, ne quereller à l'ad-
uenir, Pomeranie, Culme, & Michalouie. Ce que
toutesfois les Euesques ne voulurēt iamais cōsentir
ny passer. Cecy aduint l'an 1343. Et en ce meſme tēps
vne grand multitude de Tartares entra dans la Ruf-
ſie & Poloigne, au deuant deſquels Caſimir mena
tout incontinant ſon armee, & ne voulant rien ha-
zarder contre de ſi grandes forces, ſe contenta de ſe
parquer en Sendomirie, ſur le bord de la Viſtule,
tout vis à vis d'eux, au moyen dequoy ils ſ'eſcarmou-
choyent ſouuent à coups de fleſches & de traict, tel-
lement qu'Albert, Palatin de Sendomirie, y fut tué:
mais les Tartares voyans qu'ils ne pouoyent paſſer
l'eau, quelque effort qu'ils y feiſſent, ſ'en retourne-
rent par la cōtree de Lubline, ſaccageans & bruſlans
tout ce qui ſe rencontra en leur chemin.

L'an puis apres, qui fut 1345. Jean Roy de Boheme
entra à main armee dans la Poloigne, combien qu'il
fuſt deſia fort vieil, caſſé & rompu des trauaux de la
guerre, & qu'il euſt perdu vn œil, & vint courageuſe-
ment iuſques à la veuë de Cracouie, dont il auoit tāt
deſiré de toucher les murailles auant que mourir,
mais il n'y feit pas long ſeiour, car il fut fort honteu-
ſement repouſſé, & mis en fuite avec grand perte de
ſes gens. Il mourut peu de temps apres, eſtant venu
au ſecours du Roy Philippes de Valloys, ſon allié,

contre les Anglois, où les noſtres n'ayās pas du bon,
il ſe feit porter au milieu de la bataille, & là fut tué.
Mais ce fut apres auoir faiēt eſlire Empereur, ſon ſils
Charles, Marquis de Morauie, au lieu de Louys de
Bauieres quatrieſme de ce nom.

En ce tēps furent faiēts à la Diette de Viſlicie, cer-
tains ſtatuts & ordonnances, pour reprimer la trop
grāde authorité & licence des Palatins, & autres iu-
ges, leſquels faiſoyent des cauſes & procez pendans
par deuant eux du tout à leur appetit, & fantaſie, &
appelloyent cela iuger ſelon l'equité, & en leur con-
ſcience. On leur retrācha tel pouuoir à la verité bien
dangereux, & dont on peut trop aiſément abuſer, &
leur fut ordonné de ſe contenir & reſtreindre au de-
dās des bornes & termes expres du droit & des loix
du pays, ſans leur eſtre loyſible de ſ'en deſtourner en
aucune ſorte. Il aduint auſſi lors vn cas eſtrange, de
ie ne ſcay quels malheureux, qui deſroberēt en l'Egli-
ſe de Touſſaincts à Cracouie, le reliquaire où eſtoit
la ſaincte Hoſtie, penſans qu'il fuſt d'or, mais ayans
trouué depuis que ce n'eſtoit que cuiure doré, la ier-
terent par deſpit dans vn marais, non gueres loing
de la ville, où iour & nuict eſtoyent veuës force pe-
tites flammes partans du lieu, & eſtincellantes con-
tinuellement tout à l'entour d'iceluy. Ce qu'eſtant
venu à la cognoiſſance de l'Eueſque, ſans routeſ-
fois en ſçauoir encores la cauſe, apres auoir indiēt à
tout le Clergé vn ieufne de trois iours, ſy trans-
porterent, en vne fort deuote & ſolennelle proces-
ſion. Et là miraculeuſement ayant retrouué ſain

& entier, le tressainct & sacré corps de nostre Seigneur, le reporterent au lieu d'où il auoit esté enléué. En memoire & souuenance dequoy l'an d'apres Casimir edifia sur ce marais vne fort belle Eglise, qui fut accompagnée d'une ville à l'entour, appelee de son nom Casimirie, où il edifia encores depuis vne autre Eglise & Monastere d'Augustins. Et l'an 1347. Iean Groth, Euesque de Cracouie, deceda, qui fut en son temps homme de si grád cœur, qu'il osa bien de son autorité faire deffence à Casimir (ainsi que l'escriit Dlugossus) de ne passer point outre à l'edification de la ville de Socoluie, pource que Scarbimirie, qui est là tout aupres, & appartient au Preuost du lieu, fust par ce moyen demeuree deserte & inhabitee. Environ deux ans apres (qui fut l'an 1349, il passa derechef en Russie, où d'un grand heur en moins de trois mois il meit souz son obeyssance les places de Luschy, Vladimirie, Breste, & Chelme, avec les provinces de Volinie, Brest, & Belisto, & ayant par tout laissé garnisons de Polaques, & decerné pour son successeur Loys, Roy de Hongrie, s'il venoit à deceder sans hoirs masles, se remeit aux delices & voluptez, deuenue vn peu plus insolent, pour la gloire & grandeur des choses par luy faictes, dont il estimoit s'estre acquis plus de liberté. Et de faict entretenoit tout ouuertemét, & sans se cacher, certaines damoisselles ses favorites, à Opocin & Cressouie, dequoy luy ayans esté faictes quelques remonstrances, par l'Euesque de Cracouie, Bozenta, & autres gens de bien. Tant s'en faut qu'il prist cela en bõne part, qu'il

feit ietter dans la riuere vn d'entr'eux, qui luy en auoit parauenture parlé vn peu plus librement qu'il ne deuoit. Ce qu'on estime auoir esté cause de la peste, qui bien tost apres suruint, & par deux ans entiers affligea estrangement tout le Royaume, à l'exemple de celle qu'anciennement Dieu enuoya sur le peuple d'Israel, pour la punition du forfait commis par Dauid enuers le pauvre Vrie. Les Lithuaniens aussi feirent beaucoup de dommages en toute la contree de Sendomirie, fauorisez en cela de quelques vns d'entre les Polaques mesmes qui les accõpagnoyent & leur monstroyent le chemin. Mais il aduint lors, qu'un nommé Pierre, qu'ils auoyent enuoyé sonder les guez & passages de la riuere de Vistule. (Car ils vouloyent entrer plus auant en pays) ayant trouué vn endroit où l'eau n'estoit gueres haute, y plâta des paux pour le remarquer, puis les alla querir, & ce pendant quelques pescheurs y arriuerent, lesquels se doutans bien à quel effect ces perches auoyent là esté mises, les arracherent, & les allerent ficher autre part au lieu le plus profond & d'agereux. Au moyen dequoy quant les Lithuaniens, qui auoyent choyfi vne nuit noire & obscure, pour passer plus à leur aise, & surprendre le peuple, y furent venus, il s'ennyoya de plaine arriuee vn bon nombre. Ce que leurs chefs ayans apperceu, penserent soudain que celuy là les eust trahys. Et pourtant le meirent à mort sur l'heure, puis de paour qu'il n'y eust encores quelque embusche plus chatouilleuse, s'en retournerent en leur pays, cheminans la nuit seulement, & le iour.

ils se tenoyent cachez, afin de n'estre descouverts & apperceus. On dit que Iaghellon, quelque temps apres estant paruenue au Royaume de Poloigne, confisqua les biens de ce Pierre, pour raison de ce qu'il auoit voulu trahir son propre pays. Les Tartares aussi en ce mesme temps pillerent la basse Ruffie, qu'on appelle Podolie, qui estoit deslors souz l'obeyssance de Casimir. Lequel se voyant tant de defastres les vns sur les autres, commença à se remettre deuant les yeux, le meffaiçt qu'il auoit commis enuers ce pauvre prestre, dont il feit de grandes penitences, par ieufnes & autres afflictions de son corps, & enuoya Albert, Chancelier de Dobrine, deuers le Pape Clement sixiesme, pour auoir son absolution, & estre receu à la communion de l'Eglise, ce qui luy fut octroyé. Il fonda depuis plusieurs Eglises en Sendomirie, Villicie, Sidlouie, Stobnice, Sagosce, & Gargouie, & feit tout plein d'autres bonnes œuures pour appaiser l'ire de Dieu, qu'il sçauoit auoir assez iustement irritée.

L'an mille trois cens cinquante trois, la saison festant aduācée, de sorte que durant les mois de Mars, Aupil, & May, il y eut de tresgrandes chaleurs, tant que les bleds auoyent desia acheué de former leurs espis, tout soudain suruint là dessus vne gelee, accompagnée de neige, bien trois pieds de haut, laquelle dura par six iours. Puis s'estant fonduë, & qu'on pensoit que les bleds deussēt auoir esté là deslous pourris & gastez, il s'en trouua neantmoins beaucoup meilleure annee, que de long temps n'auoit esté.

Au

Au mesme temps la Duché de Masouie fut vnue, & incorporee au reste de la Poloigne. Car le Duc Zemoit en vint faire les foy & hommage au Roy à Calisse, pour la tenir de là en auant, nō pas par droit hereditaire, mais en fief, & par forme de bienfaict, prestant le serment d'obeissance & fidelité, enuers tous & cōtre tous, sans nuls excepter. Et pource que à cause des guerres passees, & des courses & entrees des Barbares, & semblablemēt de la peste qui auoit regné, le Royaume se trouuoit fort despeulé: Casimir feit venir vn grād nombre de Theutōs des marches de la Prusse, ausquelz il departit les terres qui estoient demeurees vaques & en frische, dont la race en est demeuree iusques à auourd'huy, éscōtrees voyfines des montagnes de la Hōgrie, & en Ruffie. Car ces gens là estoient beaucoup plus diligens & soigneux au labour, & avec ce plus propres en leurs maisons & demeures, & de plus grande espargne, que les Polagues qui ne sçauoyent gueres d'autre mestier que celuy de la guerre, & puis faire bōne chere. Le Roy se monstra si fauorable enuers ces estrangers, que communement on l'appeloit le Roy des Paysans ou laboureurs. Car non seulement il leur ottroya d'vser du droit de Magdebourg, mais permit encores que les Polagues mesme s'en aydassent. Et pour autant que les appellations qui ressortifoyent à Magdebourg venoyent à amoindrir l'authorité & reputation des vns, & quant & quant estoit cause de beaucoup de fraiz & despence inutile à tous les deux peuples, il institua dans le chasteau

G

de Cracouie vn siege fouuerain, & en dernier ressort selon le droict d'iceux Theutons, pour vuyder les appellations de tous les endroictz du Royaume. Auquel siege presidoit vn Aduocat de ce droict avec sept Scabins ou Conseillers, que le grand procureur du chasteau esliuoit. Hedwigis fille du Landgraue, seconde femme de Casimir, apres auoir esté par l'espace de quinze ans detenue au chasteau de Zarnou, combien que rien ne luy manquaist de ce qui estoit necessaire pour son viure & entretenement selon son estat, à la fin en fust retiree par son pere, personne ny mettant empeschement, mais peu apres elle deceda. Parquoy Casimir se remaria pour la troisieme foys avec vne autre Hedwigis fille de Henry duc des Glogotiens, & là dessus feit l'entreprise de Vvalachie, qui ne luy fut gueres honorable ny heureuse. L'occasion toutesfois de ce voyage fut telle. Estienne Vayuode de Vvalachie, estat decedé, ses deux enfans Estienne & Pierre entrerent incontinant en debat & contention pour la Seigneurie, & combien que Pierre fust puisné, neantmoins pour estre de meurs & façons de faire plus douces & faciles que son frere, il fut aussi plus agreable au peuple. Et eut la voix & faueur de son costé, dont avec quelques secours qu'il eut des Hongres, aisement & sans beaucoup de peine il s'empara de l'estat. Parquoy son frere se retira deuers Casimir luy promettant de demeurer à l'aduenir souz son autorité, & protection. Ainsi ayant en diligence fait assembler les forces de la petite Poloi-

gne & de Ruffie, les enuoya en Vvalachie. Mais festans les Vvalaques reconciliez ensemble, vindrent s'embuscher secrettement dans vne grande forest par où les autres auoyent à passer, où ayant couppe à demy, force gros arbres, tellement qu'ils demouroyent encores tout debout sur leur tronc, attendirent que les Polaques fussent entrez bien auant dans le boys, & iusques à l'endroict où ils leur auoyent dressé ce stratageme: Puis tout soudain venans à poulsier impetueusement ces arbres à bas ainsi agencez en accablerent la plus grand part. Le reste ils mirent en route & desordre, & prirent encores forces prisonniers, lesquels Casimir rachetta aussi tost. Ainsi passa ceste entreprise, avec perte & honte pour luy sans auoir rien exploicté. Peu de temps apres, asçauoir l'an 1360. suruint vne autre pestilence, laquelle outre tout l'ordre & cours accoustumé de ceste maladie & contagion, s'attachoit aux riches & aisez, plustost beaucoup qu'aux pauures, & menu populaire. Elle dura par tout l'espace de six mois, si cruellement, que dans la seule ville de Cracouie plus de vingt mille personnes en moururent. L'annee suyuante Casimir enuoya deuers le Pape Urbain cinquiesme, pour obtenir l'institution du siege Metropolitain de la Ruffie, en la ville de Leopoli, ou Cristianus fut sacré par l'Euesque de Gnesne, le Roy present.

L'annee d'apres, tout le pays fut persecuté d'une grand famine, où la liberalité du Roy feit beaucoup de bien & de secours: car ayât esté reseruee par tou-

tes les terres & possessions de son domaine, vne grãde quantité de bledz des annees passees, il ouurit liberalement ses greniers aux riches & aisez, à certain prix fort raisonnable: & aux pauvres & indigens partie en change d'autres denrees qui ne leur estoÿt pas si necessaires, partie pour salaire & payement du labour à quoy on les employoit. Par ce moyen durant ceste necessité & disette, plusieurs villes, chasteaux, places, & forteresses furent mieux remparees qu'elles n'estoyent, & beaucoup d'autres ourages faiçts pour l'vsage & commodité publique. Outre ce que le Roy racueillit vne grand somme de deniers de la vente de ses bledz, qui luy vint fort à propos pour les magnificences qu'il fut contraint faire l'annee suyuate, que l'Empereur Charles quatriesme espousa sa niepce Elizabeth. Et fut traité ce mariage par vn certain Cordelier, hõme de grand menee & entendement, que le Pape auoit enuoyé pour pacifier l'Empereur & le Roy de Hongrie, qui se preparoyent à vne tresforte & dangereuse guerre, d'autant que le Roy de Hongrie auoit attiré Casimir à son party, avec le Roy de Dannemarch, & vn bon nombre de Tartares & Russiens: Et l'Empereur d'autre costé mettoit en armes toute la Germanie, la Boheme & Moraue, mais ce mariage diuertit & empescha tous les maux qu'on attendoit de ce discord. Et pourtant fut celebré à grande pompe & magnificence en la ville de Cracouie, & par consequent, à fraiz & despences inestimables pour Casimir, pource que luy seul porta tout le faix.

S'y estans trouuez Loys Roy de Hõgrie, Sigismund Roy de Dannemarch, & Pierre Roy de Chipre, qui prit son chemin par la mer, iusques à l'emboucheure du Danube, & delà contremont l'eau iusques en Vvalachie: puis par terre à trauers la Ruffie en Poloigne. Des autres Princes y vindrèt Otho Duc de Bauieres, Zemouit Duc de Masouie, Boleslaus Duc des Sindniciens, Vvladisslaus Duc des Opoliens, & Boguslaus pere de la mariee Duc des Scecinensiens. Finalement arriua l'Empereur grandemēt accompagné, audeuant duquel allerent pour le receuoir tous les Princes, avec Casimir vne bonne lieuë hors de la ville. Puis l'amenerent loger au Chasteau, où les nopces furent faiçtes, avec toutes les pompes & magnificences dont on se peut aduifer, lesquelles durerent l'espace de trois sepmaines, y tenant Cour ouuerte, & faisant les despës à toute l'assemblee. Où vn Alleman appellé Verincus, Cõsul de Cracouie, riche & opulent feit vn rrefexquis & sumptueux banquet: Et donna de riches presens à tous les Princes & Seigneurs, ce qu'on estime que celuy là seulement qu'il feit à Casimir valloit plus de cent mil florins. Et d'autant que de sa derniere femme il auoit eu desia deux filles, & n'estoit pas hors d'esperance d'auoir encores d'autres enfans, Loys Roy de Hongrie volontairement luy remit son election, si toutesfois il venoit à auoir quelque hoir masse.

Mais l'an mil trois cens septante, estant Casimir le iour de la nostre Dame de Septembre, allé courir le Cerf, contre l'opinion de tous, qui taschoyent de

l'en destourner, pour l'honneur & reuerence du iour, son cheual tumba sur luy, & le desbrisa entieremēt. De sorte que luy qui estoit fort gras & empesché de sa personne, (& desia vieil) fut si mal mené de ceste cheute, que peu de iours apres il en mourut à Cra-couie, où il l'estoit fait porter. Et fut enterré fort ho-norablement à main droiēte du grand autel, où on voit encores pour le iourd'huy sa sepulture, avec son effigie taillee en marbre. Il vescu soixāte ans, & en regna trente sept, plus propre aux choses de la paix, que de la guerre. Aussi le surnom de Grand, lequel seul il a obtenu entre les Polaques, ne luy a pas tant esté acquis par ses victoires & cōquestes, comme pour ses magnifiques bastimens, & edifices de plusieurs villes, chasteaux, & forteresses. Mais sur tout ce titre si honorable luy est venu de la biē veillance qu'il s'acquit & conserua tousiours des grāds & des petits, depuis le commencement iusques à la fin, par sa iustice, douceur, humanité, gracieuseté, clemence, & autres belles vertus à luy propres & fam-
milières.

A la verité les armes sont bien l'adresse la plus courte pour paruenir à gloire & renommee, mais ces autres vertus douces & gracieuses, sont plus à propos pour attirer la grace & bien veillāce du peuple, qui n'est pas des moindres parties, à quoy vn bō Prince doit aspirer. Et combien que l'autre soit en apparence vn moyen plus plausible, neātmoins cestuy cy le plus souuent est de plus de duree. Ce discours ne doit pourtant empescher la memoire &

souuenance de tant de beaux & glorieux faitts d'armes heureusement menez à fin par ce grand Roy: Quant ce ne seroit que la cōqueste de la Ruffie, que ses predecesseurs auoyent perdue, & les reparations & fortifications quasi de toutes les places de la Polaigne, avec les Eglises basties de brique, & grand partie des Monasteres & Conuents. Outre que les munitions de guerre, & les magazins remplis d'armes furent tous de luy seul. Que si au demourant il fut vn peu libre à prendre son plaisir, cela doit estre compensé, voire enseuely & esteinct parmy tant d'autres bonnes parties qui de beaucoup assez surpasserent les viciue-
ses & mau-
uaises.

Jusques à ce Prince icy par l'espace de neuf cens ans
& plus, la Pologne n'auoit eu autres Roys &
Gouuerneurs que des siens propres, vn seul Ven-
ceslaus Bohemien excepté. Mais de là en auant les estran-
gers y furent appelez, la posterité desquels a tres-
heureusement regné iusques à Sigismund
Auguste nagueres
decedé.

LOYS

LOYS Roy de Hongrie, & de
Pologne.

A Pres que la mort de Casimir eut esté diuul-
guee par tout, les Lithuaniens ne tarderēt
gueres d'entrer dans le pays de Lubline &
& de Sendomirie, où ils pillerent le Mo-
nastere de la montagne Chauue. Et entre autres cho-
ses prirent la piece de la vraye Croix qui estoit en-
chassée en or. Mais tout incontinent qu'ils furent de
retour sur la frontiere, voicy vne chose fort estrange
& merueilleuse qui aduint. Car le chariot surquoy
estoit chargé ce tressaint & precieux reliquaire, avec
quelques hardes & bagage s'arresta tout court sans
que iamais il fust possible de le pouuoir remuer de
là, quelque renfort d'attelage de beufs, ny cheuaux
qu'on y sceust mettre. Car tout aussi tost que quel-
qu'un en approchoit il tomboit esuanouy à la ren-
uerse: Dequoy les ennemis estans fort esmerueillez,
apres qu'un Ruffien leur en eust dict l'occasion, ils ne
se voulurent point opiniastrer d'auantage: Mais le
renuoyerent sur le champ fort honorablement avec
vn Gentilhomme qu'ils auoyent pris, nommé Cho-
rabala, auquel ils donnerent liberte expressement
pour le conduire & rapporter en son lieu. Mais Loys
Roy de Hongrie, que Casimir dés long temps au-
parauant auoit decerné son successeur au Royaume
combien que tout incontinent il eust esté aduerty
de la mort de son Oncle, ne faisoit neantmoins sem-
blant de riens, attendant ce que les Polagues vou-
droyent dire. Quand les deputez le vindrent trou-

uer à Vviffegrade, aſçauoir Florian Eueſque de Cracouie, & Iean Strelhi Chancelier de Poloigne, le requerant au nom de toute l'afſemblee, de ſe vouloir au pluſtoſt acheminer pour receuoir la corõne. Toutesfois il ſe retint quelque temps ſans leur donner reſolution aucune de ce qu'il en vouloir faire, iuſques à ce que les Ambaſſadeurs par prieres & requettes, & les ſeigneurs de ſon conſeil avec remonſtrances & perſuaſions, le preſſerēt ſi fort, qu'à la fin il leur fit reſponce, que ny les vns n'entendoyent point biē ce qu'ils luy conſeilloyent, ny les autres ce dont ils le requeroient. Car parauenture ce n'eſtoit le proffit de pas vne de toutes les deux parties, non plus qu'un berger ſeul pourroit tout à vn coup gouverner deux troupeaux de beſtes. Neantmoins il ſ'en alla avec eux, & vindrent les Seigneurs du Royaume au deuant de luy, avec bon nombre de nobleſſe, iuſques à Sandecie, où ils le receurent en grand honneur. Et delà le menerent à Cracouie, où il y eut quelque difficulté touchant ſon coronnement. Car l'Archeueſque de Gneſne, & les principaux de la grand Poloigne inſiſtoient, que ſelon l'ancienne couſtume cela euſt à ſe faire à Gneſne. Le Roy au contraire leur alleguoit l'exemple tout recent de ſon ayeul Vvladiflaus, & de ſon oncle Caſimir. Au moyen dequoy il fut ſolennellemēt coronné à Cracouie par Iarõſlaus Archeueſque de Gneſne.

Pour cela toutesfois le regret du feu Roy Caſimir n'eſtoit pas du tout effacé de la memoire & ſouuenance des Polaques, d'autant que non ſeulement ceſtuy-cy ſe mōſtroit du tout d'un autre humeur, mais

avec ce, il n'y auoit moyen de l'accoſter & ſe faire entendre à luy, ſinon par truchemant, & quant & quant il monſtroit de deſdaigner les affaires de Poloigne. Car outre ce qu'il ne tint compte de recouurer ce qui auoit eſté deſmembre & perdu, il fit vn trop eſtrange & deſraifonnable preſent au Palatin de Hongrie Vvladiflaus Duc d'Opolie: auquel il donna pour vne fois tout le pays d'Oſtreſouie, & celui de Velune, avec le territoire d'Oſtin, Crepice, & Bobolice en la iuriſdiction de Cracouie, & celui de Breſnice en Siradie. Et fit encõres là deſſus les obſèques & funerailles de Caſimir ſi magnifiques, & d'une ſi grande deſpence, que pour l'offrande ſeulement, il y eut vne fort groſſe ſomme d'argent employee. Mais la grande multitude de peuple qui ſ'y trouua, teſmoigna aſſez par larmes & ſouſpirs le regret qu'ils auoyent de leur feu Prince, d'autāt plus meſmement qu'ils voioient eſtre finie en luy ceſte ſi longue & ancienne ligne de leurs Roys qui auoit cõtinuē ſans aucune interruptiõ depuis le Piaſte, iuſqu'à la mort de Caſimir: & maintenant l'eſtat eſtre paruenü à vn eſtranger qui ſ'en eſloigneroit tout auſſi toſt. Ce qu'eſtant venu à la cognoiſſance de Loys, de paour que les filles de Caſimir n'appreſtaſſent quelque occaſion de trouble & nouuelleté, il les enuoya en Hongrie, & ſ'achemina tout de ce pas en la grand Poloigne, pour contenter aucunement ceux du pays, qui ſans ceſſe l'en preſſoyent. Mais ayant ſeulement demeuré deux iours à Gneſne, ſ'en partit: ſans ſ'eſtre voulu aſſeoir au ſiege Royal qu'on luy auoit preparé, ſuyuant la couſtume, d'aurant que com-

me il disoit cela ne feroit rien pour luy, & parauenture ne feroit pas à propos pour le peuple, de reuoyer en doute le coronnement qui auoit desia esté fait à Cracouie, où soudain qu'il fut arriué, il remit tout le gouuernement du Royaume és mains de sa mere Elizabeth, & delà s'en retourna en Hongrie.

Ceste femme n'oublia pas d'appeler tout incontinent au conseil & maniement des affaires, tout plein de ieunes euentez, ignorans & indignes, casfer des Magistrats & offices les gens de bien & d'authorité, & mettre en leur lieu quelques mignons & muguets. Parquoy Iarosslaus Archeuesque de Gnesne se demit volontairement de sa dignité, & se retira à Calisse, où il mourut bien tost apres, ayant en son temps grandement augmenté & embelly ce benefice. Car il edifia les Chasteaux & forteresses de Louice, Opatouicie, Vneouie & Camene, & les palais & maisons Episcopales de Gnesne, Calisse, Curelouie, Opatouicie & Vneouie, avec les Eglises de Gnesne, Calisse, Curelouie, Opatouicie & Vneouie où il fonda vn college & communauté de prestres, & vn couuent de religieux de l'ordre saint Benoist. On dit qu'à l'article de la mort, il ordonna que son corps ne fust point porté dans l'Eglise par les portes ordinaires & accoustumées, mais par quelque trou & ouuerture qu'on feroit tout expres à la muraille, pource que indignement (& non comme il appartenoit) il estoit paruenü à ceste dignité. Mais pour retourner au Roy, voyant qu'il n'auoit autres enfans que deux filles, & d'autre part qu'il auoit deux Royaumes, il aduisa de les en pourueoir de son viuant,

de façon, que l'une eust la couronne de Hongrie, & l'autre celle de Poloigne. Enquoy il fut aydé d'une telle occasion, qui d'auenture se presenta. Il demandoit aux Polagues la contribution & impost accoustumé qu'on appelle le denier Royal ou Poraldne. Ce sont douze gros de forte monnoye, qui vallent quelques quinze solz, avec vn boisseau de seigle, ou d'auoine pour chacun arpent ou iournee de terre. A quoy le pays ne vouloit entendre, alleguant là dessus d'en auoir esté exemptez par Casimir qui leur en auoit fait grace. Luy au contraire insistoit que mesmes du viuant de Casimir ilz y auoyent contribué: Tant s'en faut qu'il le leur eust remis & les en eust affranchis. Mais à la fin apres plusieurs allées & venues, les choses en vindrent là, que moyennant qu'ils admettroient au Royaume l'une de ses filles, il modereroit delà en auant ceste redevance à deux gros seulement pour chacun arpent: Ce que les Polagues accepterent, & a tousiours depuis esté cōtinuée & entretenue, ainsi qu'on la paye encores à present.

Il y eut peu apres quelques troubles en Poloigne, pource que Vvladisslaus proche parēt des feuz Roys Vvladisslaus & Casimir, lequel auoit desia pris l'habit de religieux, & les ordres de Diacre, fut suscitē par quelques seditieux de la grand Poloigne de s'eleuer. Et comme il fut d'un fort leger, & inconstant naturel, aussi ne fit-il pas grande difficulté de ietter le froc aux orties, & se mettre en campagne, tellement qu'il prit quelques places au pays de Cujauie. Et donna beaucoup d'affaires à Sendiuoio gouuerneur de la grand Poloigne. Cependant qu'il fut apres

à luy faire teste & le repouls. A la fin toutesfois, meü de quelque repentance il s'en retourna à son cloistre où bien tost apres il mourut. Cecy aduint l'an 1374. Et quasi au mesme temps vne grosse troupe de Lithuaniens souz la conduicte de leurs Princes Keistud, Iaghellon, Vitolde, Lubart & George, d'une diligence n'ompareille coururent & pillerent tout cest endroict de la Sandomirie, qui est entre les riuieres de Sane, & de Vistule, sans q' la Roynie Elizabeth quelque instance que luy en fit tout le conseil s'en donnast autrement peine, ny aduisast d'y pourueoir, & remedier, ne que pour cela elle relaschast riens de ses danses, ieuz & musiques accoustumees où elle passoit tout son temps, encores que elle fut aagée de plus de quatre vingts ans. Mais vn autre desastre suruint qui la toucha de plus pres: Car les Hongres qu'elle auoit aupres d'elle pour sa garde s'estoyent accoustumez à prendre de force & sans rien payer, le foin & auoyne qu'on amenoit tous les iours à Cracouie, tant au marché pour le vendre, qu'à la maison des particuliers pour leur vsage & commodité. De façon qu'un ieune Gentilhomme appellé Predborio Brezio ne pouuant comporter que ces insoléces & desordres s'adressassent en son endroict, attira toute sa famille en armes au deuant de son logis qui estoit ioignant la porte de Casimirie. Et comme les Hongres se fussent iettez sur quelques charrettes de foin qui passoyent, ceux cy vindrent à la rescouffe, & là dessus s'attracherent les vns contre les autres, de sorte qu'il y eut vne grosse meslee, qui se renforça tout soudain par ceux qui ve-

noyent au secours. Dequoy la Roynie ayant esté aduertie y enuoya le gouuerneur de Cracouie Iascus Kmit, lequel ainsi qu'il pensoit appaiser la querelle, receut vn coup de fiesche Hongresque à trauers le col, dont il tomba mort sur le cháp. Et là dessus ceux de sa suite, & ses parens & amys, qui en eurent incontinent les nouvelles, de rage & de furie se ietterent sur les Hongres, & en firent telle execution, tât de ceux qui se trouuerent sur la place, que des autres qui estoient par cy & par là dans les logis, qu'il y en demeura plus de huiet vingts. Le reste se sauua dans le Chasteau, où la commune les assiegea par l'espace de trois iours, iusques à ce que la Roynie Elizabeth deslogea, & se retira en Hongrie, ayant pourueu Pierre Kmit fils de Iasco du gouuernement de Lencisie, pour recöpenfe de la mort de son pere. Cecy aduint l'an 1376. L'annee suyuante, Loys par le conseil & enhortement de sa mere, enuoya des nouueaux gouuerneurs en Poloigne, & se mit lors à faire ses preparatifs pour aller contre les Lithuaniens, dont il auoit tous les iours nouvelles plainctes, aussi que le Duc de Belge s'estoit reuolté. Apres donques qu'il eut faict signifier par tout le Royaume le rendez vous es enuirs de Sandomirie, où se deuoit assembler le camp, il partit de Hongrie avec grand nombre de gens, & passant les mons Sarmatiques se rendit à Sandomirie, par la contree de Sanoque, ou ayant tenu conseil surce qui estoit à faire, & faict vne reueüe & monstre generale, partit son armee en deux, d'autant qu'il se voyoit assez fort. L'une des troupes il donna à conduire au Palatin Sendiuoio, qu'il en-

uoya au recouurement de Chelme. Et avec l'autre il prit le chemin de Belze, en intention de l'emporter par famine, & à la longue. Mais Keistud Prince des Lithuaniens le vint trouver, & fit paix avec luy, à certaines conditions. Et d'autre costé Sendiuoio eur en huit iours mis fin à sa guerre, & repris Chelme. Cela fait Loys amadoüé des belles parolles & promesses du Duc George, non seulement luy rendit Belze, mais d'abondant luy donna Lubassouie, prenant serment de luy qu'il demurerait tousiours souz la protection & obeissance des Polaques. Et comme la beauté, fertilité, & abondance de la Russie luy fust venue fort à gré, aussi qu'il y voyoit desia grand nombre de Chrestiens par tout, il impetra du Pape Gregoire vnzième, d'y faire vne Archeuesché, laquelle il mit en Halicie: & deux Eueschez, asçauoir Premillie, & Vvladimirie, aumoins selon que la escrit Dlugossus, car s'il est vray ce qui a esté cy deuant dict de l'opinion mesme d'iceluy Dlugossus, que le siege Metropolitain eust esté premierement à Leopoli, il faut que Halicie ait esté Euesché simplement, d'autant qu'il n'y a qu'une seule Archeuesché en tout la Russie, qui est en ladite ville de Leopoli. Parquoy on peut aiseement iuger, que du temps de Casimir, il y eut pour ce commencement vn seul siege Episcopal establi à Leopoli, & que puis apres le nombre ayant esté augmenté souz le Roy Loys, l'Archeuesché fut mise en Halicie, puis remuee à Leopoli, & l'Euesché de Leopoli, à Cameneze. Mais apres que le Roy se fut derechef esloigné en Hongrie, les volleries & brigandages recommencerent

cerét de tous costez l'audace des meschãs & desbauchez à croistre de iour en iour, la force auoir lieu par tout, & la iustice à se taire & endormir, ou bien à fauoriser les riches & puissãs, cõtre les pures souffreteux. Dequoy les plainctes & doleances qui en venoyét cõtinuellement au Roy, l'esmeurét à la verité, & yeust bien voulu remedier, mais il ne pouuoit endurer (cõme il disoit) l'air de Poloigne. Parquoy il y enuoya en son lieu Vvladislaus, Duc d'Opolie avec plain pouuoir, autorité & puissance. Cestuy cy ne fut point autrement desagreable au commũ peuple & pauures gens: Mais la noblesse & les grands, se baderent incontinant contre luy. Et sestans par deux fois assemblez, l'vne à Villicie, & l'autre à Gnesne declarerent tout à plat, qu'ils ne vouloyent point obeir à vn estrangier, lequel mesmes n'auoit esté esleu ny appelé d'eux. Ce qui estoit du tout contre les loix & coustumes du pays. Et là dessus enuoyerét deuers le Roy, pour luy remõstrer toutes ces choses, parquoy il rappella Vvladislaus.

De ce temps, qui fut enuiron l'an 1380. (Et à la verité cela ne se doit pas mettre en oubly,) fut premierement trouué à Venise par vn Allemant, l'vsage de l'artillerie qu'on appelle bombardes, à cause de leur bruit & son espouuantable: vraye peste, perdition & ruine du genre humain. Et l'annee suiuiante mourut la Royne Elizabeth mere du Roy. Lequel se trouuant plus que iamais inquieté des plaintes & crieries des Polaques, qui demandoient auoir quelque reglement, tât sur le fait de la iustice, que les autres affaires du Royaume qui alloient tous sen dessus des-

fous, fit à la parfin denoncer la iournee à Bude à la Micaresme prochaine, chose bien nouvelle & estrange, & d'extremes fraiz & incommodité pour tous. Neantmoins les Seigneurs de Poloigne ne laisserent de s'y acheminer, & grand nombre du peuple quant & quant, beaucoup plus qu'on n'eust pensé, pour l'esperance que chacun auoit de quelque bonne reformation. Là, apres plusieurs choses proposees & debattues, touchant le gouvernement du Royaume: Le Roy & toute l'assemblee aduiserent de remettre l'administration de la iustice, avecques entiere superintendance & autorité, és mains de trois personages, qui furent Zaniffa Curouantski de la maison des Roseans Euesque, Obellaus son frere german Castellan, & Sendiuoio Subinien Palatin de Calisse, gouverneur de Cracouie. Autre chose ne fut faicte en ceste assemblee mesmes, touchant le iugement des proces, car tout fut remis aux trois dessusdits, sinon que l'Euesque Zaniffa eut pouuoir particulier de pourueoir à toutes les dignitez & offices qui viendroyent à vacquer, reserué de Castellan, & Palatin de Cracouie. Et ainsi se rompit la diette, & les pauures gens qui s'estoyent acheminez à grands frais & traualx, en esperance d'auoir quelque resolution de leus affaires, se voyans frustrez furent contrains de s'en retourner sans rien faire, bien couroucez toutesfois & mal contents. Les trois nouueaux gouverneurs estans arriuez en Poloigne, se mirent tout incontinent à ouyr en public les plaintifs & dolleances d'un chacun. Et monstroyent de faire cela fort liberalement, & avec vne grande facilité, de for-

te qu'on y accouroit de toutes parts, car ils ne refusoient audience, requestes, ny placets: mais quant on veit qu'il n'estoit poit de nouvelles de depescher personne, ny de faire iustice aucune, & que cela n'estoit qu'une mine & parade pour amuser le peuple, iniures adonc & maledictions ne manquerent point contre le Roy, & son beau Triumvirat.

L'annee suiuaute qui fut 1382. Loys s'apperceuant bien qu'il ne faisoit plus que languir, & que peu à peu les forces & la vie luy alloient defaillans, voulut auant que mourir establir les affaires de ses filles. Et à ceste cause fit denoncer aux Polagues la iournee en la ville de Zuolene, au pays de Scepusie, là ou festans trouuez en fort grand nombre, declara de leur gré & consentement pour son successeur au Royaume de Poloigne Marie sa fille aînée, avec Sigismund son mary, Marquis de Brandebourg fils de l'Empereur Charles quatriesme Roy de Boheme, & d'Elizabeth petite fille du Roy Casimir, lequel n'auoit encores que quatorze ans. Les Seigneurs Barons Polagues, leur firent sur l'heure le serment de fidelité. Puis s'estant la iournee rompue, Sigismund s'en alla avec eux, menant quant & luy vne bonne troupe de Hongres afin de pacifier les troubles & seditions qui estoient en Poloigne, & en prist possession du viuant encores de son beaupere, lequel toutesfois deceda le trezieme iour de Septembre à Tarnau, où il auoit semblablement fait conuoquer vne diette pour les affaires de Hongrie, dequoy Sigismund ayant eu les nouvelles, se retira en Posnanie. Le corps de Loys fut porté fort honorable-

ment & en grand pompe & magnificence à Albe Royale, où est la sepulture de la plus grand part de tous les Roys de Hongrie. Ayant vescu cinquante six ans, dōt il en regna douze en Poloigne: Et en Hōgrie quarante & vn. Ce fut vn Prince qui eut tousiours en fort singuliere recommandation de conseruer & accroistre la Foy Chrestienne. Car il n'eut iamais rien plus à cuer, que d'y conuertir les Iuifs, & Cuniens. Et quant à ceux cy, il en vint bien à bout: Mais voyant que ne par douceur ne par menasses il ne pouuoit rien faire enuers les Iuifs, il les chassa entierement de ses pays. Il eut soin des petits aussi bien que des grands, & pour ceste occasion le plus souuēt en habit dissimulé s'en alloit deça & delà par les villages, pour entendre sous main ce que le peuple, qui ne peut rien dissimuler, disoit des fermiers & receueurs, des iuges & autres officiers, & encores de luy mesmes, ce qui ne luy fut point du tout inutile, car delà il vint à reformer beaucoup de choses.

VVLADISLAVS IAGHELLON.

A V S I tost que la mort de Loys fut diuulguee, les Hongres qui auoyent plusieurs Capitaineries & gouuernemēs en Russie, comme Tremenece, Colesco, Grodlun, Lopatine, & Suatin, les mirent es mains de Lubart Duc de Luschi, pour vne bonne somme d'argent qu'ils en priret, ce qui fut la premiere entree, que les Lithuaniens eurent au pays de Volinie. Sigismund d'autre costé ayāt esté receu au Royaume, ne demeu-

ra gueres à offencer tous les plus grāds, & pour bien peu de chose. Car encores qu'ils le requissent fort instamment de demettre Domarat, du gouuernement de la grande Poloigne, il n'en voulut toutefois rien faire. Parquoy s'estans assemblez à Miloslaue, enuoyerent requerir ceux de la petite Poloigne afin de se renger & vnir avec eux pour regarder à ce qu'ils auoyent à faire, & à ceste fin se trouuer à Radom, où ils pourroiet aduifer de creer vn autre Roy. Ce qu'ils firent, mais auant toutes choses fut mis en auant, qu'il falloit qu'il se souuinssent de ce qu'ils auoyent promis & iuré au deffunct Loys, à celle fin que suyuant cela ils ne fissent point de tort à ses enfans. Toutesfois qu'ils pourroyent bien sans transgresser leurs conuenances, faire en sorte qu'ils auoyent quelqu'un de sa race qui administreroit le Royaume en personne. Ils s'assemblerent encores vne autre fois depuis à Villicie, où en pareil ceux de la grand Poloigne enuoyerent leurs deputez. Sigismund sy trouua aussi, avec l'Archeuesque Bozetha, le gouuerneur Domarat, & les Ambassadeurs de la Royne Elizabeth: Lesquels apres auoir eu audience, firent de grands remerciemens à tous les Estats, de ce qu'ils vouloyent ainsi garder la foy donnee à leur feu Roy, à l'endroit de ses filles, les enhortans de demeurer en ceste bonne volonté & opinion. Ce langage fut fort agreable à tous, & aduiferent sur le champ de faire vne autre assemblee à Siradie, quelque chose que Sigismund & ses fauteurs insistassent au contraire. Car il auoit desia entierement aliené de soy les cueurs & volonteiz des Pola-

ques, tant pour raison de Domarat, que pource qu'il souffroit qu'on les mist dehors durant qu'il prenoit son repas. Et auoir avec ce conféré vn benefice de Poloigne, à ie ne scay quel Boheme, combien que plusieurs grands personages l'en eussent fort prié & requis pour vn autre qui estoit du pays. Ainsi ayant esté esconduit d'eulx se partit de Vislicie pour retourner à Cracouie, où Dobeslaus Curouanski Castellan ne le voulut point receuoir, parquoy il se retira en Hongrie tresmal content. Toutesfois il fut tousiours entretenu aux despens du public luy & sa troupe, tant qu'il demeura en Poloigne.

Desia le temps approchoit, auquel se deuoit assembler la iournee à Siradie, où la Royne Elizabeth enuoya l'Euesque de Vesprimie, avec deux autres grands Seigneurs du pays, pour y assister de sa part. Et tout premierement suyuant la commission expresse qu'ils auoyent d'elle, deliurerent & absouldrent les Seigneurs & noblesse du Royaume, du serment qu'ils auoyent desia donné à sa fille aisnée Marie, & à Sigismund son espoux. Puis apres requierent que de l'ordonnance de toute l'assemblée, le Royaume fust transmis à sa sœur Hedwigis. Mais d'autant que la plus part de ceux de la grande Poloigne estoient absens pour quelque sedition & guerre intestine qui les detenoit, la iournee fut remise à vne autre fois en la mesme ville de Siradie: où quasi toutes les voix & suffrages inclinerent en faueur de Zemouit Duc de Masouie, pour luy donner Hedwigis en mariage avec le Royaume. A quoy tenoit fort la main l'Archeuesque Bozenta, lequel estant venu à

proposer fil ne plaisoit pas à la compagnie de conferer le Royaume à Zemouit, soudainement tous d'vn accord, à hautes voix & acclamations responderent, que ouy. Mais vn seul homme par son graue elegant parler, leur fit bien tost changer d'opinion. Ce fut Iasco Tencinien, Castellan de Voinice, fils de André, qui auoit esté autrefois Palatin de Cracouie. lequel par viues raisons leur môstra qu'il y auoit encores assez de loysir pour mieux penser à cest affaire, & qu'ils n'auoyent que faire de se tant hastier, d'autât que la soudaineté se trouuoit tousiours fort dangereuse en quelque chose que ce fust, & que les hastiues & precipitees deliberations, ne failloyent d'estre ordinairement accompagnées d'vn repentir. D'auantage que ce n'estoit pas peu de chose que de la foy qu'ils auoyent desia donnée, dont ils se deuoient tousiours souuenir, comme d'vn sacré nœud & lien de toute societé humaine. Parquoy il luy sembloit qu'on deuoit respondre aux Ambassadeurs de la Royne Elisabeth en ceste sorte. Que l'assemblée tresuoluntiers s'accordoit à Hedwigis, fille puisnee de leur feu Roy, & que loyallement tous luy garderoient la fidelité requise, mais que le pays ne pouuoit si longuement demeurer sans Seigneur, qu'il ne se trouuast en fort grand danger & peril. Et pourtant qu'ils la supplioyent de la leur vouloir deliurer pour toute la feste de Penthecoste prochaine, & qu'apres auoir receu la Couronne, il la pourroyent puis apres tout à loysir marier à quelqu'vn qui ne luy seroit pas desagreceable ny inutile pour le Royaume. Que si d'auanture elle n'obtemperoit à leurs

si iustes & raisonnables requestes, ils appelloyent Dieu à tesmoing qu'il ne tenoit point à eux que les conuentions faictes avec leur feu Roy ne fussent accomplies, & sortissent effect. L'opinion de Iean pleut à tous, & n'y fut rien changé ny adiousté, sinon tant seulement que Hedwigis (si elle vouloit estre receüe) promettrait de se marier au gré & volonté des Seigneurs & principaux du Royaume, & d'y faire continuellement sa demeure avec celuy qu'elle espouferoit. Avec ceste responce les Ambassadeurs furent renuoyez, & l'assemblée rompuë. Et quant à la Royne Elizabeth, elle l'accorda bien à tout, hors mis qu'elle n'euoya pas sa fille au iour qui auoit esté arresté, mais elle en fit faire ses excuses par le Palatin de Calisse, qu'elle depescha tout exprés pour remōstrer, comme elle s'estoit desia acheminée iusques à Cassouie, pour satisfaire à leurs volontez, mais qu'elle n'auoit peu passer outre à cause des pluyes, & des eaux qui auoyent noyé tous les chemins, au moyē de quoy (si ce ne leur estoit point trop de peine & incōmodité) elle les voudroit bien prier de venir là, où toutes choses beaucoup plus commodément pourroyent estre traictées, quand les vns & les autres seroyent presens. Le langage du Palatin fut fort bien receu, & à ceste cause s'estant retiré vn chacun à sa maison, les principaux du conseil, assauoir Dobeslaus Curouanski Castellan, Spiteo Melstinien, Palatin de Cracouie, Ieā Tarnouic, de Sendomirie, Vincēt Kēpio de Posnanie, Sēdiuoio Subinien de Calisse, & Domarat Castellan de Posnanie, gouverneur de la grand Poloigne, s'en allerent à Cassouie,

uie, où ayant reformé la plus grand partie de ce qui auoit esté aduisé à Siradie, entrerent en nouveaux articles & conuētions avec la Royne. Asçauoir que dans la saint Martin prochaine, Hedwigis seroit en Poloigne, & prendroit mary tel que le Senat aduiseroit, que si par apres elle venoit à deceder sans enfans, sa seur Marie, & ses hoirs luy succederoyent au Royaume de Poloigne. En pareil aussi si Marie mouroit la premiere sans enfans, Hedwigis rentre-roit en celuy de Hongrie. Durant ces allees & venues, les Lithuaniens sous la conduite de leur Duc Iaghellon fils d'Olgird, entrerēt en Masouie, & mirēt le siege deuant le Chasteau de d'Hroicine, Melnic, Cameneze, & Surafs, l'an 1384. Dōt les Polaques se trouuoyēt en bien grand peine, de ce que la Royne Elizabeth ne leur auoit point encores enuoyé sa fille Hedwigis, combien que le terme fust passé. Parquoy Sēdiuoio Subinien, Palatin de Calisse, & gouverneur de Cracouie, par l'aduis de l'Euesque, & autres Seigneurs du conseil, l'alla trouuer iusques à Iadre en Esclauonnie, où il luy fit entendre par le menu l'estat auquel estoient les affaires de Poloigne, & comme tout le pays la requeroit fort instammēt de leur vouloir enuoyer sa fille, laquelle aussi tost qu'elle auroit esté mise en possession du Royaume, ils ne faudroyent de luy renuoyer incontinent, pour estre nourrie aupres d'elle iusques à ce qu'elle fust en aage. Mais elle tiroit les choses en longueur, prenant d'heure à autre tousiours quelque nouvelle excuse & remise. Tant que le Palatin se despita, & en colere luy dict qu'il s'en vouloit retourner, dont

la Royne craignant que luy qui auoit toute puissance à Cracouie, ne vint à son arriuee remuer quelque chose, y enuoya soudain leã Tarnouic, Castellan de Sendomirie pour s'aller saisir du chasteau, & retint ce pendant Sendiuoio: Lequel s'apperceuant de toutes ces menees, depescha secrettement vn des siés pour preuenir & desaduācer Tarnouic, à ce que la forteresse ne luy fust mise és mains. Et luy à la desrobbee trouua moyen de sortir de Iaddre, faisant telle diligence qu'en moins de vingt quatre heures sur des cheuaux de relaiz, il fit soixāte grosses lieues de Hongrie. Estant donc arriué à Cracouie informa le conseil de tout, surquoy ils aduiserēt de changer la iournee qui auoit esté desia prise à Lelouie, & la remuer à Radom, affin que ceux de la grand Poloigne sy peussent trouuer, & consulter en commun des affaires du Royaume. Il y eut là plusieurs choses alleguees & debattues, & finalement arresterent d'enuoyer derechef deuers la Royne Elizabeth, pour essayer de l'auoir par douceur. Dequoy la charge fut donnee à vn Gētilhomme nommé Predislaus Vauelien, lequel fit tant enuers elle qu'elle ottroya d'enuoyer en Poloigne son gendre Sigismund, avec vne bonne troupe pour prédre le maniement du Royaume, ce pendant que Hedwigis viendroit en aage. Mais les Seigneurs du conseil quāt ils l'eurent entēdu, en furent merueilleusement indignez, de se veoir ainsi mocquer & abuser par vne femme, qui leur vouloit à son apetit & fantasie, nō seulement dōner des gouuerneurs, mais des maistres & Seigneurs. Et à ceste cause, aussi qu'ils auoyēt

Sigismund à contrecueur, assemblerēt promptement vne armee, & s'en allerent au deuāt iusques à Sādecie, & de là à Liblie, qui estoit lors des appartenāces de Hongrie: D'où ils depescherēt deuers Sigismūd, luy denōcer qu'il n'eust point à passer outre, ny cōtre leur vouloir entreprendre de venir en Poloigne. S'il le faisoit autrement, ils luy declaroyent la guerre, & le tenoyent pour ennemy. Ce qui fit arrester Sigismund tout court, neantmoins il fit tant enuers eux, qu'ils accorderēt d'auoir encores patience iusques à la Penthecoste prochaine, comme ils firent. Mais n'estāt puis apres aucunes nouvelles qu'Hedwigis vint, fut aduisé de n'enuoyer plus vers la Royne, & que pour quelque temps ils se deporteroyent de la creation du Roy. Toutesfois Sendouoio fit de sa fantasie vn voyage en Hongrie, où il negocia si bien qu'il ramena Hedwigis, accōpagné du Cardinal Dimitre, Archeuesque de Strigonie, Iean Euesque de Canadie, & plusieurs autres grands personages, audeuāt desquels tout incontīnāt que les nouvelles en furent esbandues, accourut la noblesse de toutes les parties du Royaume, & quelques vns encores qui se trouuerent des premiers, s'auancerent iusques sur les lisieres de Hongrie. Ayañt donc ceste ieune Princesse esté amenee à Cracouie, fort bien equippee de vaisselle d'or & d'argēt, de tapisseries & autres meubles de grand valeur, le 15. iour d'Octobre, qui est desdié en Poloigne à sainte Hedwigis de Legnicie, elle fut solennellement sacree & coronnee par la main de l'Archeuesque Bozeta, en la presence de tout le peupie, au grand plaisir & contēte.

ment d'un chacū. Ainsi l'administratiō d'une si grande & puissante monarchie fut cōmise à la ieunesse tēdre d'une delicate Princeesse. Or le desir & affectiō des Polaques qui par quelque temps auoyent esté si affamez d'auoir vn Roy, fut lors aucunemēt rassasié: D'autāt plus mesmemēt quant ils eurēt pratiqué les douces & gracieuses façons de faire de ceste ieune Dame prudēte, modeste, & retenuë, ce qu'on pourroit desirer, avec ce qu'elle estoit accōpagnée d'une beauté & bonne grace nōpareille: De sorte que tout incōtināt elle vint à si bien gagner les cueurs & volontez de tout le peuple, que non enuy, mais tresvolontiers, pour quelque braue & belliqueuse que fust ceste nation, ils eussent cōporté d'estre regis & gouuernez par vne femme, si les partialitez & dissentiōs des plus grands, & les affaires qui estoient à demeller avec les estrangiers, leur eussent permis de se passer d'un homme. Et ainsi nouvelle sollicitude les vint assaillir, de pourueoir leur Roynie de quelque mary digne & capable de la dignité Royale, & qui fust pour soustenir le faiz de si grandes & pesantes choses. Le Roy Loys de son viuant auoit bien pensé à Guillaume Duc d'Autriche, pour luy dōner Hedugis en mariage, avec le Royaume de Hongrie, ou celui de Poloigne. Mais cestuy cy ne reuenoit pas beaucoup aux Polaques, tant pour estre son bien si esloigne d'eux, (ce qui seroit cause que la plus part du temps il faudroit qu'il fust absent) que pource qu'ils n'attendoyēt pas grande ayde & secours d'un si pauvre & si foible Prince, es affaires qui se pourroyent presenter. Et comme là dessus ils vinf-

sent à l'assembler au conseil d'heure à autre pource que l'importance de la chose le meritoit bien, voicy tout à propos arriuer les Ambassadeurs de Iaghellon grand Duc de Lithuanie, qui apportoyēt de fort riches & magnifiques presens à la Roynie Hedugis, la demandant en mariage pour leur maistre, avec le Royaume dōt elle estoit pourueü. Et là dessus proposerent de grans auantages, tant pour le bien d'iceluy, que pour l'aduancement de la foy Chrestienne. A quoy les Seigneurs presterēt fort volontiers l'oreille. Mais la Roynie auoit en horreur le mariage de cest estrangier idolatre, & pourtāt sur les articles qu'ils mirent en auant, furent opposees deux difficultez. La premiere qu'à vne femme Chrestienne n'estoit point loysible d'espouser vn mary qui fust d'autre religion. L'autre que desia il y auoit eu quelques promesses faictes au Duc d'Autriche, & ce sous la peine de deux cens mille escuts, à qui se desdiroit. A cela les Ambassadeurs respondirēt que pour le regard de la religion, Iaghellon & ses freres estoient nez d'une mere Chrestienne, qui les auoit tousiours nourris en sa creāce, de laquelle il n'estoit point aliené, combien qu'il n'en eust point faict encores de profession. Et quant aux deux cens mille escuts qu'il les payeroit de sa bourse, & apporterait en Poloigne toutes ses richesses & thresors amassez de si longue main par ces ancestres. D'auātage qu'il annexeroit la grād Duché de Lithuanie au Royaume de Poloigne, pour estre delà en auant sous l'authorité & puisāce d'un mesme Prince. Cela esmeut tout incontinant les Polaques d'entendre l'vnion

d'une si grãde & puissante Seigneurie à la leur, & se veoir non seulement quelque trefue & abstinence de guerre avec de si redoutables voisins & ennemis, desquelz à toute peine festoyent ils peu deffendre iusques alors, mais vne paix ferme & asseuree pour iamais. Puis apres, que ce seroit vne grand gloire, honneur, & louange pour eux à l'aduenir, quand on scauroit qu'ils auroyent esté la cause & le moyen de gagner vne telle multitude de peuple à la foy Chrestienne. Toutesfois qu'il n'estoit pas raisonnable de rien faire, que premieremēt on n'en eust aduertiy la Royne mere, pour entendre sa volonté & intention là dessus. Les Ambassadeurs mesme eurent ceste charge de l'aller trouuer, qui leur fit vne fort gracieuse responce. Que si les Polonnois voyoiēt que cela fust le biē & auantage du Royaume, elle n'y vouloit pas de sa part contredire, ny encores moins empescher vn si grand bien & auancement pour la Chrestieté. Ce qu'ayant esté rapporté en Poloigne, le conseil d'une voix & consentement accorda aux Ambassadeurs ce qu'ils demandoient. Et ainsi furent licentiez, enuoyant avec eux deuers Iaghellon, Vvlodic Cristin, Pierre Safraneci, & Hincia Rostouic, luy accorder Heduigis avec le Royaume, sous les conditions qu'il auoit presentees. Pour seureté desquelles il donneroit sa foy & son sermēt, & promettrait d'auantage de s'employer au recouurement de tout ce qui auoit esté iusques alors pris, aliené, & desmēbré de la couronne de Poloigne. Ce pendant Guillaume Duc d'Autriche auoit ordinairement nouvelles de tout ce qui se faisoit, & si la Royne Heduigis qui luy

portoit vne amitié secrette, luy depescha secretement Gneuosie D'aleuicien de Stregonie, Souzchābrier de Cracouie, à qui elle se fioit du tout pour l'en aduertir & luy donner courage. Au moyen dequoy on ne se dōna garde qu'on le vit aux portes avec vne belle cōpagnie, & force richesses, qu'il apportoit quāt & luy. Mais Dobeslaus luy refusa l'entree du chasteau. Dont il fut contrainct de demeurer en la ville où Heduigis l'alla incontīnāt trouuer tout de plain iour dans le Conuent des Cordeliers, avec les Gentilshommes, & Dames de sa Cour, & y furent faictes danses, & autres bonnes cheres: Tellement qu'elle estoit pour passer outre, iusques à accomplir les nopces, si elle n'en eust esté retenue par Dimitre Goraiο grand Thresorier du Royaume. Parquoy Guillaume voyant que les grans, & ceux qui pouuoient tout, luy estoient ouuertement contraires, trouua moyen d'euader de Cracouie, ayant laissé ses richesses & thresors en la maison de Gneuosie, d'oū on estime que prouindrent les biens & heritages qu'il acquit depuis. Toutesfois cela fut biē tost dissipé par ses enfans. Or desia s'approchoit Iaghellon avec ses freres, & grande troupe de Lithuaniens, au deuant desquelz allerent bien peu de Seigneurs Polagues. Encores le plus apparent de tous, fut Spitco Melstiniē, ce qui luy acquit depuis beaucoup de credit, & de faueur enuers Iaghellon. Mais on l'attendoit à grande cōpagnie à Cracouie, où il entra le douziēme iour de Feurier. 1386. ayant avec luy grand nōbre de Ducs, & autres Princes & grans Seigneurs de Lithuanie, & de Russie, a-

uec Borisco, & Suitrigellon ses freres germains, & son cousin Vitoüdu. A son arriuee il vint saluer la Royne en sa chambre, où il fut soudain esmerueillé de son excellente beauté, & le iour d'apres il luy enuoya de fort magnifiques presens par ses freres & son cousin. Mais auant que de l'espouser luy & tous les autres de sa cõpagnie, excepté ceux qui tenoyent la religion Ruthenique, furent baptisez de la main de l'Archeuesque Bozenta, & de lean Euesque de Cracouie, changeant son nom pour celuy de Vladislaus. Puis il espousa la Royne à grand triumphe & magnificence: & par serment solennel annexa au Royaume de Poloigne à perpetuité le pays de Lithuanie, & celuy de Samogitie, avec ceste partie de Russie dont il iouysoit. Dequoy pour plus grande seurté Vitoüdu avec Michel duc de Zaslauie, & Lubart Duc de Luschi s'obligerent encores à la Royne, & aux principaux du Royaume, & s'en constituerent pleges. Le quatriesme iour d'apres il fut sacré par l'Archeuesque, qui luy mit vne couronne toute neuue, & qui n'auoit point encores seruy, d'autant que Loys auoit emporté l'ancienne en Hongrie, qui n'auoit point esté rendue. Et le iour ensuyuant on luy dressa vn grad eschaffaut au milieu de la place, où estant assis en son throsne, il receut les foy & hommage du peuple de Cracouie. Et puis de tout le reste du royaume selõ la coustume. Les Ducs aussi & les Princes de Lithuanie qui estoient là presens, presterent le serment es mains du Roy, & de la Royne. Puis on se mit à banquetter, & faire feste & bonne chere de tous costez par plusieurs iours.

Sur

Sur ces entrefaictes Conrad Celner Grand maistre de Prusse, que le Roy & la Royne auoyent enuoyé inuiter à leurs nopces, par Dimitre Goraio, au lieu d'y venir estoit entré en armes dãs la Lithuanie pour lors desnuee de ses Princes, & deffenseurs. Et festant departy en deux troupes, la courut & pilla au long & au large, prit quant & quant le chasteau de Lucõlie, qu'il mit es mains d'André frere de Iaghellõ, à l'instigatiõ duq̃l il auoit fait ceste entreprise. Les Polocenses se rendirēt aussi à luy. Ce que aussi tost que Iaghellõ eut entendu il depescha soudain Skirgellon & Vitoüdu avec les Lithuaniens qu'il auoit amenez, & les Polaques qui y voulurent aller pour leur plaisir, lesquelz ayans deffaiet la garnison qu'André auoit laissée à Lucomlie reprirent la place, & recouurerēt encores Miescislauie, Smolensco, & Polosco, & firent punir ceux qui auoyent esté auteurs de la rebellion. Au demeurât le Roy Iaghellon apres que la feste & les ceremonies de son sacre, & de ses espousailles furent acheuees, se mit auant toutes choses à pacifier les noises & querelles des particuliers qui estoient en la grad Poloigne, & reconcilia les Grimaliens & Nalenciens, avec leurs gouuerneurs, Domarat, & Vincet le Palatin. Fit restituer par tout les biens de l'Eglise (qui de force & de malice auoyent esté occupez) à ceux à qui ilz appartenoyent. Bannit Barthelemy Cosminie qui estoit meslé de brigander, & se saisit de son fort & retraicte appellé Odalouie. Mais comme il fut venu à Gnesne, & eust veu que les Chanoines ne tenoyent compte de fournir ce qu'ilz auoyent accoustumé de

L

contribuer pour le deffroy & seiour du Prince: D'vne façon sentant encores son Barbare, fit prendre & engager leurs meubles, mais luy en ayant esté faites quelques remōstrances par Nicolas Strosberg grād vicair de l'Archeuesque, & par la Royne mesme, il les fit rendre tout incōtinant. Surquoy on dit qu'elle en soupirāt se prit à dire. Nous pouuons bien rendre les hardes à ces pauures gens icy, mais leurs larmes, qui est-ce qui les rendra? Parole certes tres-humaine, & digne de perpetuelle memoire & recommandation. Vvladislaus toutesfois appaisa fort sage mēt les troubles & partialitez de la grand Poloigne.

L'hyuer ensuyuant, luy avec la Royne sa femme, & grand nombre de la noblesse de Poloigne, passerent en Lithuanie, menāt quant & eux l'Archeuesque de Gnesne, & plusieurs prebstres doctes & de sainte vie. Et ayāt fait assembler tous les habitans du pays à Vilne, sur l'ētree du Careme, leur fut fort estroictement fait instance de delaisser leurs vieilles & faulses superstitions, & se ranger à la foy Chrestienne. Enquoy le Roy mesme faisoit vn extreme deuoir, tantost les enhortant gracieusement avec prieres & promesses, vne autrefois vsant de menasses & paroles rigoreuses, & faisoit luy mesme l'office de truchement, pource que les prestres Polonois ne sçauoyent parler le langage du pays. Et luy qui auoit cognoissance de la langue Ruthenique, les entendoit & rapportoit puis apres au peuple ce qu'ilz vouloyent dire. Ces Barbares toutesfois bien à regret se departoyent de la religiō de leurs ancestres. Mais apres que par le commandement du Roy, le

feu sacré eut esté estainct, le temple & autel d'iceluy renuersé, & mis par terre, & la sacristie destruiete d'où se rendoyent les oracles à Vilne, par le ministre qui en auoit la charge, les Serpens mis à mort, & les forestz coupees où estoient leurs principales deuotions, voire ne recognoissoyent autres dieux, sans toutesfois que pour cela aucun mal ny inconueniēt fust aduenü à personne, ce qui ne pouuoient croire. Alors venāt à recognoistre leurs abus & deceptiōs, furent beaucoup plus prōpts & disposez à receuoir la religion de leurs Princes. Parquoy ayās par quelques iours esté catechisez, & instruietz és poinctz & articles de la foy, ilz receurent tous le saint Baptesme. Mais pource que c'eust esté vne trop grand peine & longueur de les tenir sur les fons les vns apres les autres, cela fut obserué seulement à l'endroiēt des principaux, puis le reste du peuple fut departy par troupes, & arrousé d'eau beniste par les prestres donnant seulement à chacune d'icelles vn nō pour les hommes, & vn autre pour les femmes. On regarda puis apres pour l'Eglise Metropolitaine qui fut mise à Vilne, où le Roy assigna de grans reuenuz, collations, & benefices, & fut desdiee par l'Archeuesque Bozenta au nom de saint Stanislaus. On fit d'auantage sept parroisses que le Roy renta toutes fort richemēt, & la Royne les pourueut d'ornemēs, meubles, & vstanciles requis pour le seruice diuin. Ainsi Vvladislaus passa toute ceste annee en Lithuanie, à y ordonner & establir les affaires de la religiō, & depescher à Rome Dobrogosti Euesque de Polnanie, deuers le Pape Urbain sixiesme pour prester

l'obedience en son nom, selo la coustume des autres Roys Chrestiens. Cela fait, il laissa pour gouverneur & son lieutenant general en tout le pays son frere Skirgellon Duc de Trochi, & fit auant que partir vn Edict, que de là en auant les Catholiques ne pourroient contracter mariage ny alliance avec ceux de la religion Ruthenique, si premierement ilz ne se rengeoient aux statuz de l'Eglise Romaine. Il voulut aussi que les gens d'Eglise, avec tous leur bien & reuenu fussent affranchis & exemptz de toutes coruees, subsides, & contributions, & de la iurisdiction des iuges laiz, voire de celle du Prince mesme.

A son retour il prit son chemin par la Ruffie, où il receut en sa protection Pierre Palatin de Moldaue ou Vvalachie, avec tous les siens, lesquels festoyent nouvellement sustraietz & departis de l'obeissance des Hongres durât leur interregne, & receut d'eux le serment de fidelité. Mais les choses ne demurerent pas longuement en paix & repos en Lithuanie, à cause des partialitez & euuies d'entre Skirgellon & Vitoüdu. Il y eut aussi du courroux & mauvais mesnage entre le Roy & sa femme, pour quelque soupçon que certains flagorneux luy auoient mise en teste, & festoient desia les choses si aigries, qu'ils estoient pour se separer & faire diuorce, si les Princes & Seigneurs ne se fussent mis à la trauesse, qui firēt tāt que le Roy s'accorda de nōmer celuy qui luy auoit fait ce raport. C'estoit Gneuossie Daleuiciē Souchābrier de Cracouie, qui luy auoit donné à entēdre q̄ Hedwigis (femme de biē fil y en auoit, & saincte vie) auoit faict venir secrettemēt Guillaume

Duc d'Autriche leq̄l estoit demeuré quelque iours avec elle faisans ensemble bōne chere. Dequoy elle se purgea par serment, & le Roy demeura content & satisfait. Mais Gneuossie fut appellé là dessus à l'assemblee qui tout expressement fut tenue à Vissicie. Oū ne pouuant prouuer ce que dessus, ne nyer qu'il ne l'eust dict, fut condamné d'infamie, & qu'il s'en desdiroit, ce qu'il fit en plein Senat, criant, ou plus tost abayant à haute voix, à guise d'vn chien, de dessous vn banc, où on l'auoit faict mettre. Et ainsi toutes soupçons & ialousies effacees l'amour recommancea entr'eux plus grande que iamais.

L'an puis apres 1370. Vvladislaus fit vn voyage en Lithuanie, où il recouura la place de Grodnun, que Vitoüdu auoit surprise, & le deffit en plusieurs rencōtres, luy & sa troupe de cheualiers de Prusse, dont il s'aydoit à courir & piller incessamment tout le pays. Hedwigis de son costé, ayant assemblé vne grosse armee de Polagues, prit Iaroslauie, Premissie, Grodec, Halicie, & autres forteresses de la basse Ruffie, que le feu Roy son pere auoit laissees en garde aux Hongres & Silesiens, qu'elle en chassa. Mais Henry fils de Zemouit Duc de Massouie, lors Euefque de Plocense, reconcilia Vitoüdu avec Vvladislaus, lequel luy laissa en gouvernement la Lithuanie & Ruffie. Et pourtant se trouuāt en paix de toutes parts, se mirent luy & sa femme à faire hauser les murs de Cracouie, qui estoient trop bas, & augmentèrent les gages de ceux qui auoyent la charge du guet, qu'on appelle Burggraues, à ce que delà en auāt ils eussent à toutes heures vn Archier à che-

ual tout prest & appareillé. Ils fonderent d'auantage és faulxbourgs deuers soleil couchant, le monastere des Carmes de l'ordre des Mendians, sous le titre de saincte Marie en l'Arene. Et en la grād Eglise de Cracouie, le monastere de ceux qu'on appelle les Psalmodiens, dont ils assignerent les prebendes sur les salines de là aupres. Quelque temps apres le Roy fit la guerre à Vvladissaus Duc d'Opolie, qui pilloit & brigandoit continuellement tout le pays d'alentour, & luy osta les places & forteresses qu'il tenoit en Poloigne, puis luy alla faire la guerre en la côtree que son pere luy auoit laissée par successió, où il prit quelques villes & chasteaux, & pilla le plat pays.

L'an 1396. Vitoüdu fit vn voyage cõtre les Tartares, qu'il deffit & emmena vne de leurs hordes toute entiere, (c'est à dire en leur langage, multitude de peuple,) avec les femmes & enfans. Dont il fit present de quelques vns au Roy & Seigneurs de sa Cour. Le reste il les meit au milieu de Lithuanie, & enuiron de la riuere de Vaka, pres la ville de Vilne pour labourer les terres, la race desquels y est encores pour le iourd'huy.

Trois ans apres, qui fut l'an 1399. le mesme Vitoüdu nonobstant toutes les remonstrances & dissuasions que luy en fissent le Roy & la Royne, entreprit vn autre voyage contre les Tartares, auquel se trouua vn bon nôbre d'Allemans & de Polagues, conuoiteux d'acquérir honneur & reputation. Et ayãt fait vne reueuë à Chiouie, tout ioyeux & remply de grandes esperances pour se veoir vne si belle armee, entra dans la Scythie, où pour lors comman-

doit Tamerlã, venu de petit lieu: Mais par son grād heur & vertu estoit monté à vn si haut degre d'authorité & puissance, qu'il menoit d'ordinaire avec luy douze cens mille combatans, avec lesquelz il auoit defia deffaiët les Turcz, & pris leur Empereur Bazaïet, qu'il menoit par tout enfermé dans vne cage, ou geolle de fer, à guise de quelque beste sauuage. Auoit puis apres couru d'vne diligence & viftesse incroyable, toute l'Iberie, Albanie, Armenie, Perse, Mesopotamie, Asie, & Egypte, tellement que de son nom seul toute la terre trembloit. Parquoy ce ne fut pas grand merueille, si Vitoüdu s'estant allé attacher à vn tel ennemy, & si puissant, fut bien tost rompu & deffaiët par luy. Aussi plusieurs des nostres demurerent en la rencontre qu'ilz eurent ensemble, nõ toutesfois sans auoir premieremēt bien cher vendu leurs vies. Et entre autres les deux freres du Roy André, & Dimittre Coribut, avec neuf autres Princes de Lithuanie & Ruffie. Mais Vitoüdu & son cousin Suitrigellon se sauuerēt de viftesse. Melstinie, encores qu'il eust peu facilement eschapper, ou fuyant cõme les autres, ou bien se laissant prendre par les ennemis, car Tamerlan avec lequel il estoit venu quelque foys parlementer, auoit conceu vne fort bõne opinion de luy, & l'auoit aucunemēt pris en amitié pour son honesteté & modestie, n'en voulut toutesfois rien faire. Mais s'estant allé mettre en la plus grand foule, se fit tailler en pieces, combatant fort valeureusement iusques à l'extremité. Ce qu'il auoit tousiours desiré, voire predict d'assurance, vne foys que Paule Sciucouic

l'arguoit de couardise & lascheté de cœur.

De ce mesme temps ou enuiron, la Royne Hedwigis accoucha de son premier enfant, qui fut vne fille nommée Elizabeth Boniface, mais elle mourut au troisieme iour. Et la mere ne suruescut gueres apres, laquelle fut honorablement enseuelie deuant le grand autel de l'Eglise cathedrale de Cracouie, sur la main gauche. Ayant esté de son viuant ornee d'une singuliere pieté & sainteté de vie, entieremēt esloignee de toute gloire & arrogāce, collere, & legiereté. Elle faisoit de grādes charitez & aumosnes enuers les pauures & indigents. Et tant en cela, qu'à l'endroit des Eglises, & ce qui estoit à propos pour la commodité publique, elle employa presque tous les biens & richesses qu'elle auoit apportees de Hongrie, qui n'estoiēt pas petites. A son trespas elle laissa par testamēt ce qui luy estoit demeuré de reste, pour estre partie distribué aux pauures, partie employé au paracheuemēt des colleges, que Casimir le grād auoit encommancez aux fauxbourg de Casimirie, ieusnoit fort estroictement tous les Caresmes & Aduents. Au demeurant si peu curieuse de pompes & magnificences, q̄ lors qu'on accoustroit son logis pour faire ses couches, suyuant ce que Vvladislus auoit mandé de parer sa chambre le plus richement qu'on pourroit. Elle dit n'auoir point de besoing de toutes ces vanitez, lesquelles elle auoit de long temps abandonnees, n'ignorāt pas que le plus souuent les couches des femmes sont accōpagnées du tombeau. Aussi on dit qu'apres sa mort furent faits quelques miracles à sa sepulture.

Les

Les obseques & funerailles de la Royne deuēmēt solennisees, le Roy Vvladislus se trouuoit en vn estrange ennuy & desconfort. Parquoy il se retira en Ruffie, n'ayant pas grande esperance de pouuoir retenir le Royaume: Et desia il estoit apres pour s'en demettre de son bō gré, & retourner à son anciē patrimoine, plustost que d'en estre mis dehors honteusement. Mais comme il estoit en ceste peine, les Princes & Seigneurs le rassurerent, luy offrās la mesme fidelité & obeysance qu'ils luy auoyent renduē par le passé. Et quant & quāt luy meirent en auant le mariage d'Anne, fille de Guillaume Comte de Cilie, la sœur de laquelle Sigismund, Roy de Hongrie, auoit espousee en secondes nopces. Car ceste cy, comme niepce du Roy Casimir, estoit la vraye & legitime heritiere du Royaume, à quoy Vvladislus entēdit volontiers: Et à ceste cause furent enuoyez en Ambassade deuers Herman, oncle de la Princesse, leā Obychouie Castellan de Sreme, Hincia Rogouic, & Jean Costrouic, qui obtindrent incontinant ce qu'ils demādoient, & ramenerent avec eux la mariee à Cracouie, le seiziesme iour du mois de Iuillet de l'annee suyuant. Toutes fois pource qu'elle ne scauoit autre langage que l'Alleman, elle attendit huiēt mois pour apprendre le Polaque, auant que d'estre espousee, ioinēt que Vvladislus, qui la voyoit si laide & desagreable, ne se donnoit pas beaucoup de peine de haster les nopces, mais en estoit presque du tour desgoutté. De quoy les Seigneurs festans apperceus aduiserent de s'assembler au mois de Feurier ensuyuant en la ville de Biece, avec ceux de Cilie, où apres auoir

M

renouuellé les accords & conuenances ia faictes acheuerent en diligence ce mariage.

Enuiron ce temps, qui fut l'an 1401. l'Academie de Cracouie fut du tout paracheuee, fuyuant le testament de la Royne Hedwigis, à quoy le Roy adiousta encores du sien vne bone somme de deniers. Et y furent bastis deux Colleges, l'vn pour la faculté de Theologie & les lettres humaines, en la place où souloit estre la demeure des Iuifs, maintenant appelée sainte Anne: Et l'autre pour les Iurifconsultes & Medecins, en cest endroit qu'on monte de la ville au chasteau. Les regens & hommes doctes pour lire, furent appelez de l'Vniuersité de Prage en Boheme, les gages & salaires desquels furent assignez sur le reuenu des salines, & autres fermes & gabelles du Roy, avec quelques prebendes en l'Eglise de saint Floriã. Toutes choses estoient lors en paix & repos dans le Royaume, au moyen dequoy de ce temps ne fut riẽ fait de memorable hors mis les poursuites que feit faire Vvladisslaus contre quelques brigands & voleurs qui guettoient les chemins, & destrouffoyent ceux qu'ils trouuoient mal accompagnez.

En ceste mesme saison, (toutefois il y en a qui veulent que cecy soit aduenu l'an 1399.) vne pauvre malheureuse en la ville de Posnanie, ayant receu en la communion la sainte Hostie, trouua moyen de la reseruer, & la liura à quelques Iuifs, qui par derision, & à grãds blasphemes la ietterent dans la prairie qui est le long des fauxbourgs, dõt aduindrent plusieurs beaux miracles. Parquoy Vvladisslaus y feit bastir vne Eglise en l'honneur du *Corpus Domini*.

L'annee suyuant qui fut 1403. Alexandre Palatin de Vvalachie, & tout incontinent apres, Romain fils de Pierre, avec les plus grands de leur pays, vindrent renoueller l'obeissance à Vvladisslaus, lequel ne voulut entendre au Royaume de Hongrie, que d'autre costé on luy estoit venu presenter. Aussi le Roy Sigismund qui auoit longuement esté detenu prisonnier par les siens propres, auoit esté deliuré par l'ayde & moyen de Sciborio Gentilhomme Polonois.

Quelque temps apres la Lithuanie fut fort endommagée par ceux de Prusse d'vn costé, & les Liuoniés de l'autre, qui emmenerent plusieurs ames. Mais Vitoïdus les racheta par eschange d'autres prisonniers. Et là dessus Vvladisslaus meu à pitié & compassiõ de la desolation & ruine de son pays, sçachant assez que son frere Suitrigellon estoit l'auther de tout cela, car estant banny en Prusse, il incitoit les Cheualiers à faire ces courses & dõmages, le rapella. Et paya tous les debtes qu'il auoit creez, qui mōtoyent à de grãds sommes de deniers. Et afin de ne laisser aucunes racines des vieilles querelles d'entre luy & Vitoïdus, qui peussent reietter de nouueau, il l'enuoya au pays de Podolie, qu'il luy donna, l'ayant achepté tout expressément des enfans de Spitco Melstinien, pour la somme de six mille deux cens cinquãte escus. Et luy laissa dauantage les villes de Strie, & Zidacouie en Russie, & Sidlouie, Stõbnicie, & Drugne en Poloigne, avec quatorze cens escus de rête sur les Salines. Et neãtmoins tous ces biensfaits & liberalitez n'appaïserent point la felõnie & mauuais vouloir de Suitrigellon.

L'année ensuyuant, durant les feries de Penthecoste, le Roy s'assembla avec les Cheualiers de Prusse en la ville de Racianzo, qui est des appartenances de l'Euésché de Vvladislaue, où ils feirent la paix. De là il sen alla à Vvratisslaue, accompagné de cinq à six mille cheuaux tous bien en ordre, pour parler avec Venceslaus Roy de Boheme, qui auoit prochassé ceste entreueuë, où on luy fit vn fort grād racueil. Car Venceslaus alla au deuant de Sbignee Brezien, qui venoit le premier avec quelques six cës cheuaux, assez loin hors de la ville, pensant que le Roy fust en ceste troupe. Ceux de leur conseil par l'espace de huit iours ne cesserēt de traiter affaires, & festoyēt presque accordez à cela, que les Bohemes rendroyēt aux Polagues le pays de Silesie, à la charge qu'ils seroyēt tenus de les secourir de quatre cens lances, toutes les fois qu'ils en auroyent besoin. Mais soit qu'il sembla aux Polagues estre chose defauantageuse pour eux de s'assubiettir ainsi, ou bien que Iean Smirit (le premier du conseil de Venceslaus, qui suruint là dessus) ne trouua point bonne la redition de Silesie, les choses se rompirent, & demurerent imparfaites.

Suitrigellon festoit de nouueau retiré en Prusse, pour l'esperance qu'il auoit qu'avec l'ayde des Cheualiers il se pourroit aysément emparer de toute la Lithuanie, & toutefois ne laissoit pas de retenir tousiours la Podolie, où il auoit laissé de bōnes garnisōs. Parquoy le Roy sy achemina incontinant, & d'arriuee luy osta tout le pays avec les forteresses, commāçant à la ville de Camenets, desquelles il donna le gouuernement à Pierre Saffraneci Polonois, & auāt

que partir de là, receut le serment de fidelité par Alexandre Palatin de Vvalachie, lequel deux ans au parauāt en auoit donné les promesses du viuāt encores de la Roynne Heduigis, à sçauoir de demeurer de là en auāt souz la protectiō & obeyssance des Roys de Poloigne. Ce pendant Vitoüdus ayāt fait paix avec les Cheualiers de Prusse, (ce fut l'an 1406.) passa la riuiere d'Vgre, & entra pour la premiere fois dans le pays des Moscouites, où ne les ayant peu attirer au cōbat, courut & pilla toute la cōtree, & s'en retourna chargé de despouilles, & de richesses en Lithuanie. Mais vn an apres il y retourna, encores avec bien plus grande puissance, car il eut lors à son ayde vne grosse troupe de Polagues, souz la conduite de Sbignee Brezien Marechal du Royaume. Parquoy il tira auāt pillāt & gastant tout iusques au grand fleue Occa, qu'il eust passé, sil n'eust esté empesché par Suitrigellon, lequel de legereté de cerueau, ou par enuie qu'il portoit à Vitoüdus, apres auoir mis le feu au chasteau de Bransco, & celui de Starodub, que le Roy Vvladislaus luy auoyent dōnez au pays de Seuerie, s'estoit retiré deuers Basile, grand Duc de Moscouie: Et luy faisoit tout plein de seruices à l'encontre de Vitoüdus. Toutesfois Basile ne laissa de faire appointment à conditiōs raisonnables & hōnestes.

Or combien que Vvladislaus eust esté fort picqué par le Grād maistre de Prusse, Vlrich Iuning, neantmoins estant d'vn naturel plus enclin à la paix, qu'à la guerre, fit assembler la diete à Lencisie au 17. de Iuliet. Où apres que de l'opinion de tous on eust arresté d'essayer plustost toutes choses que de venir aux ar-

mes, furent deleguez trois Ambassadeurs deuers le Grand maistre, à sçauoir Nicolas Curouiski, Archeuesque de Gnesne, Nicolas Michalouic, Castellan de Sendomirie, & Iean Tulisconic aussi Castellã de Calisse. Ceux cy le requirent de venir à vn abouchemēt avec le Roy, ou toutes choses se pourroyent traiter gracieusement. Mais il n'eut pas la patience qu'ils passassent outre, car tout en colere il leur respōdit qu'il ne vouloit plus attendre, & que tout de cē pas il falloit ietter dans la Lithuanie. Sur quoy l'Archeuesque ne se peut cōtenir voyāt l'orgueil & insolēce de cest hōme, qu'il ne luy dit: Cessez de nous faire paour de vostre guerre, si vous prenez les armes contre les Lithuaniens, parauenture que vous pourriez bien aussi taster des nostres chez vous. Le n'en voulois pas dauātage, repliqua soudain le Grand maistre, il suffit que ie sçache l'intētiō de vostre Roy, & certes aussi m'adresseray ie plustost à la teste qu'aux pieds, & aux lieux fertiles & cultiuez, qu'aux deserts, où l'on meurt de faim. Aĩsĩ l'Ambassadeur festāt trop hastē de parler, fut cause d'auācer la guerre. Car le Grãd maistre adiousta le faire à son dire. Et apres auoir licentiē les Ambassadeurs, enuirō la my Aoust amena sō armee à Dobrin, qu'il prit & brussa, & fit mourir tous les Polaques qu'il trouua dās le chasteau, avec le capitaine qui en auoit la charge, (Iacques Plominie) de là s'adressa à la ville de Ripin, & puis à celle de Lipne, qu'il prit de pleine arriuee, & les ruina de fonds en cōble, vsant de fort grand cruauté, tant enuers les habitans que les pauures gens du plat pays, sans à grand peine espargner les femmes & petits enfans, ayāt puis apres

mis le siege deuant Zlotorie, la prit dans le huitiesme iour. Mais ayāt trouuē plus d'affaires au chasteau de Bidgostie, qui estoit fort & bien remparē, eut recours à la ruse, & fit tant qu'il gaigna le Lieutenant, qu'on appelle le Burggraue, qui le luy liura entre les mains. Le Roy aduertiy par courriers sur courriers, de toutes ces choses veit bien qu'il n'estoit plus question de temporiser. Parquoy il depescha incontĩnāt par tous les endroits de Poloigne, Russie, & Lithuanie pour assembler ses forces, faisant donner le rendez vous à ceux de la petite Poloigne, & de Russie, à Volborie, & aux autres de la grand Poloigne à Lēcisie. De sorte que vers la fin du mois de Septembre, il partit de Radiovv, ou il auoit faict vne reueuē de ses gens, & s'en vint tout premierement assieger Bidgostie, qu'il prit dans le huitiesme iour, & la fortifia de nouveau, y mettant vne bonne garnison. Ce pendant il fut aduertiy comme le Grand maistre s'estoit retirē à Suece. Parquoy il y enuoya vne partie de son armee, qui mirēt incontĩnāt en fuite ceux qui se presenterent contre eux, & les contrindrent d'abandonner leur camp. Mais les Ambassadeurs de Vēceslaus Roy de Boheme arriuerent là dessus, qui moyennerent vne suspension d'armes, iusques au vingtquatriesme du mois de Iuin ensuyuāt, afin que leur maistre qui se vouloit constituer arbitre des differens des vns & des autres, eust loysir de les mieux cognoistre, & entendre. Toutesfois pource que s'estoit vn homme de peu de sens, & de lourd & grossier entendement, addonnē à ses plaisirs & yurongnerie, sans autrement auoir examinē l'affaire, vint bien legere-

ment à donner vn iugement, que le Marquis de Morauie luy auoit minuté à son apetit & fantasie, entièrement inique & defraisonnable. Y adioustant encores vne chose bien impertinēte, voire du tout hors de propos, que les Polagues ne pouuoient plus prendre de Roy, sinon des parties Occidentales, & delairroyent à Venceslaus la cōtree de Dobrine vn an entier, pendant lequel il pourroit regarder à loysir à qui il la deuoit adiuger. Cela estant leu par le Secrétaire du conseil en langage Alleman, les Polagues qui en furent indignez se partirent soudain, feignās ny rien entendre. Parquoy les choses demeurèrent imparfaictes. Vvladilaus doncques voyant qu'il ne pouuoit auoir la paix à conditions raisonnables, despescha de tous costez pour faire assembler ses forces. Et par l'aduis du Marechal Sbignee, enuoya en Boheme, Morauie, & Silesie querir des Capitaines, & autres gens de conduite experts à mener vne armee, asseoir bien vn camp, & ordonner les gens en bataille. Dont les principaux & plus renommez furent deux freres Herbortons, Nicolas, & Federic de Fulstin. Pour lors estoient en la cour & seruice de Sigismund Roy de Hongrie plusieurs Gentilshōmes Polagues, qui pour raison de leurs vertus & merites auoyent eu de grands biensfaits & recompēces. Mais tout aussi tost que les nouvelles furent espanduēs de l'armee q̄ dressoit leur Prince naturel pour la guerre de Prusse, abandonans possessions & heritages, & les promesses q̄ Sigismūd leur faisoit de plus grāds choses, se retirerent en Poloigne: Vvladilaus aussi ne fut pas puis apres ingrat de le recognoistre enuers eux.

Et à

Et à ceste fin de pourueoir aux affaires du Royaume ce pendant qu'il seroit absent, laissa à Cracouie Nicolas Curouifchi, Archeuesque de Gnesne, pour Gouverneur avec plaine puissance & autorité, y v-sant de grande liberalité & largesse enuers les pauvres, par tous les lieux où il passoit. Et quand il fut arriué à la ville de Slupie, située au dessouz du Monastere de Lissece, il y seiourna deux iours, mōtant tous les matins la montagne à pied, iusques au sommet, qui est bien haut, où est vne Eglise fort renommée, pour la piece de la vraye Croix qui y est, & là passoit toute la iournée en prieres & oraisons à genoux. Puis se meit aux champs, tant qu'il paruint sur la frontière des ennemis, ou auant que passer plus auant, il fit mettre ses gens en bataille au milieu d'vne grād plaine, & ayant pris au poing la banniere Royale, avec larmes & souspirs fit son oraison en ceste sorte. DIE V tout bon & tout puissant, à qui rien n'est ny secret ny caché, qui non seulement cognoissez les faictz & les dictz d'vn chacū, mais encores leurs plus secrettes & profondes pensees, i'appelle vostre sainte Maieité à tesmoing, que par force & contre ma volonté ie prens les armes cōtre vn peuple Chrestien tellement quellement, & neantmoins Chrestien: tāt de fois prouoqué, picqué, & irrité par les outrages & iniures insupportables des Cheualiers de Prusse, que ie ne puis moins pour mon honneur, deuoir & descharge enuers le peuple, qu'il vous a pleu me cōmettre & donner en garde, sinon de les deliurer & deffendre de leurs sanglantes & rauissantes mains, & de leurs oppressions & violences. Vous sçauetz tres-

N

bó Dieu, que ie n'ay iamais refusé la paix, & que i'ay tousiours cherché de m'exempter de ceste guerre, pour quelque iuste & legitime qu'elle fust, voire à cōditiōs defraisonnables. Mais puis que la douceur, la benignité, & patience ne peuuent trouuer lieu enuers l'insatiable cōuoitise, l'orgueil, & insolence desmesuree de ces gens icy, qui sont sans foy, sans pitié, ne cōscience. Maintēat ie prens les armes à la faueur & assurance de vostre infallible iustice, & souz la sainte benedictiō, protectiō, & sauuegarde d'icelle, voys desployer cest estandard, & le mettre au vēr. Qu'il plaist doncques à vostre grace & misericorde, tresbenin pere, auoir pour recommandé le droict & raison de ceux qui ont la meilleure cause, & redēmandez le sang de vostre pauvre peuple desia si inhumainement espendu, ensemble de tous les autres que ceste guerre deuorera, de la main de ceux qui en aurōt esté l'occasion. Ces paroles profera le Roy en la presence de toute l'armee, pleurant à chaudes larmes, le mesme feirent Vitoüdu, & les Ducs de Masouie, & le mesme encores les Princes & Seigneurs, tant Polagues que Lithuaniens. Mais les Polagues apres se estre essuyé les yeux, se prirent à chanter l'hymne *Bogorodzica*, composé par le saint martyr Adelbert en l'honneur de nostre Dame, selon l'usage du pais, puis on commença à deliberer, sur la charge du general de l'armee. (C'est celuy qui a toute puissance & commandement apres le Roy.) Mais chacun fuyoit vn si pesant, si penible & dangereux fardeau, tant que par la cōmune voix, Zindramus Mascouiaski fut esleu, lequel estoit Port'espee de Cracouie, (ainsi appelle

l'on ceste dignité) de la maison de ceux qui en leurs armoiries ont vn soleil: Hōme de petite stature, mais de grand esprit & entendement, prōpt, vif, soigneux, & vigilant: Et luy furēt donnez pour Conseillers & adioints Vitoüdu, Christin Ostrouiski Castellā de Cracouie, Iean Tarnouic Palatin de Cracouie, Sendiuoio Ostrorog de Posnanie, & Nicolas Michalouic de Sendomirie, avec Nicolas Tramba, Preuost de saint Florian & Vicechancelier, Sbignee Breziē, Marechal, & Pierre Saffraneci, Souz chambrier de Cracouie. Toutes ces choses ainsi ordonnees aduint vn cas bien meschant & detestable, de deux Lithuaniens, qui prirent la sainte hostie en vne Eglise, & la foulerent aux pieds. Le Roy scandalizé d'vn si enorme forfait, feit songneusement chercher les malheureux, lesquels par le commandement de Vitoüdu, dresserent sur le champ eux mesme leur potence, & se stranglerent de leurs propres mains. Chose bien barbare & estrange, & neantmoins vsitee en ce pays là: & encores se sollicitoyent & tāsoyent l'vn l'autre, de paour que leur retardement ne fust cause de leur faire souffrir quelque plus grand & cruel supplice, ce qui intimida les autres d'entreprendre plus semblables blasphemes & impietez. Or le Roy auoit accoustumé de faire dire la Messe tous les matins auāt que partir, mais pource que la nuit precedente estoient suruenus de si grands vents & orages, que toutes les tates & pauillons auoyent esté mis par terre, il auoit esté cōtraint de desloger sans l'ouyr, dont apres qu'il fut arriué au village de Gruneuald, il feit soudain dresser vn pauillon pour la faire celebrer, & l'oyoit

en grande deuotion, quand voyci arriuer les coureurs qui rapportèrent que les ennemis estoient là tout aupres, & venoyēt à grand force. Vitoūduſ meſme vint dire, qu'on les pouuoit deſia veoir, & qu'il y auoit dāger d'eſtre pris au deſpourueu, qui ne ſe haſteroit. Mais pour tout cela il ne fut poſſible de tirer le Roy hors de ſa deuotion, que le ſeruiſe ne fuſt du tout acheuē. Et alors il ordonna à Zindramus & Vitoūduſ de mettre leurs gens en bataille, donnant la pointe gauche aux Polaques, & la droite aux Lithuaniens, qui ſe trouuerent en nombre de quarante cornettes, & les autres de cinquāte. Deſia le Roy eſtoit tout armē, & mōté à cheual, preſt à combattre, quād on luy admena deux heraux, qui demādoient à parler à luy, de la part du Grād maĩſtre. C'eſtoit en ſomme qu'il le prioit de n'eſtre point ainſi lent & retif à venir au cōbat, & afin qu'il ne ſe mōſtraſt plus ſi laſche, il luy enuoyoit deux eſpees toutes nuēs & enſanglātees, dont luy & Vitoūduſ ſe pourroyent ſeruir contre ceux qui le venoyent trouuer en bōne deuotion. Le Roy fort poſēmēt leur reſpondit qu'il n'y auoit point faute d'armes en ſon cāp, & neātmoins il receuoit celles cy en bōne part, combien qu'on les luy euſt enuoyees par mocquerie. Car ce luy eſtoit vn augure & prediction de la victoire qu'il deuoit emporter, puis que ſi liberallement il les rendoyent & mettoient bas. Et ainſi receut ces deux glaiues à grand plaisir, lesquels ont touſiours depuis eſté gardez au cabinet Royal, où on les peut voir encores de preſent. De là ayant eu briues paroles, encourageſes gens, ſelon que le temps le permettoit, comman-

da aux trompettes de donner le ſigne du combat, & les Polaques ſe prirent à chanter leur hymne accouſtumē. Quant aux Pruſſiens ils ſ'eſtoient rangez en bataille ſur vn haut, d'oū ils delascherēt quelques coups de canon: mais voyant qu'ils ne faiſoyēt point d'eſfect, ſe meirent à deſcendre d'vne grande impetuofité, & fort courageuſement vindrent aux mains comme auſſi feirent les autres. Parquoy il y eut ſoudain vne fort cruelle & dangereuſe meſlee, & pouuoit on ouyr de bien loĩn le bruit des coups & retēſſement des armes. Il y auoit deſia plus d'vne bonne demie heure que le combat auoit durē fort & aſpre, ſans aucun aduantage d'vn coſté ne d'autre, mais ceux de Pruſſe ſ'eſtans apperceus que la pointe droite en laquelle eſtoient les Lithuaniens, Rutheniens, & Tartares eſtoit la plus foible, vindrent fort rudement charger deſſus, avec quelques troupes de ſecours toutes freſches, ce qui ne leur ſucceda pas mal. Car les Tartares, Ruſſiens, & Lithuaniens ſe voyans preſſez par ceux qui eſtoient plus fortement armez qu'eux, reculerent plus d'vn bon traiēt d'arc, & finalement prirent la fuite, quelque choſe que ſceuſt faire ne crier Vitoūduſ. Trois compagnies ſeulement de Smolensco tindrent bon, lesquelles ayant en horreur de fuyr ainſi honteuſement, meriterent par leur vertu vne grande louange & honneur. Car l'vne fut entierement deſſaĩcte ſur la place, & les autres ſe ſauuerent brauemēt iuſques à la pointe gauche des Polaques, où les choſes alloient bien d'vne autre ſorte. Car encores que la banniere Royale, que portoit Martin Vyrocimouiſki, euſt eſté miſe par terre, les

Polaques toutesfois la redresserent d'un grand effort, & auoyent desia bien esbranlé le bataillon des ennemis, quand vn certain Lusacien, nommé Dipolde Kikerici, vaillant soldat de sa personne, tout armé de pied en cap, sen vint à toute bride la lance baissée contre le Roy, lequel de son costé s'apprestoit pour le recevoir. Mais Sbignee Olesuiki tout ainsi desarmé, & en pourpoint qu'il estoit, se méit au deuant avec vn tronçon de lance, & cueillit l'autre de trauers si à propos, qu'il le porta par terre, où ceux de la garde du Roy luy couperét la gorge. Acte certes tres-magnanime, & digne de perpetuelle memoire & recomandation pour ce ieune Gentilhomme, qui par auanture fut cause de sauuer la vie à son Roy. Aussi en fut il bien recompencé, car outre assez d'autres dons & biensfaits, il eut l'Euesché de Cracouie, apres qu'il eut laissé le train des armes pour suyure cestuy de l'Eglise. Deslors la victoire commença à incliner du costé des Polaques, lesquels feirent vn grand meurtre des ennemis, & les cōtraintrent en fin de tourner le dos & prendre la fuite, où ils les en chasserét si viuement, que peste & mesle ils entrerent en leur camp avec eux, qui estoit remparé tout à l'entour de chariots & de charrettes, & sen feirent maistres. Parquoy il y eut bien encores plus grande & cruelle execution. Car on dit que ce iour là furent mis à mort plus de cinquante mille des ennemis, entre lesquels furent le Grand-maistre, & presque tous ses chevaliers, hors mis bien peu qui eschapperent. Il y eut d'auantage quarante mille prisonniers, & cinquante & vne enseignes gaignees. Ce qui ne doit pas sembler estrange, d'autant

qu'on les estime auoir esté iusques au nombre de septvingts mille. Aussi toute la Germanie s'estoit esmeuë à la suscitation d'iceux Prussiens contre la Poloigne, en intétion de les exterminer du tout. Mais il n'y eut que deux Princes seulement de tous leurs alliez qui y fussent venus en personne, à sçauoir, Cōrad le Blac, Duc d'Olesne, & Casimir Duc de Scecine, lesquels furent pris en vie, Et fut trouué dedans leur camp vn nombre infiny de torches & flâbeaux, & de manotres, chesnes, & entraves qu'ils auoyét preparees pour lier & garotter les Polaques, & mettre le feu à tout le pays. Toutesfois ce conseil & deliberation retourna sur leurs testes. On dit aussi que tant que le combat dura, assez de gens d'une part & d'autre, veirent tout appertement en l'air vn personnage de grande dignité & reuerence, orné d'habits pōtifcaux, qui encourageoit les nostres, & espouuantoit les ennemis, lequel on estime auoir esté saint Stanislaus, Euesque de Cracouie. Et certes l'ayde & secours de la diuine bonté se monstrerent assez manifestes & apparés en ceste iournee: Car bien peu y perirent de la noblesse de Poloigne. Le iour ensuyuât ne fut employé à autre chose, qu'à redre graces à Dieu, & vacquer au seruice diuin, qui fut sur le lieu mesmes celebré à grand reuerence & deuotion, avec force hymnes, louâges, & actiōs de grace, pour vne si belle victoire. Puis on se méit à enseuelir les morts. Cela fait tous les prisonniers furent amenez en commua, & deliurez sur leur foy, à la charge de se représenter à Cracouie, à la S. Martin ensuyuât, dequoy le Marechal Sbignee prit leur serment, & leur fut encores distribué quelque

argent selon la condition de chacun, pour se retirer en leurs maisons. Mais les Ducs Conrad & Casimir, avec quelques autres, furent enuoyez à part certains chasteaux & forteresses, pour y estre detenus & gardez. Deux tât seulement furent mis à mort, combien que ce fust contre le vouloir du Roy, à sçauoir, Marquard Salisbach, Cōmandeur de Brandebourg & Sumberg, desquels Vitoüidus se voulut venger, pour quelques iniures & reproches dont ils auoient vñe enuers sa mere, à l'assemblée de Canouue. Et aussi qu'estans captifs n'auoyent voulu rien rabattre de leur arrogance accoustumee. Incontinent que l'Archeuesque, les Euesques, & le Recteur de l'Vniuersité eurent les nouvelles de ceste si belle & heureuse victoire, par le courrier expres qu'on leur auoit despesché, or donnerent de faire feux de ioye, & processions generales par tout, & fut de là en auant solennisé tousiours en grand pompe & magnificence, le iour de l'Apostre S. Denys, auquel la bataille auoit esté donnée, pour memoire & souuenance de ceste desconfiture. Apres laquelle le Roy s'estant mis aux champs, prit en son chemin quelques places & forteresses, & arriua le septiesme iour d'apres son deslogement à Mariembourg, où il emporta la ville de plaine arriuee, & peu sen faillit qu'il n'eust aussi le chasteau, lequel il assiegea de trois costez, & fait autant de batteries. Sur ces entrefaictes presque toute la noble de Prusse, Culme, & Pomeranie, avec les Euesques de Culme, Varmie, Pomesanie, & Sambie, vindrent de leur bon gré se rendre au Roy, plusieurs places & forteresses feirent aussi le semblable, com-

me

me Dantzik, Elbinghen, Thorn, Culme, Kinisberg, Suece, Gneue, Derfaue, & autres. Mais sur tout ceux d'Elbinghen se mōstrerent les plus prompts & affectionnez. Car ils meirent hors du chasteau le Commandeur Verner Tetingher, qui s'y estoit retiré apres la bataille, & rendirent la place au Roy, qui y laissa Iean Tarnouic, Palatin de Cracouie. Et apres auoir receu le serment, tât des Gentilshommes, que du commun peuple de tous les lieux dessusdits, permit à tous de viure selon leurs libertez & franchises accoustumees. Mais il departit les capitaineries & Gouvernemens à ceux qu'il pensa l'auoir merité, sans mesmes exclure les Bohemes de ces recompenses & biensfaicts.

Cependant Mariembourg demeuroit tousiours assiegee, mais la faute de viures qui estoit au cāp, & principalemēt de pain, y auoit apporté tout plein de maladies, & entre autres le flux de ventre parmy les Bohemes, qui estoient venus à la solde du Roy. Parquoy sans s'arrester à la meilleure & plus saine opinion, & entre autres de Nicolas Tramba Vicechancelier, qui par remōstrances, & viues raisons accompagnées de larmes & prieres, insistoit qu'on ne deuoit aucunement abandoner le siege, le 19 de Septēbre, apres auoir mis le feu aux loges, & laissé quelque nombre de gens de sa suite, souz la conduite de Borocho Stume, pour courir la campagne, deslogea, & sen alla. On peut assez pēser combien ce deslogement fut agreable aux assiegez, qui estoient desia reduits à telle necessité, qu'à bien grand peine Henry Plauenie, qui commandoit pour lors en ceste place,

O

peut obtenir de ses gens d'auoir encores patience biē peu de iours de se rendre. D'autre costé suruint vne chose, non pas de fort grāde importance, toutesfois qui feit prendre en plus mauuaise part ceste retraite. Car le cheual du Roy, qui n'agueres hannissoit fort viuemēt, tumba soudain roide mort, ainsi qu'il auoit le pied à l'estrier pour monter dessus. Ce qu'on prit à mauuais augure: Nō pourtāt la forteresse de Radin, deuant laquelle il auoit tenu partie de son armee depuis la iournee de Gruneuald sans y pouuoir riē faire, luy fut renduē par compositiō, ainsi que ces gens ayans d'vn grand effort & hardiesse rompu l'vne des portes, estoient prests à y entrer de force. Là dedās, furent trouuez 15. des Cheualiers qu'on emmena prisonniers en Poloigne, à tout le reste on ne fait rien.

Mais Henry Planouie, qui desia auoit esté esleu Grād maistre, ne s'endormit pas, car de tous costez il amassoit gens, ayant emprunté cent mille florins de la ville de Dantzik, pour les souldoyer, laquelle de nouveau s'estoit rangée à son party. Dequoy le Roy, qui pour lors estoit à Nessouie, fut soudain aduertiy, toutesfois il n'auoit dequoy pouuoir si prōptement y remedier, & donner ordre. Tout ce qu'il peut faire, fut d'enuoyer à prieres & promesses cēt ou six vingts lanciers qui estoient à sa suite, se mettre dās Tutcholie, avec leurs gens, desquels Pierre Mezicoski, de la maison des Stariconiens, eut la charge & cōduite. Et tout incontinant apres s'allèrent ioindre à eux, Senuoio Ostrouic Palatin de Posnanie, Dobrogost Samotulien Castellan, & Martin Labissiuie Palatin de Breste avec leurs cōpagnies. Assez pres de là se trou-

uoit Michel Cochmeistre, beaucoup plus fort de gēs luy tout seul q̄ tous les autres ensemble, lequel estāt aduertiy de la venuē des nostres en si petit nōbre, accourut à grand haste au deuāt, comme s'il fust allē à vne trescertaine & asseuree proye, les cuidāt surprendre au despourueu. Mais ils trouuerent les Polagues appareillez de les receuoir. Et auāt q̄ venir aux mains vn certain Silesien, appelé Conrad Nemcie s'aduāça hors des rangs, deffiant quelqu'vn de la troupe, cōtre lequel se presenta Ieā Scicie Doliuiē, qui le vainquit & prit prisonnier. Et là dessus ayāt leuē vn grād cry d'vne part & d'autre, vindrent à se rencontrer & combattre d'vne si grāde ardeur & opiniaistreté, que par deux fois ils furent cōtraints de se separer de leur propre volōté pour prēdre haleine. A la troisieme s'estans resolus de vaincre, ou mourir, renouellerēt la meslee plus forte qu'elle n'auoit point encores esté, & ainsi acheuoyent de se tuer les vns les autres, sans que personne voulust riē ceder, iusques à ce que Ieā Ostrouic, surnōmé Nassian, du pays de Toporie, s'estant d'vne grande hardiesse abandonné tout au trauers de la plus forte & espesse foule des ennemis, meit à mort celuy qui portoit l'enseigne coronnelle, laquelle il luy arracha des poings. Parquoy de là en auant ils commencerent à s'affoiblir & perdre cœur, & finalement à se mettre en fuite. Les Polagues les poursuyuirent fort asprement, & en tuerēt grād nōbre, de façō qu'on fait cōpte de 8000. qui demeurēt tāt sur la place où fut le cōbat, q̄ depuis à la chasse: dont les Prussiens furent si abatus & descouragez, que de long temps apres ils n'oserent venir à ba-

taille rāgee avec eux. Cecy fut le 10. iour d'Octobre. Le lendemain ils enseuelirent les morts, & partirent le butin, puis avec vne lōgue suite de prisonniers, allerent trouver le Roy à Inouuladislauie, qui leur feit de grands caresses & recompences, pour auoir si biē faiēt. A la veritē ceste iournee importa beaucoup, & y en a assez qui la preferent à celle de Gruneuald, tāt pource que le combat dura plus longuement, & fut plus obstiné & douteux, que pource que les forces de Prusse furent lors comme du tout prosternees & abbatuēs. Toutesfois le Roy laissa aller les prisonniers, sur leur foy de se représenter à certain iour, excepté leur general Michel Cochmeister, qui fust quelque temps detenu prisonnier en la tour de Chen cine. Les Cheualiers eurent encores depuis vne autre venue & estrette par ceux de la grand Poloigne, lesquels par le cōmandement du Roy festoyent assemblez pour leur aller courir sus. Tellemēt que le Grād maistre Plauenie se voyant tant de deffaictes & encombres les vns sur les autres, n'osa plus tenter le hazard du combat, mais ayant ramassé aux mieux qu'il peut les reliques & demeurans de ses pertes, s'en alla assaillir le chasteau de Stume, qu'il prit par composition, & biē tost apres les Turoniēs, & ceux de Dartzik se tournerent de son costé. Mais il assiegea en vain le chasteau de Thorn, qui fut brauemēt defendu par la garnison q̄ le Roy y auoit laissée, lequel s'en alla bien tost apres à Gnesne, visiter le sepulchre de S. Adelbert. Et de là en l'Eglise du *Corpus Domini* en Posnanie, accomplir les vœuz qu'il auoit faiēts auant la bataille de Gruneuald. Par mesme moyen il feit assen-

bler la noblesse du pays, & entra à l'impourueu dans Pomeranie, où sans s'amuser aux villes & places fortes, il courut & pilla tout le plat pays. Ce temps pendant Sigismund, Roy de Hōgrie, pour s'acquitter de sa promesse, & faire quelque chose en faueur des cheualiers de Prusse, dont il auoit receu quarante mille florins, depescha Sciborie Palatin de Transsylvanie, avec douze enseignes de Bohemes, Moraues, & Autriens, pour aller endommager la Poloigne. Mais ceux du pays s'estans assemblez en grande diligence, au premier aduertissement que le Roy leur en donna, les vindrēt rattaindre aupres de Bardeouie, ainsi qu'ils se retiroyent chargez du butin qu'ils auoyent faiēt en la cōtree de Sandecie, & les deffeirent à bien peu de peine. Au mesme temps les Polaques eurent encores vne autre fort belle & heureuse victoire cōtre les Liuoniēs. Car Hermā, maistre des Cheualiers de Liuonie, auoit amené en Prusse vne grosse troupe d'Allemans, & de Bohemes, & les ayant laissez à Golube, s'en estoit venu à petite compagnie de gens de cheual à Mariembourg trouuer les Prussiēs qui y estoient, dequoy ayās esté aduertis ceux qui estoient en garnison à Ripin & Bobrouunic, entrepirēt vne chose vn peu hazardeuse, (& neantmoins d'vne grande assurance & gayeté de cœur) souz la cōduite de Dobeslaus Buchala, du pais de Vienauie. Ce fut d'aller assaillir ceux qui estoient demeurez à Golube, cōbien qu'ils fussent sans cōparaison plus forts qu'eux. Mais ils s'embuscherent en lieu fort commode & à propos, & enuoyerent quelques cheuaux courir iusques tout aupres des murailles de la ville, lesquels

n'eurent pas plustost esté apperceus des ennemis, que soudain ils sortirent sur eux, & les ayās de pleine arriere mis en fuite, les poursuyirent plus chaudement qu'ils ne deuoyēt. Car ils ne se dōnerent garde qu'ils se trouuerēt enuelopez par le derriere, de Buchala & de ses gens, qui les contraindrent de prendre la charge à leur tour, & fuyr à toute bride vers Golube, où ils trouuerent les portes fermées à leur nez, pource que les habitās qui voyoient tout, eurent paour que les Polagues n'entraissent pesse & messe avec eux. Ce qui fut cause qu'il y en eut beaucoup de tuez, & le reste se rendit à mercy, qui se trouuerent quatre fois plus, que ceux à qui ils se rendoyēt, & dont ils se laissoyēt prendre & lier. Tant peūt l'espouuamment & frayeur, quand vne fois il vient à troubler les personnes. Mais la paix fut finalement faicte à certaines cōditions par le moyen de Vitōuidus, qui en feit tout son deuoir. Parquoy le Roy licencia son armee, & depecha ses ambassadeurs à Rome avec de beaux presens, deuers le Pape Iean, qui auoit succedé à Alexandre 5. pour faire l'obediēce en son nom, cōme au vicaire de Iesus Christ, & successeur de sainct Pierre. Puis par deuotion s'en vint tout à pied iusques à Craouie, où il offrit en la grand' Eglise les 51. enseignes qui auoyent esté prises sur les Cheualiers de Prusse, lesquelles pour tesmoignage perpetuel d'vne si glorieuse victoire, furent penduēs au haut des voultēs, où on les peut veoir encores pour le iourd'huy.

Sur le commencement de l'annee suyuate, qui fut 1412. les Venetiens enuoyèrent vers Vvladislaus luy offrir la solde & entretenement de cinq cens lances,

s'il vouloit faire la guerre à Sigismund, Roy de Hongrie, lequel auoit nagueres esté esleu Empereur, & leur faisoit quelque ennuy, & fascherie, du costé de l'Esclauonnie. Ce qu'ayant entendu Sigismund enuoya tout incōtinant ses Ambassadeurs vers le Roy, pour renouueller leurs anciennes alliances, ou bien negocier quelque entreueuē & abouchement. Ce qu'ils impetrerent, non toutesfois sans grād peine & difficulté, & fut pris iour pour se trouuer à Luboullie, où Anne Royne de Poloigne s'achemina la premiere pour veoir Barbe sa seur, qui estoit mariee à Sigismūd. Mais quāt Vvladislaus arriva, l'Empereur & sa femme vindrēt au deuant de luy, iusques au haut de la montagne, & finalement ces deux Princes retournerent en paix & amitié l'un avec l'autre, laquelle ils iurerent solennellement auant que partir.

Au demeurant ce fut vne bonne rencontre pour Vvladislaus, & cela luy vint fort à propos pour faire veoir sa grandeur & reputatiō parmy ces estrangers: qu'ainsi qu'il s'en alloit à Bude avec l'Empereur, vne fort magnifique Ambassade de Tartares le vint trouuer sur le chemin, avec des presens de tresgrande valeur, pour luy offrir de la part de leurs maistres leur secours & seruice par tout où il les voudroit employer. Sigismund luy donna aussi tout plein de belles choses, puis s'en retourna par le pays de Morauie en Poloigne, où il arriva cinq mois apres qu'il en fut party. Entre les autres presens que luy feit Sigismund, furent l'espee de Boleslaus Chrobri, vne couronne, vn sceptre, & vne pomme, le tout d'or. Plus les marques & enseignes Royales, que la Royne Eliza-

beth, mere du Roy Loys auoit transportees en Hongrie, ce qui fait à son entree à Cracouie porter en parade deuant luy. Quelque téps apres Sigismund luy enuoya emprunter quatre vingts mille florins, pour lesquels il luy engagea tout le pais de Scepucie, excepté le chasteau tant seulement. Et cela est de quoy la Scepucie est tousiours depuis demeuree aux Roys de Poloigne iusques à ce iourd'huy. Vvladislaus estât retourné de Hógric, s'en alla visiter tous les pays & prouinces de son obeyssance, & fait assembler les Estats de Poloigne, & de Lithuanie en la ville de Grodlun, sur la riuier de Burgue, ou fut recófirmee l'amitié & alliance entre ces deux nations, & le droit de noblesse concedé aux Lithuaniens, Catholiques toutesfois, & non autres, à ce que de là en auant, ils peussent iouyr & vser des mesmes droits prerogatiues, & preeminences que les Gentilshommes Polonois, & paruenir aussi aux charges, dignitez, & Magistrats dont estoient exclus tous ceux qui ne viuoient selon les statuts de l'Eglise Romaine. Cela fait s'achemina en Samogitie, qui n'auoit encores abandonné ses faux Dieux, & superstitions anciennes, & là d'un grand zele, soing & trauail, se mit à les conuertir à la foy, faisant esteindre leurs feux sacrez, couper & mettre par terre les forests dediees, & tuer les serpens, & autres animaux que ce peuple adoroit, tant qu'il les attira à la cognoissance de l'Euangile. En quoy il faisoit le deuoir, non seulement d'un tresdeuot & Catholique Prince, mais plustost d'Apostre ou Ministre, selon l'instruction qui luy en estoit donnée par les prebstres, & autres gens

gés doctes qu'il auoit amenez, auxquels il seruoit de truchement en cest endroit, pource qu'ils n'entendoient les autres, ny n'en estoient entendus. Et pour ne laisser rien en arriere de ce qui estoit de leur salut, il establit vne Euesché à Mednique, avec douze Cures ou Parroisses, à toutes lesquelles il assigna heritages, possessions, & reuenus pour leur entretenemēt.

L'an puis apres 1414. voyant les maux & dommages que les Cheualiers de Prusse cōtinuoient de faire tous les iours dans ses pais, delibera de leur faire la guerre de nouveau, & fait à ceste fin assembler son armee, en laquelle se trouuerent grand nōbre de Pollaques, Lithuaniés, Russiens, & Masouiens, auxquels il adiousta encores tout plein de Bohemes & Silesiens, qui vindrent à sa soulde, & des Capitaines aussi de Silesie. Sans doncques s'arrester dauantage, il entra dans le pays des ennemis, où d'arriuee il prit plusieurs villes, chasteaux & forteresses, les vnes par cōposition, les autres de force. Mais là dessus arriua le Nonce du Pape Iean vingttroisiesme, qui estoit l'Euesque de Losanne, lequel fait tāt que les Cheualiers eurent trefues pour deux ans avec le Roy, & qu'il l'accorda de se remettre & rapporter de tous les differens qu'il auoit avec eux, à la determination du Concile de Constance. Au moyen de quoy ayāt renuoyé son armee, par l'aduis du conseil, il depescha ses Ambassadeurs au Concile, du nombre desquels fut André Lascaris. Cestuy cy de la volōté de tout le chapitre de Posnanie, (le Roy y prestant son consentement,) fut pourueu de l'Euesché. Mais ce ne fut pas qu'il ne fait beaucoup de refus & difficulté de la pré-

dre, cognoissant assez (comme il disoit) la pesanteur d'une telle charge. Ce que d'autant plus volontiers j'ay ramené icy en memoire, pour exemple de l'intégrité & modestie de ce personnage, dont nostre aage n'a gueres eu de semblables à luy en sçauoir, & saincteté de vie.

Peu de temps apres survint vne occasion qui donna moyen à Vvladislaus de faire tour d'amy à l'Empereur Sigismund. Car les Turcs durant son absence estoient entrez en Hongrie, où ils faisoient de grâs maux, & semblablement au pays de Bosne, que n'a gueres il auoit recouré, & eux de nouveau en ayâs chassé les Hongres l'auoyent repris. Mais le Roy leur enuoya ses Ambassadeurs qui parlerent si brauemēt, que trefues furent faictes entre eux pour six ans, & rendirent par mesme moyen les seigneurs Hongrois qu'ils tenoyent prisonniers. La paix mesme eust esté lors faicte perpetuelle, si Pipo Florentin Themessien ne se fust mis à la traaverse qui gasta tout. Cependant Vvladislaus visita toute la Poloigne, Lithuanie & Ruffie sans s'arrester, ny faire seiour nulle part. Et comme il estoit en la ville de Suiatin en Ruffie, vn peu deuant les festes de Penthecouste, le Palatin de Vvalachie le vint trouuer, accompagné de la noblesse de ses pays en fort bon ordre & equippage, lequel en public, & deuant tout le monde s'estant prosterné à ses pieds, luy fit la submission & obeissance, ayant mis bas sa banniere & estendard, avec serment solennel de vouloir à tousiours demeurer soubz la protection & sauuegarde du Royaume de Poloigne. Vindrent semblablement là les Ambassa-

deurs de l'Empereur, & du Patriarche de Constantinople demander quelque ayde & secours de bleds, car ils estoient fort oppressez par les Turcs. Ce que le Roy leur accorda voulant subuenir à leur necessité, & manda à ceste fin au port de Cassibeie sur la mer maiour qui estoit lors en l'obeissance des Polagues de leur en deliurer.

L'annee ensuyuante, sa femme Anne mourut. Et bien tost apres vne grande multitude de Tartares se vint à desborder & espandre dans la contree de Kiouie, souz la conduite de leur Prince Ediga, où estans suruenus inopinément, mirent tout à feu & à sang, & mesme pillerent la ville de Kiouie, puis la ruinerent de telle sorte que depuis elle ne s'est peu remettre en la beauté qu'elle estoit au parauant. Et cependant le Roy en lieu d'aller secourir son pays, & combattre ses ennemis, estoit en Sanoque apres des nopces du tout hors de saison pour l'heure, & indignes entierement de son honneur & reputation. Car il prit en mariage Elizabeth Pilecie, fille d'Ortho, iadis Palatin de Sédomirie, vefue desia fort aagée, & hors d'esperance d'auoir enfans, & la mena delà prendre la couronne en Cracouie, où il auoit à ceste fin faict signifier l'assemblee, combien que la plus grand partie des Seigneurs y cōtredissent, principalement Senuoio Ostrorog Palatin de Posnanie. Mais pour ce que Iean Ressouie Archeuesque de Leopoli l'auoit couronnée, Nicolas Archeuesque de Gnesne, qui estoit lors au Concile de Constance, craignant que cela ne tournast en preiudice à luy & à ses successeurs, du droict & prerogatiue qu'ils auoyent de co-

ronner les Roys & Roynes, impetra que delà en auant l'Archeuesque de Gnesne seroit le Primat de tout le royaume de Poloigne. Quelque temps apres ces nopces, il aduint que Vvladislaus allant de Posnanie à Srodde, le ciel s'estant couuert de grosses nuees obscures & espoisses, se remplit soudain de tonnerres & esclairs, tellement qu'un coup de foudre vint donner à trauers le chariot où il estoit, & tua les cheuaux avec deux Archers de sa garde, & quelques autres cheuaux encores, dequoy le Roy demeura esuanouy. Mais il se reuint sans auoir autre mal, sinon que il demeura vn peu sourd pour quelques iours, & sentit ie ne sçay quelle douleur à la main droite, qui toutesfois ne fut rien à la fin. On estime que cela fut vne punition de l'inceste qu'il auoit commis en ce dernier mariage, pource que la mere de la Royne Elizabeth l'auoit tenu sur les fonds.

Il fit puis apres conuoquer la iournee à Lencise, où cuida aduenir vne fort grande sedition & batterie. Car la Royne estoit fort irritee contre Albert Euesque de Cracouie, tant pource que c'estoit l'un de ceux qui s'estoyent monstrez les plus contraires à son mariage, que pour ce qu'il ne vouloit sceller les lettres de la Comté, dont le Roy contre les loix & coustumes du pays, auoit honoré le fils qu'elle auoit eu de son autre mary Vincent Granouiski. Au moyen dequoy elle auoit amené le Roy iusques là, qu'il estoit prest d'oster les seaux à l'Euesque, mais elle mourut auant que le iour de l'assemblee fust venu, au grand plaisir & contentement de tous, fors que du Roy, qui ne laissa pour tout cela de s'opiniastrer

contre l'Euesque, & remettre sus son affaire. Ce que ses confreres les autres Prelats, & semblablement ses parens amis & seruiteurs, dont il estoit venu fort bien accompagné, ne voulurent endurer: Et desia l'esmeute & querelle se renforçoit de toutes parts, & estoit bien pour aller plus auant, mais le Roy se retira (ce qu'il feist fort sagement) avec quelque nombre des principaux dans son arriere chambre, & si la porte du chasteau n'eust esté soudain fermee, & le pont leué, il y eust eu du sang respandu, toutesfois les choses furent rappaisees. Parquoy on passa outre aux autres affaires, & en premier lieu à ceux de Boheme, à sçauoir mon: Si Vvladislaus deuoit accepter le Royaume qui si souuent luy auoit esté offert. Ce qui fut fort debatü à plusieurs & diuerses sessions. A la fin fut arresté que non: A cause des heresies qui desia auoyent tout gasté & corrompu le pays en plusieurs fortes & manieres. Toutesfois fust adiousté au decret, que fils vouloyent retourner à la religion Catholique, & se departir de leurs erreurs, le Roy pour estre cause d'un si grand bien à la Chrestienté, (pour ueu aussi que le Pape le consentit, & eust pour agreable,) seroit content de satisfaire à leur demande & requeste.

Les choses passées de ceste sorte, Vvladislaus contracta alliance avec Federich, Marquis de Brandebourg, donnant sa fille unique Hedugis en mariage au fils aîné d'iceluy, nommé semblablement Federich. Mais pource qu'il estoit encores trop ieune, il fut ce pendant nourry & esleué en la cour du Roy

son beau pere, lequel tout incontinent apres sans attendre l'aduis du Senat, se maria pour la quatriesme fois, avec vne Ruffienne, appelée Zonca, qui fut depuis nommée Sophie, fille d'André Duc de Kioüie, & de la sœur de Vitoüidus. Ne tarda gueres puis apres que la guerre ne se rallumast mieux que iamais avec les Cheualiers de Prusse, contre l'opinion & attente de tous. Car on n'eust iamais soupçonné que l'Empereur Sigismund eust esté celuy qui les eust incitez comme il faisoit, se seruant en cela de personnes qui passoyent chemin en habit de Mendians. Mais les lettres furent trouuées à Conin, ville de la grand Poloigne, coustües dans les habillemens d'un de ces gueux, qui de fortune y estoit mort, dont toute la menée fut descouuerte. Parquoy le Roy feit incontinent assembler les forces de Poloigne, Lithuanie & Ruffie, & entra le premier dans le pays des ennemis, marchant tousiours en bataille, comme fil eust esté front à front d'eux. Et ainsi alloit pillant & gastant toute la campagne, où il eut quelques rencontres avec aucuns qui le vindrent escarmoucher, lesquels il deffait. Ruina aussi grand nombre de bourgs, & de villages, & prit aucunes places & forteresses. Les Cheualiers alors se voyans si mal menez, commencerent à se repentir de ceste guerre, peu heureusement par eux entreprise, & dauantage les plaintes & clameurs, tant de la noblesse que du peuple, estoient sans cesse à leurs oreilles. Dont ils furent contraints de venir à accord souz certaines conditions qui leur furent imposees. L'Empereur puis a-

pres festant veu avec Vvladislaus, à l'instance & prochas des Princes de Hongrie, la paix fut renouvellee entr'eux.

L'an mille quatre cens vingt quatre, le douziesme iour de Feurier, la Royne Sophie fut couronnée à grand pöpe & magnificence à Cracouie, où se trouuerent outre les Princes & Seigneurs de Poloigne, & Lithuanie, l'Empereur avec sa femme, Erich Roy de Dannemarch, lequel de fortune s'en alloit lors en la terre sainte pour la defféce de la foy, & plusieurs autres grands personages d'Allemagne. Finablement Vvladislaus eut vn fils qui fut baptisé le quatriesme mois d'apres, & eut le mesme nom de son pere. Les Ambassadeurs du Pape y assisterent, & ceux de l'Empereur, des Venetiens, du Duc de Milan, & autres Princes qui auoyét esté inuitez, lesquels enuoyèrent de beaux presens à l'accouchee: Vitoüidus mesmes donna vn berceau d'argent, du poix de cét marcs, & Vvladislaus à l'encontre leur en renuoya d'autres. De là à quelque tēps vint de la part du Pape le Cardinal Latin Vrsin, Euesque d'Hostie, qui luy apporta l'vn des clouds dont nostre Seigneur & redempteur fut attaché en l'arbre de la croix, qui fut receu à grand honneur & reuerence, & mis par le commandement du Roy, en la grand Eglise de Cracouie, où il est encores pour le iourd'huy.

Deux ans apres vne peste courut toute la Poloigne & Lithuanie si horriblement, que le Roy avec la Royne & Vitoüidus, furent contraints de se retirer és forests & lieux à l'escart, où passant continuel-

lement le tēps à la chasse, pour n'auoir lors autre occupation, son cheual tumba souz luy, dont il eut la iambe rompuë, & fut contraint de s'arrester quelque temps à Cranostaue pour se faire guerir.

L'an mille quatre cens vingt six, la iournee se tint à Lencise, durant les feries de Penthecoste, ou le Roy remeit sus vne chose qu'il auoit autresfois essayee. Mais il ne l'obtint pas, d'autant qu'il n'auoit satisfait à ce que l'annee precedente il auoit promis en l'assemblee de Breste, de confirmer à la noblesse, & leur augmenter encores leurs anciens priuileges, libertez, & prerogatiues, quitter aux Ecclesiastiques & aux Monasteres le droit de guet, & remettre à ceux de Cujauie la contribution de l'auoyne, à la charge de designer successeur au Royaume son fils, qui estoit né l'annee au parauant. Et les auoit lors assurez, qu'à la premiere assemblee qui se feroit, il leur en donneroit ses lettres patentes, pour les enuoyer publier par tous les Palatinats & prouinces. Mais à la persuasion de l'Empereur il auoit changé d'opinion, & leur dit lors qu'il ne pouuoit faire cela, dequoy ils furent si mal contens, que sur le champ ils reprirent les lettres que de leur costé ils auoyent expediees, & mises és mains de l'Euesque Sbignee, & les meirent en pieces en sa presence. Ainsi la compagnie se departit sans rien faire. Toutesfois il trouua depuis vn autre expedient pour paruenir à son intention, dont l'Empereur mesmes luy auoit fait l'ouerture. Car il feit venir tous ceux du conseil les vns apres les autres, & prit de chacun vne promesse

à part,

à part, comme aussi il fit des villes principales, & de quelques Sindics de la noblesse, principalement de Ruffie & Podolie. Parmi tous lesquels se trouuerēt biē peu des grans qui eussent plus d'esgard au bien de la chose publique, qu'à leur proffit particulier, & à la faueur & bon visage du Roy.

L'annee ensuyuant n'aduint autre chose digne de memoire, sinon la fascherie de la Royne, & le blasme qui luy fut mis sus: dont Vitoüdis fut la cause primitive, que la vieillesse du Roy, seconda & en augmenta le soupçon, avec ce qu'elle se trouua enceinte & sur le point d'accoucher. Tout cela ensemble, & quand bien il y en eust eu encores moins estoit assez suffisant pour esmouuoir vn tel homme qui de son naturel croyoit fort de legier, & luy faire prendre vne mauuaise opinion de sa femme. Aussi il ordonna que l'inquisition en seroit faicte, & furent prises là dessus deux de ses Damoyelles Catherine & Elizabeth de Scincouie, qu'on soupçonnoit sçauoir beaucoup de ses secrets, voire estre participantes de la menee. Aufquelles ayant esté presentee la question, confesserent tout ce qu'on voulut: on ne sçait toutesfois si cela estoit vray ou faux. Car la crainte d'estre torturees, les auoit peu intimider. Mais tant est que la Royne sans autrement auoir esté ouye, fut ramenee à Cracouie, & ne tint à gueres quelle ne fust enuoyee prisonniere en Lithuanie, si les grands ne se fussent mis entre deux, & mesmement Iean Tarnouie Palatin de Cracouie, qui estoit lors en grand credit & autorité, lesquels en destournerent le Roy.

Car s'estant iceluy Tarnouic apperceu qu'on preparoit secrettement des chariots, & autres besoignes, fit tant qu'il luy descouurit ce qu'il auoit deliberé de faire. Surquoy il luy demanda que deuiendroyent les enfans, le Roy luy respondit, qu'il les vouloit garder, & faire nourrir pour luy succeder. O Dieu (dict alors Tarnouic) nous voulez vous doncques laisser des Roys, Sire, lesquels en faisant telle honte & vitupere à leur mere vous defaouez pour vostres. Cela l'arresta, & le Senat puis apres acheua le reste. Mais il conuint que la Royne se purgeast, par serment d'elle & de sept Dames de bonne reputation, & sans reproche, dequoy le Roy se contenta, & ainsi tout fut appaisé, ioinct que de là à quelques iours elle accoucha d'un beau fils qui eut nom André Casimir.

Sigismund Empereur meü d'une certaine enuie & mauuaise volonté encontre Vvladislaus, proposa de luy faire Vitoudus ennemy, & à ceste fin trouua moyen de faire avec cestuy cy ie ne sçay quelle alliance, luy mettant en auant tout plein de belles choses, voire qu'il luy rendroit le Royaume de Poloigne entre les mains, afin de les brouiller l'un avec l'autre. Vitoudus ne refusoit pas ces offres, comme estant assez ambitieux & actif, mais il faisoit difficulté d'y entendre du viuant de Vvladislaus. Parquoy l'Empereur & sa femme aduiserent de luy preparer le chemin, & firent tant par belles paroles enuers Vvladislaus (luy remonstrant que cela estoit pour honorer tousiours d'auantage le pays dont il estoit venu) que

finablement il s'y accorda, pourueu que le Senat le trouuast bon. Par ainsi l'affaire ayant esté proposé à l'assemblée de Luschi, le Prince Albert Iastrembec, Archeuesque de Gnesne opina le premier. Mais ce fut par longues inuolutions de paroles sans resoudre aucune chose. Ce que ne fit pas Sbignee Oleski Euesque de Cracouie, car tout ouuertement il vint par vne graue & elegante harangue à blasmer l'entreprise de Vitoudus, ramenant deuant les yeux à toute l'assemblée les pactions, promesses, & conuenances que le Roy & luy mesme auoyent iurees solennellement touchant la Lithuanie, qui deuoit à perpetuité demeurer ioincte & annexee à la couronne de Poloigne. Que c'estoit chose mal seante à vn Prince de si grand aage, qui estoit tenu de tous pour si sage, si prudent & aduisé, & qui deuoit desormais estre saoul de gloire, de triumphes & honneurs, se laisser ainsi aller à vne ambition & conuoitise qui n'estoit nullement de saison: qu'il pensast que le brouët deuoit estre empoisonné & bien pernicieux, puis qu'il luy estoit présenté par le commun ennemy Sigismund, lequel ne visoit pas à ce qui pouuoit tourner à son honneur & profit, mais seulement à mettre querelle & dissention entre luy & Vvladislaus, à celle fin que ceux à qui il ne pouuoit rien faire cependant qu'ils seroyent en bonne paix & amitié ensemble, vinssent à se diuiser, & que lors il leur peust nuire, & porter le dommage qu'il leur auoit brassé de longue main. Ces choses & plusieurs autres ayans esté remonstrees par l'Euesque Sbignee,

Iean Tarnouic Palatin de Cracouie suyuit apres, qui chargea encores aussi asprement ou plus sur Vitoüdu. Lequel voyant tout le reste de l'assemblee estre de mesme opinion, & pourtant estre frustré de ce qu'il pretendoit, tout enflambé d'ire & de courroux sortit hors du Conseil, & s'en alla. Parquoy tout sur l'heure les principaux deslogerent de Luschi, comme aussi fit le Roy qui les suyuit la nuict d'apres. Mais Vitoüdu ne demoura gueres depuis à despescher deuers luy Gastoude Palatin de Vilne, & le Marechal Rombud, qui le vindrent trouuer à Corsin, où il estoit à grand compagnie de Seigneurs & principaux du Royaume, où le sommaire de leur legatiõ en briefues paroles, ou pour finale resolution fut, que bon gré malgré les Polagues Vitoüdu vouloit estre leur Roy. Parquoy on aduisa d'enuoyer deuers luy l'Euesque Sbignee, & le Palatin Tarnouic, avec quelques autres, pour regarder en toutes sortes de l'adoucir & appaiser. A tout euenement s'ils ne pouuoient faire autre chose, & qu'ils le vissent ferme & arresté en son propos, ils luy presentassent le Royaume du consentement mesme d'Vladislaus, à ce que (puis qu'il en auoit si grande enuie) il le receust plustost de la main de ses amys, que de ses ennemys. Car Vladislaus n'estant plus ce qu'il auoit esté autresfois, au contraire se sentant de iour en iour affoiblir & debilitier les forces du corps & vigueur de l'esprit, ne lairroit pas le Royaume fort à regret à luy qui estoit plus frais & dispos. Car il estoit desia tout saoul de commander, & d'auantage se voyoit n'auoir

que de petis enfans qui de long temps ne seroyent propres pour le gouverner, là où Vitoüdu qui n'en auoit point, le leur pourroit garder, & laisser puis apres plus à propos: Car il passoit desia quatre vingts ans. Vitoüdu fit responce aux Ambassadeurs que il n'estoit pas si effronté & meschant, qu'il voulust ainsi ietter Vvladislaus hors de son Royaume: Toutesfois que ce luy seroit chose fort honteuse de se departir de son entreprise & deliberation, qui estoient desia si diuulguee par tout, que les Princes & nations estrangeres n'auoyent plus autre chose en la bouche. Au reste qu'il ne vouloit rien renouer contre le Roy & les Polagues, mais que si on l'assailloit il tascheroit de se deffendre. En toute ceste negociation, Sbignee à la verité se monstra vn peu trop aigre, & parauanture plus qu'il ne deuoit: De quoy Vitoüdu fut fort mal content, & luy demanda pourquoy c'estoit que luy seul contrarioit ainsi à son desir & volonté, ce que son compagnon ne faisoit pas, au moins si rigoureusement. A quoy Sbignee sans y penser d'auantage fit responce qu'il s'abusoit d'auoir ceste opinion de luy, car il estoit content de consentir & adherer à tout ce que Tarnouic feroit avec luy, se confiant assez de sa loyauté & preudhommie. Tant estoit ce personnage de grand cueur, & encores de plus grande integrité, mais Vitoudus ne se reporta pas pour cela de ses premieres fantasies & opinions.

Desia commençoit Vvladislaus à cognoistre à quoy tendoyent les pratiques & menées de l'Empe-

reur, & de Vitoudus, & ceste nouvelle alliance avec les Cheualiers de Prusse. Parquoy l'annee ensuyuant qui fut 1430. il fit cōuoquer la iournee à Iedne (c'est vne bourgade en la contree de Radom) où afin de gagner les volonteiz des Polagues par quelques graces & biensfaits, & que par ce moyen il les peust auoir plus fauorables enuers luy & ses enfans pour l'aduenir à conferer le Royaume à l'vn d'eux apres son deces: Il leur confirma tous les ottroys, priuileges, franchises & immunitiez que ses predecesseurs Roys leur auoyent passees. Et quitta beaucoup à la noblesse de la prouision & autres charges dequoy ils estoient tenus & redevables enuers luy, dont il relascha aussi assez aux Ecclesiastiques, & quelque chose encores aux habitans des villes, & aux laboureurs semblablement, comme on peut veoir par les lettres patentes qui en furent lors depeschees. Eux en recompence luy ottroyerent qu'il peut nommer celuy de ses deux enfans qu'il verroit estre le plus à propos pour succeder au Royaume, afin que quand il seroit venu en aage, & qu'il leur auroit semblablement confirmé leurs anciens priuileges & prerogatiues, ils luy peussent mettre le sceptre & la couronne entre les mains. Les affaires doncques passerent de ceste sorte en la iournee. Mais le Roy voyant qu'il n'y auoit ordre de desmouuoir Vitoudus de son premier propos, & qu'il hastoit son couronnement au 17. iour d'Aoust ensuyuant, (car l'ambition ne se peut plus contenir si vne fois on luy a lasché la bride,) donna charge à Iean Czarncouic Sous chambrier de Pos-

nanie, homme de maison & de seruice, de s'en aller sur les frontieres de Poloigne & de Saxe, essayer de surprendre quelqu'vn de ceux qui alloÿt & venoyent continuellement de l'Empereur à Vitoudus, par le pais de Prusse: ce qui ne succeda point mal à Czarncouic. Car Baptiste Cigalla Iurisconsulte Geneuois, & Sigismund Roth Silesien, que l'Empereur auoit despechez tōberēt entre ses mains, avec toutes leurs lettres & papiers qu'il porta au Roy. L'ocasio pour laquelle ils estoÿt enuoyez deuers Vitoudus, estoit pour l'esclarcir du doute en quoy il estoit: *Si le Roy des Romains non encores couronné Empereur a puissance de creer vn nouveau Royaume.* Ils apportoyent aussi lettres patentes de Sigismund, par lesquelles la Lithuanie estoit erigee en royaume, & Vitoudus proueu de iceluy. Mais la couronne estoit remise à d'autres Ambassadeurs, qui la deuoyent apporter incontinent apres. Czarncouic fut fort bien recompensé de ce seruice, & ne pouuant plus vaquer à ceste charge à cause de son indisposition: la noblesse de toute la grand Poloigne, souz la conduite de Sendiuoio Ostrorog Palatin & gouuerneur, Dobrogost Samotulien Castellan de Posnanie, & Iarande Bruzenie Palatin de Vvladislauie, de leur propre mouuement sans attendre qu'on le leur eust commandé, se mit en armes à garder fort estroictement les boys, les chemins, passages & aduenues. Enuoyant gens de tous costez pour descouuir afin de se pouuoir trouuer par tout où l'occasion se presenteroit, voire iusques aux confins de la mer d'Allemagne, s'il en eust esté question, avec de plus grandes forces, prests & appareillez de

combatre & mettre la vie à toutes heures pour le ser-
 uice & reputation de leur Prince, & la deffence &
 conseruation du pays. Desia les Ambassadeurs de
 l'Empereur auoyent passé Francfort sur la riuere de
 Odré, quand ils furent aduertis de toutes ces cho-
 ses. Au moyen dequoy apres auoir en vain attendu
 par l'espace de deux moys, ils furent contraincts de
 s'en retourner sans rien faire: Neantmoins on n'abā-
 donna pas pour cela encores si tost les gardes accou-
 stumées. Par ainsi Vitoudus hors de toute esperance
 de pouuoir plus paruenir à ses intentiōs, outre la vo-
 lonté de Vvladisslaus & des Polaqués, voulut essayer
 d'auoir par ruse & astuce, ce que ouuertement & de
 force il n'auoit peu. Et d'autant qu'il cognoissoit as-
 sez le Roy estre vne personne fort aisee & facile, il se
 aduifa que si vne fois il le pouuoit tenir en Lithuanie
 (où il auoit aussi bien grāde enuie d'aller) il en feroit
 tout ce qu'il voudroit, il enuoya deuers luy s'excuser
 de ce qui estoit passé, car du Royaume il ny vouloit
 plus penser, le suppliant au reste de venir prendre le
 plaisir des belles chasses qu'il luy gardoit. Ce que fit
 fort volontiers Vvladisslaus: Mais ceste semonce sem-
 bloit vn peu suspecte & chatouilleuse à ceux du cō-
 seil. Parquoy ils aduiserent d'enuoyer quant & luy
 certains personnages, & entre autres l'Euesque Sbi-
 gnee, qui ne pourroyent pas estre biē aiseement abu-
 sez ny corrompus. Dequoy Vitoudus ayant esté ad-
 uerty vint au deuant du Roy iusques sur la frontiere
 où il luy fit vn grand racueil, & à tous ceux de sa cō-
 pagnie, horsmis à Sbignee, auquel il ne monstra guer-
 res bon visage. De là les ayant menez à Vilne remit
 sus

sus tout incontinent ses premieres poursuites, fai-
 sant grande instance enuers Vvladisslaus, de ne luy
 vouloir point tant enuier le titre de Roy, à quoy
 il luy fait responce qu'il ne pouuoit rien en cela con-
 tre la volōté des Polaqués. Vitoüidus doncques veit
 bien qu'il luy estoit force de gagner Sbignee à quel-
 que pris & marché que ce fust, & à ceste cause l'en-
 uoya prier de ne luy vouloir plus estre ainsi contrai-
 re à son bien & auancement (car il n'y auoit que luy
 seul qui s'y opposast) & qu'il ne seroit point ingrat
 de le fort bien recognoistre, que s'il s'y opiniastroit
 encores, il feroit tout son effort pour luy faire per-
 dre son Euesché. A cela Sbignee, sans autrement s'es-
 mouuoir, fait responce qu'il scauoit bien Vitoüidus
 estre assez digne de porter nom de Roy, mais qu'il
 ne se pouuoit faire sans contreuenir directement
 aux conuenances qui auoyent esté faictes & iurees,
 & les enfreindre & corrompre. Au reste qu'il adui-
 fast bien de ne se tromper point: car l'Empereur &
 les Cheualiers de Prusse, ennemis perpetuels, aussi
 bien des Lithuaniens que des Polaqués, ne luy met-
 royent pas cela en teste pour bien qu'ils luy vouluf-
 sent, ny pour le veoir honoré d'auantage, mais à cel-
 le fin que ces deux si puissantes nations, iointes & v-
 nies ensemble, vissent à se diuiser, & ruiner les vns
 les autres, par les seditions & guerres ciuiles qu'ils
 leur ourdissoyent. Que luy qui estoit desia si aagé, &
 tout pres de sa fosse, n'ayant aucuns enfans, deuoit
 quelque fois mettre fin à ceste inconsiderée ambi-
 tion & couuoitise de dominer. Qu'il ne falloir point

qu'il pensast de le fleschir de prieres, gaigner de promesses, ny intimider de menaces, qu'il ne s'opposast tousiours à luy, & mesmemēt en vne telle occasion. Car il auroit tousiours en plus de recommandation la foy, loyauté, & amour qu'il deuoit à sa patrie, que toutes ses faueurs, bonne grace & thresors: & estre tout prest & appareillé, non seulement de quitter la dignité qu'il auoit, mais encores exposer sa propre vie pour le bien du Royaume, qui s'estoit reposé sur luy d'une chose de si grande importance. Aussi qu'il se garderoit bien de les frustrer de l'esperāce & bonne opinion qu'ils en auoyent conceuē. Cela & plusieurs autres choses à ce propos dit Sbignee, nō sans grande admiration de Vitoudus, lequel ce pendant empiroit de iour en iour de la maladie qui vn peu au parauant luy estoit suruenue d'ennuy, ou de quelque autre occasion, tellemēt qu'il commença à desesperer de sa vie, & mettre arriere de soy tout soucy & pensement d'estre plus Roy. Ce que Vvladislaus cognoissant, & qu'il n'estoit pas pour gueres viure, renuoya Sbignee & tous les autres: pource qu'il scauoit bien, que ce pendant qu'ils seroyent là, il ne pourroit faire ce qu'il auoit deliberé, qui estoit de mettre le gouvernement de Lithuanie es mains de son frere Suitrigellon. Et comme Sbignee prist congé pour s'en aller, Iuliane femme de Vitoudus le requit de prendre ce qu'il vouldroit des thresors de son mary, car à tout le moins il pourroit employer cela à faire du bien aux Eglises, ce qu'il ne voulut faire. Vitoudus au reste se sentant peu à peu defaillir, & dimi-

nuer ses forces, voulut receuoir ses sacremens cōme vn bon Chrestien, & pour tel asseura qu'il vouloit mourir, demātant pardon à Vvladislaus des choses passées: Peu apres il rendit l'esprit à Trochi, ayāt passé l'aage de quatre vingts ans. Ce fut vn Prince tousiours fort soigneux & esueillé & de prompt & gentil entendement. Qui tout le long de sa vie n'vta d'autre breuuage que d'eau toute pure, tressobre & retenu en tout le reste de son viure, & qui faisoit telle conscience du temps, voyre en estoit si auaricieux, que pour ne le laisser perdre inutilement en prenant mesmes son repas, il donnoit audience aux parties, & despeschoit les Ambassadeurs.

Après la mort de Vitoudus les Lithuaniens & les principaux de Russie qui y estoient presens, se trouuerent en peine de ce qu'ils deuoient faire. Car Vitoudus auoit biē laissé vn frere appelé Coribut, mais il estoit absent avec les heretiques & seditieux de Boheme, dont il estoit l'vn des chefs & conducteurs. Et d'autre part le Roy vouloit mettre le gouvernement es mains de son frere Suitrigellon. Dequoy s'estans apperceus les Lithuaniens, voulurent preuenir, & s'allerent eux mesmes à l'enuy les vns des autres offrir à luy. Parquoy il vint tout incontinent apres à Vilne aux obseques de Vitoudus à fort grand compagnie, de laquelle se sentant tout glorieux, pour se veoir ainsi fauorisé, se saisit de la ville, ensemble de celle de Trochi, & de quelques autres places & forteresses plus importantes. Et commença deslors à se porter pour Duc, sans l'autorité du Roy, qu'il mes-

prisoit & traittoit assez indignement, se monstrant superbe & rigoureux enuers les Polaques qui estoÿt là. Faisoit aussi destrouffer ceux que le Roy depeſchoit en Poloigne, & qui de Poloigne luy estoÿent enuoyez: leur arracher les lettres qu'ils portoyent, & les deschirer. Et toutesfois le Roy ne se soucioit point tant de son propre peril & danger, comme il auoit d'ennuy & desplaisir des insolences de son frere, lequel il s'efforçoit d'adoucir & appaiser le plus gracieusement qu'il luy estoit possible. Et de faict il l'auoit desia tout remis, si vne autre occasion qui se presenta ne l'eust troublé, & de nouveau mis aux champs. Car les seigneurs & principaux de Podolie, & mesmement Paule, Euesque de Camenez, venu de bas lieu, mais homme de grand cœur & entreprise, avec quelques autres, ayans en diligence esté aduertis de la mort de Vitoüidus, auoyent mis la main sur Doigert, Palatin de Vilne, qui pour lors commandoit au nom de Vitoüidus en Podolie, souz vmbre de luy vouloir parler de quelque chose: car il ne ſçauoit encores rien de tout cecy, & s'estoyent saisis du chasteau de Camenece, de Smotricie, Scale & Ceruonigrod, voyre de tout le reste du pays, afin de le rendre au Roy, & aux Polaques, & qu'il ne fust plus souz la ſuiection & commandement des Lithuaniens. Dequoy aussi tost que Suitrigellon fut aduerty, sortit incontinent hors des gonds, luy qui estoit homme impatient, violent, & hastif, & commença à deschiffrer le Roy & les Polaques, menassant de tuer, mettre en prison, & autres telles braueries. Or combien

que les Polaques ne fussent pas pour lors en grand nombre, si n'auoyent ils pas pour cela perdu le cœur de se deffendre, & encores à vn besoin de mettre la main à bon escient sur Suitrigellon. Mais le Roy sans leur en rien communiquer, l'asseura de luy faire soudain rendre la Podolie, pourueu que luy & les principaux de Lithuanie luy promissent & iurassent de la rendre de bõne foy, s'il ne venoit à en estre d'accord avec les Polaques. Et là dessus depeſcha Zaclique Tarbon, avec lettres & mandemens exprez, pour remettre le tout és mains de Michel Baba, au nom de Suitrigellon. Ce que la ieunesse de Poloigne qui estoit là avec le Roy, eut à fort grand despit, & mesmement deux ieunes Gentilshommes, André Tencinien, & Nicolas Dreuciski, custode de Sendomirie, auquel le Roy auoit accoustumé de donner son cachet en l'absence du Châcelier & Vicechancelier: Lesquels meuz de l'amour de leur pays, escrirent à Michel Bucace, qui estoit dás Camenez, que le Roy auoit esté forcé & contraint par Suitrigellon, de luy quitter la Podolie. Et qu'à ceste cause il eust nõ seulement à n'obeir point à ce qu'il luy mandoit, mais encores qu'il se saisit de Zaclique, & de Baba. Et pour ce qu'il n'y auoit ordre de luy faire tenir les lettres par messager expres, pource que Suitrigellon auoit l'œil, & fouilloit par tout, ils trouuerent moyé de les enclorre & enueloper dans de la cire, en façon d'vn cierge qu'ils donnerent au garçon de Zaclique mesmes, pour le presenter au Gouverneur Bucace, tout incontinent qu'ils seroyent arriuez à Camenez, &

luy dire de bouche, que s'il se vouloit garder de faillir, il regardast avec le Magistrat de la ville de s'esclairer de ce flambeau dont la lumiere les guideroit en ce qu'ils auroyent à faire. Bucace soudain comprit bien que cela ne luy estoit point mandé sans propos: Parquoy il rompit le cierge, & trouua les lettres dedans, suyuant lesquelles il feit incontinant serrer Zaclique & Baba.

Ce pendant que les choses passoyent de la sorte que dit est en Lithuanie, les Polaques cogneurent finalement par le rapport du Marechal Jean Olesuic (qui auoit eu charge de porter au tresor quelque quantité d'argët, & autres choses dont Suitrigellon auoit fait present au Roy depuis leur recõciliation) en quel estat estoient les affaires. Parquoy sans plus differer delibererent de l'aller deliurer, & combien que la peste fust fort grande par tous les endroits de la Poloigne, ils ne laisserent toutesfois pour cela de s'assembler en grande compagnie à Varthe le sixiesme iour de Decembre. Oü ayant esté les choses bien debatues, fut arresté qu'on iroit en Lithuanie, & qu'à ceste fin tous se trouueroyent en armes au bourg de Kiane, qui est sur la riuere de Veper, à la Mi Januier ensuyuant, neantmoins que premierement on feroit sonder ce que Suitrigellon voudroit dire. A quoy furent commis Sbignee, & Jean, l'un Euesque de Cracouie, & l'autre de Vvladislaue, avec les Palatins de Posnanie & Breste, Sendiuoio & Jean Lichinien, desquels Suitrigellon ayant entendu ce qui auoit esté deliberé en l'assemblee de Varthe, soudain remit le

Roy en liberté, & feit sa paix avec luy, ce qui fut cause que les Ambassadeurs s'en retournerent. Il ne faut pas oublier aussi qu'en ceste assemblee la charge de nourrir & instruire les enfans du Roy, fut donnee à Maistre Vincent Coth d'Embenie, custode de Gnesne, & de Pierre Riterfschi, Cheualier fort notable & renommé, leurs precepteur & gouuerneur.

Au commencement de l'annee suyuant, le Roy estant retourné de Lithuanie, feit assembler la iournee à Sendomirie, où il eut nouvelles que Suitrigellon s'estoit emparé de quelques chasteaux en Podolie, & auoit assiegé Smotrice: couru au demourant & pillé la contree de Trebouulie, & celle de Leopoli. Au moyen dequoy les Polaques demandoient la guerre contre luy à toute force. Mais le Roy voulut qu'on l'enuoyast premierement semondre de rendre les choses qu'il auoit vsurpees. Dont Stanislaus, Euesque de Posnanie, Jean Euesque de Chelme, Sendiuoio, Palatin de Posnanie, & Ieã Lichinien de Breste, eurent la charge. Et leur furent dõnez les articles suyuañs: Qu'en premier lieu il rendroit les chasteaux & forteresses qu'il auoit pris en Podolie, se departiroit de Luschi & Volinie, viendroit à certain iour deuers le Roy, & prendroit de luy aux conditions qui luy seroyent imposees la principauté de Lithuanie, laquelle il auoit iniustement occupee. Mais à tout cela Suitrigellon respõdit fort arrogammët, qu'il n'en feroit rien. Car il n'auoit fait chose qui ne fust bonne, au contraire redemandoit tout le reste de la Podolie. Et sur ces entrefaictes arriua deuers le Roy,

Coribut, frere de feu Vitolde, avec les autres chefs des Bohemes heretiques, lesquels depuis la mort de l'aveugle Zisca, s'estoyent faictz nommer les Orphelins. Ceux cy ayant faict de grans maux & dommages dans le pays de Lusace, s'estoyét iettez sur celuy de Silesie, qu'ils auoyent pillé & ruiné estrangemēt, vsant de toutes sortes d'insolences & desordres enuers les Eglises & Monasteres, & les prestres & Religieux: Plus que les plus cruels & inhumains barbares n'eussent sceu faire, suyans en cela l'exemple de leur feu capitaine & cōducteur. Lequel ne se contentant pas des malheuretez qu'il auoit faictes durant sa vie, commanda à l'article de la mort, qu'apres qu'il seroit decedé on l'escorchast, & de sa peau on feist vn tabourin, au son duquel leurs ennemis seroyent si espouuantez, qu'ils n'auoyent le cœur de les attēdre, ny leur resister. Avec telle sorte de gens s'estoit doncques associé Coribut, ausquels furent mis en teste les Docteurs & autres gēs de bien & de sçauoir de l'Vniuersité de Cracouie, pour disputer des articles de la Foy, & tascher de les destourner de leurs heresies & erreurs. Le Roy mesme leur remonstra gracieusemēt les troubles, les maux, & inconueniēs, qui estoyent procedez de ce chāgement de religion, dont le iadis si fleurissant Royaume de Boheme s'en alloit tout à val de route, & à sa derniere perdition & ruine. Qu'ils auoyent du tout subuertiy l'ordre & police, tāt sacree que prophane, aboly les magistrats, lasché la bride au peuple à defobeyffance & rebelliō, pillé & ruiné les Eglises, mis souz le pied les sainctes

ceri-

cerimonies, contaminé & pollu la religion, & icelle deschiree en tant de pieces & morceaux par les fantastiques & erronees opinions qu'ils auoyent controuuees & mises sus. Ces choses icy, & autres plusieurs belles & sainctes remonstrances seruans à ce propos, furēt exposees par le Roy, aux oreilles sourdes des endurecis & obstinez Bohemiens. Car il n'est pas fort aisé de redresser au bō chemin, ceux qui vne fois s'en sont desuoyez, pour se precipiter & rompre le col. Au moyen dequoy ce pendant qu'ils seiournerent à Cracouie, le seruice diuin par l'ordonnance de l'Euesque Sbignee, fut tousiours discontinué & suspendu par toutes les Eglises. Ce qui fut cause, que pour autant que la solennité de Pasques approchoit, le Roy les enuoya à Casimirie avec Coribut, dont ils gronderent bien. Il aduint aussi que lors le Monastere de Cestochouie, qui auoit le bruit d'estre rempli de grandes richesses, pour raison des vœuz & offrandes, qui tous les iours y estoyent apportees de tous les endroits de la Poloigne, & pays circonuoi- sins, dont on y alloit en pelerinage pour l'honneur de la vierge Marie, qui estoit là fort reuerée: Ce Monastere doncques fut pillé par les Polagues mesmes, qui auoyent esté à l'escolle des Bohemiens, & apris d'eux à brigander. Et afin de reietter le soupçon de ce sacrilege sur iceux Bohemiens, donnerent quelques coups à trauers le visage de la saincte image. Mais ils ne trouuerent pas le butin si grād qu'ils pensoyent, & si ne laisserent pas pour cela d'estre executez auant que l'an fust reuolu.

S

Le Roy ayant licencié les Bohemes, avec leur Colonel Coribut, se meit à faire la guerre contre Suitrigellon, lequel il n'y auoit eu ordre de ramener à raison. Car mesmes contre le droit de toutes gens il auoit vilainement outragé l'Ambassadeur, Jean Brezien, mais pour le cōmencement il n'y eut que quelques escarmouches, & legers combats (comme pour s'entretaster les vns les autres) où les Polaques sans faire aucune perte, à tout le moins que bien petite, auoyent tousiours eu du meilleur, parquoy Suitrigellon se voyant ne pouuoir estre esgal aux forces du Roy son frere, fut contraint de se retirer, voire de prendre la fuite, avec toute son armee, qui le suyuit. Toutesfois il y en eut la plus grand' part de pris ou de morts, & ce pendant il prit la forteresse de Rathum, laquelle les Russiens qui l'auoyent en garde luy rēdirent, & la brusla. Puis se meit à courir le pays de Chelme. Mais le Gouverneur, ou Burggraue, nommé Ciolcus, n'ayant en tout que cēt trente hommes avec luy, en eut bien tost la raison. Car estāt sorty fort courageusement sur luy, en tua plus de trois cens, & en prit trente prisonniers. De l'autre costé les Vvalaques, vassaux des Roys de Poloigne, en faueur neantmoins de Suitrigellon, se ietterent sur la Russie, voy sine & prochaine d'eux, lesquels ainsi qu'ils s'en retournoyent chargez de proye, & de butin qu'ils auoyent fait au territoire de Suatin, Halisse, & Camenez: les Russiens qui estoient en l'armee du Roy, allerent incontinent apres souz la conduite des deux Buczaciens freres, & les ayans trouuez en-

cores sur le chemin, en tuerent vu grand nombre, & desualiserent le reste. Cela fait, le Roy s'achemina à Leopoli, où vn grand nombre de pauures Gentilshommes du pays de Cujauie, & de Dobrine, luy vindrent demander secours, contre les Commandeurs de Prusse, qui les auoyent ruinez. Le Roy les receut fort humainement, & leur vfa d'vne bien grande liberalité. Mais d'autant que ses dons immenses luy auoyent entierement vuidé ses coffres, & mis à see luy & le thresor du Royaume, il fut cōtraint de leur departir quelques biens de l'Eglise, pour iouyr seulement de l'vsufriict d'iceux durant l'hyuer. Ce que les Prelats trouuerent estre vne ouuerture fort dangereuse, & de trop grande consequence pour l'aduenir. Parquoy ils se meirent tout incontinent à en faire instance. L'Archeuesque de Gnesne vn peu plus mollement, mais Sbignee qui estoit plus aigre & vehement vint à luy reprocher ses fautes passees, & reprendre fort asprement ces façons icy de dōner ainsi iniustemēt les biens d'autruy, avec menaces que s'il ne s'en corrigeoit, il procederoit à l'encontre de luy par censures Ecclesiastiques. Et comme le Roy s'excusast tout doucement, sur la necessité qui le cōtraignoit d'auoir pitié de ces pauures gens ruinez & destruits, l'autre sur le chāp repliqua, qu'il ne luy seroit point de besoin d'auoir maintenant ceste cōpassion, s'il n'eust esté luy mesmes la cause de ce mal & calamité, à vne si grāde multitude de peuple. Car il ne se pouuoit excuser d'auoir tiré ceste guerre en lōgueur, laquelle il pouuoit abreger, si l'affectiō mal à propos

d'un meschant & seditieux frere ne l'en eust destourné. En telle façon Sbignee parla au Roy non rât pour soy, que pour les autres Ecclesiastiques, car rien n'auoit esté alliené en tout son Diocèse.

Vladislaus doncques se trouuant en grand peine des affaires dont il estoit de tous costez enuélé, fit assembler la iournee à Siradie au 23. iour d'Auril, où son fils aîné (du mesme nom) lequel il auoit desia designé pour successeur, fut cōfirmé & approuué par les voix & consentement de toute la compagnie. Et à son retour en la petite Poloigne, les deputez des Bohemiens heretiques le vindrent trouuer pour luy offrir ayde & secours contre les Cheualiers de Prusse, & traiter de la reconciliation de Coribut avec luy. chose qui luy fut ensemble à tous ceux du conseil infiniment agreable, d'autant qu'ils se prepa-royent desia à la guerre cōtre les Prussiens. Au moyé dequoy ces Ambassadeurs furēt les fort bien venus, & leur fait on de grandes caresses & bōnes cheres, & par le consentement de l'Archeuesque & Euesque là presens, furēt receus & admis à ouyr le seruice diuin avec les Catholiques. Mais à leur retour estās passez par Cracouie, outre ce que le Roy leur auoit limité, on le fait cesser par le commandement de l'Euesque, qui estoit absent pour lors. Ce qu'ils receurent à vne fort grāde iniure & outrage. Le Roymesmes eut despit, comme aussi eurent tous les Prelats, qu'un seul Sbignee voulust ainsi faire le suffisant, & s'opposer ordinairement à tout ce qui auoit esté determiné par le conseil, surquoy il vint à estre encores plus ir-

rité par Iean Mezie d'Ambrouic, Palatin de Russie, & Pierre Coriboc, qui auoyent eu la charge de conduire les Bohemiens, pour tousiours les honorer d'auantage: Ceux cy animerent le Roy contre Sbignee, de façon que l'estant venu trouuer à Viflicie, il ne luy daigna rendre la main, comme il auoit accoustumé, ce qui est vne marque & tesmoignage de faueur à ceux qui abordent le Prince, & luy tint quant & quant quelques fascheuses paroles, iusques à le menasser qu'il se donnast garde que l'Euesché ne luy fust ostee. Mais l'autre sans s'estonner de rien, luy respondit soudain: Qu'il pensoit auoir bien plustost meritē sa bonne grace que son courroux & indignation: Pource qu'il prenoit ainsi seul tout le soin de son salar, & qu'il se parforçoit en toutes manieres à luy possibles, de prouuoir qu'il ne fust point calumnié & tenu pour vn protecteur d'heretiques. Au moyen dequoy toutes & quantes fois qu'il seroit question de l'honneur de Dieu, il ne se soucieroit de sa mine, de son mauuais visage, ny de ses menasses, ne d'autre que ce fust, qu'il ne feist tousiours ce qui seroit iuste & raisonnable. Et quāt à l'Archeuesque & autres Prelats, il ne se donnoit pas beaucoup de peine de leur autorité en cest endroit: car il auoit pour approbateurs de ce qu'il faisoit, ceux qui entēdoient le droit diuin & humain. Au reste qu'il n'auoit pas grand paour de perdre son Euesché, estant tout prest & appareille d'endurer, non seulement vn exil & bannissement perpetuel, mais la mort encores, s'il en estoit besoin, pour la deffense de la foy. Et comme le

Roy repliquast qu'il y auoit des gens doctes en Theologie, & aux loix, aussi bien que luy, lesquels n'estoyent pas de son aduis. Les plus renommez en sçauoir de tout l'Vniuersité de Cracouie furent appelez là dessus, & avec eux Iean Saffraneci, Euesque de Vvladislauie, le Theologien Ieã Euesque de Culme, & Vvladislaus Oporonie, Vicechancelier, fort versé en droit canon, qui fut depuis Euesque de Vvladislauie, lesquels furent bien aysément refutez. Toutesfois le courroux du Roy ne se remeit pas pour cela enuers Sbignee: Et comme il eust esté admonesté par Iean Tarnouic, Palatin de Cracouie, de se tenir sur ses gardes, pource que le Roy auoit attiré quelques vns pour le ruer, il remercia de ceste faueur & bonne volonté le Palatin: mais ne changea rien pourtât de sa façon accoustumee. Car toute ceste nuict, qui deuoit estre la plus dangereuse, il coucha en la mesme chambre, & au mesme lict, sans aucune garde. Et auant qu'il fut iour, s'en alla avec vn sien Chappellain, & vn page qui leur esclairoit, ouyr matines à l'Eglise, & toutesfois ne receut aucune fafcherie ny ennuy, qui plus est, chassa encores vn prestre heretique qui estoit venu vers le Roy. Tant fut ce personnage de grand cœur & integrité, tresdigne de louange & memoire perpetuelle.

En ce mesme lieu arriua deuers le Roy vne fort belle & magnifique Ambassade de Ieã Roy de Chippre, de Ierusalem, & d'Armenie, dont estoit le chef Baudouyn de Noris, Mareschal du Royaume, qui apportoit de grãds presens à Vvladislaus, & à sa fem-

me, demandant sa fille Heduigis en mariage, pour le fils de son Roy, & deux cés mille escus à emprunter: Pour seureté desquels il auoit charge de luy engager les deux parts du Royaume de Chippre. Mais il ne se fit riẽ de tout cela, pource que Heduigis estoit morte, & pour le regard des deniers, il s'excusa sur les affaires qu'il auoit euz, qui luy auoyent vuidé entiere-ment ses coffres. Quelque tẽps apres Sigismund, frere de Vitolde, Duc de Starodub, ayãt osté la Lithuanie à Suitrigellon, du cõsentement du Roy, s'en empara, & enuoya deuers luy pour en auoir la confirmation. Sur quoy furent depeschez sept des principaux du conseil, pour en proposer les cõditions à Sigismund, à sçauoir, qu'il iureroit de demeurer tousiours loyaumẽt souz l'obeyssance du Roy & des Polagues, qu'il seroit amy d'amis, ennemy d'ennemis, qu'il rẽdroit Dolesco, Grodlun, Rathun, & Lopatin, avec tout le reste de Podolie: ne lairroit autre successeur au grand Duché de Lithuanie que le Roy & ses enfans, & q̃ le pais de Volinie qu'on luy laissoit pour en iouir, tout ainsi qu'auoit faict Vitolde, retourneroit apres sa mort à la couronne. Tous lesquels articles furent promis & iurez par Sigismund & son fils Michel, avec le Senat & la noblesse, & en furent lettres passees. Cela faict l'Euesque Sbignee, qui estoit chef de la legation, prit l'espee (marque & enseigne de la seigneurie) & en la presence de tous, au nom du Roy la meit au poing de Sigismund, lequel tout incontinant apres s'achemina contre Suitrigellon, qui auoit de nouueau mis sus vne grosse armee de Rufsiens, Liuoniens & Tartares, & le defit en la contree

des Osmiens, où il en demeura dix mille sur la place, & quatre mille qui furent pris prisonniers. En memoire dequoy, & pour rendre graces à Dieu d'un si heureux combat, Sigismund fonda là vne fort belle Eglise, avec vn College de Chanoines. Ceste victoire fut preuenüe d'une autre grande defaite contre les Rutheniens. Car Theodoret, ou Fetco Ostorog, Duc de Russie, qui tenoit le party de Suitrigellon, vaillant, hardy, & bon capitaine, ayant mis ensemble vne armee plus grande beaucoup que celle des Polaqnes, n'osoit toutesfois venir aux mains avec eux, ce pèdant qu'ils demurerent en Podolie à remparer les places, mais espiant l'occasion à propos de faire quelque chose de bon, les vint assaillir à leur retour, ainsi qu'en vn certain destroit ils passoyent la riuere de Moraqua, qui est par tout ailleurs fort espandüe & marescageuse: Et donna dessus à grands cris & sons confus de trompettes & tabourins, de façon que ce fut grand merueille, qu'estans ainsi en desordre ils ne furent entierement rompus & defaicts. Mais il semble qu'ils furent lors miraculeusement conseruez, car nonobstant tout cela ils eurent la victoire, combien que ce fust en pleine minuit, la Lune entreluisant quelque peu, où il y eut vn grand meurtre, & occision des ennemis, & douze enseignes prises. Or est le lieu où cela aduint distât de 40. grosses lieuës de la ville de Leopoli, où le Roy estoit lors, & neantmoins il en eut les nouvelles le mesme iour, qui fut le dernier de Nouembre, par vn bruit commun qui se leua soudain (sans que iamais on peust descouurir qui en auoit esté l'auteur) ainsi qu'il estoit

estoit en l'Eglise en ses prieres & deuotions accoustumees pour le salut & conseruation de son armee, cognoissant assez le dangier où elle pouuoit estre pour tant de puissans & cauteleux ennemis qui la guettoient incessamment. Mais le iour ensuyuant qu'on en eut eu la certitude & assurance, il fit rendre graces à Dieu de tous costez. Puis s'en retourna à Cracouie où il entra à grand triomphe, à pied toutesfois. Et ainsi alla visiter toutes les Eglises auât que s'aller raffreschir au Chasteau.

A la saint Iean Baptiste ensuyuant, il fit assembler les estatz, où fut arresté (nonobstant les empeschemens & contradictions, qu'y missent les Euesques,) qu'on l'ayderoit du secours des Bohemiens contre ceux de Prusse: mais que le Roy demurerait cependant en Poloigne. Parquoy la charge de l'armee fut donnée à Nicolas Michalouic Rosean, Chastellain & gouuerneur de Cracouie, auquel entre les autres principaux points de ses memoires & instructions, le Roy ordonna tres expressement qu'il aduisast bien de se retenir à la campagne, pour courir & gaster le plat pays, sans s'amuser à assieger ville ny chasteau qui peust resister. Dequoy il ne se souuint pas fort longuement, ou pour le moins n'en tint cõpte. Car à la persuasion d'Ostorog, il fut bien tost induict à mettre le siege deuant Choinicie, place tres forte, & pourueüe de gens de guerre, de viures, & toutes autres munitions qui faisoient besoing. Aussi apres auoir essayé quelques mines & assaux, voyant que tout cela ne profittoit de rien: Finalement, mais trop

tard, ramena en memoire l'aduis & commandemēt du Roy, & au bout de deux moys qu'il auoit inutilement consumez là deuant, fut contrainct de leuer le siege, & mener l'armee es dedans de la Pomeranie pour piller le pays. Toutesfois on donna ordre que les femmes d'honneur, & les filles, n'eurent mal ny desplaisir, & que pas vne seule ne fust destornée. Et furent commis & ordonnez des gardes à ceste fin: Puis les ayant passees outre la riuere de Vistule les renuoyerent toutes saines & sauues, sans auoir receu aucun tort ny violence. Ce qui leur fut fort honorable enuers les ennemis propres, qui commancerent à leur souhaitter tout bon heur & prosperité, & à maudire & detester leurs gens qui n'auoyēt pas fait ainsi en pillant la Poloigne. La Pomeranie doncques ayant esté saccagee de toutes parts iusques aux riuages de la mer: Ce fut vne chose bien estrange que les Cheualiers de Prusse vindrent à demander la paix si instamment, veu qu'il ne leur restoit plus sinon quatorze villages entre les lacs & maretz, que les Polaques n'eussent acheué de ruiner tout. Parquoy les trefues faictes & arrestees entre eux, Michalouic licentia l'armee, & les plus apparens des Bohemes, allerēt trouuer le Roy a Pisdres, lequel leur fit vn grand recueil, & leur donna force presens & recompenses. Et si ne furent point pour celle foys les Polaques infectez de leurs erreurs, au contraire commancerent d'auoir en plus grande horreur & abomination leurs iniquitez & blasphemés.

Le Roy ayant renuoyé les Bohemes, se retira en

la contree de Sendomir pour cause de la peste, qui festoit mise en la grand Poloigne, où estant mort Iean Saffraneci Euesque de Vvladislauie, Vvladislus Opouoraniski Vicechancelier du Royaume luy succeda. Et sur ces entrefaictes, le Roy estant à Prisoie vint deuers luy vn certain Bohemien Prestre heretique, pour l'aduertir de la part d'un Astrologue Chretien, qu'il se donnast garde, & auisast à ses affaires, car il estoit pres de sa fin. Et comme le Roy l'eust ouy à part, l'Euesque Sbignee craignant que cest heretique ne luy mist en teste quelque sinistre & mauuais opinion de la foy, le tança & reprit fort aigrement de ce qu'il auoit ainsi donné audience à vn homme desuoyé, & hors de l'Eglise, sans y appeller personne. Dequoy le Roy le satisfit & cōtenta pour l'heure, toutesfois il fut contrainct de renuoyer l'autre. Et tout incontinant apres apparut vne Comete toutes les nuicts par l'espace de plus d'un moys, qui estoit le signal & prediction de la mort du Roy, ainsi qu'on disoit lors, & que l'euuenement le monstra depuis.

Desia Vvladislus estoit arriué à Nepolomicie, où il auoit fait cōuoquer l'assemblee au iour saint Martin d'hyuer, quant Helias, filz du deffunct Palatin de Vvalachie Alexandre, le vint trouuer demandant secours contre son frere puisné Estienne, qui l'auoit mis hors de la Seigneurie, & offroit de demeurer tousiours fidellement souz la protection & obeissance des Polaques. Mais l'Ambassade de son frere arriua quasi aussi tost, qui suyuit le Roy ius-

ques à Lencisie, requerant d'estre plustost favorisé que son frere, qui estoit vniuersellemēt hay de tous, & que de sa part il rendroit aussi la mesme obeysance & deuoir. Or combien qu'Helias eust espousé la propre sœur de la Royne Sophie, neantmoins la chose ayant esté mise au Conseil, fut arresté que la Vvalachie demeureroit à Estienne, puis qu'il estoit plus agreable au peuple, souz condition qu'il en feroit les foy & hommage. Et en outre tiendroit à tousiours du Roy, luy & les siens la cōtree de Sepinie, avec les forteresses de Chocin, Cecū, & Chmelouic. Et pour le retenir mieux en bride, & le rēdre plus craintif, furent assignees à Helias de grāds terres & seigneuries en Poloigne. Au moyen dequoy Estienne selon ce qui auoit esté ordonné presta à Socauie és mains des deputez, le serment accoustumé: & afin de recognoistre la grace que le Roy luy auoit faicte, s'oppola aux Tartares qui festoyent iettez sur les prouinces de Poloigne, lesquels il rembarra dās leurs limites: Prit Vvratisslaue, où Suitrigellon auoit mis garnison, & la rendit au Roy.

L'an 1434. durant le Quaresme, le Roy tint vne assemblee en la ville de Corcin la neufue, où furēt deputez ceux qui deuoient aller au Concile de Basle, pou rabattre les calumnies & detractions de l'Empereur Sigismund, & de ceux de Prusse. Les principaux desquels furēt Sbignee & Stanislaus, l'vn Euesque de Cracouie, & l'autre de Posnanie, avec Jean Conespoli, Chancelier du Royaume: Et Nicolas Lascoci Doyen de Cracouie. Mais Sbignee ne vou-

lutlaisser perdre l'occasion qui se presentoit de donner vne bonne reprimende au Roy, auant que partir. Car il craignoit de ne le trouuer plus en vie à son retour, pour estre desia si aagé, & quant & quant fort extenué & affoibli. Par ainsi en plaine assemblee commença par vn long & graue discours à extoller les vertus & perfections qui estoient en ce Prince, puis tout soudain à donner sur les fautes & les vices qui estoient meslez parmy, dont tant de bonnes parties estoient obscurcies & estouffees. Et en premier lieu que par son ordonnance ou bien de son consentement on auoit à grand tort osté les biens de plusieurs personnes, ou pour le moins par vn trop grande rigueur de droict, & d'vne trop seuerer & estroicte interpretation d'iceluy. En apres que les plainctes & doleances des pauures gens n'estoyent point ouyes: & ne pouuoient auoir aucune expedition de leurs affaires. Qu'il auoit donné à des femmes la charge de faire battre la monnoye laquelle estoit avec ce foible & de mauuais aloy, au grand interest de tout le peuple. Et auoit retenu quelques superstitions de ses anciēnes idolatries. Dont il auroit faict son deuoir de le reprendre par plusieurs fois, premierement à part & hors de tesmoings, en apres deuant quelques vns. Et finalement voyant que tout cela n'auoit de riens proffitē, auoit esté contrainct de faire le mesme en la presence de toute l'assemblee, afin que la honte des hommes le peust amender, puis que la crainte de Dieu ne le pouuoit faire contempir en son deuoir & office. Qu'il luy estoit

aussi aisé comme aux autres de le flatter & gagner sa bonne grace, dissimulant & baissant les yeux à ce qu'il faisoit. Mais qu'il se souuenoit fort bien de la charge qu'il auoit, & pourtant que ny par crainte ny par faueur n'abandonneroit iamais le deuoir de la dignité de Conseiller & d'Euesque, où il auoit pleu à Dieu & au Roy mesmes le constituer. Auoir beaucoup plus en recommandation le bien du Royaume que tout ce que le vulgaire pourroit esperer & desirer. Et que pour recognoissance de tant de graces & biensfaicts qu'il auoit receuz de sa Maiesté, il estoit tenu d'auoir plus d'esgard à son salut, qu'à vne bien-veillance presente, laquelle il pouuoit bien acquerir par flaterie & adulation, mais aussi n'a elle pas accoustumé d'estre de l'ogue duree. Là dessus le Roy ne se peut plus contenir qu'en grand colere & despit la larme à l'œil, il ne luy entreroüst son propos, luy disant qu'il faisoit trop arrogamment de ce que tous les autres, & mesmes l'Archeuesque son primat, & superieur ne disoiēt mot, & luy seul estoit tousiours à le reprendre & ranser. Mais tout soudain le Senat se leuant en pieds, respondit que c'estoit leur mesme aduis, & que le langage de l'Euesque estoit le leur propre. Dequoy le Roy plus irrité que deuant, s'en alla en grand courroux menassant fort asprement l'Euesque. Toutesfois s'estant depuis recogneu, & retourné à soy mesmes, l'honora encores d'auantage: Et s'estudia de se chastier des choses dont il l'auoit repris. L'archeuesque aussi luy fit de grand remerciemens, de ce qu'ainsi librement, & d'une telle asseu-

rance (tresdigne à la verité d'un successeur de saint Stanislaus) il auoit osé entreprendre de corriger les fautes & erreurs du Prince.

Mais quand il se sentit pres de sa fin, il se voulut preparer à la mort, comme bon Chrestien qu'il estoit & receuoit les saints sacremens. Puis pardonna à tous, requit en semblable qu'il luy fust pardonné, fit son testament par lequel il ordonna que tout ce dōt il sentoit sa conscience chargée, fust restitué à ceux auxquels il appartenoit, enuoya à l'Euesque Sbignee l'anneau que la Royne Hedwigis (sa premiere femme) luy auoit donné le iour de leurs nopces, qui estoit la plus chere chose qu'il eust iamais eue en toute sa vie, & luy demanda pardon des choses passées, luy recommandant son ame, & les enfans qu'il laissoit. Finalement le dernier iour de May, passa de ceste vie à vne plus heureuse, apres auoir regné quarante huit ans, & trois mois. Il fut tousiours si liberal que non seulement espuisa, & mit à sec plusieurs fois le thresor: Mais encores donnoit le plus souuent à vn homme seul vn heritage de grande valeur. Tellemēt que le Pape Martin cinquiesme, voulant refrener ceste trop grande prodigalité, auoit quelque fois donné charge à l'Archeuesque de Leopoli de casser, & rescinder ses donations. Il fonda les Eglises de Chelme & Chiouie, & les reduiēt en Dioceses & Eueschez, & fut large magnifique & tres humain enuers les estrangers. N'ayant iamais eu à desdain le moindre present qu'on luy fist, ny renuoyé sans recompense ceux qui luy donoyent, si on luy deman-

doit quelque chose, on se pouuoit asseurer à tout le moins de la moitié. Ne se vengea ny ressentit iamais d'offence qu'on luy eust faicte, fort pesant & tardif à faire punir ceux là mesme qui l'auoyent merité. Deuot sur toutes choses, & adonné au seruice diuin. Les iours de ieusne, il se passoit ordinairement de pain & d'eau, aussi n'vsa il iamais en toute sa vie d'autre breu uage, mais au reste il estoit assez grand mangeur. N'estant aucunement curieux de se baigner & estuuer, ny delicat en ses habillemens, car il n'vsoit gueres que de draps de laine & de fourreures d'aigneaux crespes, & abhorroit les pōmes si fort qu'il n'en pouuoit seulement cōporter l'odeur. Son corps fut porté fort solennellement à Cracouie, où au bout du mois les obseques furent faictes à grand pompe, & cerimonie. Car tous les grands Seigneurs, & la plus part de toute la noblesse, sy trouuerent. Et voit on encores sa sepulture quasi au milieu de l'Eglise, à la main droicte, laquelle son petit filz le Roy Sigismund (il n'y a pas long temps) fit fort magnifiquement raccoustrer. Voyla ce que nous auons peu entendre des faicts de Iaghellon. Maintenant il

est paruenu à ce que son

est paruenu à ce que son

Handwritten text, likely bleed-through from the reverse side of the page. The text is mirrored and mostly illegible due to fading and ink bleed-through.

Small handwritten text or signature, possibly a date or name, located in the center of the page.

Another line of handwritten text, possibly a signature or a short note, located in the lower middle section of the page.



Hist. Polon.

a. gener.

